

國家文物局

清代傳記叢書



明文書局印行

清代傳記叢刊·學林類  
周駿富輯 ②

國朝詩人徵略初編  
(二)

六十卷

(清)張維屏輯



明文書局印行



國朝詩人徵略卷三十

番禺張維屏子樹輯

沈德潛

字確士號歸愚江南長洲人乾隆四年進士官至  
禮部侍郎加尙書銜贈太子太師諡文愨有竹嘯  
軒詩鈔歸愚詩鈔

康熙三十三年甲戌年二十二學院試取爲長洲  
博士弟子員雍正十二年甲寅年六十二時

詔舉博學鴻辭督撫學三院考試取六人予第三十三年  
乙卯年六十三四月入都八月應北闈試不遇乾

國朝詩人傳卷三十一  
隆元年壬辰年六十四八月應北闈試不遇九月  
御試保和殿予失寫題中字不合格不遇歸三年戊午年  
六十六八月省試九月榜發中第二名四年己未  
年六十七二月應春官試中六十五名

殿試二甲

欽點庶吉士十一月乞假歸里七年壬戌年七十四月散  
館德潛名第四畱館六月輪班引見

上諭張中堂云沈德潛係老名士有詩名命和消夏十詠  
八年癸亥年七十一三月

御試翰詹諸臣德潛二等第五九月晉侍講學士九年甲

子年七十二六月

欽點湖北正主考十一年丙寅年七十四七月夜夢俞淑  
人醒而成詩有三年我未看瓜苦四紀君惟饜齋  
甘抱病但聞辭藥石益棺始得易衣簪句進

呈新詩此詩未刪

上見之

御門日

上謂汝既悼亡何不歸家料理感

上恩諭卽進摺假歸

陛辭日

國朝詩人卷三十一  
賜五言八韻起二語云我愛德潛德淳風挹古初錢司寇

香樹贈詩云

帝愛德潛德我羨歸愚歸尤藝林傳誦也十一月到家十  
二年丁卯年七十五四月啓行入都六月

陛見

皇上云汝滿假卽來可云急公今命汝入上書房輔導諸  
皇子授汝禮部侍郎

皇上憫德潛年老

諭云汝天明始來午時二刻卽出以身教不專以言教也

十三年戊辰年七十六三月

欽點會試總裁六月

上成悼

孝賢皇后詩

命南書房諸臣與德潛同和中有兒字亡字二韻難於措  
辭子賡和云普天俱灑淚老耄似童兒海外三山  
杳宮中一鑑亡

命卽寫卷後傳觀衆臣示妥適也十四年己巳年七十七  
患噎未愈

上命大司馬梁詩正傳旨沈德潛不必到上書房許其歸  
里享林泉之樂朕與之以詩始亦以詩終令其校閱詩



稿校畢起行梁公捧

御製十二本到德潛處奉

旨後逐日恭閱閱過四本先繳進

上召見云汝所改幾處俱依汝唯大鐘歌中云道衍儼被  
榮將命汝改榮國因道衍封榮國公也榮將本黃帝時  
鑄鐘人汝偶然誤會然古書讀不盡有我知汝不知者  
亦有汝知我不知者餘八本盡心校勘不必依回旋出  
賜臣五言長律一首起云清時舊寒士吳下老詩翁結云  
近稿經商榷相知見始終

皇上冲然若谷之懷古帝王所未有也恭閱畢繳進

上後召見云我一見汝便知好人汝回去與鄉鄰講說孝弟忠信便是汝之報國又云賜汝扁額原是詩壇耆宿既而改耆碩見年老之人堅固自守同於碩果不食以後更發榮滋長也明日恭進四詩

陞辭良久內侍捧出扁額一

御書一緞綾各四疋人獲二斤治噎丸十六最後又傳出御製用陞辭韻四律首章落句云高尚特教還故國清標終惜去朝班次章落句云爾自一舟歸浩蕩望窮潞水暮川虛三章中云笑予結習多難遣嘉汝臨文不忘箴四章中云儘有煙霞爲供養正賒歲月入謳歌

君恩優渥幾於終分在旁觀亦皆歔歛感歎也六月歸里

十六年辛未年七十九二月接

駕于清江

召見於武帳中次日

賜七言詩一首中云玉皇案吏今煙客天子門生更故人

別後詩裁經細檢當前民瘼聽頻陳第四語緣昨陳奏

民間疾苦也十月啟行往祝

聖母六旬萬壽十一月到京隨羣臣朝賀十二月廿五日

上召入內廷

命觀歸愚詩序文中稱歸愚叟并云他日見訪山居即以

爲愚公谷也等語從古無君序臣詩者傳之史冊  
後人猶歎羨矣二十二年丁丑年八十五二月迎  
駕召見於武帳中

賜詩一幅有星垣帝友豈無友吳下詩人尙有尺句有  
旨加禮部尙書職銜以示眷念老臣之意二十七年壬午  
年九十二月同錢尙書陳羣舟行迎

駕常州白家橋

召見

御舟

賜坐體卹備至翼日

國朝詩人卷之三十一  
賜九表詩仙扁額又詩二律其一與錢尙書同  
賜者起云二老江浙之大老新從九老會中回

天恩優渥不敢當也隨

鑾至浙是役也共和

御製一十八章

恩禮稠疊不可枚舉

沈文愨公  
自訂年譜

先生少從學于吳江葉星期葉居橫山故阮亭尙  
書云橫山門下尙有詩人然先生獨綜今古無藉  
而成本源漢魏效法盛唐先宗老杜次及昌黎義  
山東坡遺山下至青邱崆峒大復臥子阮亭皆能

兼綜條貫嘗自進其全集

御製敘言以高王爲比誠定論也所選別裁諸集滙千古

之風騷聚一時之壇坫年至九十八而終蓋得于

天者厚矣

湖海詩傳

集中好句隨舉數則何一不天然神妙

詞科掌錄

門下士王光祿鳴盛司寇昶錢宮詹大昕曹侍講

仁虎趙少卿文哲吳舍人泰來黃明府文蓮俱以

文章氣節重天下文愨彙刻吳中七子詩

羣雅集

文愨詩綜貫今古專尙盛唐

國朝詩萃

沈文愨公論詩及所選別裁諸集自好高愛奇者

觀之或有嫌其近平熟者抑知好高愛奇或出於獨嗜而失之偏或暫足驚人而不能久平心而論

究不若文慤所見為出於中正和平使學者有軌

轍可循而流弊尚少也聽松廬詩話

文慤詩中歲以前多精心結撰之作晚年情性所

至稱心而言然亦範我馳驅不以名位既高肆為

野戰即詩以觀亦足徵神明之強固也同上

標題 制府來長短句 田家雜興古五 古鼎古五

詠史古五 百一詩古五 過牖古五 石公山

古五 度石碓嶺古五 石梁觀瀑古五 濟南

雙忠祠

古七

蔡將軍歌

古七

地震行

古七

南徐寓中作歌六首

古七

宋徽宗鸚鵡圖

古七

古七

錢唐江觀潮

古七

伏生授經圖

古七

黃山看雲海歌

古七

丹青引贈家南蘋

古七

摘句

古人對月時亦似今人情

峰巒陰晴雲林雜古今樹

造化理所無到者人方識辛苦苟未經奇

快何由得

迴瞻峰頭雲是我經行處

地僻多遠心情真寡浮語



臥病憎夜長望晨如望赦

所守苟不移道在終有識

湖寬雲作岼邑小市侵橋

一徑入花塢衆溪藏竹陰

名自詩人得山從霸王分

真孃墓

帆帶洞庭雨屐穿茶塢雲

雀開收禾日蜂喧割蜜時

散食遊魚喜吟詩野鳥聽

多誦緣違俗無成爲近名

長齋非奉佛達理不關書

贈內

載書關吏厭止酒僕人歡

短燭身千里中宵夢兩年

除夕

燕齊同一色天地失雙丸

交河大雪

人家臨水花爲市僧舍沿山石作梯

前期人指鳥飛外竟日舟行桑影間

地連桑竹多平遠山入雲煙忽有無

黃土牆邊春店酒綠楊村裏午時雞

巢由稷契無高下廊廟江湖有重輕

鑿險地曾開力士搜奇天許作詩家

死同孤竹分先後諫並龍逢照古今

比于墓

鑿空使者通西域傾國佳人出北方

漢武帝

九原可作惟隨武千里相思是向期

庾信離愁枯樹賦少陵幽怨杜鵑詩

四愁都忘張平子三樂能全榮啓期

方子遇客唯三拜翁卷成詩號四靈

身歷八朝同木石心空六鑿返真淳

楚人湯雲

山年一百三十九訪之問以眠食曰健飯多睡次及方藥曰生平無病不知藥也

此身剩有筋皮骨明日居然九十三

只有生離無死別果然天上勝人間

七夕

何事爾曹談墨守少陵詩法已多師

莊有恭

字容可號滋圃廣東番禺人乾隆四年

賜進士第一人官至刑部尙書協辦大學士

父奕仁由閩徙粵

廣東通志

公以翰林院修撰入直

南書房越三年公弟有信成進士選庶吉士其冬兄

弟同請告歸省海內傳爲盛事

潛研堂集

擢光祿寺卿丁資政公憂卽家拜內閣學士服闋  
入都遷兵部右侍郎提督江蘇學政轉戶部

召還供職尋充江南正考官再提學江蘇卽除江蘇巡撫

莅事六載丁太夫人艱坐在蘇日罰贖事失當逮繫法司論如律

詔特貰罪令護喪還籍後赴軍臺自効方詣謫所中途卽授湖北巡撫歲餘調浙江巡撫莅事四載復調江蘇加太子少保逾年擢刑部尙書協辦大學士仍畱辦巡撫事乙酉冬入都供職未幾坐劾段成功事逮問訟繫半載復授福建巡撫乾隆三十二年七月疾終於福州官署享年五十有五上同

錢唐江入海之處有三疊曰南大疊曰中小疊曰北大疊乙丑以後水行中疊者十餘年己卯歲改

趨北大壘公渡江周遭履勘首以購芻薪加築土  
堰添建坦水爲請又奏復海塘兵專司負薪運土  
糞石下椿設守備一員千把外委十二員分界防  
守省民夫無算又用前人竹絡之法編竹爲篋實  
以巨石鱗次櫛比以衛塘根其秋風潮大作石塘  
間有崩裂而柴塘獨無恙公之力也是時秋霖之  
後水漲久不退公親往嘉湖兩郡察勘知水歸太  
湖之道多淤而太湖下流亦多壅闕因請浚烏程  
長興境內七十二澗并遣官至江南按三江故道  
疏入尋有改撫江蘇之

命公遂親往探尋脈絡得其要領建議大修三江水利具摺入告報可於是選紳耆賦工役先疏橋港次及河身菱蘆魚蕩之圜占者除之城市民居之不可毀者別開月河以導之公再撫蘇有

旨仍兼管浙江海塘先後增築魚鱗石塘凡若干丈松江太倉沿海亦有石塘而土塘居什之八九公請如浙塘之法編竹篋實石護塘根以禦海潮公之盡心于水利海塘其大者如此

同上

其撫福建也預誠族人居晉江者勿至省卽至遣門者謝之曰我爲封疆大臣嫌疑當避且俟去此

之日再相見今則不敢也洎公之薨晉江宗人始  
來會哭咸稱公之公正爲不可及

同上

乾隆二十七年

上南巡幸嘉興之煙雨樓時公爲浙江巡撫

特詔公聯句用石鼎體成二十四韻

御製有句云老錢筆老健謂錢尙書陳羣所書也兩老字

一時頗難屬對公對句云蒙莊眎蒙翳自註臣目

本近視蒙

詢樓中陳羣所書幾茫無以對後公書此詩勒石固足見  
聖朝喜起賡歌之盛而公敏捷之才亦卽五字可見一斑



矣聽松廬詩話

殿試日公對策有云不為立仗之馬而為朝陽之鳳

此二語當時頗傳誦之松軒隨筆

摘句 經綸猶有待吐屬已非凡詠蠶

廬陵事業起彝陵曾界原從閱歷增況有

文章堪潤色不妨風骨露峻嶒送袁子才

袁枚

字子才號簡齋浙江錢塘人乾隆四年進士官江

寧知縣有小倉山房集

仁和袁枚子才廩生廣西巡撫奉天金公有國士

之目力薦于朝子才在諸徵士中最爲年少兼有

美才一時名滿日下

詞科掌錄

君年甫四十絕意仕宦盡其才以爲文辭歌詩見人善稱之不容口後進少年詩文一言之美君必能舉其詞爲人誦焉君古文四六體皆能自發其思通乎古法爲詩尤縱才力所至人所欲出不能達者悉爲達之士多効其體故隨園詩文集上自朝廷公卿下至市井負販皆知貴重之海外琉球有來求其書者君仕雖不顯而世謂百餘年來極山林之樂獲文章之名蓋未有及君也

惜抱軒文集

散館以未嫻清字改知縣分發江南初試溧水調江浦沭陽再調江寧枚常言爲守令者當嚴束家奴吏役使官民無壅隔則百弊自除其爲政終日坐堂皇任吏民白事有小訟獄立判遣無稽畱者多設耳目方略集鄉保詢盜賊及諸惡少姓名出所簿記相質證使不能隱則榜其姓名許三年無犯湔雪之奸民皆斂迹方山谿洞外兩氓爭地無契券訟久莫能斷枚視案山積笑曰此左氏所云晉鄭之間有隙地玉暢頓邱是也訟久則破家吾當爲汝了之乃盡去舊案別給符驗使各開墾升

科聞者皆歎賞有賈人販布江行舟觸戰船溺死  
一兵衆兵縛控舟子兼及客枚心知過失殺無罪  
而累客必傾貲乃令乘風張帆作觸舟狀縱之去  
以埋葬錢發兵完案侍郎尹會一督學試江寧有  
兩騎衝其前麾且嫚罵稱親王家奴他縣尹不敢  
問枚立擒治則爲大將軍投書制府者也搜其篋  
得關節書十餘封悉焚之重撻遣去十三年江南  
災銅井民運米至吳門有率衆劫之者枚以荒政  
當弛刑召其魁詢之乃土人遏糶非劫也諭以情  
法追米還之其敏而能斷類此

澄清  
堂稿

校長身鶴立聲若洪鐘生平事母孝友于姊弟母  
年九十四而終迎養寡姊年至九十妻亦白髮齊  
眉一家怡怡如也篤于故舊嘗爲亡友沈凡民司  
祭埽卅年如一日程編修晉芳死負五千金往弔  
焚其券且撫立其孤尤喜汲引後進嘗自稱吾之  
官不擇日葬親徙宅不用形家言而未嘗遇患不  
學仙佞佛而年登大耋枚旣山居年又最高歷

四朝乃取康熙至乾隆間所識名臣事狀諮諏其子  
孫僚友各編次爲碑傳傳聞或有譌舛然其逸事  
足以裨益正史其所爲詩文天才橫逸不可方物

尤長駢體抑揚跌宕得六朝體格撰小倉山房文集七十卷詩話尺牘說部之屬若干卷以嘉慶二年十一月十七日卒年八十有二同上

襄勤伯鄂虛亭容安沒於王事袁子才挽詩有云

男兒欲報君恩重死到沙場最善終傅文忠公最

愛末句謂人曰我不識袁枚何人能作此語兩村詩話

或問袁子才何如人余誦白樂天句云已爲海內

有名客又占世間長命人同上

袁子才以散館出爲縣令初在江寧總督尹文端

公愛其才旣丁憂再起至陝西與總督黃文襄臬

味差池上書萬餘言不省遂乞病歸

湖海詩傳

石庵相公在江寧時聞其蕩佚將訪而按之子才

投以二詩公閱畢卽請相見頓釋前嫌

同上

孫淵如謂其神道碑墓志銘諸文紀事多失實

同上

簡齋大令弱冠卽舉鴻博旣而成進士入詞垣當

強仕之年獲遂初之樂備林泉之清福享文章之

盛名船山檢討所謂一代傳人傳己定非溢美也

攷其生平於倫常骨肉之間天性頗篤至居官行

政亦能達於治體合乎人情惟賦性通脫而又恃

其才名遂於世間蕩心佚志之事往往爲之助其

燄而揚其波使後進之士或相率效尤未學其才能先學其放蕩漸至長其浮薄甚且習於悖淫其流弊亦非細故也

聽松廬  
文鈔

子才爲人近於縱情逸志然其所爲古文每有切中事理洞達物情者又不可以人廢言也

松軒  
隨筆

隨園之文駢體尤工詩則以七律爲最七絕次之五古又次之七古才華富贍奔放有餘然好爲可驚可喜遂或涉於粗浮近於遊戲者有之蓋名盛而心放才多而手滑諸體皆有遊戲而七古尤縱恣惟七律中酬贈言情之作無辭不達無意不宣



以才運情使筆如舌此其專長獨擅者也聽松廬詩話

標題 雜詩五古第一首第二首 卮言五古第一首第二首 水西

亭夜坐五古 齒痛五古 改詩五古 商丁孫

尊歌七古 還杭州五首五古 讀胡雲坡觀

察馳封嫂氏奏疏有作五古 觀大龍湫作

歌七古

摘句 意如主人辭如奴婢主弱奴強呼之不至

崇意 文不加點興到語耳孔明天才思十

反矣精思 不從糟粕安得精英曰不關學

終非主聲博習 能剛能柔忽歛忽縱筆豈

能然惟吾所用

用筆

次韻自繫疊韻無味

鬪險貪多偶然遊戲

擇韻

西施蓬髮終竟

不臧若非華羽曷別鳳凰

振采

戒之戒之

賢智之過老手類唐才人膽大

辨微

知一

重非進一重境亦有生金一鑄而定

勇改

不學古人法無一可竟似古人何處著我

著我

聖求童蒙而況於我低棋偶然一着

頗可

求友

節錄續詩品

欲見何代人但翻何代書

一日不讀書如作負心事

讀書不手記一過無分毫

舉手天地動放手烟雲空朝爲大將材暮

作漁樵翁

韓蘄王

英雄與文人往往託佛老匪自矜清超卽  
是貪壽考

一見動相慕未見早相惡問其所以然有  
緣無緣故

雨來蟬小歇風到柳先知

老牛知讓路小蝶學穿花

無情何必生斯世有好都能累此身

萬重白骨堆青史  
六代黃金散暮煙  
螻蟻尙存封建法  
圍棋時見井田心  
地當六代悲歌易  
胸有千秋下筆難  
學書未求人苦佳  
句雙存割愛難  
折柳自澆臨去酒  
攀花難問再來期  
不先詣客來還答  
最愛看書過亦忘  
聰明得福人間少  
僥倖成名史上多  
傳名早死皆高壽  
肯樂貧家卽富翁  
物須見少方爲貴  
詩到能遲轉是才  
天上送行千里月  
客中娛老一船書

所到總能增閱歷無求何處不神仙

辦事人多解事少愛民心易治民難

千金儘買羣花笑一病才徵結髮情

病中贈內

芸香此日三千卷麥飯他年百六天不覺

一齊到心上祝兒長大望兒賢

香亭生兒云將嗣我

喜賦

嫁衣日為他人作金穴誰知住者貧倘念

丁單門戶薄夕陽紅處好抽身

留別香亭

一坏尙起膏肓疾九死難醫嫉妒心

扁鵲墓

觴詠偶畱修禊帖安危能上會稽箋

王右軍祠

高談澤潞兵三萬論定揚州月二分

杜牧墓

宦途少累神先定天性多情句自工

白太傅集

世上本無常照月天邊還有再來春

尹宮保移

督廣州

韋平兩世黃扉業伊呂三朝白髮身

尹公七十

當時澤只三江占此日恩同四海分

尹公入閣

我輩尙將儒者待朝廷久當重臣看

開樹齋侍

郎領威遠大將軍印奉寄

從來効力沙場日卽是承權膝下時

同上

及州作督仍爲子五鼎娛親更及賓

廉村中丞

招陪侍封公滌齋先生夜宴

百戰餘生依膝下五湖歸計趁春潮

贈吳將軍

一品集成傳海內五湖花好稱吟身朝無

燕許傷前輩家有章平慶後人

輓錢太傅

家焚諫草終存史身是傳人更有詩

贈錢嶼沙

半夜天星摧上將一軍風鶴起深愁斯時

代作孤臣想可有生還兩字不

贈王蘭泉

手書露布三邊讀甲洗銀河萬馬知

同上

應劉才調生同世稽呂交情隔暮雲

寄蔣若生

姓名敢作千秋想得失先安一寸心

謝荅生校

定拙集

汲鄭果然能禮士  
臯夔原本是詩人  
答孫補山

有意欲填將陷路  
未知能作幾時花  
詠雪

望去空堂疑有路  
照來如我竟無人  
詠鏡

一夜送人何處去  
百年分半此中居  
詠牀

垂雲深護鴛鴦穩  
越境難防蝴蝶飛  
詠帳

解用何嘗非俊物  
不談未必定清流  
詠錢

傳家事業從今始  
識字聰明上口知  
阿遲上學

夔龍簫管巢由唱  
請自分途慶太平

全家雞犬分明在  
世上遙看但綠雲



人求終比求人好平著心看卽是禪  
老夫心與遊人異不羨神仙羨少年

舒瞻

字雲亭滿洲人乾隆四年進士官知縣

雲亭親文衛霍屏居委巷如寒素旣出仕而浙東  
西頌其廉明傳其風雅古所云文學飭吏治者也

詩品在元白之間近情處迴不易及

歸愚  
文鈔

雲亭少日以性愛登臨同謝傳志存溫飽愧王曾

句得名

雨村  
詩話

摘句 關河萬里夢雲樹一江詩

晚雲籠水暗明月上船多

碧雲紅樹皆秋色疎柳寒蟬共夕陽

風料峭時偏抱病月團欒夜却離家

入手轉添心悵望開緘先覓字平安

得家書

世間難得爲知己天下傷心是別離

馮成修

字達天號潛齋廣東南海人乾隆四年進士官禮

部郎中

成修七齡喪母依世父以養每語及其父遠出事

輒涕泗交頤益奮學己未成進士選庶常散館改

吏部主事庚午晉禮部郎中己卯

命督學貴州揭條約十四則以訓士成修得官後兩次乞

假尋親卒無所遇以故一生隱痛年六十一假歸

不復出掌教粵秀越華書院受業數百人年八十

計其父已百有一齡乃持服三年乙卯重宴鹿鳴

卒壽九十有五著有養正要規諸書

廣東通志

摘句 雅過歐公舫安於邵子窩

題耿湘門素舫齋

雞籌報曉漏聲寒 九重垂念儒臣

老 送沈歸愚宗伯還里分得老字

國朝詩人徵略卷三十

國朝詩人徵略卷三十一

番禺張維屏子樹輯

裘曰修

字叔度號諾皋江西新建人乾隆四年進士官至  
工部尙書加太子少傅諡文達

公貌清整眉有濃翠顧盼間精神淵映居恆喜賓  
客遇事神解超捷每詣一曹受一職手文書嘿然  
數日後判決如流二十一年

天師征伊里公面奏軍務機宜

天子大悅卽賜

御衣冠乘傳至巴里坤傳宣

聖意會逆曾莽阿里克遣弟某詭稱押送諸番探信卡倫  
公與哈密總兵祖雲龍縛畀總督發其姦哈密兵  
少有赴巴里坤種地者七百人公請暫畱爲衛撥  
沙洲五衛麥石添備支發

上皆獎許公聰強機警雖侍

內廷領六部而英蕩欵關足迹常半天下五主鄉試  
一至湖北兩至江南浙江八勘水利三至河南兩  
至江南四至直隸公所讞決無苛嚴亦無縱捨衡  
文得士心尤善治水所治黃淮淝濟伊洛沁汜等

共九十三河疏排濬瀾貫穿原委俱有成效可爲  
後法公以文學受知始終與書局相終始最後爲  
四庫全書館總裁

上以書法近宋臣張卽之以內府張書華嚴經殘本

命公足成之

小倉山房文集

公神閒氣靜明敏自然事無大小談笑應之每遇  
朝廷大議論衆說紛紜而談笑微中分肌劈理如奏  
刀砧然如土委地人人各適其意以去總督高君  
書麟謂天仙化人不可湊泊者也公沒後相傳爲  
燕子磯水神後有家人過之拜祝祠下云若果在

茲願乞順風頃之東風果作挂帆而去故顧晴沙

詩曰爐香燭影曉猶紅稽首陳情語未終試看靈

旂微颺處春江已借一帆風

湖海詩傳

摘句 人世蒼茫悲代謝古今詞賦幾傳畱

秋屏閣

壁壘久忘當日險功名仰愧昔人難

仙霞嶺

李文襄扼賊於此

論文不棄鼓刀者相士每於彈鋏中

竹涼似有蕭蕭雨荷靜微生嫋嫋風

### 李湖

字又川江西南昌人乾隆四年進士官至廣東巡

撫贈尙書銜諡恭毅有李恭毅公遺稿

乾隆四十五年調廣東巡撫廣東素多盜番禺之沙灣菱塘近大洋縣亘百數十里尤稱盜藪假風便捕魚出洋肆劫或散布內地行劫湖蒞任會同督臣巴延三籌訪各盜姓名居址出入途徑偵各盜首以七月望前歸家設祀密飭文武官豫分布兵役旬日間擒誅盜首二百餘人疏至

上嘉之四十六年條奏安輯章程一沙灣南岬市橋村新造墟向設巡檢各一分司緝捕南村駐縣丞一秩微不足彈壓請移同知一員駐菱塘沙灣適中之



坑頭村兩巡檢可隨時調遣遇盜警會石碁營弁  
緝堵一沙菱涌口甚多石碁村逼臨師子洋爲舟  
行總滙請立專營以扼其要一石碁水師汛房並  
列村內移涌口芻易於盤詰水陸各汛酌添弁兵  
一石碁營在陸路汛地俱屬水鄉宜設櫓船快槳  
船各一官涌口市頭村石壁汛各設快槳船一市  
橋汛設四櫓船一令千把總帶兵巡緝一菱塘涌  
口無船汛與內河巡船不相連接應合左翼鎮派  
樓船一配兵巡徼一移駐汛兵挈眷遷徙每兵酌  
給房二間一各村民船令沙菱巡檢編號給印照

刊船戶姓名俾一望瞭然凡大船樑七尺以上者  
限用四槳小船六尺以下用兩槳禁民間私造洋  
船一新設移駐各員必久任專其責成請在外棟  
調照海疆例五年俸滿保陞遇有盜案文職以巡  
檢爲專管廳員爲兼轄武職以千把外委爲專管  
守備爲兼轄將領爲統轄如失察沙焚民人偷越  
各屬行劫照失察奸民出口例參處一石碁村有  
鼠山又有土堆形同田鼠鼠性善竊故多盜請剷  
毀鑄鐵貓鎮壓以順輿情下部議行

李恭毅公傳  
見恭毅遺稿

同年李又川巡撫廣東以清嚴爲政輿人歌云廣

東真樂土來了李巡撫

聖眷甚隆而積勞成疾薨時香亭往送入殮見公面目手

足作黃金色光耀照人亦一奇也巡撫貴州入境

口號云雙旌遙指貴陽城紫蓋紅旗夾道迎自愧

書生當重任不知何以報昇平

隨園詩話

先是番禺菱塘沙灣爲盜藪每劫宦商不敢過問

又川到任卽會同制軍出兵擒捕一百八十人請

王命斬之海盜肅然公外嚴而內和任通永道時有

自題一聯云人苦不自知願諸君勤攻吾短弊去

其太甚與爾輩率由舊章

兩村詩話

吾粵百餘年來論大吏之賢首推李恭毅公村中  
耆老閨中婦孺皆能道公之賢誠以公實心實力  
爲民除害故入於民者不覺其深且久也粵東盜  
賊之患較他省爲甚或於水上行劫或於民居放  
火或擄人而索贖或恃衆而脅從又有一種匪類  
俗名爛崽呼羣結黨擾害閭里欺侮善良非重法  
懲之無所忌憚亦終爲盜賊而已恭毅公之治盜  
也不獨嚴明而且神速沙菱一案旬日之間誅盜  
百數十人自是數十年粵東內地盜賊不敢肆行  
無忌皆公重法明威有以震懾之也公詩云由來

盜息自民安息盜終須仗長官如公可謂坐言起

行者矣書曰辟以止辟是言也公能以之聽松廬文鈔

摘句 壯懷孤劍在作客一身多

衆壑束雙峽三江爭一門

曼陀香雨三千界絃管春風十萬家天竺寺

蘭膏解結同心藥珠樹曾棲並命禽

數聲蘆雁三更月千里霜蓬獨夜身悼亡

明時勇退輸高枕薄宦粗成好著書

### 梁善長

字崇一廣東順德人乾隆四年進士官建寧府同

知有鑑塘詩鈔

授陝西白水令減耗羨革陋規歲荒悉心籌賑攝

蒲城多惠政蒲城人語曰一文不取清白如水經

綸滿胸多謝梁公所纂有廣東詩粹

廣東通志

摘句 隔雲仍有色向日更添輝

西樵瀑布

申甫

字及甫號笏山江南江都人乾隆六年舉人官副

都御史有笏山詩鈔

大學士無錫嵇公所薦詩章秀拔律調尤妍

詞科掌錄

君直軍機處三十餘年中更戡金川討準夷平回

部軍書劄午日不暇給君戴星而入比暮而歸爲  
聖主所深知宰臣所倚任然君最以詩鳴常以重陽日同

查禮諸君集陶然亭君詩先成四座稱歎

春融堂集

摘句 及親三釜養樂與萬鍾匹

明月白千里梅花香一樓

青山近郭尋詩路紅袖當爐賣酒家

霜葉老畱前代樹風簷閒憶十年燈

明遠樓

重來我只常資進晚達君猶本分官

兩公視我如兄弟三世論交到子孫

草堂貲要隨時蓄垂老依人畢竟難

金 牲

字雨叔號海住浙江仁和人乾隆七年

賜進士第一人官禮部侍郎有靜廉齋詩集

兩叔孝感令長孺弟也穿穴諸經時有創解詩宗

韓杜駢體得南宋二李之遺

詞科  
餘話

公少偕兄虞砥礪問學尤淹貫史事及第授修撰

典甲子廣東鄉試散館復第一丁丑在

上書房行走公言養正之地殫竭微忱用資啓導不

易膺斯任也先後侍書十七年自孝友大端至言

動威儀之節罔弗盡言累遷內閣學士晉禮部侍



郎告歸主講敷文書院年八十一卒入祀鄉賢公  
在都時捐金醪資創仁錢會館部署周備至今鄉  
士棲止如歸

公次女幼時一日於中庭忽大驚佈家人問之云  
見一藍面人從天而下以魁星像示之云所見正  
同是年壬戌科公得會狀然獨次女見之未喻其  
故後女適汪康古庚子科公外孫汪如洋亦得會  
狀乃悟魁星示象而次女獨見者蓋狀元之女而  
又狀元之母也公聞外孫大魁寄二女詩有云當  
年會狀憐嬌女今見教成會狀兒亦科名中一段

佳話也

聽松廬詩話

標題

鎮海樓

五古

鞋拔子

自來詠物所無再作一首五古

摘句

蒙養定終身姑息一生了

精神貴寶嗇財賄宜疏通百物皆取給專

利怨所叢

賦形良混沌飾采誰雕琢

珂貝介蟲殼有細點千萬

高情戀風露小劫墮熬煎

蔗蟬一名蔗蟲出閩中

草香花氣欲成瘴山靄水煙同結雲

蘭畹敢期佳夢獻荔支或取側生宜

望孫

同巷編名如保甲比肩事主卽臣鄰

詠號舍

蠶老自應勤縛繭積成纔足穩藏珠

治木戲成

只此得如兄弟否清宵風雨對牀眠

病中示內

麥飯紙錢親料檢者回不愧過清明

### 竇光鼐

字元調號東臯山東諸城人乾隆七年進士官左

都御史有東臯詩集

公幼負絕人之資家貧貸書於人覽卽成誦一日

讀文選卽操筆爲琅邪臺賦時年甫十二耳

小峴文集

御試翰詹等官閱卷者列公四等

上知公特遷公爲中允蓋公被

上知遇自此始上同

乾隆六十年充會試正總裁以所錄首卷多語疵

被勘議落職降四品銜予休上同

公生平不講學而嚴析義利要之以毋自欺立朝

五十年柴立無所顧慕人多忌之惟以誠悃荷

聖主知屢起屢仆卒蒙保全上同

嘗言學貴有用如昌黎折王庭湊陽明平宸濠乃

真學問上同

摘句 猿鳥各成性松篁俱好音

密林交石氣空峽轉江聲

地連五嶺分鵬背水帶三江下虎門

越秀山

王太岳

字基平號芥子直隸定興人乾隆七年進士官雲南布政使有青虛山房集

公以弱冠入詞林海內交推其文學而公獨志於經世之務在西安元畱心水利著涇渠志在雲南憫銅政之弊於是劾搜博訊指利害所由來以求補救之術大略謂舊時滇銅聽人取攜自康熙四十四年始設官爲經理歲有常課至雍正初始開鼓鑄運京局以疏銷積銅茲硿路已深近山林

木已盡夫工炭價皆數倍於前而又益以課長之  
掊尅地保之科派官役之往來供億廠民受價六  
兩四錢之外尙須貼費一兩八九錢而後足採辦  
之難此其一也 滇銅自乾隆四五年以來歲產  
六七百萬觔乾隆三十八年三十九年以一千二  
百數十萬告此滇銅極盛之時至今日而京師之  
運額旣不可缺而江南江西以外尙有浙閩黔粵  
秦楚諸路開鑄求之益衆責之益急雲南之銅何  
時足乎採辦之難此其二也 銅民皆無業之人  
領本到手往往私費亦有開硎無成虛費工本懸

項累累名曰廠欠自頃定議每歲終責取無欠結  
狀然工本不足廠民不能徒手枵腹而致採則爲  
之量借油米爐炭以資工作而其欠借不歸之油  
米爐炭亦不下巨萬之值大廠之逋累積重莫蘇  
採辦之難此其三也 小廠收買渙散莫紀合計  
數十小廠之銅比二三大廠不能半則大廠安得  
不困採辦之難此其四也 若夫轉運之難牛可  
載八十觔馬力倍之一千餘萬之銅非十萬匹頭  
不辦今司運之官旣皆增價僱募然不免以人易  
畜里民每歲數日之糧以應一日之役喜事之吏

驅率老幼橫施鞭打瘁民生而虧政體非小故也  
嘗竊求前人之論議其有已效於昔而可試行  
於今者曰多籌息錢以益銅價也通計有無以限  
買銅也稍寬考成以舒厥困也實給工本以廣開  
採也預借僱值以集牛馬也 銅政之要必寬給  
價給價足而後厥衆集厥衆集而後開採廣廣採  
則銅多銅多則用裕有銅本斯有銅息有鑄錢斯  
有鑄息以厥民之銅鑄錢卽以鑄錢之息與厥費  
不他籌澤不泛及而此數十厥百千萬衆皆有以  
蘇困窮而謀飽暖積其權呼翔踴之氣銅卽不增



亦斷無減 雲南山高脈厚到處出產礦砂但能  
經理得宜非惟裨益銅務而數千萬謀食窮民亦  
得藉以資生由此觀之小廠非無利也誠使加以  
人力穿峽成堂則初闢之礦入不必深而工不必  
費又地僻人少林木蔚萃炭亦易得較大廠攻採  
之費有事半而功倍者誠於廠之近邑招徠土著  
之民聯以什伍之籍又擇其愿樸持重者爲之長  
於是假之以底本益之以油米薪炭則渙散之衆  
皆有所繫屬然後示以約束董以課程作其方振  
之氣厚其己集之力使皆穿石破峽以求進山之

曠雖有不成者寡矣 銅運之在滇境者後先踵  
接依次抵瀘而瀘州旋收旋兌略不停息則終無  
儲備之日惟寬以半歲之期會然後瀘州有三四  
百萬之儲儲之既多則兌者方去而運者既來是  
常有餘貯也如是而凡運官之至者皆可以時兌  
發次第啓行在瀘既無坐守之勞在途亦有催督  
之令運何爲而遲哉

春融  
堂集

摘句

盡取不知節力足疲乾坤

銅山

取人以言貌孔聖猶失之

富貴固尙來遭逢會其時下士罕知命謂

云術取攜

山連二華橫秦塞水控三川下豫州

潼關

鄭虎文

字炳也號誠齋浙江秀水人乾隆七年進士官贊善有吞松閣集

君少孤竭力奉母母病禱於神請減算昇母事兄如父迎寡姊歸老於家撫諸姪諸甥五十年親戚故人待以養葬者無虛歲就食於其家者無虛日囊篋每空家人以告君笑曰姑強支持寒餓當共之吾寧苦身無以病吾心也性無苟取歲時餽遺

非其人雖親舊不受王芥子文集

君一主河南鄉試三充順天鄉試同考官再充禮

部會試同考官提督湖南廣東學政家居主徽之

紫陽書院十年主杭之紫陽崇文兩書院五年同上

摘句 憶昨夢慈母語酸聲不揚不願兒富貴願

兒常在一菊

天水相與際蒼然入虛空積氣舉其外萬

象生其中渡海

甘於諫果三分澁苦到蓮心一味清讀慎齋詩

有人望遠千行淚比我思渠十倍愁

三朝臣妾明忠順百粵屏藩漢竇融洗夫

山暗霧疑文豹隱海腥風挾毒龍行

西方秋老人初去南國春濃物有知紅豆

國朝詩人徵略卷三十二

番禺張維屏子樹輯

夢麟

字文子號午塘蒙古正白旗人乾隆十年進士官

戶部侍郎有大谷山堂集

乾隆二十二年

命督辦荆山橋河工程三月報工竣

賜戴孔雀翎七月沂水散漫入運爲沛邑害公奉

命與在工諸臣分任責成公之在工也役夫數十萬指咸

畚揭趨事昧旦而興指揮董率日在泥淖中與丁

卒同勞勩故告成較捷然公之疾亦自此始矣公

歿年僅三十有一

春融一堂集

午塘先生未弱冠而入詞垣未三十而躋八座且

屢掌文衡進參樞務而其為詩五言則蕭寥澄曠

七言多激楚蒼涼方處春華之時已造秋實之境

蓋得於天分非人力所能與也

聽松廬詩話

夢文子樂府詩有云遠憶送者此時到家凡行人

初別家時胸中皆有此意却被道出

同上

標題

今年別

古七

朝往香山

古五

雞鳴寺

古五

將赴梁谿道閒作

古五

蘇武牧羝圖

古七

中元舊縣驛夜歌三首古七 輿人哭古七

河決行古七 晾甲石歌古七

摘句 林隙辨歸人時見一回顧

澹靄蒙青岑孤篷冒疎雨層波生淺涼獨

坐聞柔艫

落日萬古色長江千里秋

荷動觸虛籟竹深流暗螢

帳鉤花影外人夢月明中

邴生薄宦非求達宋玉微辭欲著書

山連熊耳關雲白天入鴻溝朔氣黃



錢維城

字宗盤號稼軒江南武進人乾隆十年

賜進士第一人官刑部侍郎贈尚書諡文敏有茶山集

上命公偕湖廣總督吳公達善往貴州訊獄獄定將旋而

古州香要事起香要苗人力扼虎自詡有邪術鎗

礮弗能傷爲諸苗所憚二十一寨爲所誘將襲下

江同知龔學海告變公因偕吳公及巡撫宮公兆

麟檄黔省各營會剿又以古州壤接湖南廣西移

知各督撫分兵守隘口而自馳赴古州飭副將來

永增守加濶且策之曰賊苗脅從者衆急則并力

阻險勢不能旦夕平宜多懸木榜諭以

天朝止誅首亂餘無所問其黨必疑且散吳公等從之

苗聞日持牛酒詣軍門公慰諭遣去衆心大定明

日督兵入大箐密使人偕生番老雄等伺香要所

至六月八日擒之與其黨皆磔死事平

春融堂集

標題 定遠山行見田間蓄水有法禾黍暢茂卽

事述懷

古七

摘句 一路杏花發滿山春鳥啼

清磬上明月孤琴流暗泉

風辭昨夜雨雲作早涼天

李因培

字其材號鶴峰雲南晉寧人乾隆十年進士官至

福建巡撫左遷按察使有鶴峰詩鈔

廷試翰詹名列一等第二晉翰林學士視學山左尋

遷閣部洊轉侍郎歷戶禮兵刑四部任江蘇浙江

學政十年得士最盛先大父剛毅端嚴雖親子

弟望之生慄歷官數十年矢志清白所至振拔單

寒伸理冤抑風節凜凜每公事叢集悉心裁決夜

分不倦

李氏詩存

摘句 入山不見山但見千層樹絳葉落成雲吹

出前峰去

花開思媚日樹動欲辭雲

訟庭聞鳥語小市雜溪喧

秋風桂子淮南樹春水桃花洞口魚

子舍京華愁旅客牀風雨憶同衾

張甄陶

字希周號惕庵福建閩縣人乾隆十年進士官知縣

希周總角卽肄業鼇峰書院潛心經義巡撫奉天

盧公學使奉新周公皆有國士之目

詞科掌錄

四書翼註論文惕庵先生自撰凡例有云講明四子書乃致知格物第一義此書博徵百家凡天官地志國典兵機食貨律例方技與一切雜說果於聖經源流相涉一一攷證會通不特臨文者可以開拓心胸增長筆力卽登朝服官皆有所助日松心錄自高頭講章盛行幾變秀才爲學究惕庵先生四書翼註論文一書爲習舉業者增其見聞擴其才識較之尋常講章實爲遠勝先生初舉鴻博後成進士入詞垣散館外用爲知縣未久不獲展其所蘊而主滇黔書院講席前後十有六年反覆刪訂

乃成是書其用心良苦其爲院長也名達

九重獲邀議敘宜哉

聽松廬  
文鈔

惕庵有往事無根盡到心句極沉着

聽松廬  
詩話

摘句 身是魯儒三黜慣思同楚客九悲深

不才底日成投筆善病經年累倚閭

誰與益者成三友欲往從之付四愁

病骨那堪空冀北羈心祇是望江南

朱珪

字石君順天大興人乾隆十三年進士官至大學

士贈大傅諡文正有知足齋集

公以雍正九年正月十二日生于蓋屋縣公祖與高安朱文端公同省爲知縣相友善公父受經于高安故公十一歲卽傳高安之學年十三丁母艱孺哀毀瘠服除補附學生年十七科試第一舉于鄉與叔兄齊名次年會試中式

賜梁國治榜進士出身改庶吉士習

國書座師阿文勤公劉文正公鄂剛烈公皆以學行重之乾隆十六年散館第一授編修明年大考二等授侍講二十三年大考二等授侍讀學士公所撰進文冊陳宮中

高宗純皇帝亟賞異之特達之知實始于此二十四年主  
河南鄉試復

命旋奉使告祭南嶽登祝融峰明年充會試同考官秋授  
福建糧驛分巡道抵閩兼攝福州府事毀和合等  
諸淫祠民大驚服二十八年

特旨擢福建按察使兼署布政司閩人裘自位假平臺灣  
功驚武職獄連數十人公誅正犯一人諸受欺者  
皆不坐有告家譜妄逆者讞之僅戮一撰譜者屍  
不坐其子孫二十九年秋丁父憂戴星奔抵京治  
葬三十二年服除補湖北按察使三十三年調山



西按察使明年授山西布政司秋奏立保固城工  
法令後任隨時修護如隕在三十年內與原築官  
分賠下部議行三十六年暫代巡撫事奏撥歸化  
綏遠二城穀十萬石配放兵糧以省採買而免紅  
朽奏免土默特蒙古私墾之罪以所墾無礙牧地  
三千一百餘頃許附近兵民認耕納租歲六千餘  
兩增官兵盤費皆下部議行三十八年勘歸化城  
水災奏撫卹之且予修費借穀種三十九年按察  
司黃檢奏公終日讀書于地方事無整頓明年入

觀授翰林院侍講學士四十一年

命尙書房行走侍今

皇帝學時初置

文淵閣官

特授公直閣事主福建己亥鄉試四十五年督福建學政

將行上五箴于今

皇帝藩邸曰養心曰敬身曰勤業曰虛己曰致誠

上力行之及

親政亦常置座右四十八年冬還朝明年扈

蹕南巡授內閣學士兼禮部侍郎閱浙江江蘇召試

卷五十一年授禮部侍郎主江南鄉試督浙江學

政五十四年冬還朝充經筵講官五十五年

經筵進講

高宗純皇帝顧

今上曰此汝師傅講之善春總裁會試秋授安徽巡撫

命馳驛賑水災乃賑宿礪山靈壁泗五河盱眙民以糧借

懷遠鳳台壽民以糧及種築決隄六十餘丈民乃

安復請展春賑五十七年奏鳳潁水災

恩賞糧種免民欠萬五千兩祁門縣築城成輕騎往驗之

至新嶺有欲巡撫怒其歛縣令屬掌亭人以饋餉

進者公恬然飽之五十九年調廣東巡撫六十年

兼署兩廣總督喚咭喇國入貢呈土物于總督卻  
之嘉慶元年征苗調兩廣兵萬二千親調遣之夏  
授兩廣總督兼署巡撫六月奉

旨內召云將欲用爲大學士也俄以閩浙總督魁倫奏粵  
東艇匪駛至閩浙乃公任內不能緝捕之咎寢前  
命仍加

恩補安徽巡撫鳳陽等州有水災蒙

恩賑親給之官吏無敢侵者時楚豫多邪教流言安徽有  
隱伏者公曰疑而索之是激之變也乃親赴界上  
籌防禦徧蒞穎亳等州城鄉聚長老教勸之徧張

國朝言行錄卷之三十一  
告示簡明諄切民大感化明年授兵部尚書留巡撫任宿靈壁水合肥定遠巢來安全椒旱親賑之明年蒙毫復水卹賑如之

高宗純皇帝上賓于天今

皇帝初親政卽馳驛召公公哭且奔先上奏曰聞

太上皇帝龍馭上昇膽裂呼天角崩投地欽惟

大行皇帝十全功德五福考終傳器愜心於昭在上我

皇上純性超倫報天罔極竊聞定欲躬行三年之喪此舉邁千古而欽萬世然而天子之孝不以毀形滅性爲奇以繼志述事爲大親政之始遠聽近瞻默運

乾綱蕩施渙號陽剛之氣如日重光惻怛之仁無  
幽不浹思修身嚴誠欺之介於觀人辨義利之防  
君心正而四維張

朝廷清而九牧肅身先節儉崇獎清廉自然盜賊不  
足平財用不足阜惟願我

皇上恆久不忘堯舜自任之心臣敢不隨時勉行仁義事  
君之道

上嘉納之及至京哭臨

上執公手哭失聲旋

命直南書房管戶部三庫自是凡

國家大政有所咨詢皆造膝自陳不草一疏不沽直  
不市恩軍機大臣不相關白公第在外城遠且隘  
賜第西華門加太子少保充實錄館總裁

國史館總裁己未會試總裁冬調戶部尙書時

上禁浮收漕米之弊外省以運丁貧仰資州縣州縣取民  
不得不浮于是安徽有加贈銀江蘇有加耗米之  
請部議將擬行公思之不寐綜其數較原徵加倍  
乃決計駁曰小民未見清漕之益先受加賦之害  
不可行竝令漕司以後凡事近加賦皆議駁以體  
皇上損上益下之意長蘆鹽政奏鹽價一斤加錢二文公

駁曰前蘆東因錢價過賤已三加價又免積欠二百六十萬兩餘欠展三年商力自寬且今錢價漸貴所奏應毋庸議廣東布政司奏陞濱海沙地賦公駁曰海沙淤地坍漲靡常是以照下則田減半賦之今依上中田增賦是與沿海民計微利非政體且民苦加賦必多坍豁別有漲地亦不肯墾不可行倉場衙門請預納錢糧四五十倍準作義監生公駁曰國家正供有常經而名實關體要于名不正于實有傷斷不可行凡駁議皆親屬藁奏上皆聽之六年陪祀祈穀壇未曙誤行墜甬道下傷左跨



賜醫

賜食絡繹于道七年以戶部尚書拜協辦大學士九年春

駕幸翰林院

賜宴聯句

御書天祿儲才扁摹刻院堂以墨蹟

賜公第公在翰林為二十四科前輩資最深且掌院事領

袖清班瀛洲典故盛且榮焉十年正月宣

制拜體仁閣大學士管理工部事明年春公感寒多痰嗽

肝火觸右目微青時公年七十六矣九月奏乞休

上曰待八十當為壽旋

賜詩十韻及玉鳩杖每

召對則預定召對後期十一月庚午寒甚

召對畢降階忽痰壅歸第

上遣侍衛領醫官來視疾疾少差

賜假兩月十二月乙亥坐外軒作芻獻詩有云天道神難

測民心惟一中知人可安衆

居所自持公

上將

親臨公第丁丑復

命戶部尙書戴公來夜逾子痰盛氣微遽薨是五月戊寅

也報聞

上震悼己卯

上親臨奠三爵哭不止

特賜諡曰文正庚子葬于二老莊呂邨舊阡明年

御製碑文刻石阡門

經室集

公豐厚端凝中和醇粹爲仁若渴抗義不撓坦白  
公誠絕無城府于經術無所不通漢儒之傳注氣  
節宋儒之性道實踐蓋兼而有之取士務以經策  
較四書文誠心銳力以求樸學佳士之文未薦被  
落者讀而泣之公布政數省平餘銀鉅萬悉不取

撫安徽裁蕪湖關陋規閩省洋商陋規事發

欽使莅治獨公實不受一錢公官于外厓岍廉峻中朝大  
官絕無所援管部事持大端不親細事數十年清  
操亮節人皆仰之公事父愛敬本于天性父杖兒  
跪而以身蔽受之慟母氏早歿事庶母謝幾如母  
事諸兄悲愉如一體事寡嫂盡敬撫諸兄子如己  
子公年四十餘卽獨居迄無一妾

御製杆痛詩有云半生惟獨宿一世不貪錢知之深也

同上

參政兄弟少入翰林卽以高文典冊照耀蓬萊華  
蓋之間爲菽林所仰垂三十年然其尙名教敦清

節世或未盡知也任山西布政使司以方正爲巡撫所嫌謂其不諳吏治由是仍改官翰林久之

上深知其公正廉潔累擢用爲巡撫而參政愛才下士士以此望而趨之昔韓忠獻爲中正所歸而於元祐諸賢未嘗徇葉文忠爲清流眉目而于東林君子亦無私好參政益深得此意者也

湖海詩傳

標題 定興道中月夜觀雪

五古

謁東坡亭

七古

摘句 文章金蕤重富貴白衣輕

書生何有銅鑄柱宦跡或可山畱龕

忠義神仙同脫屣漫將尸解擬劉安

詠顏平原

圖轄布

字裕軒滿洲人乾隆十三年進士官翰林院侍講  
學士有枝巢詩草

劉文正公曰圖學士不忽于微不愆于隱

雅頌 熙朝

晚年卜居阜城門外之池水村有園圃竹木之勝  
遺命歿後弔吾墓者薦寒泉而已勿以葷酒同上

摘句 田園三徑僻風雨一蓑寒

畦塍當午靜花竹隔簾清

雨裏荷鋤春早晚磯邊把釣水西東

卻憶嘉陵江上路萬山深遶一舟行

凌魚

字西波號滄洲廣東番禺人乾隆十三年進士官知縣有書耘齋集

榜下分發楚南歷任桂陽昭陵醴陵諸縣廉介明敏案無畱牘在桂陽政暇輒進邑諸生講授經義而嚴課試之文風丕振續修縣志考核詳明尋歸養大母遂不出以讀書敦行教其鄉人廣東通志

凌西波觀黎忠愍公畫像詩云運移亦知大事去

不忍報國虛無人能說出千古忠臣心事聽松廬詩話

標題 結襪子古 耕田歌古 鄉賢八拜詩古

張文獻公 余襄公 崔清獻公 李  
忠簡公 邱文莊公 陳文恭公 湛文  
簡公 海忠介公

摘句 一跌易如登白簡半階難似上青天

林明倫

字穆安號穆庵廣東始興人乾隆十三年進士官  
衢州府知府有穆庵集

穆庵廉靜寡欲反復於宋五子之訓有得於心以

編修出知衢州府卒時年僅三十五

梅崖文集

暉子居數稱穆庵文余未得見當畱心覓之

松軒隨筆

摘句 捐生片語易仗義五人同道直心寧悔名



田身三二二

存死不空 五人墓

### 陶世鳳

字威仙號雲門浙江會稽人乾隆十五年舉人官

澳門同知有雲門賸稿

世鳳知新興縣監生趙簡祥合七邑匪徒歛盟為

不軌世鳳飛檄上聞躬率壯勇猝禽其魁獲逆名

簿佯笑曰封官授職是優伶演劇所為詎可呈上

官耶當眾焚之反側乃安縣民立祠報德

廣東通志

摘句 山帶曉雲橫別浦樹含春雨散遙天

意超得自腸迴九句鍊真同肱折三

欲訪雪堂何處是滿江煙樹到黃州

余慶長

字元亭湖北安陸人乾隆十五年舉人官成都府

同知有壬癸詩藁

元亭爲子撰銅政考八十卷釐然畢具

湖海詩傳

摘句 知有小園屬開府可能大樹號將軍

子瞻詩和陶彭澤漫叟歌招孟武昌

劉 墉

字崇如號石庵山東諸城人乾隆十六年進士官

至大學士諡文清有石庵詩集

文正公清德重望雅不欲以詞章自見先生如之  
 先生手書近詩見示清新超悟有香山東坡風格  
 十餘年所得甚夥門人陳子韶因合梁侍講同書  
 書鐫于西湖上名劉梁合璧湖海詩傳  
 諸城文正文清兩公非徒為宰相且為賢宰相天  
 下仰之此

聖翰所以特許為海岱高門第也聖經室集

劉文清書初從松雪入中年後乃自成一家貌豐

骨勁味厚神藏不受古人牢籠超然獨出松軒隨筆

摘句 五鼎薦八珍孰曰非正味竄人病未能謬

云太羹貴

爲學患不知既知苦未勇護疾而忌醫見  
藥反增恐

乾坤秘清氣一縷入肺腑

譚尙忠

字會文號誨亭江西南豐人乾隆十六年進士官  
至吏部侍郎有緱芳齋詩集

公之在戶部也嘗司寶局及

高宗純皇帝察局中事惟公無纖豪私染在興泉時以洋  
行事例降官而

上又察知其不汙故復進用其在封疆爲大吏室中澹如  
寒士遇屬員甚有禮藹然親也獨不能少入之以  
財利天下論吏清儉者必舉譚公爲首然公遇事  
奮發則執誼不可回其爲安徽巡撫以忤和珅致  
降爲福建按察使故公雖和平廉潔而非煦煦曲  
謹者也其教子有曰人當先約其身身約則心約  
心約則事不踰閑然後可以擴充爲有本之事功  
矣故公所至興利去害必究其原委曲折斷然行  
之使所蒞必蒙其澤去則民多涕泣送之

惜抱軒  
文集

粵東百餘年來大吏遺愛在民而去思最深者莫

如李恭毅公

湖

次則譚公

尚忠

譚公爲按察嚴治

盜賊尤加意懲治匪徒之害民者訪拿確實卽以重枷枷斃於是匪徒斂跡而良民感恩蓋粵東之患莫甚於盜賊然其始不過兇頑之徒耳彼習見犯法者未必卽罹于法也乃無所畏矣卽罹于法而罪名不至死不過軍耳流耳彼又習見軍流之犯往往脫逃而歸也乃益無所畏矣至于無所畏而糾衆行劫擄人索贖放火搶奪諸惡皆作而鄉民受其毒害有吞聲飲泣而莫敢控告者譚公重枷之法行速而衆著使匪徒皆知兇橫者旬日之

間可柳斃也庶幾聞風而知畏耳故大吏不必求  
爲民興利也能實心爲民除害而無形之利已溥

矣聽松廬  
文鈔

摘句 雲橫遠岫衣千摺水落平橋帶一圍

獨坐孤帷難自遣細研松露寫秋蘭

湯世昌

字其五號對松浙江仁和人乾隆十六年進士官

御史有嘉藻堂集

公成進士時閏五月

朝考詩題爲閏月定四時公作四詩已違式不錄

上時亦賦此題求佳卷不可得大臣以公卷進

上大加褒賞取其綵絲真續命競渡繼清音二句定爲第

一人翰林公性剛直嘗踵座主劉文正公門閤人

以他客拒公且作倨傲狀公怒曰而公大賢果縱

而如是耶手批其頰聲達戶內於是文正延公入

謝不敏焉後保舉御史文正卽以公名上擢工科

給事中封事數十上時人號爲湯多諫云

兩浙翰軒錄

摘句 徑穿雲篠合灘接石梁橫

周於禮

字綏遠號立崖雲南嶠峨人乾隆十六年進士官



大理寺少卿有聽雨樓詩草

少卿性耽吟詠又嗜書法爲侍御時暇輒行琉璃  
廠書肆見有佳者隨時售之宋元石刻旣多真蹟  
尤不少取褚顏蔡蘇黃米六家先勒于石旋以疾  
終所居聽雨樓在神匠胡同爲明嚴介溪別墅

國初徐健菴尙書居之繼歸于溧陽史文靖公其後  
分爲數處畢君秋帆得之爲燕會觴詠之地及秋  
帆出爲觀察遂歸少卿迄今三十年是樓不知誰  
屬石刻亦無可攷

湖海詩傳

摘句 片石真存漢無絃亦賞音

武侯祠石琴

飽經棧閣千重險還對秦川一掌平

出陳倉

國朝詩人徵略卷三十二

三

國朝詩人徵略卷三十二

國朝詩人徵略卷三十三

番禺張維屏子樹輯

惠棟

字定宇號松崖江南元和人諸生

先生自幼篤志向學家多藏書日夜講誦自經史諸子百家雜說靡不津逮中年課徒自給陋巷屢空處之坦如乾隆十五年

詔舉經明行修之士總督尹文端公黃文襄公交章論薦有博通經史學有淵源之稱惠氏世守古學而先生所得尤深擬諸漢儒當在何邵公服子慎之間

撰有周易述易學易例古文尚書攷左傳補注九

經古義明堂大道錄禘說精華錄訓纂後漢書補

注九曜齋筆記松崖筆記松崖文鈔諸史會最先

生卒於戊寅五月年六十有二潛研堂文集

先生于易理尤精凡鄭君之爻辰虞翻之納甲荀

謂之升降京房之世應飛伏暨六日七分世軌之

說悉為疏通證明春融堂集

先生序吳企晉詩謂詩之道有根柢有與會根柢

原于學問與會發于性情二者兼之始足稱一大

家先生不多作詩而此論極精當聽松廬詩話

摘句 若使當年傳漢易王韓俗學久無存

蔡 隴

字文舟江南崑山人貢生官訓導

先生教人以躬行實踐讀書好古爲宗

春融堂集

先生臨終爲文以戒其子有云虛文無益末俗不  
經俱應捐除毋嫌駭聽倘旁觀未喻以爲子道有  
虧可取遺命示之先生此言實堪取法近時喪禮  
專尙繁文以侈費相高以美觀爲孝世俗之見難  
以破除惟賴有德望之君子以身作則爲鄉里先  
庶幾崇實黜浮不至流而日甚耳

松心日錄

摘句 長貧甘吏隱多病忝官箴

葛景中

字運乘號若湖江南崑山人貢生官訓導

先生教授諸生為詩學溫岐韋莊湖海詩傳

摘句 錦囊句好題新畫石鼎茶香讀異書

閒居賦就霜凝鬢夢友詩成月滿梁

尚有故交畱白社更無殘夢到紅樓

東方自昔常求米南郭於今且據梧

沙維杓

字斗初江南長洲人有耕道堂集

斗初與張崑南號兩布衣斗初隱於商來往江西

湖北間長髯巨顙如酒豪劍客湖海詩傳

摘句 樹近俯鶴巢燈遙辨漁艇

蔬圃半藥草禪榻多儒書

壁險復挂藤水清魚避網

岼高崩積雪船響犯流澌

### 張崗

字崑南號古樵江南長洲人有鶴健堂詩鈔

崑南隱於醫豐頤紅頰神情怡曠閒好古琴詩多

清和閒適之趣湖海詩傳



摘句 曉鐘雲外斷春樹雨中深

桃花一夜雨春水半帆風

天空一雁來胥口木落諸峰見洞庭  
老去杜陵猶作客病來摩詰愛逃禪

許 燦

字衡紫號晦堂浙江嘉興人諸生有晦堂詩鈔

晦堂以尊人辨駝官逋對簿甘州著燉煌集追事

白言歸杜門課徒著梅里詩輯三十卷

兩浙翰  
軒錄

摘句 湖雲多上樹山雨忽如烟

詞臣善頌元和聖小雅仍歌吉甫功

西極若徠千里馬東封請用一丸泥  
邊丁日課屯田麥使者星馳屬國瓜

### 高鳳翰

字西園號南阜山東膠州人官縣丞有擊林等集

西園工書畫豪於詩具經濟才則世罕知者山左詩鈔

病痺廢右諸任事以左手更號尙左生同上

南阜畫山水以氣勝善草書嗜硯著有硯史畫徵錄

西園以雁字詩受知于尹文端公公調任雲貴猶

行文布政司令遇缺卽題其愛才如此聽松廬詩話

摘句 愛民勿使驕驕則長戾氣吏勿使苦苦

則少生意

壯士愛寶刀名士愛寶硯

客是故人新白髮地經初到舊題詩

不妨李固終成黨到底曾參未殺人

自拂綠茸隄草坐菜花香裏看春山

落霞點出簪花格驟雨催成急就章

雁字

沈大成

字學子號沃田江南華亭人貢生有學福齋集

學子壯年在潘敏惠公思築幕府晚年偕惠徵君

寓官梅亭益以學業相砥礪三禮注疏杜氏通典

皆手自校勘丹黃爛然後館于江鶴亭春家編次  
詩文集共六十八卷無子沒後鶴亭刻以行世其  
詩出入唐宋杭堇浦太史謂以學人而兼詩人者

信也

湖海  
詩傳

摘句

遠水檣帆小孤村桑柘深

香泥雙屐滑春草一庭寬

邑小人稀風色緊江寒天濶雁聲多

萬事逡巡成白首一年容易又黃花

朱方藹

字吉人號春橋江南桐鄉人貢生有紅橋載酒集

春橋門第清華風神雅令詩賦之餘兼通畫理披

麻沒骨無所不工

湖海詩傳

標題 觀伏波銅鼓聯句一百二十韻

五古

摘句 竹色侵經閣松風和梵音

### 陶元藻

字龍谿號篁村浙江會稽人諸生有泊鷗山房集

篁村客揚州時盧抱孫轉運大會名士紅橋卽席

賦絕句十章一時傳誦倦游歸里於西湖築泊鷗

莊以撰述自娛有全浙詩話六十卷鳧亭詩話二

卷越彥遺編攷五卷越畫見聞三卷

兩浙輪軒錄

摘句 欲語性情思骨肉偶談山水悔風塵

我似漁人原泛泛誰稱桑者獨閒閒

野老門庭雲亦嬾荷花世界夢俱香

諫草文章唐宰相樓船弓弩漢將軍

廣州城樓

若計揚州二分月紅橋應占一分多

### 江 昱

字賓谷號松泉江南江都人諸生有松泉集

瀟湘聽雨錄江昱撰辨衡山岫嶼碑一篇考究詳

明知確出近時僞撰尤足祛千古之惑

四庫提要

摘句 斜日明孤塔寒江遶廢城

老蓮吹香酒初醒  
白月挂柳魚跳波

蟲鳴廢院僧鋤菜  
葉滿空廊客看碑

微力辛勤營壘燕  
殘聲酸苦別枝蟬

移居

### 馮公亮

字石門廣東南海人官福州府同知有白蘭堂稿  
先生弱冠補諸生食餼以明經貢成均北闈薦不  
售援例筮仕通判常州調漢中以廉幹稱擢奉天  
遵化州牧引

見以親老奏願歸養母蒙

特恩改授福州府理事同知人以爲誠孝能感動

至尊云後引疾歸結屋濠畔與朋舊觴詠其中

聽松廬文鈔

先生曾孫賡颺丁丑進士選庶常余妹婿也

松軒隨筆

摘句

閒愁似飛雪入酒卽消融

江雲秋化水天月夜通潮

民風淳樸藏官拙衙宇荒閒面嶺開

青蛙雨過桑園茂綠浦潮平鴨陣歸

羅元煥

字超掄號章山廣東南海人諸生有萬石堂稿

章山歲暮懷人絕句五十首陳仲鴻爲之註名曰

粵臺徵雅錄百年來詩人韻事略見一斑

聽松廬詩話



摘句 臯馬同時文士重荆高亡後酒人輕

王景

字日永廣東番禺人諸生有柳塘集

雍正乙卯舉鴻博未就

粵東詩海

摘句 會見南園增俎豆合憐東井聚星辰詩歌

易續千秋調姓字難磨一代人

喜後五子配享南園

五先生

陶璉

字夏重號東籬浙江嘉興人貢生有東籬詩鈔

夏重天才英異風發泉湧而筆之所至皆合於規

矩湖海詩傳

摘句 倚幌家家月開門樹樹秋

敗荷秋水驚疎柳夕陽蟬

把酒但將杯送老工書苦被墨磨人

徘徊破甑原無益嘆息炊桐竟不聞

父子名同高士傳公侯禮下布衣交

張棟

字鴻勳江南震澤人貢生有看雲吟稿

鴻勳情性和藹工于山水行滕所至羣訂編紵之

交詩中有畫然亦有畫不到處湖海詩傳

摘句 客至驚啼鳥人歸踏落花

山靜餘寒燒潭空響夜漁

流水聲中停客舫夕陽影裏挂漁罾

空山落木散秋影孤館月明生夜涼

陳華封

字祝三號復齋廣東順德人太學生有復齋詩鈔

獨漉先生孫世居羊城育賢坊以詩世其家杭堇

浦贈以詩云習嬾時欹枕甘貧早閉門粵臺徵雅錄

摘句 補天雖未能拈花曾點首有石狀如佛手先世所遺

苦持當日志論定百年身奉酬堇浦先生賜題先祖遺像

耿國藩

字介夫號湘門湖南長沙人太學生有素舫齋詩鈔

湘門上舍題素舫齋壁詩云背部臨濠靜不譁一

軒深築抵山家茶烟出戶常縈樹池水過籬欲漂

花小睡手中書未墮半酣窗下字微斜叢蘭不合

畱香久勾惹喧蜂入幕紗

隨園詩話

湘門悼亡詩云屈指于今廿載餘中間十二載離

居高堂今日悲于我子職能兼較勝余又悼李姬

詩云當時讀我悼亡詩未及終篇涕共垂今日記

將泉下去從頭說與女君知此二詩於缺陷中想

見湘門家室之淑

嶺海詩鈔

外大父耿湘門先生十一歲賦詩黃鶴樓有高低  
紅樹迷江渚斷續青山繞鄂州之句座客驚異稍  
長以飢驅橐筆之燕齊吳越爲諸侯客繼乃入粵  
業鹽筴遂家焉結屋濠畔顏曰素舫齋花竹圖書  
布置幽潔又有似兩軒取坡公語無事此靜坐一  
日似兩日意也性灑脫工書好爲詩一時粵中及  
游粵諸詞人咸樂與交邀月評花飛觴擊鉢佳辰  
令節坐客常滿然先生意中不輕許可所師事者

杭堇浦何西池兩先生友事者陳祝三華封馮箕

村公侯張紫峴九鉞數人而已先生每夜輒飲酒

數杯酒後隨意作大小字一夕燈下大書兒女債

完生白髮利名心澹愛青山十四字書畢目垂家

人以爲倦請息先生復提筆書還可支得住五字

少頃痰上端坐而逝年六十二聽松廬文鈔

馮潛齋太史爲湘門先生像贊云蒼松其神白璧

其質孝友辛勤信義超拔詩步白蹤文循歐轍素

舫棲遲長歌不輟論者以爲非溢美云同上

先君少孤貧湘門先生一見卽欲以女妻之人曰

國朝詩人卷之三十三

其家甚寒先生曰非爾所知也卒以女歸于先君  
是為吾母耿孺人先生歿未久二子及壻數人皆  
相繼下世存者惟先君人謂先生有先見云同上

標題 訓子五古 五十治棺歌七古

摘句 那識為歡處偏思已故人

紅翻東海三更浪翠立南溟萬點山浴日亭

肺病小蘇催煮酒吟聲偶佳為焚香

誰思失馬還來馬人若呼牛便應牛

病與老如膠見漆懶逢閒似芥投針

棺壙預為還製此可容消受一爐香自題真容

何士容

字南園江南江都人諸生有南園詩集

袁簡齋大令云金陵有兩詩人一為陳古漁一為

何南園陳詩矯健何詩清婉

羣雅集

摘句 閒因省事得老為課孫忘

茶苦有餘味蘭幽無驟香

月遲防睡早詩富補家貧

才于趨世拙詩到近情工

陳毅

字直方號古漁江南上元人太學生有古漁詩槩



古漁工詩好友尹文端督兩江欲延為鍾山書院

諸生說詩古漁呈詩有餓夫為將一軍驚句議遂

寢選有所知初二三集羣雅集

摘句 節隨新火改月與故人來

紅杏雨中村店小綠楊風外酒旗偏

未必世情如此薄須知秋氣本來清秋雲

### 方正澍

字子雲江南歙縣人諸生有伴香閣詩

方居士忘情仕進樂志衡門今之賈浪仙羅昭諫

也詩工于體物一聯一語唐人得之皆可名世何

止一一鶴聲飛上天與袁簡齋太史流寓金陵激  
揚風雅詩壇爭長照耀江東居士賃屋長干索居  
屏跡于時詞客罕有韻昂故袁有論詩絕句云金  
陵從古詩人少近有南園與古漁更有閉門工索  
句無人解扣子雲居

吳會英  
才集

標題 投壺三十韻

五古

弄盆子歌

七古

摘句 江遠帆如定風狂石欲飛

眾峰孤寺得一澗數邨分

煙蘿挂壁疑無路日月行空似有聲

蓮花  
峰

高閣紅扶臨礪樹小亭青受隔江山

風急忽疑星欲墮舟移如與月同行  
漁樵來往能行意仙佛虛無易得名  
空山雲與人爭路破寺風隨虎打門  
酒幔隔花人問路漁莊臨水鴨知門  
一院綠天栽竹地滿身紅雨折花人  
酒因賒得餅難滿書爲催成字易訛  
交廣易添離別恨學荒翻得性靈詩  
花事雨多俱寫意俗人交淺易忘名  
也知佳句原關命偏是庸流每忌名  
西去斜陽東上月一般花影有寒溫

徐大椿

字靈胎號洄溪江南吳江人

余弱冠卽聞吳江布衣徐靈胎有權奇倜儻之名  
不得一見庚寅七月患臂痛乃買舟訪之一見權

然年將八十猶談論生風

隨園詩話

二百年來名醫以葉天士爲第一臨證指南一書  
中多精要之語然係門人輩綴輯而成非先生手  
定學醫者必先明於靈素及仲景諸書乃有定見  
若初學而讀臨證指南吾恐其不善讀而致誤事  
也同時徐靈胎亦以醫名於時著有醫學源流論

蘭臺軌範傷寒類方難經釋諸書學識俱深然不  
及葉先生之變化他如江西喻嘉言極高明矣不  
及葉先生之篤實福建陳修園有卓識矣不及葉  
先生之小心至若張景岳於醫道未免粗浮其書  
功不補過而時醫多宗之無怪乎不死於病而死

於醫者之多也

聽松廬  
文鈔

徐靈胎有道情數首其刺時文一首有云案頭放  
高頭講章店裏買新科利器讀得來肩背高低口  
角噓唏甘蔗渣兒嚼了又嚼有何滋味此雖有激  
而言然世間但熟幾篇時文倖獲科第便自以爲

能讀書者不可不內省而自愧也

松軒隨筆

摘句 一生那有真閒日百歲仍多未了緣

滿山靈草仙人藥一徑松風處土墳

自題墓門

方秋白

字希文一字寄村廣東南海人有萍跡草

寄村好遊北至燕薊南極河仙足跡萬餘里

嶺海詩鈔

摘句 鐘寒鯨吼水海白蜃沉星

沙痕驚樹失陰火挾魚飛

紅日影中天地正青山呼後帝王尊

洛陽

過去事多成代謝到來人又感飄零孤忠

未可論成敗正氣還能亘日星

零丁洋

### 查岐昌

字藥師浙江海寧人諸生有吳趨江上諸集

藥師為初白先生孫詩句新異而散體文尤有法

度

湖海詩傳

### 摘句

澤國稻梁肥鼠雀海天雲雨混龍蛇

村居

何須解語能傾國自喜居卑不染泥

觀荷

流盡舊家簾幙影秦淮依舊水如羅

### 徐堅

字孝先號友竹江南吳縣人貢生有緝園詩鈔

友竹工隸書喜篆刻尤長山水游楚南依陸朗夫  
時朗夫病且貧而友竹盤桓不忍去至護其喪而  
歸世因此益重焉年八十餘乃卒

湖海詩傳

摘句 山靜傳齋磬林疎出茗烟

燕歸新雨後人去落花前

孤城背嶺千家暝萬派朝宗二水分

鳥啼深樹初催麥雨散低簷正熟梅

薛廷文

字鳴上號鹵齋浙江嘉興人有聽雪齋詩鈔

薛鹵齋五十未娶有除夕詩云獨送窮愁獨掃塵



一回除夕一傷神來朝記取年多少不敢分明說

與人誦此覺雉朝飛篇徑直乏味南野堂筆記

摘句 雪後春歸樹花前客到門

斷烟微有色殘雨漸無聲

荷花折得不連藕儂在湖時郎在城

### 陸 藝

字樹人雲南昆明人諸生有漱亭集

樹人以武將世家耽心細素與其兄藻對牀風雨

翰墨共娛江坪工詩樹人兼能畫溟人目為二難

陳大令文燦而外莫能及也湖海詩傳

摘句 野水明殘照村墟入暮烟

寒燈情話堪通夜暮雨離懷又到秋

張大進

字海門廣東番禺人諸生

海門博極羣書文筆奧衍會學使者出教誦粵人  
廢學海門不平奏記稱曾讀三千卷能背誦千卷

惟所試使者噤不發士林快之

嶺海詩鈔

標題

羅浮龍葱竹歌

七古

摘句 天地大父母諸子咸樹立胡爲自相賊恐

令真宰泣

雲樹有情人浩蕩水天無際月嬋娟

童 鉦

字二如號二樹浙江會稽人有二樹山人詩稿

鉦客河南修一省三十六縣志條例謹嚴紹興府志

二樹與同郡劉文蔚沈翼天姚大源劉鳴玉茅逸

陳芝圖結社聯吟稱越中七子鳧亭詩話

二樹善畫梅畫成輒題一詩詩亦佳故有萬樹梅

花萬首詩之句可稱二絕梧門詩話

畫梅極多自為詩云寫梅只合號梅癡長為梅花

過六時記得甲申元日集三千三百十三詩同上

古今好詩讀者每心知其妙口難說童一樹詩云

如鹽著水中其味飲者受可謂善於形容

聽松廬詩話

摘句 早煙山際重春霧水邊多

看花峰立帽問水鷺隨人

蟻閒緣水過蜂健負花歸

故交多老矣此別倍酸然

古木畱殘雪寒鴉守夕陽

斜陽樹老丹青嶺小雨雲低水墨天

湖雲挾雨當窗過春水浮天上樹來

花猶解媚開如笑水不忘情去有聲

捨身峰頂搜殘碣減食囊中買僻書

秋聲如雨不知處落月似霜還照人

詎有庚寅同正則敢誇丁卯是前生

黃盛

字穎之廣東南海人諸生

穎之十試九冠其曹晚以負才失路大去其鄉諸

同好徧訪之積十數年莫得也

嶺海詩鈔

摘句 楊柳春風軟桑麻夜氣溫此中有真趣難

與外人言

紅顏終白骨紫陌忽青蒿

但求閩苑三天近那識王都五府虛通天臺

### 楊 屋

字子載江西南昌人貢生有恥夫詩鈔

蔣心餘先生哀楊子載詩云亡友誰最賢早死痛

楊屋屋為將門子靈關世其守又云新詩自淘鍊

收縮筆逾陡又云別來得君書規戒多善誘觀此

可以知子載之為人矣聽松廬詩話

隨園詩話誤以何在田句為楊屋詩同上

摘句 莫為遠遊子遠遊母心悲遊子有懽顏母

悲無已時

君如再生世復我為朋友哭趙山南

雲影忽離地松聲時到門

春色遠來如舊約 國恩閒我是書生

繞盡亂山逢上巳作為遠客是今年

千里寒江一飛鳥半山斜日兩歸人

汪輒

字輦雲江西武寧人貢生有魚亭集

輦雲少孤貧刻苦向學躋直重氣誼江西詩徵

心餘又有哀汪輦雲詩云汪生東野儔五窮不可

送浩歌振頽響其才實天縱袁簡齋云乾隆初江

西有四子楊屋汪趙由儀蔣士銓是也聽松廬詩話

摘句 人生不立業倉卒同蜉蝣

天上與人間佳期皆草草七夕

斷崖懸朽棧孤影在斜曛

### 彭雲鴻

字夷鵠號儀庵江西寧都人貢生有咄咄吟諸集

儀庵以優貢補教習選訓導卒著有情話編江西詩徵

彭儀庵詠介之推云一朝賞弗及抱憤去邦國偕

隱愚老親火烈山盡赤忠孝兩無憑舉動成褊賊

語雖翻案未為過刻聽松廬詩話



摘句 我不卽子曰把子詩子不見我出入倭遲

天高月白可以相思

猶可忠言悟應無亡國人

甲屈原

貧妻莫笑張儀舌老母殊憐李賀心

幾人能了生前事作客空添別後情

平生自擬無懷傳他日誰題有道碑

人言卽是封侯相三十年來記不真

成婦詞

劉文蔚

字豹君號柵亭浙江山陰人貢生有石颿山人集  
山人性真摯戚友告急雖家無餘資必力圖以應

舉優入太學譽滿都門以親病南返教授里中門

下士科第相繼而山人獨以明經老

越風

摘句 程無十里遙徑有千盤曲

水勢趨藤縣山光接柳州

潯城北樓

一笑推篷雲亂飛遠天如夢青山小

鱷浪白浮番舶遠佛桑紅壓戍樓開

### 朱 箕

字二亭號市人江南江都人諸生有二亭詩鈔

二亭居揚州城北陋巷狹室而其胸次超然塵埃

之外放情山水吟詠自適以至老死

惜抱軒文集

揚州詩人窮而在下而能一洗俗調者近惟如臯

江片石江都朱二亭二人盟鷓傲筆談

金徵君農客邗上老且病市人延之千家供湯藥

既歿杭太史鳩金治喪事以餘金畀市人市人悉

舉以畀徵君之子其高行古誼如此蘇汀錄

摘句 天水同混茫宇宙妙闔闢曉登焦山絕頂

佳節又寒食故人誰少年

老孤湖海志貧見雪霜心

練飛下界乾坤小天挂中峰日月低

烟澄黛色分齊魯松作濤聲挾雨風

江干

字片石號黃竹江南如臯人貢生有片石詩鈔

片石偃蹇海上與徐荔村冒芥原仲松嵐宗杏原

陳小新徐弁江吳梅原冒柏銘結香山吟社

羣雅集

摘句 開過牡丹春亦倦啼殘杜宇客無歸

一去又成經歲別重逢猶是故人寒

寒食年年誰上塚一編詩草當兒孫

劉南廬墓

蔣業鼎

字升枚江南長洲人諸生

升枚風神俊雅竟體芳蘭與同縣朱桂泉人稱雙

璧祖樹存州牧父盤猗司馬皆以風雅名家居桃  
花塢東有倚梧巢西疇閣交翠堂諸勝統名繡谷  
康熙己卯尤西堂侍講年八十二樹存約爲送春  
之會烏目山人王石谷寫長卷記之時沈文愨公  
年二十七耳至乾隆己卯文愨八十七升枚佐其  
父復爲前會名流至者二十餘人作圖者爲林屋

山人王存慄人尤以爲佳話

湖海詩傳

摘句 白雁低寒影黃河急暮流

遠樹低青嶂孤城枕碧江

微月澹樵逕疎烟生竹扉

朱荏恭

字肅徵號桂泉江南長洲人有雅材堂初稿

桂泉居桐溪浜其前爲疎雨樓後爲蘋花水閣子  
與鳳階策時損之來殷升枚過從來往故詩酒之  
盛著于吳下後予輩入都勝游難再及戊戌南還  
樓閣易主舊雨亦多物故循覽遺詩不勝聞笛山

陽之感

湖海詩傳

摘句

一逕杳無人  
攜樽對松酌

旗亭酒罷潮生候  
水驛帆開月上時

國朝詩人徵略卷三十三

李 熾

字晴沙湖北安陸人諸生有僅存詩稿

余年舞勺卽好聲律見名人詩輒於私處繙閱加  
丹黃二十五以詩受知於任邱邊先生越二年走  
涇原復南抵粵命途多舛所至齟齬壬寅春送表  
兄張省菴戍伊犁與桐鄉朱端書湘潭陳峻峯太  
倉王晉源上元陳賡軒相酬和適徐炳菴以部曹  
襄軍事因就正焉謬蒙印可存如千首惜西行諸  
作爲人竊去良可恨耳詩未工特以性之所近境  
之所歷存爲異日之驗使後人知所遭若此猶不



廢筆墨或因以自勵未可知也僅存詩稿自序

晴沙先生祖中憲公官太守所至有惠政先生為廉吏孫慷慨好義以親戚之故崎嶇出關往返數萬里其詩存不多頗有奇警語如登華山云綠厓轉層磴百折皆樹杪又云垂眸看雁背低首唾虎穴又云壑風忽逆擊雲響同奔泉諸峯露頂髻如海浮鳧蓮微茫一積氣為秦晉豫燕有筆搖五嶽目隘九州之概聽松廬詩話

先生之孫碧山太守壬午同年也述先生中年艱苦晚境安閒好吟詠日飲酒數杯尤喜垂釣人稱

釣魚先生碧山登賢書先生猶及見之

松軒隨筆

標題

華頂祝晴適與晴會

五古

觀大獵歌

七古

摘句

不知所歷高漸覺近山小

登華山

頭承前人尻脚蹴後人額一身委十指氣

促不得歇

自千尺幢至玉女峯手攀鐵索故有十指句

登華必

冠裳星斗氣耳目海天風

嶽廟

閒身歸亦客知己即為家

書卷蟲鄰里苔痕雨化身

敢謂英雄多俠氣不教兒女累情腸

萬里飛來無肉食隻身歸去有綈袍

朱荏恭

字肅徵號桂泉江南長洲人有雅村堂初稿

桂泉居桐溪浜其前為疎雨樓後為蘋花水閣予  
與鳳階策時損之來殷升枚過從來往故詩酒之  
盛著于吳下後予輩入都勝游難再及戊戌南還  
樓閣易主舊雨亦多物故循覽遺詩不勝聞笛山

陽之感 湖海詩傳

摘句 一逕香無人攜樽對松酌

旗亭酒罷潮生候水驛帆開月上時

國朝詩人徵略卷三十四

番禺張維屏子樹輯

翁方綱

字正三號覃谿順天大興人乾隆十七年進士官  
內閣學士左遷鴻臚寺卿有復初齋集

覃谿年甫及冠已入詞垣而精心績學宏覽多聞  
所著兩漢金石記剖析毫芒參以說文正義幾欲  
駕洪文惠而上之近年研精經術嘉慶己未予入  
京師見其方攷禹貢顧命兩篇諸儒同異相與辨  
難斷斷竟日詩宗江西派出入山谷誠齋間雖嘗

仿趙秋谷聲調譜取唐宋大家古詩審其音節刊  
示學者然自作亦不能盡合也書法初學顏平原  
繼學歐陽率更隸法史晨韓勅諸碑生平雙鉤摹  
勒舊帖數十本北方求書碑版者畢歸之

湖海詩傳

自漁洋先生取嚴滄浪以禪喻詩謂詩有別才非  
關學也於是格調流於空疎神韻淪於寥闕矣吾  
友覃溪蓋純乎以學爲詩者歟自諸經傳疏以及  
史傳之攷訂金石文字之爬梳皆貫徹洋溢於其  
詩雖所服膺在少陵瓣香在東坡而初不以一家

執也

陸廷樞撰復初齋詩集序

覃谿先生精心汲古宏覽多聞於金石譜錄書畫  
碑版之學尤能剖析毫芒如肉貫弗生平論詩謂  
漁洋拈神韻二字固爲超妙但其弊恐流爲空調  
故特拈肌理二字蓋欲以實救虛也復初齋集中  
詩幾於言言徵實使閱者如入寶山心搖目眩蓋  
必有先生之學然後有先生之詩世有空疎白腹  
之人於先生之學會未窺及涯涘而輕詆先生之

詩是則妄矣

聽松廬  
文鈔

雍正十一年癸丑八月十六日先生生 乾隆九  
年甲子先生年十二是年六月補順天府學生簪

花日大雨家無雨衣以油紙覆衫上 十二年丁

卯先生年十五是年鄉試中式舉人 十七年壬

申先生年二十是年會試中式進士會榜在九月

殿試改庶吉士先生自編復初齋詩集於是年始

十九年甲戌先生年二十二是年散館授編修

二十四年己卯先生年二十七是年秋奉

命典試江西 二十七年壬午先生年三十是年奉

命典試湖北 二十九年甲申先生年三十二是年秋奉

命視學粵東 三十六年辛卯先生年三十九自甲申秋

至辛卯秋視學役竣凡三任八年 三十七年壬

辰先生年四十是年春二月還都 三十八年癸巳先生年四十一是年冬得宋槧蘇詩施願注本因以寶蘇名室 四十一年丙申先生年四十四是年冬奉

命充文淵閣校理官 四十二年丁酉先生年四十五是年除夕前一日

賜柑橘橙有恭紀詩 四十三年戊戌先生年四十六是年七月十八日

賜荔支有恭紀詩 四十四年己亥先生年四十七是年秋奉



命典試江南 四十五年庚子先生年四十八是年秋扈  
蹕灤陽 四十六年辛丑先生年四十九是年擢國子監  
司業閏五月擢司經局洗馬 四十七年壬寅先  
生年五十是年馳贈曾祖父母行焚黃禮敬述有  
詩自註云四品以下向無馳贈曾祖之例茲出

特旨蓋異數也 四十八年癸卯先生年五十一是年正  
月蘇詩補注刻成八月奉

命充順天鄉試副考官 四十九年甲辰先生年五十二  
是年春閏三月遷少詹事秋扈

蹕灤陽 五十一年丙午先生年五十四是年秋奉

命視學江西 五十二年丁未先生年五十五是年嗣君

宜泉太史樹培中式進士選庶吉士 五十四年

己酉先生年五十七是年冬視江西學役竣還都  
五十五年庚戌先生年五十八是年春扈

蹕山東奉

勅充曲阜釋奠分獻官冬十月

上御乾清門先生以學士承

旨嗣君宜泉太史以檢討侍班有敬述詩 五十六年辛

亥先生年五十九是年春隨

駕往盤山冬奉

命視學山東 五十八年癸丑先生年六十一是年五月

登泰山有登岱詩 五十九年甲寅先生年六十

二是年春扈從天津先生藏書三萬卷是冬有自

題三萬卷齋詩 嘉慶元年丙辰先生年六十四

是年春正月四日

賜千叟宴先生有恭依

御製詩韻詩二首自註云筵上蒙

賜

御製詩一卷錦綺十卷綵箋二卷玉嵌如意一柄紅琥珀

朝珠一串湖筆五硃墨一周提梁白硯一金合一

齋戒牌一荷包二對杭緯二匣金字壽杖一  
四  
年己未先生年六十七是年春授鴻臚寺卿  
六  
年辛酉先生年六十九是年寓馬蘭峪溫肄三傳  
三禮久不作詩冬爲季子樹峴締婚李氏  
九年  
甲子先生年七十二是年畱題馬蘭峪寓齋詩有  
三載枝棲荷

主恩暮春悵別緒誰論之句又有蒙

恩家居以退圃自名其齋詩夏重赴泮林宜泉太史隨侍  
有敬拜宮牆詩  
十二年丁卯先生年七十五是  
年秋奉

旨賜三品銜重預鹿鳴宴有紀

恩述懷詩 十五年庚午先生年七十八是年宜泉太史

下世先生有哭培兒詩 十九年甲戌先生年八

十二是年四月

賜加二品銜重預

恩榮筵宴有恭紀詩 二十三年戊寅先生年八十六是

年 月 日先生卒 屏欲撰先生年譜而未

得其詳先生既歸道山凡家傳墓誌屏未獲見茲

就詩集中舉其大略而詩集僅刻至第六十六卷

亦闕而未全俟他時訪得其詳擬補成之

同上

嘉慶丁卯四月屏入都時覃谿先生罷官家居海  
內騷壇巋然魯靈光也顧朋輩中每言先生持論  
太嚴門牆太峻是以屏於先生門下雖有淵源未  
往請見九月一日先生嗣君宜泉太史忽見訪言  
家君知子來已數月曷爲不往相見今日特命僕  
來奉約明晨便往勿遲也屏諾之翼日往見先生  
顏色甚歡謂屏曰前年伊墨卿攜子詩一冊示余  
余意中早有一張南山乃今始得握手於蘇齋耶  
於是共几對談辱承獎藉並追話魚山葯房在都  
時事又詳詢二樵生平而於魚山之歿則尤嗟悼

不已越日屏賦詩呈先生是以有獎許鯁生詩彷彿馮子筆爨桐賞音慙墓草餘涕澀之句而先生亦賦五律三章見贈詩云南山舊墨緣韶石響鳴絃

鳴絃峯英德南山也江碧深畱鏡榕陰記泊船詩盟圓似

夢易說了非禪石汝礪與坡公談在英德南山紹聖前題字重

拈四十年山志陶貞白松濤李少溫鶴銘笙籟苔

慧麓篆煙痕淪乳來參味青蒼許對論多生耳根

業訊爾妙之門為南山臨陽冰聽松篆風抗南園後魚山又

葯房何區五家派莫誤二樵狂酣放精微處崇深

乘尺量於蘇窺杜法詩境乃升堂又為屏題聽松

廬畫卷云松石本無意苔岑成夙期竟憑真氣合  
不恨淡交遲萬谷笙鐘起千峰雨雪時琅然鸞鶴  
語卷外許誰知以爾松廬境參予石畫軒研屏相  
澹對濤籟卽清言雪乳香浮瓊葛蒲綠結盆琅玕  
芝草長息息見深根屏南旋後先生數郵書垂問  
又見寄詩云千里金山張山南叩笈津一源蘇杜孰  
推論杜惟質厚原無訣蘇取雄奇恐未真故紙何  
關拈笑處焚香要共會心人樂蓮裳吳蘭雪隔巷精微  
訊但卓錫來未是貧末句望屏北上勲拳之意溢  
於楮墨今先生詩翰手蹟皆藏篋中每一展覽如



親杖屨愴懷知己追溯典型不禁泫然隕西州之

涕也聽松廬詩話

由羅入浮有嶺甚峻余名之曰分霞嶺先生寄題

分霞嶺詩云羅浮二山界舊名佛子凹蓬萊之左

股鵬羽掣六鼇到此蒼翠間風雨氣乃交分霞名

初勒五色鳥所巢遠寄五字題墨湧千峰高笑酬

張子意補昔伊守勞昔伊墨卿守惠州有書來云羅浮山中未有覃溪詩今此

補琅然少霞銘聲接大海潮又有寄題雲泉山館

詩今勒山館壁又聞屏遊羅浮見寄詩有南山結

伴入羅浮袖有松濤萬壑秋之句同上

標題

紀連州山水六百四十字

古五

拱北樓刻

漏歌

古七

九曜石歌

古七

書萬季野明史

列傳手彙殘本後

古七

永樂大典餘紙歌

古七

閔正齋奉饌圖

古五

登攝山最高峰

頂作歌

古七

文信國琴歌

古七

古刺水歌

古七

六君子圖歌

古七

石鼓歌

古七

趙子

固落水蘭亭卷

古七

小滄浪月夜作

古七

摘句

杜詩於楚終蘇詩於楚始

瀑布三十丈分瀉八九灣灣復以湖名寺

乃開中間

一夕枕簟涼海氣颯而入四窗如浮動萬壑乃呼吸

百里積雪光晶晶浮遠天宿麥萬頃綠劃破瓊瑤田

風涼遠岬笛月上昏林磬此時波不興下一上綠淨

北方三月雨其價無與酬點滴土生香何減珠玉投所以雨曰膏自彼雲之油

三折五折水樵人野人屋路古氣澹泊時遇杉與竹

闌干十二曲海綠搖一片  
流水答松風空山響碁子  
碧瀾寸寸色澹與空光會  
閱世三十年方知學爲福  
下上歐韓柳周流蜀楚淮  
好山如善抱老柳不知寒  
小紅深淺蕾新綠短長條  
露翻垂葉響水與立苗齊  
草痕纔過雨松頂有畱雲  
神來非假力意到不容刪

海山正青海水黑水閒十丈水花白千頃

萬頃烟茫茫中見扶桑一痕碧

渡海中流作

烟雲籀篆文字禪竹樹燈光風露氣

奔流萬里河之曲上下千年漢以來

贈錢禔石

春社雞豚桑葉雨晚陽籬柵菜花風

沙村綠出潮痕外野水青迴蜃氣中

冉冉晚雲昏似墨濛濛春雨綠如烟

三千里外挑燈話四十年前聽雨心

寄內

今我來思還視昔樹猶如此況於人

寒柳

錢載

字坤一號稹石浙江秀水人乾隆十七年進士官  
禮部侍郎有稹石齋詩集

稹石襟情蕭曠真率自如性豪飲常偕朱竹君學  
士金輔之殿撰陳伯恭王念孫兩編修過余冬夜  
消寒卷波浮白必至街鼓三四下時竹君推戴東  
原經術而稹石獨有違言論至學問可否得失處  
稹石輒發赤聚訟紛拏及罷酒出門斷斷不已上  
車復下者數四月苦霜濃風沙蓬勃餘客佇立以  
俟無不掩口而笑者善鑒別書畫尤工繪事晚年

致仕歸藉以給朝夕乾隆庚戌年八十三猶爲子

傲黃鶴山樵長林修竹極雨葉風枝之妙湖海詩傳

稹石侍郎雍正壬子副榜乾隆丙辰舉鴻博報罷

至壬申成進士年四十五矣是年會試在八月香

樹先生賀詩云刻成楮葉廿年遲著論韓公伸紙

時朵殿爭看和氏璧瓊筵笑插菊花枝注云今年

會試題卽廿年前中副榜題也與退之不貳過論

題事相類梧門詩話

稹石詩以博大爲宗神景開闢不愧鉅手南野堂筆記

錢稹石云三百篇都是疊此語可參香石詩話

稗石先生詩不名一家大要以清真鏗刻爲主有時或人於澀滯而必切事以杼辭有時或出以纖新而必切景以造句凡詩中空架子假門面之語皆埽而空之故集中時有獨到處而述菴司寇乃謂其詩率然而作蓋未細觀其全集也

聽松廬詩話

稗石七律偶舉其一如到家作第二首云久失東牆綠萼梅西牆雙桂一風摧兒時我母教兒地母若知兒望母來三十四年何限罪百千萬念不如灰曝檐破襖猶藏篋明日焚黃祇益哀字字沉實字字動盪其佳處未嘗不從古人來却能于古人



之外自成面目同上

又如宜亭新柳第四首云寶花倉口起東風雞唱  
星懸賦惱公笛裏關山今是淚梢頭明月本來空  
一聲玉折涼州怨萬里雲陰杜宇紅歸去傷心原  
有路依然水驛綠烟中句句賦物却句句是悼人  
性情風調一氣鎔成尤須看其真氣貫注同上

標題 上巳登平山堂古 滄浪亭古 插秧古

板罽古 馬文毅公彙草辨疑歌古

宿雄縣傲孟貞曜體古 僮歸古 首古 第十六

首 興隆店古 寄善元樗于南窪五首

古七 天佑助威大將軍歌古七 紅衣大

始 二硯歌古七 黃文節公小像古七 檀

樂草堂海棠花歌古七

摘句 山川愛玉璞草木驚春雷元氣有必洩豈

得長胚胎

天行四時德要使生物康生生伏物害遂

乃殺以霜冰雪除衆毒泰然復春陽

出土青見根千尋削巨凸或皆側疊成石

與石相切

豈無一刻心豈無一事知迂疎偃仰謝薄

弱蹉跎隨古賢傷不遇遇矣今何辭

露氣溼松竹無風滴如雨

路隨崖數盤人與地俱瘦

天影淺深水鷗聲前後山

人氣得涼定市聲隨笑來

楊柳影邊水鷺鷥飛處風

尚有平生意今成未盡言

清氣天臨地遠情江送山

聖自先尼父風還踵伯夷

柳下惠墓

天皇帝居高理太皞勾芒報政成

浮生那必關天地轉瞬真憐卽古今

老嫗古祠盃玦火羣兒高阜紙鳶風

殘山剩水春三閣燕子桃花酒一杯何限

斜陽入詩句笑君猶爲昔人哀

早禾渴雨雨而雨修樹藏山山復山

出城樓閣連山起對岼人家兩郡開

武昌

三揖三終三讓禮杖鄉杖國杖朝人

摯虞禮自心喪議宋玉魂終像設招

扇影衫痕秋水上桺絲荷蓋夜燈前

掌謀蓮幕書生力拜慶萱堂孝子身

送王述菴

寧申岐薛亭臺里車馬衣裳士女風樂遊原

先生論詩喜講句法句法中喜講疊法如此聯一字一頓竟可謂之七疊矣

蠟屐唾壺紛士女投鞭麾扇此江山秣陵

春物儘隨新歲見舊情安得故人言

困學前惟王伯厚日知近有顧亭林

插架圖書鄴侯軸滿庭風露趙昌花

香踰佛土優曇烈晚壓閨人末麗寒吐必落索

此卽晚香玉也粵人呼爲玉簪其實玉簪另是一花

惆悵城西南路熟百年中又一回來

假使桃花也蘇姓屬他小小屬髯公

梁同書

字元穎號山舟浙江錢塘人乾隆十七年進士官侍講

文莊生二子長卽公文莊未達時家故貧居鳳皇山麓包夫人夜織公兄弟方幼戲于豸虎突入戶夫人驚絕旣蘇視兩兒戲如故問之曰有大獸來四顧而去亦不知爲虎也

鑑止水齋集

嘉慶十二年丁卯公重宴鹿鳴加翰林院侍講學士銜時海內重與宴者皆止加虛銜惟公獨具官名蓋公耆德清望聞於

天聽久矣公治生頗纖悉人有緩急拯濟無所吝杭俗好  
華靡喪車必以影神樓前導惟公家一依禮制儀  
從外無浮飾二氏之徒不入門十六年公患腦疽  
危篤見有人持楹帖入其句曰萬里煙雲開嶂戶  
一天風雨護神鑪病遂愈逾四年至二十年卒年  
九十三卒前數日自書訃筆法蒼勁如平時公書  
法顏柳中年用米法七十後愈臻變化純任自然  
日本國有王子好書以其書介舶商求公評定琉  
球生自太學歸國踵公門乞一見公以無相見儀  
却之其人太息曰來時國王命必一見公而歸今

不可見奈何因可公書一紙日持是以復國王耳

公論學書大旨具於與孔谷園及張芑堂兩書上

山舟性不近婦人不宴客亦不赴人之宴故余寄

詩云一飯矜嚴常選客半生孤冷不宜花隨園詩話

摘句 茅堂開三間以書作襟背左旋而右抽上

瞭或秀睇

北人麥爲飯炎毒苦難散生豚勝梨頭涼

冷沁肺葉蘿蔔

登仙直是尋常事雞犬由來亦上天反遊仙

上界不聞阿堵貴道人偏要鍊黃金



畢竟人間勝天上不然劉阮不歸來

盧文昭

字紹弓號磯漁浙江仁和人乾隆十七年

賜進士第三人官侍讀學士有磯漁詩藁抱經堂文集

官中書十年讀經史皆徧以朱筆點定訛字提督

湖南學政以條奏學政事宜降調告養歸歷主鍾

山崇文龍城諸書院講席取舊時校正各書擇尤

要者如經典釋文孟子音義逸周書白虎通等書

次等授梓著述已刻者儀禮注疏詳校鍾山札記

龍城札記未刻者廣雅注釋

兩浙輟軒錄

紹弓官京師與東原交善始潛心漢學取易禮注

疏呂氏讀詩記魏書宋史金史新唐書諸本脫漏

者蒼萃一書名曰羣書拾補

國朝漢學師承記

紹弓爲敬甫先生之子馮山公之外孫桑跋甫之

壻故其學有本原

松軒隨筆

摘句 交憐同臭味貧有好容顏

湯盤禹鼎古有器今其在者祇文字世間

何物最堅牢金石猶然遭失墜固知古人

絕愛名亦望後人能好事

讀金石錄

入座山光全勝畫隔簾人影總疑花

周大樞

字元木一字元牧浙江山陰人乾隆十七年舉人  
官教諭有居俟堂集

詩文高勁秀出力追古則

廷試日瘧疾未愈書多所遺落不得入等詞科

果毅公延為上客每公餘命講通鑑數則隨園詩話

標題 隆福寺觀市一百韻古 贈子才古

摘句 夕陽明晚稻秋水倒疎花

成佛未甘居謝後論文那得在盧前

浪說儒門羞五尺只今江左幾夷吾管仲墓

陸 燿

字朗夫號青來江南吳江人乾隆十七年舉人官  
湖南巡撫有切問齋集

公舉京兆補中書入軍機房公在樞垣傑直至日  
晡猶不退有急務立辨以故大學士傅文忠公屢  
薦公以戶部郎中補登州府知府其守濟南也上  
書請截畱南糧爲積貯計任河道時上書請疏泉  
源增修月河爲臬使時以徒犯罪輕請免解司以  
省苦累甲午壽張縣王倫作亂距運河甚近有欲  
閉城者公不可曰寇未至先閉城門是示之怯也

且鄉民爭入城何忍棄之乃募鄉兵拒守而身自坐城闔彈壓稽察賊知有備不敢南向撫楚時奏

官員凡親年七十雖有次丁俱許終養一時中外

官歸養者千餘人

小倉山房文集

朗夫爲湖南巡撫時總督以閱兵抵長沙朗夫迎謁畢還署總督鈕祜祿君特昇額來候直入解中方午食見所食皆菽乳菜蔬訝之曰天不雨地方官戒殺清齋故所食如此總督素豪侈聞語瞿然詈其奴曰吾此來傳舍酒肉如山何不以祈雨告耶歸寓悉撤其豐腆人羨總督之知過而益歎君

之清德感于人者速也

湖海詩傳

朗夫先生所輯切問齋文鈔嘉惠後學不淺其自序有云道備於經既有漢之箋故唐之義疏宋之章句微言大義已可無憾而復擇摭細瑣抉剔幽隱紛如聚訟無益毫毛此何爲者也道猶路也路有實徑適越者必南轅之燕者必北轍今舍而不由閉戶而談天道高座而說明心學案語錄之書日出而不窮異同宗旨之辨相攻而不已高明者墮入禪宗篤實者窘於應務此又何爲者也云云余深有契乎其言蓋講攷据而人於瑣碎談心性

而墮於虛無皆無裨於實用也知此則知切問齋

文鈔一書亦期於有用而已聽松廬文鈔

摘句 酒闌辭歲後人靜獨吟時除夕

苛節刪於相熟後淡懷長似訂交初

### 阮葵生

字寶誠號吾山江南山陽人乾隆十七年舉人官

刑部侍郎有七錄齋集

辛巳會試取中正榜授內閣中書軍機司員處行

走補刑部主事諸城劉文正公告同列曰阮某選

西曹總讞事有人矣明年總辦秋審有兄被殺而

父受賂私和弟首其事證父以賄擬徒公判曰爲  
兄洩憤手足之誼雖全陷父充徒恩義所傷實重  
使依前擬不特父不能無憾於子子亦何能一息  
自安應改子首如父自首例令其弟代父充徒則  
無媿兄弟之義亦不賊父子之恩矣

孽經  
室集

吾山司寇撰茶餘客話三十卷戴蕨塘爲選十二  
卷仿畢昇活字板印行蕨塘謂其記前型搜逸事  
攷證典物多有未經人道者余謂卽擬諸漁洋池  
北偶談數種亦正不多讓也

松軒  
隨筆

摘句 真成湖上烟波客苦戀江南橘柚天





國朝詩人徵略卷三十五

番禺張維屏子樹輯

紀昀

字曉嵐一字春帆號石雲直隸獻縣人乾隆十九年進士官至協辦大學士諡文達有紀文達公集公貫徹儒籍翊通百家

高宗純皇帝命輯四庫全書公總其成凡六經傳注之得失諸史記載之異同子集之支分派別罔不抉奧提綱溯源徹委所撰定總目提要多至萬餘種攷古必衷諸是持論務得其平

擘經室集

世爲河間著姓祖天申有善行父容舒官姚安太守河間爲九河故道天雨則窪中汪成巨浸夜有火光天申夜夢火光入樓中而公生火光遂隱人以爲公乃靈物托生也少而奇穎讀書過目不忘夜坐暗室二目如電光不燭而能見物比知識漸開光卽斂矣年二十四乾隆丁卯科解元甲戌成進士授庶吉士散館授編修己卯充山西鄉試正考官壬午提督福建學政戊子授貴州都勻知府晉侍讀學士緣事呈誤發烏魯木齊効力辛卯召還授編修三十八年擢侍讀

命爲四庫全書館總纂官丙申授侍讀學士充

文淵閣直閣事日講起居注官己亥擢詹事旋晉內閣學士壬寅授兵部右侍郎仍兼直閣事改任不開缺乃異數也甲辰充會試副考官壬子畿輔水災奏請截留南漕萬石設十廠賑饑全活無算嘉慶元年丙辰充會試正考官轉兵部尙書癸亥六月以八旬開秩

上遣官賻

上方珍玩賜之是年奏婦女猝遭強暴捆縛受污不屈見戕者例無旌表臣謂捍刃捐生其志與抗節被殺

者無異如忠臣烈士誓不從賊而縶縛把持雖使  
跪拜可謂之屈膝賊廷哉請

敕交大學士九卿科道公議與未被污者略示區別量子  
旌表大學士等議奏如兇手在兩人以上顯係孱  
弱難支與強姦被殺者一體予旌飭交各督撫勘  
明情形請

旨定奪

報可乙丑正月奉

旨調禮部尚書協辦大學士加太子少保管國子監事十  
五日卒於位年八十有二

賜祭葬

子諡文達公於書無所不通尤深漢易力闢圖書之謬

四庫全書提要簡明目錄皆出公手大而經史子集

以及醫卜詞曲之類其評論抉奧闡幽詞明理正

識力在王仲寶阮孝緒之上可謂通儒矣胸懷坦

率性好滑稽有陳亞之稱然驟聞其語近於詼諧

過而思之乃名言也

國朝漢學師承記

或言紀文達公博覽淹貫何以不著書余曰文達

一生精力具見於

四庫全書提要又何必更著書今人目中所見書不

多故偶有一知半解便自矜爲創獲不知其說或爲古人所已言或爲昔人所已駁其不爲牀上之熱屋下之屋者蓋亦鮮矣文達之不輕著書正以目逾萬卷胸有千秋故也或又言文達不著書何以喜撰小說余曰此文達之深心也蓋考據辨論諸書至於今已大備且其書非畱心學問者多不寓目而稗官小說搜神誌怪談狐說鬼之書則無人不樂觀之故文達卽於此寓勸戒之方含箴規之意託之於小說而其書易行出之以諧談而其言易入然則閱微草堂筆記數種其覺夢之清鐘

迷津之寶筏乎觀者慎無以小說忽之

聽松廬文鈔

姜西溟不食豕紀曉嵐不食鴨自言雖良庖爲之亦覺腥穢不下咽且賦詩云靈均滋芳草乃不及梅樹海棠傾國姿杜陵不一賦以梅花海棠爲比鴨又何其幸也嗟乎嗜好愛憎之間有難強者豈惟口味哉詩文亦然

聽松廬詩話

標題 題福建將軍平海圖古十一月初一日

渡黃河古 建陽城外謝疊山賣卜處古

建溪二十四韻效昌黎體古

摘句 讀書加遊山觸目皆可悅



置身豈不高時有蹉跌慮

貴賤皆有營百歲誰得閒但使妄念淨卽

爲善閉關

昔未屬我前閱主已無數過此落誰手應

亦聽所遇且隨現在緣領此當前趣

當年爭洛蜀此外付金遼

白溝河

人懷見明月侍坐得春風

全收月窟歸封內原有星弧在掌中

西域入朝

窮荒更遣蟠桃使降表連收貝葉文

宿衛舊聞唐頡利衣冠今賜漢呼韓

由來六職分司馬況值諸戎貢旅獒

杜詩韓筆都堪愛王後盧前恐未安

甲辰會闈

壽如君爽祥符驗學比甘盤道脈尊

壽蔡葛山

蜀道正需貔虎將此中可有郭汾陽

武會試

古來名將惟郭汾陽以武舉出身

應知今日持衡手原是當年下第人

壬戌會闈

此日歐梅欣共事向來韓范本無爭

曲江春宴花無數遼海秋風淚幾行多少

遺珠收不盡中宵輾轉漏聲長

千古文章雖有價一時衡鑒豈無差

名士爲官原灑落詞人垂老半飢寒

車徒小駐三义路童稚爭看一品衣

時日暮微

寒余衣紅哆囉呢

王維早貴襄陽老俱是開元第一流

朱筠

字美叔號竹君順天大興人乾隆十九年進士官

侍講學士左遷編修有笥河文集

先生初爲諸城劉文正公所知及督安徽學政會

詔求遺書先生奏言翰林院貯有永樂大典內多有古書

世未見者請開局使尋閱且言搜輯之道甚備時

文正在軍機處顧不喜謂非政之要欲議寢之而  
金壇于文襄公獨善先生奏與文正固爭執卒用  
先生說上之

四庫全書館自是啟矣先生入京師居館中纂修日  
下舊聞未幾文正卒文襄總裁館事先生顧不造  
謁又時以持館中事與意迕文襄大憾一日見

上語及先生

上遽稱許朱筠學問文章殊過人文襄默不得發先生以  
是獲安其督福建學政逾年

上使其弟珪代之歸數月遂卒先生爲人內友於兄弟而

卷之三十三

外好交遊稱述人善惟恐不至後進之士多因以

得名尤喜小學勸人爲學先識字語意諄勤去而

人愛思之惜抱軒文集

上命開四庫全書館凡十餘年而書成於是人文炳曜遠

邁唐宋而其始實自君發之春融堂集

四庫全書得于永樂大典者凡五百餘部皆世所

不傳之本先生一言而此五百餘部之書其精神

心力得以復見於世嗚呼可謂盛業矣然非遭逢

聖主稽古右文儒臣亦曷由有此盛業哉聽松廬文鈔

標題 平定準噶爾恭紀四言百韻

摘句 帆如不動暮天沒  
岍竟欲斜秋水流

王鳴盛

字鳳喈號禮堂江南嘉定人乾隆十九年

賜進士第二人官光祿寺卿有耕養齋集

乾隆十二年鄉試以五經中式時沈侍郎德潛門下吳泰來趙文哲張熙純錢大昕皆以博學工詩文稱而咸推鳴盛爲渠帥十九年以第二人及第二十一年大考翰林鳴盛名第一擢侍讀學士三十四年充福建正考官尋陞內閣學士兼禮部侍郎還京以濫用驛馬被吏議左遷光祿寺卿丁內

艱歸遂不復出鍵戶讀書垂三十年春融堂集

所撰尚書後案以鄭馬為主又撰十七史商權一

百卷主於校勘本文補正譌脫最詳於輿地職官

典章制度又撰蛾術編一百卷其目有十說錄說

字說地說制說人說物說集說刻說通說系說自

號西泚卒年七十有八光祿嘗曰子門下士以金

子璞園為第一璞園名曰追嘉定諸生著有儀禮

正譌十七卷國朝漢學師承記

詩綜三唐既而笏涉宋人歸田後復守前說湖海詩傳

標題 矯志篇四 東崦西崦五 雨泊江岬登

天門絕頂七古

摘句

時於白雲裏流水松花香

疎鐘烟外寺遠火渡頭船

曉漲雲浮岼春山翠壓城

殘歲辭家隨斷雁大江積雪上孤舟

三戶遺墟春草碧六朝舊事暮江平

醉裏人將春並去望中雲與水相齊

蘆中問渡真窮士漢上題襟少故人

長江九派東流去何事孤舟獨向西

錢大昕



字曉徵號辛楣一號竹汀江南嘉定人乾隆十九年進士官少詹事有潛研堂集

君幼有神童之目乾隆十六年

高宗純皇帝南巡君獻賦

召試

賜舉人以內閣中書用入京與同年褚摺升吳荀叔講九章算術又以

御製數理精蘊兼綜中西法之妙悉心探覈由是用以觀史則自太初三統四分中至大衍下迄授時盡得其測算之法尤嗜金石文字最熟於歷代官制損

益地里沿革所著經史荅問廿二史攷異通鑑注  
辨正元詩紀事補元史氏族表補元史藝文志三  
統術衍四史朔閏攷金石文跋尾養新錄諸書君  
入中書後十九年成進士改庶吉士散館授編修  
二十三年大考二等一名擢贊善尋遷侍讀二十  
八年大考一等三名擢侍講學士三十七年擢少  
詹事君以知足爲懷謂官至四品可休故奉諱歸  
里不復出歷主鍾山婁東紫陽三書院而在紫陽  
至十六年之久門下士積二千餘人嘉慶九年十  
月二十日卒於書院年七十有七卒之日尙與諸

生口講指畫少疲倚枕而臥家人趨視則已與造

化者遊矣

春融堂集

戴編修震嘗謂人曰當代學者吾以曉微爲第二人蓋東原毅然以第一人自居然東原之學以肄經爲宗不讀漢以後書若先生學究天人博綜羣

籍蔚然一代儒宗也

國朝漢學師承記

十駕齋養新錄爲嘉定錢氏晚年之書包羅廣大其義類似有可引伸者一條謂筮用錢始於齊隋唐初謹按朱子語類卜卦之錢始於京房又按胡一桂筮法變說引項平甫云以京房易考之世所

傳火珠林卽其遺法火珠林卽交單重拆也則錢  
卜實自漢始矣一條謂魏孫叔然始爲翻語謹按  
惠氏九經古義云不來爲狸并夾爲箭勃鞞爲披  
後世反切之學本於此又按顧氏音學云爾雅禘  
大祭也大祭正切禘字他不律切筆鵠鵠切鳩  
蔽膝切鞞則翻切由來久矣一條謂四聲始於齊  
梁謹按三百篇涇以渭濁鐘鼓旣設充耳琇實皆  
具四聲又隋書經籍志晉有張諒撰四聲韻林則  
四聲不自齊梁始矣一條論魁屋謂奎非文章之  
府謹按孝經援神契奎主文昌倉頡效象宋均注

奎星屈曲相鉤似文字之畫然則日知錄謂奎文章之府未可議也至其論之創者謂鄭讀易簡之易與變易不易初無兩音又謂鄭注三禮並無麒麟皮冒鼓之說皆信而有徵豈獨可伸鄭耶錢氏以碩學雄視海內其書滿家竊意其博而能一通而近正則是書之可貴固不徒以典核也

修本堂稿

或問顧氏日知錄錢氏養新錄二書孰優余曰研究經史攷核典章博洽淹通誠難軒輊若汲汲焉以明體達用爲學勤勤焉以扶世翼教爲心有裨於治道有助於經世則日知錄一書未嘗非攷據

而不敢徒以攷據目之

松心日錄

詠荆軻者多矣余最愛錢竹汀先生作詩云匕首

懷中出諸郎殿下看燕丹心未死趙政膽先寒成

敗論人易從容舍命難千秋猶灑淚易水共沈瀾

聽松廬

詩話

標題

田家雜詩五首

五古

中河

五古

石鼓

七古

琉璃廠窰戶掘土得古墓棺朽而骨殊異

其誌石題云大遼故銀靑崇祿大夫上柱

國隴西李公督厥郎中改埋于故兆東二

十步因摭誌文大略作詩遺攷古者

七古

讀漢書六首五 齋中無事與到輒書數

字八首五 生朝偶作五 禹廟二十四

韻五言排律 平定準噶爾告捷禮成恭紀一

百韻五言排律 回部蕩平大功告成恭紀一

百韻七言排律

摘句 秋色江上來吳楚千里碧

雅頌風同源未可薄雕蟲

著錄晁公武評詩教器之

安心真是藥省事便成仙

江近山容潤冬來樹意寒

影形神互荅生老病相尋

四門唐博士萬戶漢通侯

門神

韓子文皆從道出澗公事可對人言

闕外建旌麾鐵騎軍門推轂賜黃封

金川平定

烏道千盤朝縹馬龍韜三略夜封章

分茅列爵周三等舞羽敷文舜兩階

却從鮮甲橐弓日爲念披堅執銳身感激

一時齊額手臨觴猶軫結纓人

凱宴諸將士

盡識軒轅通道遠方知光武閉關非

浪傳阿母來青鳥却喜奇童對白麕

茂陵



黃蓋竟因孤注勝青壇想見萬靈趨

亦中詠古

直欲許身追稷契何曾譚藝薄盧王

杜文貞祠

百寶流蘇隨處挂不應全是為令狐

李義山詩

老子詎矜兵甲富秀才曾耐粥糞貧

范文正祠

文章巨手唐燕許山水前盟漢向禽

歸愚先生

新詩想得江山助名士仍兼政事傳

贈李南澗

彈指淒涼成浩劫招魂慘澹隔重關空餘

老友懸河淚灑到天西木果山

哭趙損之

兒女穿鍼翻舊樣詞人乞巧換新詩

聞七夕

三楚颿檣風上下萬家煙火水東西

武昌

谿水一灣分向背山雲片刻改陰晴  
曉山出霧皆成浪晚樹和煙半作雲  
將相時來須重望功名論定要全終  
美政久書江表傳詞人例作嶺南詩  
文本性成兼有學句從苦得却能和  
著書已勝金樓子汲古常攜玉帶生  
歐陽集古一千卷洛社閒居二十年  
偶借呼盧袁彥道居然完璧蘭相如  
從古文章無定論由來場屋困名流  
青紫那如名士貴漆膠獨與素心投

國朝詩人徵略卷三十五

國朝詩人徵略卷三十六

番禺張維屏子樹輯

王昶

字德甫號述庵江南嘉定人乾隆十九年進士官  
刑部侍郎有春融堂集

公體貌修偉弱冠爲名諸生乾隆癸酉舉于鄉甲  
戌成進士歸選班二十二年

高宗純皇帝南巡召試一等第一

賜內閣中書協辦侍讀直軍機房洊陞刑部主事員外郎  
郎中三十三年以言兩淮鹽運提引事不密罷職

時緬甸未靖阿文成公以定邊右副將軍總督雲貴請公佐軍事遂至騰越出銅壁關擊賊江中勝之緬酋乞降阿公屬公草檄允其降班師旋永昌緬甸貢表久未至復從阿公如騰越三十六年溫公福代阿公移師四川辦金川事奉

旨授吏部主事從溫公西路軍進討溫公屬公作檄斥僧克桑罪遂克斑爛山進攻日耳寨阿公奉

詔由北路進兵兼督南路公復從阿公軍攻克美美卡以皮船渡水克小金川僧克桑遁澤旺降進討大金川阿公奏公無兄弟母年七十餘明大義勗以殫

心軍事今從軍五年矣得

旨陞員外郎三十八年至當噶山山脊絕險官兵營壘與  
賊錯處且雨雪甚夏溫公兵潰木果太阿公亦退  
兵至翁古爾壟時警報絡繹

詔旨疊至公力疾叱馬懸厓日行數百里夜治章奏文書  
于礮火矢石之中無誤無畏冬大兵復進據美美  
卡攻大板昭小金川平補員外郎擢郎中復從討  
大金川克勒烏圍刮耳嵯四十一年三路兵合攻  
益急索諾木等率衆投罪公草露布告捷于是兩  
金川悉平公在軍中前後九年每有所攻克輒議

國朝言行錄卷三十一  
敘凡加軍功十三級紀錄八次凱旋之日以戎服  
行禮

賜宴奉

旨陞鴻臚寺卿賞戴花翎在軍機處行走四十二年擢大  
理寺卿四十四年授都察院左副都御史四十五  
年授江西按察使五十一年授雲南布政使五十  
四年擢刑部右侍郎五十八年乞歸修墓冬還京  
以病乞休

上鑒其老允之

諭以歲暮寒俟春融歸明年歸名其堂曰春融堂嘉慶四

年分賂滇銅鬻田宅以入官居于廟廡朋舊贈遺  
盡以刻書五年重游泮宮十一年六月初七日卒  
年八十有三順天鄉試會試公五爲同考官壬子  
主順天鄉試士之出門下爲小門生及從游受業  
者二千餘人公提倡風雅士藉品藻以成名致通  
顯者甚衆生平重倫紀尙名節在軍營和平簡易  
自科爾沁王以下皆親重之公所著春融堂詩文  
集金石萃編湖海詩傳青浦詩傳琴畫樓詞續詞  
綜等書皆刊成餘若天下書院志征緬紀聞屬車  
雜志朝聞錄等書四十餘種尙待次第校刊

經室集



蘭泉先生有經術而通知時事為儒臣而久歷戎  
行博雅克擅夫詞章著述皆關於文獻而又愛才  
若渴說士彌甘宜乎海內俊彥翕然稱之聽松廬  
文鈔

蘭泉先生論文云稍濃則近塗澤稍奧則近贗古

此道中甘苦之言學為古文者宜知之松軒  
隨筆

述庵司寇北至興安南逾蠻暮句云昔依北斗今

南斗又從征金川句云我今更度大義西已踰江

源一千里壯哉蓋古名將所歷罕及此者聽松廬  
詩話

虞夏時黃河循太行自北而東至涪水分九河以

殺其勢復為逆河歸于海其餘衍沃皆資種食魏

晉六朝以至遼金皆精水利未有運南方粟米供  
給北方者自明開會通河運濟而北方水利久廢  
昔日九河今變爲三十六淀七十二沽千里內外  
沮洳淤澱海門又復狹隘不能迅速歸墟是以往  
昔膏腴悉歸蕪沒此述庵先生詩自註也論黃河  
今昔利病頗爲簡括

松心  
日錄

標題 古風贈沈學子五古 觀伏波銅鼓聯句一

百二十韻五古 詐馬七古 榜什七古 相撲

七古 教駢七古 折卜尊丹巴瑚土克圖再

世來朝詩以紀之七古 觀覺生寺大鐘聯

句一百八韻古五

樂戶行古七

雷回灘古五

栗子冲曉行二首古五

經高黎貢山古七

皮船古五

望日耳礪寨有作古七

克僧

格宗古七

美篤寺古五

賜宴紫光閣紀

恩詩一百六十韻古四

回部平定恭紀一

百韻古五

副將軍振旅回永昌時屆歲

除追溯用兵顛末聯句八十韻古五

排律

摘句

小船如幽居夢醒聽柔艣湖天尙春陰層

雲被洲渚迴風掃垂楊殘滴下如雨溪橋

寂無人眷此孤禽語

一日過數灘灘獻奇警一灘亘數峰峰  
峰露妍靚

野花鄖子國新月楚人船

寒烟生竹屋殘雪滿漁舟

一德追伊吕三分限魏吳

諸葛忠武侯墓

鐘魚水寺傳山寺燈火吳船雜楚船

京口

古埭煙波思召伯空山草木走符堅

謝太傅祠

洵有才華開庾信誰知風義接靈均

宋玉宅

千古傷心朋黨論一時破膽敵人知

范文正祠

才子相門前代少詞臣羈迹異方多

楊升庵宅

光焰豈真同李杜風標端合繼歐蘇

王文簡公

別墅 二語論漁洋儼爲平允亦已推尊至矣

荷蓋忽傾知露重  
柁牙微響識潮生

球璫鳴場將刈麥  
桔槔戽水待栽秧

人從激箭流中坐  
船在崩崖罅裏行

絕塞定占擒頡利  
中朝已議靖烏桓

負嵎賊已同狼顧  
穴地人方等蝨行

呼鷹玉塞秋圍獵  
立馬金江曉勒兵

斫陣誰當楊大眼  
讀經偏愛賈長頭

簿書仍似東曹掾  
袴褶真同北府兵

令嚴誰敢爭先後路險安能卜死生  
百年豈暇爲身後萬事難堪是眼前  
文武勳名推吉甫中和樂職愧王褒  
五色蟠龍紅袍日雙翎孔雀翠迎風  
轉輸久已侔蕭相籌畫尤能贊晉公  
四海人才歸月旦千秋詩派接風騷  
漢唐寶刻掇殘本歐趙風流得替人  
江關憔悴無人省只有傷心小庾知  
遶牀作馬年方少誰省微波足斷腸  
寂寞金閨亭子畔綠陰門巷送殘春

范家相

字左南號衡洲浙江會稽人乾隆十九年進士官

柳州知府有環淥軒詩草

三家詩拾遺范家相撰是編因王氏

應麟

之書重

加裒益而少變其體例近時惠棟九經古義余蕭

客古經解鉤沈於三家均有採掇論其賅備尙不

及是編也

四庫提要

詩瀋范家相撰是書大旨斟酌於小序朱傳之閒

而斷以己意

同上

摘句 何事人間最惆悵月明風細聽吹簫

王又曾

字受銘號穀原浙江秀水人乾隆十九年進士官  
刑部主事有丁辛老屋集

穀原極爲陳文勤公汪文端公稱許釋褐後皆以  
爲當得上第旣入三甲人猶以秀水朱檢討爲比  
性善飲談笑風生神情瀟灑作詩專仿宋人信手

拈來自多生趣

湖海詩傳

標題

迴谿草堂銷寒第六集

古五

林良九鷺圖

古七

摘句

折入最深處高挂五百丈近遠無定姿變



幻非一象

觀大龍湫

趁墟人裹飯畏虎客關門

秋生羣暑澹月出衆星低

畫橋脫板低新漲酒旆懸風澹舊題

橋外錫簫寒食路柳邊蠡殼酒船牕

翟灝

字晴江浙江仁和人乾隆十九年進士官教授有

無不宜齋集

先生博覽羣書精心考證著湖山便覽四書考異

爾雅補郭通俗編俱梓以行世

碧谿詩話

晴江居杭城東北臨江鄉村民咸以蠶桑爲生不知有習舉子業者自晴江讀書取科第于是其弟

涵心淵瀚元洲澍傅霖皆以能詩稱

湖海詩傳

標題

湯婆子聯句

五古

咏煙草三十六韻

五言排律

摘句

桑畦遠隔人家小菜甲平連雉堞遙

峴口人家皆種柳船中客饌每供魚

沈業富

字方穀號旣堂江南高郵人乾隆十九年進士官

河東鹽運使

君性情醇厚篤於友朋武進黃仲則過河東留之

賓館病中哀其諸作抄錄成編俾無遺佚竹西自  
午橋太史沒詩壇寥落君以詞林耆宿家居望重

香山洛社之風賴以不墜

湖海詩傳

都轉守太平最久救荒恤災至今民思之

種竹軒餘話

摘句 過客情懷逢竹院閒農風味是柴門

牛背遠浮新漲滿馬蹄平踏亂雲低

葉佩蓀

字丹穎浙江歸安人乾隆十九年進士官湖北布

政使有傳經堂集

丹穎覃心易理獨契微言著易守四十卷勃窣理

窟多前人所未逮

湖海詩傳

摘句 行路此身賤謀生吾道艱

真從田父語莫作使君看

一線波盤江北去百重山壓漢東來

### 曹學閔

字孝如號慕堂山西汾陽人乾隆十九年進士官  
宗人府府丞有紫雲山房詩鈔

公在臺垣八年所陳奏於民生吏治皆有裨益性  
耽山水暇輒與三四知己出國門游賞如潭柘戒  
壇祕魔厓香界寺往往流連信宿生平不臧否人

物而胸中界限分明嘗曰人各有所偏但當棄短

取長否則無一人可交矣潛研堂集

摘句 致身有具從行伍黥面無妨出將材秋武襄祠

何在田

字鶴年江西廣昌人乾隆二十一年舉人有玉耕

堂詩集

在田高簡厭馳驚寄南昌僧舍鉛山蔣士銓見其

詩壁間與訂交始知名江西詩徵

袁子才過南昌時蔣心餘病風口不能言以左手

書何鶴年詩數聯老輩之愛才如此聽松廬詩話

賤骨草葉如薺麥中有赤心人截取之得土卽活  
能治重傷凡跌損者以根漬酒服之立效攷古方  
書皆未載惟見於何鶴年詩集中憶余兩年血痢  
百藥不效服鴉膽子四十九粒一服而愈鴉膽子  
本草未載因思有一病卽有一藥天生百穀以養  
人又生百草以救人天心仁愛於此可見松軒  
隨筆  
標題 子陵先生釣臺七古 南昌閔節婦五古  
摘句 早歲貪著書動欲成簡冊消磨客氣盡積  
寸未得尺

飽帆遇颺風收發豈由我

前賢失足處未敢輕唾罵

野徑無人問隨牛自得村

早霞隨日上敗葉擁潮行

荒程難計里野飯不成餐

樵室薪爲榻漁舟網作帆

移牀蟲見蛻徹饌蟻徵糧

藉懶成高志因貧得儉名

有客嫌庭窄無書覺晝長

枕酣新夢美酒罷故愁生

月借日光成半面雨收雲氣泛餘絲

豈有奇才堪許國無端隨衆強離家  
容悴多因爲客早心閒還幸受恩稀  
客少常畱不鳴雁睡酣翻喜失晨雞  
寒星欲失見漁父小雨無聲添落花



國朝詩人徵略卷三十六

國朝詩人徵略卷三十七

番禺張維屏子樹韓

蔣士銓

字心餘號茗生江西鉛山人乾隆二十二年進士  
官編修有忠雅堂集

君天稟英絕有覽輒記丁卯舉于鄉甲戌考授中  
書丁丑成進士入翰林散館第一居官八年乞假  
養母大府聘爲蕺山崇文安定三書院山長會少  
宰彭公元瑞召見

天子問蔣某何在彭以渠母老對及太宜人薨君感

上恩入都京察一等以御史用旋患風痺還南昌

小倉山房文集

君秀眉長身兩眸子奕奕如電在叢山時越中三

江闌日久堙廢君力請于大府借帑辦治日事雖

非山長責然食越人粟則視越人如一家焉有駱

生者負鹽課客死君連夜作十三札飛遞嶺南俾

其孀孤扶六櫬歸

同上

裘文達公在

上前薦君與彭公為江右兩名士以故

上賜彭公詩并及君

同上

君晚年雖病廢而神明不衰左手作字橫斜入古

所居藏園水木明瑟五子七孫穿花繞膝死之夕  
無雲而雷者三相傳君生時亦然同上

君風神散朗如魏晉間人從容讌笑繼以諧謔而  
甄錄寒峻激揚忠義有古烈士之風博通淹雅自  
古文辭及填詞度曲無所不工而最擅場者莫如  
詩論詩於當代以君爲首君與禮部尙書彭君元  
瑞生同鄉成進士同年又同官翰林

上賜詩嘗有江右兩名士之目乾隆五十年二月二十二

日卒年六十有一

春融堂集

茗生諸體皆工蒼蒼莽莽不主故常正如昆陽夜

國朝詩人卷三十一  
戰雷雨交作又如洞庭君吹笛海立雲垂信足以  
開拓萬古之心胸推倒一時之豪傑也君長身玉  
立眉目朗然嶽嵒磊落肺腑槎柯遇忠孝節烈事  
輒長歌以紀之夙知音律意所未盡放而爲院本  
有芝龕香祖諸劇世尤稱之

湖海詩傳

心餘先生詩篇篇本色語語根心不欲英雄欺人  
不肯優孟摹古言情而出以蘊藉故無粗率之辭  
用事而妙於剪裁故無堆垛之迹金銀銅鐵鎔爲  
一鑪而不覺其雜酸鹹辛甘調於一鼎而愈覺其  
和無他有我以主之有氣以運之故也

聽松廬詩話

袁子才以第一人自命而以第二位置先生然通

觀兩集袁詩多可驚可喜而蔣詩則多可味上同

先生哀楊子載厚詩有云君死我尙生忍見顛危

糾悠忽成坐視何用我爲友真氣鬱勃於此見先

生性情肫摯不獨交誼之篤也上同

心餘詩楚水入吳寬五字中有數千里又棲霞詩

萬石聚成海句亦奇又焦山詩江隨禹力已朝宗

山到漢朝纔得姓拈出便警又閉門人各在深山

七字極有味至如古來失路萬人淚斷續滴作桑

乾河二語較之文章遼海哭秋風尤爲沈痛上同

行旅遇涉水之處深則須舟淺或推車或牽馬皆不能不需人助於是土人遂有藉端橫索者然猶曰水爲之也乃車轍所經往往有故設陷阱致令覆車以恣其需索之欲者此亦宰斯土者所宜留意也心餘先生詩云泥中列阱道旁嬉橫索金錢一挽持過客囊空民橐滿可憐官吏不會知同上

先生詩云寄言學詩者唐宋皆吾師宗旨可見同上先生古文亦雅正有法其銅絃詞尤爲獨絕或行以勁氣則磊落崎嶇或出以深情則纏緜婉曲直是世間一種不可磨滅文字不得以小技目之同上

標題

上灘古五

萬年橋古七

自鳴鐘古五

到家六首古五

上甸行古七

望灣賞番圖

覆車紀行古五

京師樂府詞十六首

蔡貞女詩古七

鐵篙行古七

隆興寺

大菩薩歌古七

讀史三首第一首古五

文字

四首古五

辯詩古五

天地球古七

錢武肅

王鐵券歌古七

題表忠觀碑後古七

執紼

詞六章長短句

雷門吟古五

宛委山金簡

玉書歌古七

自題敝珮偕老圖古五

題文

信國遺像古七

醉歌古七

江孝子詩古七



王文成驛丞署尾硯歌

古七

白將軍

雲上

歌

古七

李竹溪桃源圖

古七

再示知讓三

首

古五

文信國琴

古七

摘句

文字何以壽身後無虛名元氣結紙上雷

此真性情讀書確有得落筆當孤行數語

立墜壁寸鐵排天兵

古人未易及不幸有可議恆情樂攻短羣

口諛然肆試存易地思幽獨但滋愧

君子互攻擊翻貽小人嗤

惡人亦好名常恐君子棄惟量貴容物奈

何觸其忌

俗士學干祿居恆厭枯槁貴來無可爲翻  
嗟入官早

萬物各處逸天地居其勞

生非不材木斧斤安得辭爲用信偶然天  
地難悉知輪轅與屏几勞逸誰使爲

天地多境界所值偶得之

古來數大事據我方寸胸積疑孰與釋恆  
理皆莫通古聖不可作謬誤難折中

讀書心久死每被酒力活

俗士竊章句驟貴亦自矜國家數大事何  
以爲肩承

地力養萬物至慈過于天

偶得心造語古人復我先

屈意頌庸人文辭毋乃僞

破廟狐吹火孤墳鬼唱詩

水喧帆力健天濶岬沙圓

雲氣爲朝暮山容互淺深

民窮胥役富縣小士人尊

萬竹掩危磴一菴埋綠雲

飢寒未市千金骨貧賤終成一代身

不關天地非奇困能動風雷亦異才

薦廡寺

離鄉味似新婚別乍客身經蜀道難

古來名士窮難送天下才人貴亦勞

東鄰熟睡西鄰醒各樣情懷各自知

飢驅氣藉詩書長游倦心惟骨肉親

杯空寒色一鐙裏夢在雨聲雙鷓中

苦吟猶學李長吉薦士不逢韓退之

片雲當晝酒杯黑新綠過牆庭宇深

貧賤讀書聞見少艱難求仕鬢毛蒼

攜來琴鶴存清節看到江山要好詩  
家饒田宅爲身累士解悲歌是病根  
食祿敢存能死念臨危纔見讀書身  
性靈獨到刪常語比興兼存見國風  
但借文章敵憂患莫看科第作功名  
讀書心較求官急許國身容戀母閒  
諸緣淡定根于達萬物生機得自和  
高名身後誰千古同輩年來半九原  
此生窮困由天授後日功名厭客談  
瀑布之餘雲盡水茯苓其上樹交花

彭元瑞

字掌仍號雲楣江西南昌人乾隆二十二年進士  
官至協辦大學士諡文勤有恩餘堂稿

文勤少年敏慧早直

西清應奉文字婉麗清新出人意表所進無不被蒙  
獎賞者而恭跋

御製全韻詩乃集千字文爲之又撰

乾清宮前燈詞駢體尤佳

上賜以貂裘端硯中外榮之故

恩眷始終不替嘗輯宋人四六爲藝林傳誦

湖海詩傳

讀彭文勤公經進稿其中多屬對工整典重渾成

者偶錄數則於後亦可為初學開拓心胸之助

天下有三重議禮制度考文聖人等百王夏造殷

因周監恭進 皇朝 禮器圖式表王者之治三十年而後

仁天子所都五百里曰甸服駕幸 天津連珠瀦流為

池有淀盍七十二阻灤為界其址自遼宋金同

畋田宅宅如解衣衣我推食食我樂樂利利以春

風風人夏雨雨人同春七日秋七夕七見來復

之心五重午九重陽重叶剛中之德御製 節序詩 恭跋

天子所至曰幸以德為車以樂為御以人情為田

大德之致永年如月之恆如日之升如南山之壽萬壽經

壇牘文

兕觥田峻幽籥之三日無疆鳳翽吉人卷

阿之四曰純嘏

集成讚跋 萬福

是謂太平之世曰

雨而雨曰暘而暘則知小人之依先憂而憂後樂

而樂

雪陰晴詩恭跋 御製雨

有象之春夏秋冬孰主張

是孰綱維是孰居推行是無形之陰晴雨雪我潤

澤之我滲漉之我汜布濩之

同上

心惕若以乾乾

聖原無過言達之而疊疊民可使知

恭謝知過論墨刻

恩賜摺子

承筐肆宵雅之三食萃空愧受祿頌

天保之九戩穀聲宜

恭謝賜鹿肉摺子

恩

在治忽觀古人之



國朝詩話卷三十一

象繪作有虞先稼穡知小民之依

圖成無逸

恭謝  
宋李迪雜

恩賜  
待餉圖墨刻

御臨  
摺子

十二時不翼

而飛

天之所助者順千萬里如指諸掌

聖不可知謂神

恭謝  
平定臺灣

紀事文墨刻

摺子

御製

維天為

大有成功斯有文章維

聖成能有文事必有武備

同上

三皇各歲萬八千史臣勒

之古牒伊耆在位七十載虞典首於尚書

恭請編  
輯

萬壽八旬  
盛典摺子

奉三無私

聖人之作也如覆載照致四必得

昊天其子之以保佑申請誦六章之詩川至日升月恆山

阜岡陵松柏之茂麗

敦九功之敘利用厚生正德水火金木土穀惟脩上同著

來

恩重憶舊服之鶉懸捧出心驚惕微衷於鶉翼恭謝 恩賜照

狐端罩 摺子

齒非加長實維逾格之施步本不工彌

切殊常之感

恭謝 禁城內騎馬摺子

竊幸遊

門學疲羸之十駕願同在廐頌福祿於

萬年上同播晨綸於

西苑得為氓而

仁許受塵曝冬日於南榮將改歲而

恩謀入室容身環堵憶踰江國之牛宮待漏觚稜不隔

禁城之魚鑰

恭謝居內城摺子

賜

夢為蝴蝶本在漆園

傲吏之書紀于太常宜入日下舊聞之錄

恭謝恩

賜仙蝶詩墨刻摺子御筆太常

君上補造物無不接之青黃

父母篤恩勤有必周之黔赤

恭謝西十二縣偏災摺子

恩撫江

不得

已而用師往有功无所利而為我戰則克

御製詩

文十全集進表

國家豐亨豫大再籌三十年之通民戶朝饗夕飡或

鮮萬千斯之積富非藏國利本因民矧當太倉之

陳陳相因何如高廩之多多益善恭謝旨普免漕糧摺恩

子 輔相裁成而泰有福天施地生而益无方

平惠全書進表 通觀全稿益得力于宋四六為多松軒隨筆

摘句 包山具區濱直境入短幅山影七十二湖

### 光三萬六

六逢唐宋元明代疊衍來鼻仍耳人恭和

御製命彭元瑞曹文植檢四庫全書古來見元孫者有幾據奏自唐迄明凡六人詩以誌事元韻

皆地行仙德既醉自

天子所福來

同千叟

陌上泥沾高下屐擔頭香過短長亭 杏花

### 曹錫寶

字鴻書號檢亭江南上海人乾隆二十二年進士

官監察御史贈左副都御史

檢亭胸襟瀟灑早入

內廷隨巡侍直時有篇章流傳日下及登進士改庶

常復由部曹擢為侍御因見朝貴家人貪縱不法

劾之詢無實據吏議請革職

詔特原之仍令畱任及至嘉慶己未正月

上追念其慷慨敢言不愧諍臣之職且其事亦非失實追

贈副都御史并蔭其子爲中書蓋異數也

湖海詩傳

摘句

驚沙常暗日衰草自生風

塞上

山自朔庭環九域城聯遼海控三邊

彭紹升

字允初號尺木江南長洲人乾隆二十二年進士

有觀河集

允初爲芝亭先生第四子自雋南宮卽辭廡仕古

文宗法震川詩亦克承家學

湖海詩傳

先生學兼儒釋仁恤鄉梓所著文集諸傳志表微

闡幽可備史冊非泛作空言者比

羣雅集

尺木居士甲門華胄而淡於世情耽於禪味殆有  
夙根耶然其所著二林居集於近時名臣名儒循  
吏生平行實爲之搜羅綴輯成一家言而於砥節  
礪行之徒濟人利物之事尤必懃懃焉紀載而表  
彰之此非特畱心文獻其於扶世翼教益有深衷  
焉余謂先生不愧儒者特以性地高明厭棄塵俗  
故不覺有契乎釋家之言耳嗟乎昔之人名爲儒  
而實惑於釋者豈少也哉

聽松廬  
文鈔

蔣心餘題允初詩卷云季子席華盛刻苦如諸生

聞道一何早曾閱同經營其推重如此聽松廬詩話

摘句 有懷長傍佛無夢不依山

雲淨寒潭纔見月雪消梅萼早生春

### 程大中

字拳時號是菴湖北應城人乾隆二十二年進士官蘄州學正有在山堂集甲乙存稿餘事集

四書逸箋程大中撰採輯諸書之文與四書相發明者或集註所已引而語有舛誤或集註所未發而義可參訂皆為之箋其出處其與集註小異者則為附錄其他書中所載四子書文與今本異者



則為附記第六卷則專考四書人物遺事又雜事

數十條別為雜記援據頗極詳明

四庫提要

拳時先生殫心稽古讀經讀史俱有發明余從李

碧山太守處獲觀全集四書逸箋

四庫已著錄詩文集外有測言兩卷尤多名論

松軒隨筆

先生詩非專長然如雲開欲見家五字寫出行客

思家心事又花氣月中閉五字亦極靜細

聽松廬詩話

程拳時曰史記秦子嬰降之歲書漢元年漢書去

漢字殊非正始之義且使覽者不知元年何屬

劉子駿有漢書百卷班固所作全取劉書 諸列

傳未有及書集目錄者獨武侯集二十四篇十萬  
四千一百一十二字蜀書詳載之 三國志荀彧  
傳彧以憂薨明年太祖遂爲魏公使人知操少自  
安者蓋憚彧而不敢爲孰謂陳壽非良史哉 在山  
堂集  
郡縣之法周始之秦因之積漸之勢然爾 患不  
生於所備而生於所不備弊不生於所不防而生  
於所防治不壞於變法而壞於用法者膠其法事  
不敗於庸才而敗於負才者恃其才 測言  
摘句 羣動有時息故人同此心 對月

板橋無次第花徑有窮通

寒燈遠寺微聞梵暮雨空江漸作潮

孫永清

字宏圖號春臺江南無錫人乾隆二十四年舉人  
官廣西巡撫有寶嚴堂詩鈔

安南諸大校莫黎鄭阮諸姓相吞噬久矣先是黎  
氏殘莫氏而據其國其臣鄭檢尋篡奪阮惠誅鄭  
并逐黎氏乾隆二十五年黎維祁敏關求內附時  
高宗純皇帝已遣福公康安總督兩粵將議討君爲廣西  
巡撫密陳曰黎阮相吞噬外夷之常聞安南深懼  
天威可以折箠使也福公然之阮惠果悔罪自陳乞効職

貢恭遇

高宗八旬萬壽入覲既至請用中國冠服

上益嘉之賜名光平禮成而還同上

五十二年臺灣林爽文反調廣西兵合剿君往駐

梧州擇勇銳者勞遣之士氣騰湧臺灣平福公謂

是役也得廣西鎗兵之力爲多同上

標題 峽山寺和翁學使古七

摘句 城依綠楊岼風遞白蓮香

積雨綠巖岫空林明翠微

秋聲暗挾江濤壯雲氣遙連海色多

黃紹統

字燕勳號翼堂廣東香山人乾隆二十四年舉人  
官瓊州府教授有仰山堂集

燕勳前明祭酒佐七世孫八歲而孤家貧奉母甘  
旨常充母卒臥靈帷三年不入內室己卯舉於鄉  
選石城訓導進諸生以聖賢實踐之學在任十八  
年擢瓊郡教授士民餞送二十餘里設供帳三百  
餘所從來司鐸所未有也瓊有劣生被禡賄以千  
金求復不許復浼上官關說變色以拒曰吾焉用  
是不義貲遺子孫乎卒於瓊瓊人弔唁不絕

香山縣志

馮編修敏昌至會城見其詩大傾倒遂訂古交同上

翼堂訓導石城學者稱仰山先生嘗自署楹帖云

為倫類中所當行之事作天地間不可少之人其

子培芳以詩名畱心經術兼工書畫嶺南羣雅

先生闢仰山堂進士人課之如課子弟邑之老者

敦禮之窮而無告者周恤之節孝者白於上而旌

之故邑人雖野夫孺子皆敬先生如父師聽松廬文鈔

標題 十八灘五古 五人墓五古

摘句 柴門迎晚照籬落隔平蕪

才人奢名不奢福饜飮六籍天亦妬

寧甘憂憤名詩史不願疎狂學酒徒杜工部

虔禮寶

字席珍一字律齋號古愚漢軍人乾隆二十四年

舉人官兵部侍郎有椿蔭堂稿

公本姓楊初任高平縣知縣嘗自題容我山房云

退思只願身無過守分方知樂有餘釀酒先栽三

徑菊看山更擁一牀書可想見其為人聽松廬詩話

摘句 鴉背晨光明遠近馬頭寒色認迷離

百種飄零天不管青山啼遍杜鵑聲落花

水天無事容高臥此意蕭然便十洲

畢沅

字緇蘅號秋帆江南鎮洋人乾隆二十五年

賜進士第一人官湖廣總督贈太子太保有靈巖山人集

關中勝蹟圖誌陝西巡撫畢沅所進其書以郡縣

爲經以地理名山大川古蹟四子目爲緯而以諸

圖附於後援據考證各附本條具有始末

四庫提要

公少孤資性穎悟十五歲能詩從沈宗伯德潛惠

徵君棟游學業益邃乾隆十八年順天鄉試中式

又二年補內閣中書直軍機處二十五年進士及

第授翰林院修撰三十一年授甘肅鞏秦階道三



十二年授陝西按察使司十月擢陝西布政使十  
二月護巡撫印務時征大小金川京營及各省之  
兵先後入蜀取道潼關公調運糧餉撥解軍器安  
設臺站源源協應二十八年河洛渭三水並漲分  
別賑恤全活甚衆授陝西巡撫三十九年勘西安  
八旗人馬厰空地與平盤屋扶風武功四縣者  
四百八十餘頃悉募民開墾歲納租賦爲八旗賞  
卹之需重修華嶽廟暨漢唐以來名蹟又秦中碑  
版最多萃而置之府學俾毋散佚元聖周公墓在  
咸陽縣北畢原有姬姓奉祀生一人援曲阜東野

氏之例置經博士一員請世襲并奉文武成康四  
王陵祀報可是年十二月丁張太夫人憂回籍明  
年十月陝西巡撫員缺奉

旨畢沅前在西安最久熟悉情形且守制將屆一年着前  
往署理四十六年甘肅河州番回相仇殺傷及蘭  
州知府副將聞警卽屬提督馬彪西安將軍伍彌  
泰等統滿漢兵往擊討之繼聞陷河州逼蘭州府  
城又檄延綏興安二鎮一由固原平涼一由略陽  
鞏秦分道並入適

上命大學士章佳文成公督剿蹙之化林坪賊遂平四十

九年甘肅平涼番回復亂公先調滿漢兵赴剿

上仍命文成公偕富察文襄公領健銳火器兩營兵進剿  
番回窮蹙乞命械赴京師先是西安省城日久頽  
圯公請帑興修三年工畢五十年調河南巡撫豫  
省水旱公請截漕二十萬石平市價以濟民食五  
十三年夏秋多雨漢江及洞庭諸水驟漲出江以  
截江流故江水亦騰踴決荊州堤潰城而入奉

旨授湖廣總督兼署湖北巡撫發銀一百萬兩爲工賑之  
用八月抵荊州同文成公勘潰決緣由蓋因江自  
松滋而下至荊州萬成堤折而東北流本窄又

有窖金洲沙長數里以障其南兼之盛漲無所宣  
洩直注堤根潰決實由於此乃盡剗洲旁蘆葦於  
對岍楊林洲斜築土壩並築雞嘴石壩逼溜南趨  
以刷洲沙無致壅遏而北於是城堤皆足保護矣  
五十九年八月陝西之安康四川之大寧邪教起  
皆稱傳教由湖北公馳赴襄鄖訊辦有

旨降補山東巡撫六十年五月仍授湖廣總督卽赴新任  
二月次襄城聞貴州銅仁苗民石柳鄧湖南永綏  
苗民石三保等四出鈔掠馳赴常德奉

旨令駐荆常適中之地爲後路應援是時乾州鳳凰廳諸

處盡爲賊藪且圍永綏雲貴及湖廣官兵分駐鎮  
筭轉餉甚急公令長沙岳陽常德澧州荊門州各  
屬先儘常社兩倉存穀刻期碾運由辰州轉解軍  
營且令雇船從朗江以達五溪較用夫背負爲便  
而辰谿峒門砦以上多苗寨派文武能事者駐兵  
防護運道始爲周密熟苗有被脅者准其自首示  
以若先效順候事平分給逆苗田產又賞給銀布  
米糧以散其黨繼聞永綏圍解卽在花園隆團一  
路安設臺站六省之師每日供支數萬迅速周詳  
上聞而益嘉之自三月至八月乾州苗民五百餘寨先後

詣辰乞降公便坐傳見不設兵衛導以

朝廷威德勉令自新羣苗涕泣叩頭去嘉慶元年湖北賊起詭稱白蓮教宜都長陽各聚數千人爲應公赴枝江調兵搜剿連破蕭家巖栗子山各寨擒斬千餘賊竄山北而宜昌別有賊數千分擾遠安東湖當陽復調河南南陽陝西興漢二鎮兵往援未至當陽陷隨統官兵募鄉勇與前護軍統領舒亮進圍之殲其外援三千人斬僞帥楊啟元等七月破城因奏當陽善後六事一編審民戶二分撥營兵三裁撤鄉勇四賑卹良民五旌獎忠節六修

建城垣其他儲備徵發供支策應遠近紆籌鬚鬢  
爲之頓白奉

旨畢沅前此剿洗當陽肅清縣治著有勞績不可不加懋  
賞着賞給輕車都尉世職公復密奏逆苗石三保  
等就擒石柳鄧旦晚可獲以十萬之衆駐守環攻  
苗人生計無資賊首反得從中煽誘不若乘其窮  
蹙予以自新且就降苗內擇其趨捷者以苗攻苗  
不至再煩兵力撤出官兵併剿襄鄖宜昌諸賊自  
可卽日掃除

上下其章於軍中皆以爲宜十二月官兵破平隴斬石柳

鄧復擒吳廷義等於是將軍明亮酌撤官兵前赴  
達州宜昌軍聲大振明年公遵

旨畱駐辰州綜攬南北諸軍事羽檄紛沓心規手畫炎天

瘴毒積勞成疾七月初三日卒於官舍年六十有

八

春融  
堂集

公著續資治通鑑二百二十卷別爲攷異附於本

條之下凡四易稿而成

潛研  
堂集

秋帆制府愛才下士又好刻書惠定宇徵君所著

經說悉爲劄劄生平有幹濟材在陝重建省城又

修華陰太白祠及涇渠在豫開賈魯河修桐柏淮



源廟

湖海詩傳

標題

華嶽聯句一百韻古五

昭陵石馬聯句古五

古五

開成石經聯句八十韻

孟詩排律

摘句

竹深僧貌寒月暗佛燈耿山空木葉下秋

與鐘魚永

夜市有人沽玉盃秋風無淚泣銅仙

咸陽懷古

平淮功定資裴相檄蜀文還仗馬卿

寄趙損之

王文治

字禹卿號夢樓江南丹徒人乾隆二十五年

賜進上第三人官臨安府知府有夢樓詩集

君成進士授編修爲壬午科順天鄉試同考官癸未科會試同考官其年

御試翰林第一擢侍讀署日講官旋

命爲雲南臨安府知府數年以屬吏事鐫級去任其後當復職而君厭吏事不復就官

高宗南巡至錢塘僧寺見君書碑大賞愛之內廷臣有告君招君出者君亦不應君之歸也買僮教之度曲行無遠近必以歌伶一部自隨其辨論音樂窮極幽渺海內求君書者歲有餽遺率費於聲伎然客去樂散默然禪定持佛戒數十年君嘗自言吾詩

字皆禪理也嘉慶七年四月二十六日跌坐室中  
逝矣年七十三妻女子孫來訣不爲動容問身後  
事不答然則君殆莊生所謂遊方之外者耶文藝  
雖工特君寄迹況於伎樂遊戲之事乎

惜抱軒文集

禹卿賦才英俊尤工書法全侍講魁周編修煌奉  
使琉球挾以俱往故其詩一變頗以雄偉見稱其  
時袁子才壯年引退以詩鳴江浙間禹卿繼其後

聲華相上下

湖海詩傳

夢樓太守風流倣儻書如其人詩亦無愧作者究  
其才力自遜蔣袁而李雨村盛推之此門弟子之

私言非公論也惟隨園贈夢樓詩有云才子中年

多學道仙人家法愛吹笙頗切其人

聽松廬詩話

標題 登萬壽閣望華山

五古

摘句 水涵星不動帆正月同懸

山密天無縫筇過石有聲

黔中

將離更唱紅蘭曲相憶應看青李書

烟光自潤非關雨水藻俱馨不獨花

五字河梁蘇屬國經年書記阮陳畱

軍政纔聞誅後至將星忽報落前營

玉牒銀潢九天上高牙畫戟大江東

吳璜

字芳甸號鑑南浙江山陰人乾隆二十五年進士官戶部主事候補四川直隸州殉難贈巡道有黃琢山房詩鈔

癸巳三月揀發四川五月十七日詣登春軍營大將軍某素失將士心六月初十之夕木果木軍潰大將軍死登春一軍亦瓦解公爲礮石飛擊人馬墜溪河中同墜者四千餘人時年四十七事

聞得贈加道銜入祀昭忠祠

忠雅堂文集

陸燿日鑑南爲樸庭先生

倫文

令子商寶意太守

之甥舉京兆出蘭泉王舍人之門

兩浙翰軒錄

摘句

河流抱伊闕嶽影護秦關

碧雲影斷人何處黃葉聲寒雨忽來

漫攜謝朓驚人句要和張華勵志詩

伏櫪還存千里志安巢偶借一枝棲

短蘆一帶低如屋空翠千層遠入城

陶然亭

謝啟昆

字蘊山號蘇潭江西南康人乾隆二十五年進士

官廣西巡撫有樹經堂詩集

公授編修出為鎮江知府又知揚州府寧國府擢

河庫道浙江按察使山西布政使調浙江布政使  
今上親政命爲廣西巡撫凡三載嘉慶七年六月乙丑終  
於位年六十六至廣西築湘灘之隄民呼曰謝公  
隄爲藩司持身廉潔無造怨于吏民而能完久虧  
之額又興學校飭營伍文武皆懷愛之所著樹經  
堂集西魏書小學攷廣西通志若干卷

惜抱軒文集

公爲乾隆庚寅河南鄉試正考官辛卯會試同考  
官多得賢才其最者會稽陳大文歷城方昂以吏  
績名曲阜孔廣森以文學顯生平重交遊獎氣類  
居廣西作懷人詩數十篇首其座師大興翁學士

方綱次桐城姚鼐也同上

蘊山爲覃溪少卿入室弟子篤信師說畱心著撰  
至桂林作粵西金石志與覃溪粵東金石志並行  
又修廣西通志微顯闡幽搜羅博洽爲詩不名一

家而詳于詠史湖海詩傳

標題 台州勘災紀事七古

摘句 南斗一星扶北極西江隻手障東川王文成像

陳奉茲

字時若號東浦江西德化人乾隆二十五年進士

官江蘇布政使有敦拙堂集



公成進士授四川知縣當金川爲逆大將率兵討之任公主礮局及修飭兵興橋路常居口外山谷間瀕危勞績甚著有三雜土司地當進攻金川之路官兵猝至三雜長卓爾碼婦人也謂且伐之閉道不通將校譁言三雜畔矣宜先攻公告將軍三雜未知國家意耳非畔也請往察而諭之將軍從公策公至一告諭卓爾碼卽散守者具狀上謝且奉軍過甚謹其後

詔加其封曰賢順卓爾碼以謂惟陳公活我又予我以榮

也

惜抱軒文集

公在蜀凡二十七年其後居江南九年熟習民情能以簡靖漸祛其患吏民愛戴謂得大臣之體好士樂善獎掖如不及上同

作詩專法杜子美論者謂朴厚之氣殆足媿之上同

標題 別老母之官茂州古五 出塞古五 梵詛古五

清溪縣境古七 寶雞古五

摘句 論詩到針芥世情百不顧

清茶故山味小吏閒鷗姿

慮澹身易閒趣深物無劣

日生底柱闕門赤風捲中條嶽色黃

四山秋雪明紅樹一驛寒雲瀉碧泉

閒街遠水僧門綠小巷通風藥店香

殘編熟盡還相對蠻語通多總入詩

天垂地底根皆見石上雲端骨欲飛

傳浪鼓山

老冰如石塞陰洞積雪捲風埋壯夫

安得從容共文酒細商此事付將來

吳泰來

字企晉號竹嶼江南長洲人乾隆二十五年進士

官內閣中書有淨名軒集

企晉襟期清曠意致蕭閒少中副車選校官以松

滋山水之佳勾留竟歲旋以病歸其大父吉安大  
守銓歸築遂初園於木瀆雲林杳靄花葍參差有  
柳堤鶯囀竹溪烟雨爽臺秋月莎邨觀刈松閣聽  
濤巖東霽雪諸勝其尊人用儀復購書數萬卷於  
其中多宋元善本遂與江浙諸名士流連觴詠如  
是十餘年後成進士

召試賜中書而少無宦情壯而彌甚既而兄弟析產出藏  
書而貨之并售其園於是同年畢公沅招主關中  
書院攜家而往後又隨至開封年六十餘而卒企  
晉才情明秀作詩大指一本漁洋子與訂交將及

四紀向所同遊者零落殆盡金谷玉山之雅集不

可復得今取其詩吟諷之不啻山陽之笛矣湖海詩傳

標題 十八盤五古 湖樓曉起五古 吳越王廟七古

重修瀟橋紀事聯句七言排律

摘句 禪心水上月世事風中帆

殘陽明浦樹新月上漁家

自古邊庭須魏尙至今父老怨唐蒙讀史有感

戰壘新增巴子戍降王舊拜夜郎侯

好尋摩詰還山詠未過羲之誓墓年

錦袍烏帽成千古明月清風又一時牛渚

王宸

字子凝號蓬心江南太倉人乾隆二十五年舉人  
官永州府知府有蓬心詩鈔

蓬心麓臺侍郎曾孫所繪山水頗能入室美鬚髯  
工飲酒著有繪林伐材十卷上自黃帝下逮

國朝乾隆時人亦畫史之總龜也

湖海詩傳

太守罷官後以詩酒陶情人呼曰老蓬仙嘗慕柳  
下季東方曼倩之爲人號柳東居士

南野堂筆記

摘句 苦吟咽秋菴旅夢冷秋雨

寫幅爲青閑換酒每逢佳客便當畱

申兆定

字圖南號鐵蟾山西陽曲人乾隆二十五年舉人  
官定邊知縣

圖南清羸多病歷官均以廉聲著中年學道又工  
八分書所撰涵真閣漢碑文字如郝閣頌張壽景  
君諸碑跋皆精深詳密作令十年遽歸奄忽其夢

入西溪偶賦云云殆詩識耶

湖海詩傳

摘句 如何花底客竟是夢中身

夢入西溪偶賦

國朝詩人徵略卷三十七

國朝詩人徵略卷三十八

番禺張維屏子樹輯

王杰

字偉人號惺園一號畏堂陝西韓城人乾隆二十

六年

賜進士第一人官至大學士贈太子太師諡文端有葆淳

閣集

公以拔貢生得教諭未任遭父喪服終貧甚為書

記以養母所居幕府尹文端公陳文恭公為江南

督府時也兩公皆賢公謂為正士

惜抱軒集



乾隆五十一年拜東閣大學士公為人廉靜質直  
誠於奉職其居位與和珅同列公以大體接之不  
為壯頡悻悻之事而遇所當執終不與和珅附公  
素行無疵瑕

純皇帝知公深和珅雖厭公亦不能去也公之心人不能  
具識而至其入陳

禁陞裨益朝廷者又非人所得聞故不可得而述同上  
嘉慶七年公以老病乞休

御製詩送之有云直道一身立廊廟清風兩袖返韓城足  
以盡公生平矣同上

公爲乾隆庚戌科會試總裁官又嘗爲湖南江西  
浙江考官一督福建學政三督浙江學政所進多

佳士

同上

公嘗訓及門云爲政之道當開誠布公不可有意  
除弊此弊除他弊興矣性寬厚然於世之以姑息  
爲寬大者極不然之曰縱惡以取名如

國家何生平於浮屠老子法未嘗言及亦不排斥有

道及者輒不對曰吾未嘗習此也

王文端  
公年譜

公著有惺園易說解天九三爻辭云若濡有愠言  
己若爲所濡不能無愠究之事過而心跡自明所

謂其要无咎也公此言殆自白其衷懷耶聽松廬文鈔

摘句 鳶魚知道趣鷗鷺澹詩心

記否刺船巫峽日青簾白舫杜陵詩

趙翼

字雲菘號甌北江南陽湖人乾隆二十六年

賜進士第三人官貴西道有甌北集

雲菘性情倜儻才調縱橫而機警過人所遇名公

卿無不折節下之初受知於汪文端及入中書直

軍機處傅文忠尤愛其才旋以及第改翰林數年

簡放知府出守廣西鎮遠時緬甸用兵

詔選鄰省幹才助蒐軍實君住永昌半載會文忠將督兵  
深入遣之還粵又爲李制府所賞調廣州并登薦  
剡擢貴西道尋以母老不復出迄今幾三十年同  
時與袁子才蔣心餘友善才名亦相等湖海詩傳  
君官中書舍人入直樞要進

奏文字多出君手每扈從出塞戎帳中無几案君伏

地起草頃刻千百言不加點忠雅堂文集

先生撰廿二史劄記攷證精審持論明通又撰陔  
餘叢考一書雖未及顧氏之日知錄錢氏之養新  
錄然於文字事物之間或究其源流或正其譌誤

不特多聞之有助亦爲解惑所取資又撰

皇朝武功紀盛一編以連篇累牘所未能備述者而簡

括出之亦足徵史才也惟簷曝雜記體例稍雜然

國家掌故及滇黔各省土風物產皆略可藉以攷見

蓋凡先生所撰著均能使人增益見聞通知時事

較之斷斷考據於無用之地者似爲勝之

聽松廬  
文鈔

甌北先生晚歲退閒取唐宋諸家全集再三展玩

尋繹得識各家獨至之處故所撰甌北詩話挾摘

精微指陳得失語多切當非僅見方隅橫生議論

者可比也其論列詩家梅村之後獨舉初白蓋初

白之詩空靈變化有廣大教主之風先生詩與之相近故不覺爲鍼芥之投然合觀全體漁洋之高秀竹垞之厚重初白亦有所未逮惟初白生當王朱並峙之時獨能陶冶性靈自成面目此所以爲不可及而先生舍王朱而特舉之亦可云獨具隻

眼者矣

同上

甌北五古中論古論事論理諸作雖虛字太多發論太盡於古人渾厚含蓄一唱三歎之旨幾不復存然胸中有識腕底有力眉開目爽自成爲有韻之文且其所言每如吾意中所欲出讀至愜心處

似倩麻姑癢處搔也聽松廬詩話

七古才氣奔騰時見剽滑五七律多工巧奇警之

句然力求工巧可稱能品却非詩家第一義也同上

人參一兩直十金此康熙五十年後事也至乾隆

十五年白金一兩六錢易參一錢二十八年價至

三十二換嘉慶初年白金三百兩易參一兩今則

價愈昂而佳者愈不可得誠如甌北人參詩所云

但許活富人貧者莫可冀矣然貧者無力服參豈

遂坐視其殆余嘗用黃耆黨參療極重之病多則

一兩少或數錢連服數劑屢屢見效時醫遇重病

輒云非人參不治亦思世間病人力能服參者有

幾哉

松軒  
隨筆

標題

讀史二十一首

五古 第十首 第十一首 第十二首 第十三首 第十四首 第十五首 第十六首 第十七首 第十八首 第十九首 第二十首 第二十一首

偶得十一首

五古 第八首 第九首 第十首 第十一首 第十二首 第十三首 第十四首 第十五首 第十六首 第十七首 第十八首

赴滇從軍作

五古

連日無蔬菜至平夏

買得蘿蔔大喜過望而紀以詩

五古 編詩

五古

放言

五古

觀西洋樂器

五古

青山莊

七古

行園卽景

七古 五首

贈相士彭鐵嘴

七古

南珍

七古

摘句

人日住在天但知住在地天者積氣成離



地便是氣氣在斯天在豈有高下異

兒生母已乳蠶生桑已葉生之斯養之未  
嘗有德色

眼白識王敦面青識盧杞一見定其人終  
身弗改徙藉非有性惡何以驗若此後儒  
強爲詮分別氣與理旣名之曰性理早落  
氣裏

硝磺製火藥世乃無利兵玻璃琢眼鏡世  
乃有老明由來利用物亦隨時會呈當其  
機未啟雖聖難預迎及夫爲用廣聖亦不

能更

乃知曠達言大抵十九寓一朝見可欲鮮  
不失故步徒以言取人動爲古人誤

荆公變祖法欲創富強治及思法必行勢  
須使指臂羣小遂競進流毒不可制始知  
功名心亦足禍人世

天地有至文花鳥與山水亦必有解人乃  
不虛此美可憐蚩蚩氓熟視不覩此其有  
才智流又爲名利使倘無我輩在蕭閒味  
其旨大塊亦寂寞歎世無知己

公卿視寒士卑卑不足算豈知漏一盡氣  
燄隨烟散翻藉寒士力姓名見豪翰使其  
早知此敢以勢位慢

同乎俗吏爲吾意旣不欲異乎俗吏爲吾  
力又不足

曉星明似月古堠立疑人

千盤蛇陣勢十萬馬蹄聲

出古北口

倉皇臨大變智勇出良知

樟樹鎮

月華涼在水山影澹於雲

江雲殘夜黑海日五更紅

杜門閒客散攤卷古人來

天遠似連地月高偏傍人

九邊塵靜平安火上苑春催頃刻花

同輩半爲揚鱗客至親翻有向隅人

宣名

品題未便無雙士遇合先成得半功

薦條

欣賞情同青眼客別裁權亞黑頭公

藍筆

黑頭公謂主司用黑筆

落花退筆全無豔食葉春蠶尙有聲

落卷

未妨螺贏艱生子笑比琵琶別過船

撥房

十數名分新雁塔一家人聚小龍門

房卷

一軍皆甲晨聽令萬馬無聲夜踏邊  
久客不歸無異死故人入夢尙如生  
家貧婦或勞兼婢身老兒還小似孫  
潮定未分消長水風橫兼使往來帆  
絕頂樓臺人倦後滿堂袍笏戲闌時  
無官豈必皆高士有福何須作貴人  
焦頭救已愁災熾生齒繁應有劫來  
一蚊便攪人終夕宵小原來不在多  
到老始知非力取三分人事七分天  
千秋自有無窮眼豈用爭名在一時

李文藻

字素伯號南澗山東益都人乾隆二十六年進士  
官桂林府同知有恩平潮陽桂林諸集

南澗成進士謁選得廣東恩平縣知縣後調潮陽  
縣以海疆三年俸滿保薦擢廣西桂林府同知未  
及一年而沒其居官以清白強幹稱嶺南俗多竊  
牛牛皮色相似雖獲盜多不承有司無如之何南  
澗始至令有牛之家各於牛角印烙私記凡赴墟  
賣牛者牙僧以印烙登簿以印付買主如告失牛  
先以印呈官官遣役持印驗墟簿無得隱者大府

善其法下所部行之潮陽民好械鬪往往殺傷多人南澗至則懸鉦於堂上有將鬪者令地保馳入城擊鉦立往拘治衆則散矣潮陽海陽揭陽俗稱三陽仕其地者多致富南澗去官之日囊橐蕭然還至番禺命工摹光孝寺貫休畫羅漢四軸以歸曰此吾廣南宦橐也性好聚書每人肆見異書輒典衣取債致之又從友朋借鈔藏弄數萬卷皆手自讐校於金石搜羅尤富所過學宮寺觀巖洞崖壁必停驂周覽有僕劉福者善椎拓攜紙墨以從有所得則盡搨之嘗乘舟出迎總督小憩南海廟

命僕拓碑秉燭竟夜比曉問總督舟已過矣其詩  
古文皆自攄所見不傷前人門戶然口不道前輩  
之短以爲非盛德事元和惠定字婺源江慎脩皆  
素未相識訪其遺書刊行之子嘗戲論南澗有三  
反長身多髯赳赳如千夫長而胸有萬卷書一也  
生長於北海官於南海二也湛思著書欲以文學  
顯而世稱其政事三也

潛研堂文集

在嶺表士子以文就質無虛日獨稱欽州馮敏昌

順德胡亦常張錦芳作嶺南三子歌

同上

素伯窮經志古肆力於漢唐註疏陞州牧引



見來京聞余有惠氏易漢學諸書至余寓舍借鈔大暑中  
 漫膚多汗沾漬衣襟不以為苦也嘗約其友周編  
 修書倉取經史著述未甚傳于世者刻為貸園叢  
 書而素伯歿其後遂不能續今所傳者止十二種  
 而已

湖海詩傳

南澗先生嶺南三子詩蓋作在先其後與黃虛舟  
 黎二樵呂石颿交善而於二樵尤為傾倒又有張

黃黎呂之目

聽松廬詩話

標題 觀音巖

五古

摘句 俸薄儉常足官卑清自尊

山色暮愁裏雨聲寒食前

涼生獨客枕聲入萬家心

聞雨喜作

十三都內皆安業一百餘年不被兵

曹仁虎

字來殷號習庵江南嘉定人乾隆二十六年進士官侍講學士有宛委山房諸集

君在禁林每遇大禮高文典冊多出其手館閣代言之文院長輒委屬艸皆典重清切宜古宜今擢右春坊右中允扈

蹕盤山有奉

敕命諸作累擢侍講學士五十一年奉

命視學廣東與平少詹恕交代少詹爲諸生時嘗受業於

君粵人傳爲美談明年程太恭人終於官署君方

按試連州聞訃晝夜號泣甫匝月竟以毀卒春秋

五十有七

潛研堂文集

君詩宗三唐而神明變化一洗粗率佻巧之陋少  
時與王吳趙諸君唱酬彙刻其詩流傳海舶日本  
國相以餅金購之其事二親孝所得俸錢分寄諸  
弟無私藏焉所著詩有春槃瑤華倡和秦中雜稿  
轅韶鳴春諸集又有蓉鏡堂文稿二十四氣七十

二候攷轉注古音攷上同

來殷以聲華名望為都下所推然端靜自守不至  
朝貴薰灼之門時詩道雜而多端或做白居易或  
做黃庭堅楊萬里或至做袁宏道信手塗抹率以  
流易佻巧為能如郭舍人之俳諧鄭五之歇後黃  
茅白葦彌望皆是及來殷詩出乃奏金石以破蟋

蟀之鳴湖海詩傳

標題

秋晚田家雜興五古

馬伏波銅鼓歌七古

辟雍釋奠講學禮成恭紀五言排律一  
百二十韻

東巡上

陵禮成恭紀百韻五言  
排律

摘句 林光微露日石氣欲生雲

綠樹歇疎雨人家春鳥鳴斷雲諸寺出斜

日半山明

紫霧千盤開漢碣碧霞四氣拱秦封

西京專闔推橫海東漢登壇數伏波

初添蜀郡三城戍更遣秦川四道兵

校尉盡看紅帙首材官齊號黑雲都

奸細幾曾誅趙信征人空見老班超

執法烏臺秦御史談經絳帳漢儒林

梨花小院重重樹燕子高樓面面風

白蘋千點鷺初散紅雨一簾鶯亂啼  
聽雨聲從殘夢覺惜花情比憶家深  
記得小窗相伴讀晚涼庭院水晶簾

陸錫熊

字健男號耳山江南上海人乾隆二十六年進士  
官副都御史有篁邨詩集

耳山博聞彊記資稟絕人二十七年

召試

賜內閣中書入直軍機初與子奉

敕編通鑑輯覽頌之

命輯永樂大典復求天下遺書開

四庫館以薈萃之校對數百人謄錄至千餘人歷十年始成而君與今大宗伯紀君曉嵐司其總每進一書仿劉向曾鞏例作提要冠諸簡首

上閱而輒善之

特旨由刑部郎中授翰林侍講文字受

知駸駸嚮用典試者二督學政者一後因奉天所儲

四庫館書中多脫落舛誤奏請自往覆校比至而病歿時論無不痛惜平日進

御之作工而不穠婉而能切同人推爲莫及至詩文隨手

散佚歿後搜篋中得數百首皆應酬之作非其稱

意者

湖海詩傳

標題

戲鴻堂石刻歌

古

鉛山追悼蔣心餘

古

摘句

山青削兩崖天白露一綫衆壑競奔流斜

曳萬丈練

橫塞灘

田俯僧衣碧峰交佛髻青

小牀怯雨畱燈坐薄絮欺寒壓夢眠

手摘明星望鄉國黃河如綫走中原

吳玉綸

號香亭河南固始人乾隆二十六年進士官兵部



侍郎有香亭詩集

君成進士改庶吉士散館授檢討充

武英殿纂修乾隆三十年充順天鄉試同考官三十三年遷貴州道監察御史十月遷太常寺卿三十九年充順天鄉試同考官四十一年

上以金川平將告成功於

闕里

特命君先往演習禮樂四十四年又以熱河

文廟成

上將親往釋奠亦先遣往習儀四十五年正月扈

躡南巡四月陞都察院左副都御史四十六年充會試副總裁得錢棨等一百六十八人四十八年六月充浙江正考官是年九月授福建學政五十二年還京二月授兵部右侍郎五十四年以事降檢討君既復歸館職悉心纂校凡七年而年已六十有四詔以原官休致既歸俯仰邱園教子孫以孝弟讀書一如

中丞公之所以教君者

春融堂集

京師琉璃廠北巷古海王村也向爲王漁洋司寇故宅手植紫藤一株舊本久枯乾隆己丑香亭先生寓此次年抽蔓復花因繪古藤詩思圖自爲記一

時名流題詠殆徧錢文端有臭味尊前輩風流此

一燈因君追往事其奈髮鬢髻之句蓋文端少時

曾過漁洋此寓云圖中佳句不可勝舉而余最愛

錢穉石侍郎畫人只畫袷衣寒畫花并畫雕欄曲

一二語能寫出紫藤風致

聽松廬詩話

余與公子嵩少水部

俊民

紅生中翰

葆晉

為文字

交垂二十年嵩少昆季寓橫街大川淀余每入都

暇輒過從樽酒論文清歡永日古書繞榻綠陰壓

檐渾忘身在軟紅塵土中也一日邀余小飲又出

引藤書屋圖觀之引藤書屋者先生移寓橫街分

古藤而引其蔓以爲新藤也此圖題詠不減前圖  
余最愛曹習庵學士人如五老當筵集花有雙身  
隔巷移之句又劉石菴相國句云消得一庭人影  
月紫英飄落酒盃中相國詩罕見此清麗者同上

近人詠梅花多著相卽如趙甌北單身立雪程門  
弟素面朝天虢國姨幾墮惡道香亭先生句云梅  
花清極本無詩七字爲梅花掃多少荆棘同上

摘句 千山闕函谷一綫人秦州

白帝降精凝華嶽黃河倒影射潼關

四山落葉亂飛鳥萬樹遠松明夕霞

香過木犀能悟否廣寒高處本無花

詠桂

馮應榴

字星寶浙江桐鄉人乾隆二十六年進士官鴻臚寺卿

星寶英敏豁達有幹濟才既以江西布政使罷歸益肆力於典籍尊人養吾侍御注李玉溪詩最爲精瞻君師其意以蘇文忠公詩注疏舛尙多遂取王梅溪施輔之查初白諸本合抄之以攷其是非得失所採正史而外凡叢書脞說可證據者靡不

蒐討

湖海詩傳

星實先生沈酣於東坡詩者有年又得宋槧五家  
注元槧百家注舊本參以施注殘本稽其同異而  
辨證之竊謂王本長於徵引故實施本長於臧否  
人倫查本詳於攷證地里先生則彙三家之長而  
於古典之沿譌者正之唱酬之失攷者補之輿圖  
之名同實異者覈之以及友朋商榷之言亦必標  
舉姓氏其虛懷集益又如此合注出而讀蘇詩者  
可以得所折衷矣

潛研堂文集

摘句 列戟門疑水焚香事告天自然翔鸞驚詎

待效鷹鷂

哭陸朗夫中丞

國詩言ノ卷田名三二ノ

七盤路入星河影一綫江分隴蜀天

儲祕書

字玉函江南宜興人乾隆二十六年進士官黃州

知府有緘石齋詩稿

玉函好游後中甲科數載省郎一麾出守尋罷官

歸卒其詩淺而實腴清而不激又工倚聲湖海詩傳

玉函為理質太史在文之孫隨筆

摘句 亂鴉盤古塔凍鵲聚閑門

海月迎人滿山花背客妍

衣袖尙存慈母綫盤飧重剪故園蔬

綠蔭村邊孤寺掩春陰牆角一花明

趙文哲

字升之號璞函江南上海人乾隆二十七年

召試

賜舉人官內閣中書殉金川難

卹贈光祿寺少卿有姸雅堂娠隅等集

乾隆壬午春

上幸江南進詩試

賜舉人授內閣中書舍人甲申直軍機房戊子秋侍講學  
士紀昀中書舍人徐步雲洩兩淮鹽運使盧見曾



國朝言行錄卷三十一  
事君與余牽連得罪會兵部尙書阿公桂以定邊  
右副將軍總督雲貴請以余兩人掌書記

詔許之明年三月至騰越州時大學士忠勇傅公恆奉  
命經略緬甸七月借協辦大學士副將軍果毅阿公里袞  
由南大金江以西進討君從之出萬仞關緬地惡  
多瘴攻壘久未克君乃以病還騰越州十一月緬  
降撤兵傅公還

朝君始與余依阿公幕府居二年辛卯五月

上以理藩院尙書溫公福代阿公會金川土舍索諾木襲  
革布什咱土司戕之噉小金川土舍僧格桑攻鄂

克什勢張甚總督弗能制九月

命溫公偕阿公赴蜀討之奏以余與君行十月至成都復以君爲中書舍人明年壬辰五月余從阿公由章谷攻達烏君畱溫公所是冬克美諾小金川平晉君戶部主事又從溫公由空喀進討金川明年癸巳兵至木果木攻五閣月弗克六月小金川降者叛與金川合鈔後路初十日師潰賊邀於險溫公歿君與其難時年四十有九按故事無驗而死于兵名曰未出未出不得卹兵部員外郎巴君尼琿以君陣亡報事聞兵部乃議贈光祿寺少卿子祭

葬工部作主躋于昭忠祠命翰林院立傳蔭子一

入國子監讀書期滿以知縣用

春融堂集

標題

鄭學齋詩

古五

牟珠洞

古五

大池灘

古五

樂戶行

古七

猛拱土司進四象詩

古七

斑

爛山紀事

古七

摘句

一峰十萬樹一樹四五猿一猿千百聲雜

以風雨喧一日十二時一程三十里一軍

六千人盡在猿聲裏

山迴露確牀岼迴隱漁鼓微風來炊烟人

家渺何所

石立水亦立飛浪搏人面

林霏寒作雨池水靜生雲

尙憶牽衣同拜母真從戴笠早稱兄

更無人影惟簾影纔和香煙又藥煙

茶煙

朱孝純

字子穎號海愚漢軍人乾隆二十七年舉人官兩

淮鹽運使有海愚詩鈔

子穎奇男子也浩浩焉有擔荷一世之心

劉海峰文集

子穎爲都統龍翰之子承其家學能畫尤長于孤

松怪石鬚髯不多有兩莖綠脣而下長二尺許風

吹飄然撚之頗自憇也作令四川獨游峩眉經旬  
 乃返後以迴避當量移他省時大兵方討金川子  
 穎單騎赴營觀戰鬥久之而去其募儻奇偉如此  
 愛友朋晚為揚州鹽運使方欲招致大江南北諸  
 賢為文酒之會而遽以風痺解職姚姬傳謂其不  
 可一世之氣勃然動于紙上王夢樓謂其豪宕感

激之意屢見於詩者信也

湖海詩傳

孝純工山水知泰安府時曾作泰岱全圖

墨香居畫識

朱子穎詩伉壯雄豪有幽燕老將氣槩

聽松廬詩話

標題

對酒二首

五古

登日觀峰觀日出

七古

成

都逢楊竹堂古 仲松嵐席上作古

摘句 偶於會心時微言得要妙

只愁天上月併作鬢邊霜

鄉心垂萬里天影接諸蠻

一水漲喧人語外萬山青到馬蹄前

颿共鼃鼉爭晚浪人如鳧雁在晴空

雞啼荒雪陳倉道馬亂春雲大散關

邊風壓地黃雲動朔氣橫關白日陰

椎牛穹帳三更雪飲馬長城十月冰

黃河一綫從天下太華三峰拔地開

四郡開邊虛鐵馬九天擎露失銅人通天臺  
飛鳥與人爭道路啼猿知我憶家鄉

張熙純

字築時號少華江南上海人乾隆二十七年舉人  
官內閣中書有華海堂集

築時英姿壯氣與升之同學齊名中年歿於京邸  
未歷江山兵燹之奇故所作稍遜一籌湖海詩傳

摘句 人家藏遠樹漁火入寒流

洗鉢承花雨翻經和海潮

山店桃花分馬色溪橋楊葉試弓聲

連江暮雨孤帆卸  
萬樹秋聲一雁飛  
詩就涪翁分一瓣  
酒同坡老鬪三蕉  
紅牙曲罷千花暝  
青翰舟迴一水香

張九鉞

字度西號紫峴湖南湘潭人乾隆二十七年舉人  
官南昌知縣有楓林羊城諸集

紫峴初宰峽江繼調南昌遇水災力請普賑水際  
積骸壘纍捐廉購棺瘞之豫章溝渠淤塞力請開  
通於是二十里長渠復其舊三湖積潦得以疏通

居民徯之

聽松廬  
文鈔



紫峴先生詩學太白而得其真氣落想浩然落筆  
灑然如風行空如雷出地濡染大筆洵堪旗鼓中  
原非特爲楚之雄也余覓其全集弗得今秋寓章  
門遇杜少牧秀才得見鈔本百餘首亟錄其一二  
比諸吉光片羽焉登采石謫仙樓放歌云借我峨眉  
眉萬古之明月照我長江萬里之孤舟醉我樽中  
千斛之美酒坐我青天百尺之高樓危磯冥冥猿  
恹恹怒濤走渚聲奔牛枯松倒江風颭颭雙蛾橫  
掃天門秋樓前何人擊大鼓使我聞之淚如雨任  
城誰伴狂知章歷下不逢老杜甫乾坤浩蕩日月

白世有斯人容不得空攜駿馬五花裘調笑風塵  
二千石天生鞭撻風騷客肯上樓船同作賊黃金  
唾氣不原功翻令銜哀夜郎謫宮袍落拓何處來  
磯頭淚灑孤臣杯開元天子真知己七寶方牀安  
在哉心懷濟代浮名誤學佛求仙了世故死後能  
令泣鬼神生前已悔工詞賦我欲招之騎黃鶴飛  
出江湖下衡霍玉簫金管擁羣鬟唱月青山銜不  
落徑須提挈崔宗之共捉長鯨拔其角自從大雅  
久沈淪獨立寥寥今古春待公不來我亦去樓影

蕭蕭愁煞人

聽松廬  
詩話

標題

廣武

古五

桃源洞

古七

新疆屯田歌

古七

鐵杖樓歌

古七

武侯墓鐵蒺藜

古七

題桂

林霜院本

古七

張鏞魁歌

古七

摘句

龍血久銷磨誰復分虎鼠

古戰場

日落萬山中化為煙霏霏

天在峯窮處峯窮天又垂

長淮下曉月秋氣生中原

河嶽雄詩膽乾坤縱病身

蠻刀吹鬼髮峒錦作戎衣

南徼

旌旗文諭蜀鼓吹曲平蠻

浮生無姓字，亂世有神仙。梅尉

不圖將別日，得見未交人。贈耿湘門

官冷詩名天下熱。贈汪輩雲

蒲桃醉臥一丈雪，仰看日射天山紅。送會亮臣

誰知萬古塚中魂，飛作三更頭上雪。花田

遠地也須圖再會，神交原不作初逢。別湘門

蘇東坡詩集卷之十一

三



國朝詩人徵略卷三十九

番禺張維屏子樹輯

黃景仁

字漢鏞一字仲則江南武進人諸生有兩當軒蔗  
梢諸集

父之炎禱于學宮神祠而生君故小名高生君數  
歲卽孤伯兄又繼卒訓導君撫以成立性不耽讀  
而所受業倍常童年八九歲試使爲制舉文援筆  
立就學使者歲科二試吾鄉應童子試者至三千  
人君出卽冠其軍前常州府知府潘君恂武進縣

知縣王君祖肅尤奇賞之君美風儀立儔人中望之若鶴慕與交者爭趨就君君或上視不顧君守訓導君訓未嘗學爲詩歲丙戌亮吉亦就童子試至江陰遇于逆旅中亮吉攜母孺人所授漢魏樂府錄本暇輒朱墨其上閒有擬作君見而嗜之約共做其體日數篇逾月君所詣出亮吉上遂訂交焉及常熟邵先生齊燾主常州書院亮吉及君皆從游君學益大進君爲諸生家甚貧不願授徒值潘君恂王君祖肅遷官杭歛君歷訪之歸必得詩數百篇後復攜邵先生書客湖南按察使王君太

岳署中是時君已攬九華陟匡廬泛彭蠡歷洞庭  
每獨遊名山經日不出值大風雨或暝坐崖樹下  
牧豎見者以爲異人自湖南歸詩益奇肆見者以  
爲謫仙人復出也後始稍稍變其體爲王李高岑  
爲宋元祐諸君子又爲楊誠齋卒其所詣與青蓮  
最近歲辛卯大興朱先生筠奉

命督安徽學政延亮吉及君於幕中先生賓客甚盛越歲  
三月上巳爲會於采石之太白樓賦詩者十數人  
君年最少著白袷立日影中頃刻數百言徧視坐  
客坐客咸輟筆時八府士子以詞賦就試當塗聞



學使者高會畢集樓下至是咸從奚童乞白衿少年詩競寫一日紙貴焉君自知年不永嘗共赴弔邵先生於常熟夕登虞山遊仲雍祠北望先生墓慨然久之曰知我者死矣脫不幸我先若死若爲我梓遺集如玉芝堂乎玉芝堂者王君太岳爲邵先生所刊詩文集名也亮吉以君語不倫不之應君就便藝神祠香要亮吉必諾乃已故平生於功名不甚置念獨恨其詩無幽并豪士氣嘗蓄意欲遊京師至歲乙未乃行亮吉亦以貢入都值母孺人疾中止君自京師貽亮吉書曰人言長安居不

易者誤也若急爲我營畫老母及家累來俾就近  
奉養不至累若矣亮吉時奉母孺人憂家居發其  
書資無所出居向有田半頃屋三椽因并質之得  
金三鎰俾君之戚護君母北行後二年而亮吉遊  
京師君果以家室累大困亮吉復爲營歸資俾君  
婦及子奉君母先回而君已積勞成疾矣又二年  
亮吉遊西安君繼至今陝西巡撫畢公沅奇君才  
厚資之遂以乾隆四十一年

上東巡召試二等在

武英殿書籤例得主簿入資爲縣丞銓有日矣爲債

家所迫復抱病逾太行出雁門將復遊陝次解州  
病殆遂卒于今河東鹽運使沈君業富運城官署  
距生乾隆十四年年三十有五君性不廣與人交  
落落難合以是始之慕與交者後皆稍稍避君君  
亦不置意獨與亮吉交十八年亮吉屢以事規君  
君雖不之善而亦不之絕臨終以老親弱子拳拳  
見屬君之意殆以亮吉爲可友乎此或君之明而  
亮吉亦有不取辭者矣君年甫壯歲蹤跡所至九  
州歷其八五岳登其一望其三及歿而出篋中詩  
篇幅完善者至二千首是可傳矣

卷施閣  
文集

黃少尹風儀俊爽秀冠江東初依竹君學使公燕  
太白樓援筆成詩時有神仙之望自遊京邑聲譽  
益華卒以不自檢束憔悴支離淪於丞倅高才無  
貴士悲夫曩以薄游關中綢繆觴咏才賢並集實  
謂勝游踰年客死安邑人傳其過平遙絕句云疑  
是晉鄉靈未泯九原風雨逐人來詞雖警絕信爲

詩讖

吳會英  
木集

仲則風神玉立世比叔寶年未弱冠所撰小賦新  
詩已有烟月揚州之譽旣而彈鋏依人歷游楚越  
又從竹君學使于皖桐及回京從子受業務爲閔

覽博聞之學故所過名山水探奇歷險才力皆足

以發之激昂排奐不主故常信其所至正如淚流

鮫客悉化明珠米擲麻姑俱成丹粒

湖海詩傳

仲則爲詩上自漢魏下逮唐宋無弗效者疏瀹靈

腑出精入能詞出入辛柳閒新警略如其詩

春融堂集

古今詩人有爲大造清淑靈秀之氣所特鍾而不

可學而至者其天才乎飄飄乎其思也浩浩乎其

氣也落落乎其襟期也不必求奇而自奇故非牛

鬼蛇神之奇未嘗立異而自異故非佶屈聱牙之

異衆人共有之意入之此手而獨超衆人同有之

情出之此筆而獨雋亦用書卷而不欲炫博貪多  
如賈人之陳貨物亦學古人而不欲句摹字擬如  
嬰兒之學語言時而金鐘大鏞時而哀絲豪竹時  
而龍吟虎嘯時而雁唳猿啼有味外之味故咀之  
而不厭也有音外之音故聆之而愈長也如芳蘭  
獨秀于湘水之上如飛仙獨立于閩風之巔夫是  
之謂天才夫是之謂仙才自古一代無幾人近求  
之百餘年以來其惟黃仲則乎

聽松廬  
文鈔

或曰仲則詩誠工矣然超逸有餘而博大似未足  
也余曰子之意必以多用書多數典而後爲博乎

必以襲杜韓之貌學明七子之聲而後爲大乎夫古無類書并無刻本是以三都賦就紙貴一時今類書大備刻本通行爲詩文者一題到手但解繙書居然博學吾非謂書可少也第以善爲詩者用書而詩愈工不善爲詩者用書而詩亦拙蓋書不可廢亦不可恃也至於杜韓兩家學之者衆貴在得其神骨豈徒襲其皮毛不然李空同之學少陵聲口可云逼肖乃身後論定終難免嬰兒學語之譏正以有心摹擬真氣弗存也仲則天分極高無所不學亦無所不能至下筆時要皆任其天之自

然稱其心所欲出乾坤清氣獨往獨來此仲則之

所以不可及也同上

仲則詩諸體皆工其筆力變化騰拏不拘一格卽

以七言古體論之其中有大筆如一信將無渤解

空再來或恐鴻蒙濕觀潮行洞庭一瀉八百里浮雲

貼天天浸水洞庭行有重筆如萬八千人同一泣卓

然大陣如山立虔忠肅祠當時河北廿四郡大名獨邀

天子呼顏魯公名印歌有提筆如東山賓從南州客顧榮

羽扇桓伊笛淮上夜發有陡起之筆如一篝火起狐鳴

野三月阿房土花赭漢瓦并天有陡接之筆如一



風吹衣露其肘有大如掌瘡癥新程孝子行有放筆如

此樓此月此客可一醉誰共此樂獨與清影相嬉

邀元夜登天橋酒樓有斂筆如故人遲我作長句須在匡

山讀書處得稚存書有細筆如藏古篆法意慘澹備諸

皴妙胸錘鑪王叔明畫有險筆如虎口呀開大如斗人

轉從容探以手圈虎行有直筆如不能決蹠爾不智

不能破檻爾不武同上有峭筆如映之蒼壁太古色

洗以淥水空天痕先文節公像有超筆如紅霞一片海

上來照我樓上華筵開荷河先生偕宴太白樓有挺筆如此

時長驅有八可以笏畫地言琅琅虞忠肅祠有翻空之

筆如若使麻姑海上見卽此亦是滄桑流湖西有刻

入之筆如百無可冀冀一濟一髮尙欲回千鈞程

子行有跌宕之筆如或云名山恨僧占縱以歸我能

畱乎三元洞有動盪之筆如馳檄纔清驃國烽回軍

又撒旄牛寨觀鄺湛有奇句如風吹離地倘尺五

著手便可捫匏瓜九華山長虹五道飲河下肉山自

來填曠野劉武穆祠有健句如斗大城猶守六年百戰

身經中三矢余忠宣祠隻身斫壘沙滾滾隨手殺賊風

淒淒寄王東田有沉着之句如多少中原逐鹿人若見

此文同一泣漢瓦并天有清空之句如一絲清氣

共來往星辰自動高高天樓上有真摯之句如一

身未了地上事親在詎敢逃空虛登妙遠閣偶然持論

有齟齬事後回首皆相思待稚存有古豔之句如沐

日浴月暈蒼翠苔色散點周秦銅黃山松歌有冷豔之

句如幽蘭裊露露珠白零落花香葬花骨秋夜曲有

雄麗之句如山屏五色開雀尾海光萬道浮龍鱗

送馮魚山歸欽州有沉麗之句如碧海難騎李白鯨紅塵

欲老嵇康鳳贈尹六丈有適鍊之句如依人虎任人頤

使伴虎人皆虎唾餘行有刻劃之句如怒張牙

爪斲獅象俯受戒律儕祇陀戒壇四松歌有一氣三句

如不知當年董糟邱天津橋南之酒樓亦有風景

如茲不

天橋酒樓

有一氣五句如將軍已死殉合門紛

紛部曲呼其羣曰余將軍死死君我輩何忍辜將

軍從而死者千餘人

余忠宣祠

有一氣七句如假如公

有烟霞思此必弟子相追隨前驅狼狽後麕麋攜

囊入雲採苓芝剝刷幽怪窮險巖佐公巨筆揮淋

漓此則不敢多讓誰

上朱笥河先生

以上摘句皆一鱗片

爪耳欲翫其通體神氣仍當於全篇觀之

聽松廬詩話

仲則七律余尤愛者錄之以供同好翩與歸鴻共

北征登山臨水黯愁生江南草長鶯飛日遊子辭

鄉去友情五夜壯心悲伏櫪百年左計負躬耕自  
嫌詩少幽燕氣故作冰天躍馬行 看人爭著祖

生鞭彩筆江湖焰黯然親在名心畱百一我行客

路慣三千誰從貧女求新錦肯向朱門理舊絃吳

市簫聲燕市筑一般悽斷有誰憐

將之京師雜別五首錄二

五劇車聲隱若雷北邙誰見塚千堆夕陽勸客登  
樓去山色將秋遶郭來寒甚更無修竹倚愁多思  
買白楊栽全家都在風聲裏九月衣裳未剪裁

側身人海歎棲遲浪說文章擅色絲倦客馬卿誰  
買賦諸生何武漫稱詩一梳霜冷慈親髮半飶塵

凝病頰炊爲語遶枝烏鵲道天寒休傍最高枝都門

秋思如猿噉夜雁嗥晨剪燭聽君話苦辛縱使身

榮誰共樂已無親養不言貧少年場總刪吾輩獨

行名終付此人行覓它時養砂地不辭暫踏軟紅

塵與雅存話舊神清骨冷何由俗鳳泊鸞飄信可哀

何處好山時夢到一聲清磬每驚回定知前路合

長往疑是此身真再來聞道玉皇香案下有人憐

我在塵埃失題余舊題仲則詩集有云黃生抑塞

多苦語要是飢鳳非寒蟲今三復其詩益信同上

或曰仲則耽酒好色其才雖美其人不足重子之

匡章言ノ後田卷三十一

推許母乃過歟余曰僕就詩論詩謂其詩可愛非謂其人可法也亦第就仲則之詩論詩非謂其能壓倒諸家也至仲則親老家貧窮愁抑塞念念不忘將母乃欲謀升斗之養而不獲遂其志卒至飢驅奔走客死他鄉吾方悲之不暇又何暇以禮法

繩之耶同上

標題

雜詠五古第一首第三首第七首第十首十五首十七首 觀潮行

七古 後觀潮行七古 楚歌行七古 上朱笥

河先生七古 笥河先生偕宴太白樓七古

虞忠肅祠七古 大雨宿青山僧寺五古 鋪

海古七 遊九華山放歌古七 大造古五 夜

宿中峰古五 答維衍古七 思舊篇古七

余忠宣祠古七 塗山禹廟古七 樓上對

月古七 新安程孝子行古七 歷城道中古五

獻縣丞坐中觀技古七 得稚存淵如書

卻寄古七 圈虎行古七 漢瓦并天下文拓

本古七 題洪穉存機聲燈影圖古七 顏魯

公名印歌古七 王蘭泉先生齋頭觀鄺湛

若天風吹夜泉硯古七 太白墓古七

摘句 不知何事勞但若有所待雜詠一待字 誤多少事每誦



此十字輒惘然久之

行行向京雒冠蓋織古今疲極或嘅息偶

云慕泉林長揖挽之去至竟非其心

譖醜伏禍淺譽美藏機深

膚寸足下雲倏已際天白

萬里見川原千堆散邱垤

道旁見樵衣疑是虎啖餘側身望中嶺半

黍形蠕蠕須臾負薪至低唱過我車

妙繪不到處化工展匠力

松間就僧飯牕際聞樵斧

上嶺怒欲壓下有無窮深削壁絕捫據長  
雲蕩其陰小心坡

霞奔如有聲日起已千尺濛濛濕未收照

見島烟白

登鎮海城樓觀海

況生東南人柔脆太楚楚鍊以冰雪威骨  
健可楛柱

多恐再圓時不是今宵月

聚散成古今此意幾人會

觸物感斯集不知何事悲

精氣生已洩那有魂相隨

新路如人面看來總不同

五更乘曉月一路看秋山

秋士霜前草春人鏡裏花

澹日寒逾瘦孤雲懶不高

由來著書願禁得幾蹉跎

偶看芳草思名馬每見青山想異書

經過燕市仍吳市相送臯橋又板橋

春水將生君速去此江東下我西行

好名尙有無窮世力學真愁不盡書

馬因識路真疲路蟬到吞聲尙有聲

似此星辰非昨夜爲誰風露立中宵  
小山桂樹吟方苦大海萍踪聚亦奇  
風雪衣單知歲晚江湖酒病與年深  
九派江聲猶入夢六朝山色已迎舟  
山勢盡朝東岳去地形都向北平開  
百靈自掣龜山鎖萬怪須然牛渚犀  
天心似要江河合地勢愁當湖海衝  
忽然破涕還成笑豈有生才似此休  
郢中有客皆詞賦楚國何峰不雨雲  
江漢欲浮天地外山川渾老戰爭餘

禹疏不到相離水媧補難平有恨天

千秋放逐同時命一樣牢愁有盛衰

屈賈祠

生前遇合樊姬笑死後悲歡優孟歌

孫叔敖祠

去畱楚漢興亡地倔強韓彭斧鑕餘

英布墓

一慟無由恩已絕兩家多故事難言

靈澤夫人

事去僅歸蘇武節身閒聊倚葛洪居

洪忠宜祠

靜裏風懷元度月愁邊心血子胥潮

萬事不如知己樂一燈常記對牀時

久遲作答非忘報只恐開緘亦斷魂

纖雲微蕩月沉海列宿亂搖風滿天

王復

字敦初號秋塍浙江秀水人太學生官偃師知縣  
有樹護堂詩

秋塍承其尊人穀原之學殫見洽聞詩才凌厲迨  
筮仕中州初任商邱令尋調偃師繼湯君毓卓之  
後湯君南皮人乾隆壬午孝廉搜羅金石重輯志  
書與武君虛谷交君繼其後風流彌劭游龍門砥  
柱極山水之勝作長卷紀之同安陽令趙君希璜  
皆以仙吏稱

湖海詩傳

王大令名父之子翩翩佳士早年游歷江淮棲遲

京國鉅公名士咸有膠漆之投詩篇蘊藉風流如  
其標格頃自雍鎮豫佐幕需賢薦牘再申由丞擢

令雖沾微祿深惜小用其材

吳會英才集

摘句 志在業千秋情豈榮一官

好詩句有神催花速於鼓

草色青迷沽酒處杏花紅點渡江時

月明漁火全無影夜靜江濤漸有聲

憂患豈真緣識字飄零未易得歸期

淺碧新羹烹玉茗硬黃佳帖寫銀鈎

信有人間鳳伴鴉誰憐樂府鴛鴦隨鴨

徐書受

字尚之江南武進人太學生官知縣有教經堂集

尚之羈旅道塗所作往往牢愁激楚取法在孟東

野張文昌間然才情諧暢兼效元白湖海詩傳

徐州倅為茶坪詩老曾孫學有本原性情純摯其

詩悱惻纏繚意由心發曩曉嵐補山二公薦為秘

校已草封章終以捧檄不遑擇祿古來丞尉每有

賢才香山柳州此為流亞吳會英才集

標題 論癖一首五古 送秋旌往保定七古

摘句 亭臯俯呀庠人馬比蛩蹙十八盤



霜柳未黃矜雨色風蟬將老變秋聲

亂山深處藏官廨春水生時響桔槔

楊芳燦

字蓉裳江南金匱人貢生官戶部員外郎有吟翠

軒初稿

蓉裳驚才絕豔綴玉聯珠駢體之工幾于上掩溫

邢下儕盧駱而詩則取法於工部玉溪間填詞亦

兼有夢臆竹山之妙乃僅以拔萃科選為伏羌縣

令既而逆回構亂烽火連天蓉裳嚴守孤城授子

傳餐獨當豕突事平久之乃量授靈州又偃蹇十

餘年始爲農部雖兼會典館纂修而終不獲與於  
承明著作之林殊爲缺事然聞京師盤敦之盟必  
以君爲赤幟蓋光燄固不能掩也

湖海詩傳

揚州牧驚才絕艷世謂盈川復生袁簡齋太史論  
詩所云毘陵星象聚文昌洪顧孫楊各擅場者也  
始以里選上計出宰伏羌值回氛肆逼櫻城守禦  
指揮殺賊一軍皆驚王述庵廉使統師長武嘉其  
偉節賦詩二律飛達圍城州牧卽有和章並自著  
伏羌紀事詩一卷又何整暇竟以殊功特擢可謂

才人之奇遇

吳會英才集

標題 錢忠懿王金塗塔瓦歌古七 哥舒翰紀功

碑古七 伏羌紀事詩一百韻五言排律

摘句 峰遮遙目斷月伴客心懸

誓死孤城在輕生一劍提

玉節仍煩中屬國金符新拜左賢王

時當搖落難回首人為聰明易斷腸

國朝詩人徵略卷三十九

國朝詩人徵略卷四十

番禺張維屏子樹輯

姚 彙

字姬傳江南桐城人乾隆二十八年進士官禮部  
郎中有惜抱軒集

姬傳豈弟慈祥而襟期蕭曠有山澤間儀有松石  
間意簿書刀筆雅非所好也詩旨清雋晚學玉局  
翁尤多見道之語既歸屢主安徽敬敷江寧鍾山  
揚州安定三書院以讀書學道教多士古文淳古  
簡淨紆徐往復亦多不盡之味

湖海詩傳

姬傳甫弱冠而學已無所不窺天既賦姬傳以不

世之才而姬傳又深有志於古人之不朽海峰文集

予見姚姬傳所為誌銘雜文必把讀五六徧不能

去手其文簡澹清深翛然有得於性情之際淵雅堂集

惜抱軒集十卷前三卷亦多攷訂家言自記序以

後文始驚絕朱竹君一傳尤有史筆同上

姚鼐曰唐時凡入史館者必令作名臣傳所以規

史才今史館大臣傳率抄錄

上諭吏牘謂以避黨仇譽毀之嫌而名臣行績遂於傳中

不可得見然則私傳安可廢乎惜抱軒文集

惜抱文集乍閱之似不甚可喜再三閱之淳澹簡

質中有義有法自是古文正宗聽松廬文鈔

標題 送演綸歸里古 暮行青山下宿田家作

古 舟中望板子磯山勢甚奇因題長句

古 子穎禹卿同游累日作詩紀之古

金麓村招游莫愁湖醉中作歌古

摘句 聖人不可作遺經啓蒙愚大義乖復明實

賴宋諸儒其言若澹泊其旨乃膏腴我

朝百年來教學秉程朱博聞強識士論經

良補苴大小則有辨豈謂循異塗奈何習

轉勝意縱而辭誣競言能漢學瑣細搜殘  
餘

文章兩司馬擅為西漢雄人君取士節優  
劣安得同

所志尙千百為者纔八九

一從捫蝨話屢歎阿龍超

閉門生逕草空砌墮隣花

萬頃波平天四面九霄風定月當中

岳陽樓

河流畫地分中夏雲氣隨風出大荒

秋聲城郭千家樹返照雲霞萬里天

青楓江上人纔返黃菊花初蟹欲肥

往日讀書真恨少少年如子豈能多

中年樂趣殊兒輩此日儒林少丈人

三月晚春悲老物百年後死待奇才

但使體中還少壯更偕兒輩向詩書

亂世烏飛難擇木男兒豹死自留皮

弔王彥章

五十年閒都憶起一鐙廿四卷中詩

### 湯大奎

字曾輅號緯堂江南武進人乾隆二十八年進士

官鳳山知縣有緯堂詩略



君之在鳳山也秩滿候代屬賊勢蔓延縣故無城君率僚佐募鄉勇爲守禦計一夕酌酒勞客君口占曰今日不知明日事他生未卜此生休典史史謙訝其語不祥君曰人孰無死身旣許國成敗聽之願諸君共相勉爾神色忼壯座客爲之罷酒平明賊果來攻與參將瑚圖禮禦之賊稍卻參將馳馬逐賊去君聞城北有警急馳歸得內應四人立斬以徇方獎厲兵役煮鬻糜餉衆賊已突進北門入縣治典史守獄死闔人王明素負膂力力屈亦死僕林坤手格之斷四指暈絕仆地君則朝服坐

廳事手劔擊賊賊刃交下猶瞋目詈不止時長子  
荀業侍以身蔽翼其父不去遂同遇害時乾隆五  
十一年十二月十三日也督撫上其居官死事狀  
賜襲雲騎尉世職

子祭葬

亦有生齋集

君撰彙硯瑣譚十二卷攷鏡是非揚屹風雅賊起  
臺灣君死事及事平僅存第十卷補遺一卷同上

湯荀業字楚儒一字與竹緯堂公長子也隨父之  
官林逆作亂將及鳳山緯堂公見賊勢猖謂公子  
曰汝無官守可以去對曰事母有弟在父以死守

城兒以死從父忍臨難苟免耶聞者壯其言越日賊至公朝服仗劍坐堂上公子佩刀侍賊上階公殺賊數人公子亦拔刀格殺以身翼蔽其父賊蜂擁兵刃交下父子皆遇害張維屏曰於戲臣死忠子死孝忠臣孝子萃於一門此邦家之光名教之效也吾友湯雨生騎尉爲忠臣之孫孝子之子蒙恩世襲雲騎尉遂以文人而爲儒將與余訂交垂二十年昨自浙郵書屬爲尊甫與竹先生墓表因未見詩是編無從采入爰撮舉其大節附識於緯堂公事

略之後

聽松廬  
文鈔

摘句 大道歸私淑斯文復在茲學參會閱列術

可帝王師 謂孟廟

雲從秋後白峰入晚來青

雪晴蕭寺冷風定遠山明

降王烏喙方嘗膽浣女蛾眉恰捧心 姑蘇懷古

窮士痛心曾乞食美人報國是傾城

人來小縣門如水座有名花吏亦仙

振衣竟欲凌風去回首方知行路難

祝德麟

字止堂浙江海寧人乾隆二十八年進士官御史

有悅親樓詩鈔

君未冠登第官翰林其間或典試或視學關中天  
 府川中地險以暨八閩濱海之區無不備歷及改  
 官御史以言事不合鐫級歸里僑居五湖三泖間  
 授徒自給日以詩酒友朋之樂宕漾其襟懷夢樓文集  
 芷塘詩以性靈為主亦能驅遣故實蓋欲力追其  
 鄉先輩查初白及其房師趙甌北兩先生聽松廬詩話  
 醉蝦罕見佳詠芷堂有句云有生難得惟中酒到  
 死何曾肯著緋頗足解頤同上

標題

讀史雜詠九首古

讀白詩偶有所觸因

韻成篇五古

所見三首

五古第一首第二首

冬蟲

夏草詩五古

讀宋史三首

五古

摘句

虞廷賡喜起臯陶本詩人

功業無可見專意立文字

六經不難讀字字皆近情盤詰固聱牙當

時詔黎毗如今官文書或別有式程不然

多舛脫口授由伏生

正復苦岑寂小童報客至吾誠喜客談且

莫談世事平生肄業及詩書多疑義觸舉

一二端剖析證同異

文人好翻案偏斷類寡識

兒母輕視身是孃一塊肉

庸醫難與謀以藥試人疾欲生是其心欲死是其術

交親非不多知心間有幾

本爲貧而仕仕而貧益甚

當歸真有寄薏苡喜無嫌

大能尊孔子空不啟禪門

莊子

真詮規矩外天趣性情中

論詩

三千世界塵八百功德海

功德言從何處立畫詩書且一身藏  
讀書纔信童時易忍事偏於醉後難  
并無富貴誇春夢差免形神病夏畦  
人到中年增感慨文難異代享聲名  
每因一字難安處吟到三更渴睡時  
論文豈敢輕餘子飲酒何妨得老兵  
世途誰可呼將伯家事毋來溷乃公  
漢試籀書九千字唐升禮部十三經  
尺五天邊韋杜曲一千年外帝王州  
地棄燕雲原失算天生宗岳爲何人

汴州懷古



一死易酬知己德千金難買美人心綠珠

默啜何難防戊己支那不過守庚辰平緬甸

肯拋冊府詩書畫忽學官箴清慎勤辦事翰林

豈料編文煩李漢每緣問字賞侯芭

淡到可憐方絕世生猶無色肯言香白秋海棠

飢驅到爾真羞澀鑒賞由人或愛憐鬻書及硯

豕柵牛欄俱入畫半依修竹半桃花

我無姬妾相寒暖不是君憐更有誰贈內

那得不為祧廟主小門生已有門生

直同千佛名經看好句流傳不在多詩話

沈初

字景初號雲椒浙江平湖人乾隆二十八年

賜進士第二人官至戶部尚書諡文恪有蘭韻堂集

雲椒司農母陸太夫人遺腹生子三歲殤哭之慟  
以朱志其臂曰天不絕吾家若再生當以汝歸是  
月司農生於鳴珂里之族氏陸太夫人聞之心動  
索視之臂朱灼然遂請撫之五歲卽能辨四聲稍  
長研究諸經秀通子史通籍後

命直內廷賡歌矢音由侍講學士詹事府擢禮部兵部侍  
郎充會試副總裁官視學福建順天江蘇江西諸

大省所拔皆績學士每奉

諭旨以好學政目之進左都御史尋授兵部尚書調吏部

主順天鄉試遭遇之隆數十年如一日入贊

樞務精白一心不立異亦不苟同

兩浙翰  
軒錄

上命內廷諸臣舉翰林數人劉文正公于文襄公裘文達

公王文莊公聯名奏彭雲涓曹竹虛兩前輩董蔗

林同年與余四人翼日

命入直懋勤殿

西清  
筆記

魯連臺詩翁山五律實為傑作七律當以沈文恪

一首為最其詩云城邊一騎射書回此地曾經不

戰摧天下有人秦計阻先生無恙海濱來英雄總  
挾神仙氣時俗空驚論辨才南望巖陵山水窟千

秋異代雨高臺

聽松廬  
詩話

標題

朱萊峰先生輓詩五古

祀竈聯句

五古

摘句

必爲天下用乃貴讀書人

靜中求我方知樂局外看人未覺難

詩情添似桃花水春夢輕於桺絮風

一片湖光星萬點家家水閣上燈初

吳省欽

字冲之號白華江南南滙人乾隆二十八年進士

官左都御史有白華詩鈔

君少英敏善屬文年十七爲諸生乾隆二十二年

高宗純皇帝南巡獻賦

召試

賜舉人授內閣中書

春融堂集

三十三年

大考翰詹一等第一擢侍讀

同上

君在翰林二十餘年以文學詞賦爲

聖主所知歷主鄉會試所錄多知名之士

同上

白華著撰精心果力不屑蹈襲前人衡文荆楚及

西川遇山厲水刻處以五七字寫之散體文于唐

似孫樵劉蛻于宋似穆修柳開亦戛然自異湖海詩傳

白華集陝蜀道中諸作頗有深思厚力聽松廬詩話

標題 井陘關古七 五丁峽古五 彌牟鎮觀八陣

圖古七 平羌渡望鐵索橋古七 荊州郡齋

石馬槽傳是漢壽亭侯故物古七 慰忠祠

古五 食蟹聯句古五 杏酪聯句古七  
五言 排律

摘句 一雲肖一物一物幻一影華嚴頂佛閣觀雲海

孤兒如一萍出海跡茫昧明知葬從薄焉

敢緩有待蜃灰暨陶埴審辨極瑣碎庶幾

先事營勿貽後時悔

祠廟籠秦樹人家抱嶽蓮

水依天到岍人與月同船

過廟似聞嘶石馬收京且喜斫金蠖

長安懷古

到海長河尊一柱度關太華俛雙旒

蒲州

望姓簪裾天尺五麗人珠翠日重三

曲江亭

豈有牽牛聽夜語竟無飛燕鬪春妝

馬嵬

上去笑同驢背穩坐來驚比馬頭高

竹兜

人間陸險踰川險送險亭如至喜亭

人生只有歸田好不爲南雲也悵然

董 潮

字曉滄號東亭浙江海鹽人乾隆二十八年進士  
官庶吉士有東亭詩選

東亭綺歲能詩與沈文恪初有十子之刻旣而贅

婿蘭陵兼以飢驅奔走故其詞句淒鏘

湖海詩傳

東亭本武進人少孤祖母陳撫之成人贅於海鹽

遂占籍焉性至孝讀書慷慨負志節工詩文兼善

六法與夏槐雲朱笠亭陸太冲及同郡知名之士

結社聯吟有嘉禾八子之目嘗賦紅豆樹歌傳誦

都下稱爲紅豆詩人卒年三十六

兩浙翰軒錄



標題

唐花詞七

摘句

惟君共此心語俗必大異

已悲閱世同劉峻莫更逢人說項斯

橘柚本難栽北地鷓鴣還自戀南音

半春孤客忘寒食一夜東風又杏花

斷雲將雁隨烟沒野水如天帶月流

由來恩怨終亡國未有英雄肯忌才

廉藺祠

青史幾人高諫議白麻當日哭延英

陽城

郡控三關雄巨鹿峰連千里走飛狐

中山

人事只如鴻印雪俗情偏喜鶴乘軒

王嵩高

字少林江南寶應人乾隆二十八年進士官平樂府知府

少林門第清華文學之傳師承有自吟編甚富今所採者游梁一集耳以郎中出守粵西未及歲以乞養歸遂不復出一爲安定書院院長而卒

湖海詩傳

王司馬江左清門學有源本早年得第譽滿長安咸以未入承明爲惜薄游南北攬古探奇詩格駿駿日上旣而謁選歷宰繁區鞅掌之餘吟卷益富真可爲此事便廢者一雪斯言

吳會英才集

標題

太皞宓犧氏陵

五言  
排律

摘句

曲直得情理剖決無畱疑兩造各俯首何

用加鞭笞

羣動各有歸勞者難爲心

獨客畏秋氣思歸多苦吟

三花樹色開神岳萬里河聲下孟門

小人有母誰加飯遊子辭家未授衣

施朝幹

字鐵如江南儀徵人乾隆二十八年進士官宗人

府府丞有正聲集

鐵如詩樸質清真生澀刻峭居官如其詩在京師  
老屋數椽寒菹冷炙夫婦相得怡然終不與熱官  
來往稍遷京卿督湖北學政荆襄開潢池告警憂  
瘁而亡其門人伊太守湯安刻其詩

湖海詩傳

摘句 春星兼鳥落山雨接潮來

土瘠憂人事年饑出吏才

中原秋色高嵩嶽孤劔寒雲落大河

褚廷璋

字左莪號筠心江南長洲人乾隆二十八年進士  
官翰林院侍讀學士

筠心敏慧絕倫兼有荀令謝郎之日進詞館充方略館纂修于準夷回部山川風土最爲諳悉奉

勅纂西域圖志又纂西域同文志并通等音字母之學詩

初學青邱既學元白旨遠詞文卓然大雅

湖海詩傳

摘句 山圍蒲類分西谷雲護沙陀拱北庭

烏魯木齊

漢蒲類國地唐爲北庭大都護府

海氣萬重吞麗水山容三面負祁連

伊犁

伊犁河唐時名伊麗河亦曰伊麗水山卽古祁連山

塞月已寒三葉護邊風猶動五單于

雅爾

漢五單于地唐三姓葉護地

千屯此日開榆塞十箭當年阻玉關吹

唐沙鉢羅陞利失可汗分十部部授一箭日十箭居碎葉東西境

焉耆鎮敕龍遊遠都護城懸烏壘尊哈喇沙爾

漢烏壘城唐設焉耆都督府為四鎮之一其西為

東縈姑墨千年磧南走于闐一綫河阿爾蘇

阿克蘇為古溫宿地其東為古姑墨國地

大乘西來畱法顯重源東下問張騫和闐

和闐為古于闐唐設毗沙都督府河有兩源一出于闐

### 李調元

字雨村四川綿州人乾隆二十八年進士官

兵備道有童山詩集

雨村觀察襟懷瀟灑跌宕不羈家藏書多至萬卷

嘗輯函海一書卷帙繁富又愛才若渴撰雨村詩

話人有一聯片語之佳者輒采而錄之

聽松廬文鈔

好色復好書遇事太果斷此祝芷塘懷李雨村詩

也二語頗肖其人

聽松廬話

朝鮮四家詩四家者李書九洛瑞柳得恭惠風朴

齊家次修李德懋懋官也雨村詩話采其詩四家

中朴齊家之名尤著

同上

敢言勤學通今古深愧爲人在下中

帆迴山背風無力艣剪江心月有聲

### 梁泉

字崇簡號弼亭廣東順德人乾隆三十年鄉試第

一

弼亭爲文原本史漢取裁莊騷有遺文四卷

廣東通志

己丑成進士卷出桐城張閩士房總裁賞其文閩

士喜見於色同列銜之因假磨勘傾閩士至失官

弼亭遂被斥革

嶺海詩鈔

摘句 木落屋依平地出霜空人坐一天寬



勞 潼

字潤之號莪野廣東南海人乾隆三十年舉人官  
國子監學正

莪野常言讀孔子書得一言曰務民之義讀孟子  
書得一言曰強爲善而已矣讀朱子書得一言曰

切己體察

魚山文集

先生家居奉母絕意仕進從學者歲常數百人立  
學約八則戒約七則曰苟犯此者勿入吾門也嘗  
以六事自期曰傳先集葬先墳建宗祠濟族人定  
世居報知己自言諸事皆就理惟報知己有未盡

或曰君於馮潛齋盧紹弓兩業師皆視猶父潛齋  
晚年供給尤至尙不足云報知己耶先生曰是報  
恩耳非報知己也師所期於余者在立身行道之

大節豈淺淺于有無緩急之際耶

雁山  
文鈔

先生著有四書擇粹救荒備覽讀史隨筆諸書上  
摘句 美人自昔憐芳草名士由來讀楚辭

### 閣循觀

字懷庭號伊蒿山東昌樂人乾隆三十一年進士  
官考功司主事有西澗草堂集

懷庭學行醇篤時目爲真儒官考功一秉直道事

或齟齬輒不畫押同列或強之答曰吾學何事豈至是變耶吏或舞文亦不遽責取陳文恭公所刻在官法戒錄爲講說曰存其廉恥俾知悔改安見吏不可教也在部三年以病請假歸未幾卒年四十有五著有西澗草堂文集困勉齋私記尙書讀記毛詩讀記春秋一得論語譜名人小傳見澗隨

筆諸書

國朝山左詩續鈔

摘句 茅茨意自足小隱情何深童稚知禮數雞犬含淳心

濕烟斷樵徑滂雲出林屋

微官忌太直結習安得存抑心復柔氣猶  
有見忤言

汪孟錫

字康古浙江秀水人乾隆三十一年進士官吏部  
主事有厚石齋集

康古曾祖晉賢先生讀書好友建裘杼樓以貯圖  
史有華及堂以延賓客故子孫皆好學能文康古  
與弟仲鈐咸以詩名康古兼精術數自謂壽命不  
過五旬屆時而卒子如藻如洋

湖海詩傳

標題

岫樓碑搨本二十韻

五言排律

摘句 客心爭歲晚如鳥思歸巢舟行到淺水東

手無如何

得句從來勝得官

### 朱炎

字桐川號笠亭浙江海鹽人乾隆三十一年進士

官阜平知縣有楓江湖樓諸集

笠亭一行作吏而著述之念未嘗一日忘好古多

聞撰陶說六卷又抄明人詩十四卷

湖海詩傳

摘句 纖徑出松梢微茫若懸綆

高閣夕陽殘醉後板橋流水獨吟時

金兆燕

字鐘越號棕亭江南全椒人乾隆三十一年進士  
官國子監博士有棕亭詩鈔

棕亭遊黃山諸作奇崛可喜又工院本在揚州作  
旗亭畫壁記盧雅雨運使刻之生平不耐靜坐愛  
跳躍多言笑故時人目爲喜鵲

湖海詩傳

摘句 穿透天一綫漸觀海千里

半簾疎雨客何處滿地落花春欲歸

張錦麟

字瑞夫號玉洲廣東順德人乾隆三十三年舉人

有少游草

錦麟幼慧與兄錦芳竝為北平翁方綱所賞有雙

丁兩到之日年二十九卒廣東通志

錢辛楣稱其詩標新領異不拾人間唾餘嶺南羣雅

玉洲詩骨格清蒼情韻繚逸與胡同謙齊名兩人

太白樓詩亦相伯仲聽松廬詩話

余愛玉洲七夕絕句云雨餘閒聽葉辭條久客羈

心不自膠獨倚檐前望牛斗秋風秋月可憐宵同上

標題 楊歷巖五古 夜遊虎邱五古 登穹窿望太

湖七古 元夕妙高臺對月七古 甘露寺七古

摘句

千山迭迎送一重復一掩

微吟不自覺驚起雪色鷺

江海交流處金焦相對青

好風離听得新月傍林生

感激飛椎日從容進履時飄然秦楚際偶

作帝王師

下邳詠  
留侯

前身應是江南客纔見金焦喜欲狂一月

風沙隨曉夢半空樓閣出秋光

野岬無人潮欲上碧天如水雁初飛

三面青山四圍水藕花香處笛船多



匪言名田卷四十一

十一

玉洲因此二句人呼為張碧天又呼為張藕花

### 黎建三

字謙亭廣西平南人乾隆三十三年舉人官涇川

直隸州知州有學吟草悔初草諸集

謙亭詩云悍民始一二歲久因為奸免窟錯犬牙

烏合互相連涓涓將不塞浩浩成狂瀾此詩殆有

慨於除莠之難耶今之會匪莫知其數涓涓不塞

其患非細思患豫防所望當事者孰籌之聽松廬詩話

標題 斗米謠古

摘句 承恩如夢寐得罪未分明棄置

故鄉秋裏別明月客中看

雲山入手身猶健官職拋人夢漸安

任大椿

字幼植號芝田江南興化人乾隆三十四年進士  
官監察御史

幼植少以詞賦知名既而覃精經術尤熟於爾雅  
說文廣雅嘗撰呂忱字林攷逸八卷又刻釋繪九  
經三傳沿革例諸書

湖海詩傳

君二甲一名進士分禮部爲儀制司主事時值

詔開四庫館大臣知君才舉爲纂修官是時非翰林而爲

纂修官者凡八人，與君與焉。君著有弁服釋例。

深衣釋例、小學鉤沉、吳越備史注。惜抱軒文集

摘句：放船歸思減，久客別人難。

盡日吟情連鴈鷺，一秋風色在蒹葭。

### 鮑之鍾

字雅堂，號論山，江南丹徒人。乾隆三十四年進士。

官戶部郎中，有論山詩稿。

戶部少負雋才，文采秀逸。在都門與洪稚存、吳穀

人、趙味辛唱酬契密。法梧門稱爲詩龕四友。典試

廣東貴州暨分校禮闈，所拔皆名雋。潤故

摘句 白塔出青林紅亭圍碧沼

虹收山店雨月出柁樓烟

水暗疑沈墨山明不受烟

彭 翥

字少鵬號南池一號竹林雲南蒙化人乾隆三十五年舉人官廣東同知有海天吟

乾隆五十三年福敬齋公相總督廣東調水師出海捕盜時君爲香山令乞公相賞精兵二百往捕許之君捐俸支帑造戰船簡鎗砲火藥賚糗糧徑出海揚帆行百餘里遇盜船發砲擊之賊驚遁數

日賊船八九隻來官兵發砲擊之閉君知賊以穢  
物厭勝也殺黑犬取血釁砲砲果發適大軍亦至  
擊破賊船賊落水號呼乞命君命以鐵鈎拉起之

縛七百餘人

小倉山  
房文集

南池捕盜政績周導之比之終軍虞詡一流

羣雅  
集

摘句 溪山本目前烟雲使之遠

四方迷子午一氣闔坤乾

泛海

天垂無際水月戀欲歸舟

江楓冷雨啼山鬼浦月芳蘭夢水仙

高齋幾處燒紅燭香霧千門放素馨

廣州  
夜泊

潘有爲

字卓臣號毅堂廣東番禺人乾隆三十五年舉人  
官內閣中書

嶺南自三家後比來余所知者張庶常錦芳馮戶  
部敏昌溫編修汝适潘舍人有爲趙大令希璜而

黎簡民爲之冠

湖海詩傳

先生受知於王文端公又爲翁覃谿先生入室弟  
子性落落不事權貴官中書十餘年不遷丁外艱  
歸不復出所居曰南雪巢又橘綠橙黃山館門外  
陂塘數頃多種藕花有句云半郭半村供臥隱藕

塘二月春令飛蓋紀實也晚好聲樂嘗畜梨園菊  
部演劇爲壽母娛余時未弱冠讀書之暇輒偕先  
生猶子伯臨昆季往觀焉笙歌院落燈火樓臺歷  
歷若前日事越十餘年先生歸道山所藏書畫鼎  
彝亦皆星散惟張樗寮書古柏行一卷銀鈎鐵畫  
墨寶堪珍今歸伯臨比部可謂得所矣聽松廬  
文鈔

珠江南岸土名河南毅堂中翰有河南竹枝詞三  
十首於土風古蹟甚詳起句云楊子宅邊松柏盡  
地名依舊說河南蓋河南以漢楊孚得名也聽松  
廬詩

話

舍人官京師時上巳日同人集竹垞先生古藤書  
屋詩云先生原不藉花傳地以人傳花更妍兩度  
宦情春雪後百年風韻石欄邊桃栽似訪元都舊  
蘭被徒追曲水先吾粵才人吟夢斷夜闌紅雨逼  
樽前此詩神韻綵邈結二句蓋追感藥亭先生尤  
令人低徊不盡

同上

先生聽雨詩起句云四圍涼透一燈孤極得夜坐

聽雨之神

同上

摘句 野竹鎖烟移檻遠長蘿牽翠補籬疎

六松園

青藜閣上光如昔春草池邊夢已差

感舊



千里故人重繾綣十年前事半模糊

聽雨

國朝詩人徵略卷四十一

番禺張維屏子樹輯

李懷民

名憲噩以字行號十桐又號石桐山東高密人諸生有十桐草堂集

先生早孤與兩弟蓮塘少鶴相師友嘗與少鶴依張為主客圖例蒐集元和以後諸家五律詩辨其體格奉張籍賈島為主朱慶餘李洞以下客焉名曰重訂中晚唐詩人主客圖

國朝山左詩續鈔

單廉夫紹曰先生當虞山漁洋之後獨能刮磨前

洗一舉而空之

同上

李石桐曰余讀貞元以後近體詩稱量其體格得兩派焉一派張水部天然明麗不事雕鏤而氣味近道學之可以除躁妄祛矯飾一派賈長江力求險奧不吝心思而氣骨凌霄學之可以屏浮靡却熟俗子每欲聚集諸家分承兩派訂成一書嫌於創始或驚俗目喜得張爲主客圖本鍾氏孔門用詩之意而推廣之謹依其制尊水部長江爲主而入室升堂及門以次及焉

重訂主客圖

前輩謂學選體者讀初唐學盛唐者看中晚中晚

人得盛唐之精髓無宋人之流弊上

天地間文章祇在當前搜得出便成至文梅宛陵  
曰發難顯之情於當前畱不盡之意於言外二語

實盡古今詩法同上

石桐先生生於漁洋秋谷之後而能自闢町畦獨  
標宗旨可謂岍然自異不肯隨人步趨者其五言  
樸而腴淡而永苦思而不見痕迹用力而歸於自  
然五字中含不盡之意五字外有不盡之音粗人  
觀之乃曰易易蓋未知此中甘苦也聽松廬詩話

標題 寄子受五古第  
三首 道笏兒七古 攜兒輩遊

村市

古五

摘句

道深意彌歉養至中乃虛

入時性已乖力古氣猶勇

既云拙進取復不事生產親戚或相誚妻  
帑亦憤懣一編聊自娛浩歌秋已晚

優伶蒙繡裳乃與公侯類內蘊苟不充浮  
華焉足恃

兩足日著土閒居淡無味登舟未半程舉  
步思履地

沾濡花上重瀟灑樹間密稍急始紛喧漸

繁轉寥寂

對雨

風歇林未靜月出水方動

靜中世味淡病後衆情遣

斯人誰不死死身不死人

物情感氣候各自爲秋聲

孤村羣動息遠水夜聞聲想得暗流處無

人空月明

荒圃二三畝種蔬兼種花

買藥寄山客寫詩呈故人

新書借未讀舊句定猶刪

旅病覺寒早獨眠知夜長

朝食嘗新穀秋衣著舊絺

夜雪曉方覺朔風晴更多

隨行一舟月出送滿城人

送張  
邑侯

長貧爲客易漸老別鄉難

閒思一年事祇見兩封書

有景皆同賞無愁不並知

思人如中病吟成勝拜官

遠山晴始見高樹夜偏聞

母念應扶杖兒迎早候扉從頭說風土語

笑滿庭闈

遠歸

送花如嫁女相看出門時

子受求盆桂詩以送之

福增格

字贊侯號松巖滿洲人官廣東將軍有酌雅齋集

顧國泰序云光明磊落雅健沈雄洵足鼓吹休明

馳騁千古

熙朝雅頌

摘句

行人渡河水曉月照潼關

人臥兼旬雨書來千里心

往事嗟陳迹傷心過少年

五陵裘馬無知己四海交遊得幾人



託庸

字師健號瞻園滿洲人官至吏部尙書諡誠愨有

瞻園詩鈔

庸所居曰瞻園有十八景暇則觴詠於此入旗通志

託冢宰作江寧方伯時一見如平生歡遂贈以二

律有句云七十神仙海鶴姿六年人悔見公遲次

日公過訪坐定忽正色曰吾欲借君一貴重之物

未知肯否余愕然問何物公笑出袖中和韻詩第

二句仍是六年人悔見公遲七字彼此蹶然隨園詩話

摘句 鍾山餘夜燒鐵甕走江聲

方寸一時得平生萬事非

寒山歷歷路不盡班馬蕭蕭君獨行

蔣韶年

字臨臯漢軍人官山西平度州知州有吏隱集

顧詒祿

序云臨臯先生家世閥閱學博才富修書

議敘爲江蘇布政司理問事繁俸薄先生處之泰

然克勤其職公餘眺覽山水與二三同僚酌酒賦

詩而政事不廢

吏隱集

公以直道忤上官遂罷官歸怡然自得吟詠而外

惟以教子讀書爲急務家貧無力延師今相國礪

堂先生時方髫齡就傅百里外比相國以弱冠成  
進士入詞垣公猶矍鑠也廉吏家風德門善慶讀

吏隱一集可想見之

聽松廬  
次鈔

摘句 雪擁山疑失風狂馬不前

一宵將盡臘半紙隔年書

貧餘負郭方容隱宦可言歸便是仙

位因卑處才難見詩到窮時句更新

事少經營驚我老世多閱歷識人情

才未稱官原自解事非由我可原情

田無負郭饗飧缺家有藏書歲月多

高珙

字乘亭漢軍人官湖州府同知有茗谿宦遊草

徐現序云蒼老不及杜而斌媚過于香山雅頌熙朝

摘句 偶此簡書便出門觀雲烟

馬因芳草歇客爲故人留

身在浮名外心清一磬中

三十年中雙鬢改七千里外一身歸

兆勳

字佑辰號牧亭又號牧牛子滿洲人有牧子詩錄

不堪持贈吟

不堪持贈吟自跋云半窗冰雪老境寂寥偶作一

二短章不過湖邊茅屋下消遣不淨妄心熙朝雅頌

摘句 飲足臥雲岑高吟抱明月

明日送春兼送別雨中烟柳濕長條

### 白衣保

字命之號鶴亭蒙古人官荊州參領

鶴亭參領佳句頗近唐音聽松廬詩話

摘句 春雨過無迹野花開自然

一徑入山翠諸峰擁寺門

病起初妨酒官閒便擬仙

詩因臨水淡步爲看山遲

急雨過前浦亂蟬鳴夕陽

林空同鶴住果落與猿分

閒思往事還疑夢暫息勞生莫問家

病酒客愁孤館雨惜春人賦落花詩

### 甘運源

字道淵漢軍人官廣東巡檢有嘯峴詩存

道淵隱於下僚詩多警句其夔州雜詩有云永鎮

蜀門戶全分楚上游二語確是今之夔州蓋所謂

三峽之險古屬於蜀今屬於楚歸州巴東皆湖北

宜昌府所屬也

聽松廬詩話

摘句

蠶叢千里國鳥道百盤山

火畚燒白草鹽井上青烟

破硯寒暄共殘書師友存

病閒浮白手雨冷踏青心

單襄棨

字子迥山東高密人太學生有夢筑堂詩

子迥在日屬李懷民定其詩存六百四十首懷民請付梓子迥不許曰君雖直諒然面對我終不能無少容隱異日幸先君死君爲我定千秋業乃無

毫髮容情耳子迥歿懷民覆閱之始歎前言非虛

詞引謙乃爲汰存百首

國朝山左詩續鈔

摘句

杳靄澹空際晴光泛遙綠

娟娟昨夜月待人猶未沈

四野猶殘雨遙峰獨夕陽

還持一片月贈汝炎天行

但能寡營欲所得皆靜緣

兒女各已睡獨坐感餘生

汪松

字蒼巖漢軍人官佐領有早閒堂集



七卷以上皆分體八卷曰哀雁集蓋哭妹之詩九  
卷曰悲鸞草則悼亡之作十卷以冷巢殘藁終焉

蓋又其晚年所賦此三卷不分體

熙朝雅頌

摘句

亂山排遠岫孤艇入寒流

野花隨路發秋草接天齊

空囊逢儉歲老屋怨愁霖

鳥啼春夢斷雨歇夏雲涼

鼓角秋風清瘴癘樓船春浪壓魚龍

三月棠梨寒食路一雙蝴蝶美人魂

魚腸欲雪先王恥馬骨能傾國士心

金臺懷古

明 瑞

字筠亭滿洲人襲封公官至兵部尙書死難緬甸  
諡忠烈有北窗吟稿

忠烈工於吟詩雨中過石門云自憐馬上囊韉客  
獨立谿邊問渡船元夜云陌上晚煙飛素練渡頭  
殘雪踏銀沙送弟瑤圃使烏斯藏云寒分百戰袍

渴共一刀血皆名句也

隨園詩話

摘句

村舍炊煙溼旗亭酒力微

春雪

騷客興隨秋水遠故人書報菊花開

奎 林

字直方號瑤圃滿洲人襲封公官至兵部尙書定

邊將軍

勇冠三軍功垂絕域枕戈之暇不廢筆墨熙朝雅頌

君以椒房戚晚弱冠侍直

乾清二十餘年四方征討之役無不身在行間終歿

於西藏之江卡囊韃之暇喜讀史傳嘗閱元史子

問其中愛慕者誰曰耶律文正吾不敢期最慕者

王保保耳湖海詩傳

奎將軍酷嗜吳梅村詩背誦如流水南野堂筆記

摘句 百年殊夢幻一劍是平生

白馬拳毛雪蒼鷹側翅風

秦庭一哭終存楚越國三軍竟沼吳

毓奇

字鍾山號竹谿滿洲人官漕運總督有靜怡軒集  
公以吏科給事巡視漕務時河決考城東注曹充  
湖河泛溢運道多阻公乘小舟履度形勢會疏具  
奏請自濟寧迤南至江境黃林庄三百四十里內  
分爲五段籌辦以備開春運行疏甚詳奏入奉  
旨允行及春漕運果無阻滯

上嘉之擢漕運總督襲爵如故公虛懷接下諮求利病首

具疏請定僉審不實處分略曰漕糧起運首重僉  
丁僉選不實爲害匪細近年各省軍丁有紳衿富  
戶規避差運一遇報僉百計營謀冀脫軍籍每僉  
一丁賣放者數戶編審一次賄脫者逾多轉令赤  
貧之徒承充起運臣請嗣後凡有僉丁承僉官按  
四年審冊擇殷僉送如有疲丁誤運之事卽照二  
十七年前任漕臣楊錫紱奏叅湖廣運丁脫逃之  
例將承僉結報各官實降二級不准抵銷庶僉丁  
得實不致誤運奏入

勅部議行

聽松廬  
文鈔

摘句

宜防時患伏兼秋刷沙螯石勞臣力

昔靳文襄

公作石工禦水俾冲激鼓盪逼瀆刷沙受益不淺

青草池塘黃犢路綠楊村落碧螺天

慶蘭

字似村滿洲人諸生有絢春園詩鈔

大學士尹繼善子

雅頌 熙朝

似村詩專寫性情獨近劔南

隨園詩話

似村愛蘭而北地無蘭取以自名

湖海詩傳

似村耽吟詠畫筆亦灑落無塵

墨香居畫識

似村有句云作客情懷君已慣典衣風味我纔經

以貴介公子猶嘗此味何況我輩松軒隨筆

摘句 學詩未學書笑倩旁人寫

人同春作別花與蝶爭飛

埽逕迎良友挑燈改舊詩

竹因風定平安久花爲春寒富貴遲

鵲非報喜何妨少雨縱澆花也怕多

看花好似尋良友得句翻疑是舊詩

懷謙

字地山滿洲人官刑部郎中有兩間草堂詩賸

地山郎中有句云漸覺月光淡不知天色明寫曉

行情景逼真聽松廬詩話

摘句 沙平淡落日天遠入愁心

衰柳夕陽今古道亂山秋色短長亭

靜中庭院梨花雨一曲闌干一段愁

李鴻齡

字彭年號松屋雲南蒙自人士職齋監生

松屋古詩格高味永多見道語近體穠麗中有骨

幹詎圖僻壤毓此奇才羣雅集

摘句 黃雀飛飛不忘網羅烈士懷恩不忘坎壈

公子天涯猶落魄美人何處憶前身



國朝詩人徵略卷四十一

國朝詩人徵略卷四十二

番禺張維屏子樹輯

汪中

字容甫江南江都人貢生

容甫年二十試第一爲學生乾隆四十二年拔貢  
生容甫通五經正義及羣經註疏由經暨史於天  
文地理六書九章與高郵王君念孫及劉君端臨  
聲望相上下是時

朝廷方修四庫館書書成頒於揚州杭州俾各建閣  
以儲之而書帙浩繁裝潢編排鹽政全君難其人

子以容甫答遂使主閣事明年全君調杭州重容

甫才又兼掌文瀾閣因至杭州館梁孝廉玉繩家

以乾隆五十九年九月二十日終于杭

春融堂集

容甫多聞彊記經史金石悉心研究嘗得漢石闕

畫以五千錢從寶應昇歸其癖如此性情兀傲凌

轍時人故人多短之生平所著有廣陵通典三十

卷春秋後傳二十卷述學四卷又選屈宋以下哀

豔之文為傷心集若干卷比其歿也子穉著作皆

不可攷阮閣學元僅獲其述學重梓之

湖海詩傳

摘句 高言王霸略衣食苦無策

少壯不用世垂老反任官年命苟不延後  
世何所觀

畏讒多禮數居賤習憂勞

親老兼多病身孤更遠遊

素心忘世味黃綬屈詩人

青天明月不改色今日登樓無此人

太白樓

驚心歲月中年速過眼雲煙舊恨多

程夢湘

字荆南江南丹徒人貢生官清泉知縣有松寥山

館詩鈔

松寥集資清以化乘氣以霏所謂水仙數萼冰梅

半樹未足喻其芳潔也

湖海詩傳

標題

張公洞

五古

夜宿雲林曉步冷泉亭上

五古

摘句

水清不受月月出見湖底

遠屋寒流靜開門雪正深

不復似人境好風來自東花明鳥影外香

滿磬聲中

昨宵病酒今朝雨況復懷人更送人

蘇加玉

字維晉號餐霞江南太倉人諸生有蓼蟲吟稿

維晉才情雄傑骨力開張同里汪衡玉少司空視  
學安徽江右河南所至必偕性好游凡遇名山故  
蹟必登臨吟嘯而去歸而貧甚年逾六十猶作童  
子師以自給余嘗過所居繩樞圭竇頰首而入見  
其敗氊破席吟咏自如雖饗飧不繼弗顧也湖海詩傳  
標題 發硃砂菴過天門至老人峰歷巢雲洞上

小心坡渡斷凡橋抵蓬萊島穿一綫天遂

登文殊院

古五

文殊臺看前海諸峰

古七

摘句

堅壁一夫怒環攻萬騎怯在德豈在險自

焚悔不戢虎視羣雄吞鹿逐劉項入誰知

百二封莫敵三章法

函谷關

諸葛心存漢畱侯志報韓

文信國祚

高密建功能再造武鄉遺憾竟三分

南陽

殷如梅

字果園江南元和人諸生有綠滿山房存稿

果園安貧樂道苦節自貞乾隆庚子春予扈

蹕至吳閫借沙斗初步屨訪之衡門兩版在橫橋疎柳間

簞瓢屢空嘯歌不輟蓋錢穀居節一流人也

湖海詩傳

摘句 好句有時堪入畫閒情無日不提壺

東風綠到門前柳小雨香生砌下蘭

茶烟不共晨炊斷梅雨能令午夢涼

半畝瓜壺秋色早一庭梧竹雨聲多

尙憶使船如使馬獨憐擒賊未擒王

韓斲王碑

吳照

字照南江西南城人貢生官教諭有聽雨齋集

照南才華清綺詖蕩不羈少得詩法於禮堂光祿

以唐人爲師通六書又工畫竹人以爲金錯刀之

比湖海詩傳

摘句 閉精斗室中掃萬惟一戀

貧專邱壑原奇福老閱風霜作散材



路孰重尋前代寺天晴補看去年花

氣吞湖海襟期濶老閱炎涼感慨平

投人自笑非高士安分居然羨老僧

### 金慰祖

字繩武號蘭嶠浙江嘉定人貢生有綠雨山房稿

蘭嶠詩才繁富南昌彭司空視學東南愛之湖海詩傳

摘句 貞非柳下惠寧學魯男子廉非吳隱之勿

飲貪泉水

飄零弱主封歸命憔悴詞臣著辨亡

讀書新有珠船獲論古還看玉塵揮

兩代詩名元好問畢生心事沈初明  
吳梅村  
燕子話殘樓外雨梨花夢斷夜來雲

### 何青

字數峰江南歙縣人太學生官知縣有味餘樓稿  
數峰風雅宜人竹君爲安徽學使特加識拔數奇  
不遇溷於鹽筴近始鳴琴花縣世論惜之  
湖海詩傳

摘句 未梯絕巘雲先臥孤嶺月

向背三州外陰晴一息間  
天都峰

### 余鵬翀

字少雲江南懷寧人太學生有息六齋遺稿

少雲鵬年之弟少有逸材工水墨畫往來燕晉所

遇名山水輒以詩寫之未幾卒

湖海詩傳

摘句 割雞契先聖雕蟲羞壯夫

寫竹不滿十數葉能使葉葉生長風

玉川搜腸五千卷鄴侯過眼三萬籤

地返舊遊如故里天生有用即勞人

朱彭

字亦錢號青湖浙江錢塘人諸生有抱山堂集

西泠自金江聲厲樊榭杭堇浦汪槐塘諸公後大

雅將淪青湖獨承其後以詩法指示騷壇故二三

十年來從游甚衆每言浙江明季多學鍾譚漸乖於正自雲間陳臥子先生司李山陰差知復古後如西泠十子皆奉司李之餘緒西河毛氏幼承賞識亦宗其旨卽竹垞太史初時並效唐音百餘年來浙中詩派實本雲間至康熙中葉小變其格繼吳孟舉查初白出始競爲山谷誠齋之習樵李學者靡然從之而武林兼學唐宋無所取裁故青湖專以歸愚宗伯別裁諸集傳示學者於詩自爲有功今年已七十餘多識前言往行實爲一時文獻著有吳越古蹟攷若干卷其詩古體矩矱從容今

體聲情高遠又錄其弟子李方湛蔣炯徐鉞諸人  
及其子械壬等十三人詩爲同岑詩選子爲之序

今行于世

湖海詩傳

摘句 江流經割據山色閱興亡

歸鳥有寒色晚山無定容

霜摧羣木瘦秋放一峰高

雲淨江天遙辨塔潮迴沙渚忽無田

春當二月原如客人過中年欲近僧

病餘人比寒山瘦秋晚詩如落葉多

人當晚節多憐菊天爲重陽特放晴

朱文藻

字映濬號朗齋浙江仁和人諸生有碧溪草堂稿  
朗齋精六書自說文繫傳佩觿汗簡及鐘鼎款識  
博古圖諸書無不貫串源流會其旨要又能手親  
摩寫韓城相國督浙學時訪而延之至京師佐校  
四庫全書又通史學凡紀傳編年紀事通典諸書輒  
攷其缺略審其是非先助子修西湖志後助子撰

金石萃編訂正之力最多湖海詩傳

標題 妝域歌七古 明宮人兒嬉之具琢象齒為之有樓閣人物可使几上旋轉

摘句 朝章原尚齒天性愛畱賓贈王述菴

尋之有易有不易妙處每在艱難中 尋詩

### 黃 易

字小松浙江錢塘人太學生官運河同知有小蓬

#### 萊閣詩

小松尊人松石名樹穀因以小松為號松石工隸

書嘗客于張文敏公家博通金石故小松愛古亦

如之官濟寧凡嘉祥金鄉魚臺間漢碑悉搜而出

之而武氏祠堂畫像尤多所見漢石經及范式三

公山諸碑皆雙鈎以行于世又工填詞官雖不達

亦為名流所重 湖海詩傳

摘句 歸興濃於酒波光綠上衣

傷心卅八年前事此日辭親上客船

羅聘

字兩峰江南歙縣人諸生有登岱詩

兩峰爲金壽門弟子能畫尤工梅生有異稟目見  
鬼物久之成鬼趣圖殊形異狀宛然吳道子地獄  
變相又如讀五王樓炭經也其寫大阿羅漢及摩  
訶薩各像足與崔青蚓陳章侯上下又能詩好遊

山通佛理游京師最久垂老歸揚州

湖海詩傳

摘句 初登雲未生移時間羃歷忽焉出山腰俄



訝沒山春儵然天風吹雲開見絕壁登岱頂

山靈慰勞人娛耳復娛目

靜悟造物心所忌在極樂

### 方薰

字蘭坻浙江石門人有山靜居稿

東南布衣能詩者自李客山後蘇州張崑南沙斗

初吾松翁石瓠而嘉禾爲方蘭坻能畫尤工蘭性

情和雅儵然自得湖海詩傳

方薰字蘭士號樗盦詩畫見重於世著有詩八卷

詞二卷詩話二卷論書二卷論畫二卷兩浙翰軒錄

蘭坻山水花卉得宋元人秘法錢塘奚鐵生亦以畫擅名于時浙東西求一鼎足者不可得

定香亭筆談

摘句 孤雲將離心去作寒城雨

古人千載前事事後世師

暇日寄書期別後經年欲語盡燈前

翁 春

字澹生號石瓠江南華亭人有賞雨茅屋詩鈔

石瓠遠性風疎逸情雲上汪上舍大經序其詩云嗜恬澹甘寂寞菽水奉母耕讀教弟年踰四十不娶不就有司試爲詩一唱三歎如朱絃疏越足以

盡石瓠矣

湖海詩傳

摘句 空空雖未談心心亦無礙

孤艇破澄綠數邨明澹霞

松闕孤枕夢蟲語一鐙秋

尊鱸入夢三間屋風雨論心一紙書

人來山色蒼茫裏春在梅花淺澹時

汪照

字綉青江南嘉定人貢生有陶春僅吟稿

綉青少有詩名在練川十二子之列通金石能八

分如臨潼張子祠堂記及修長武縣學記皆其所

書又選宋詩略最爲精當晚年窮經義有齊魯韓

三家詩義證大戴禮註今藏于家

湖海詩傳

摘句 蘭橈徐蕩秦淮水秋月秋風送六朝

張夢階

字鳳于號玉壘江南華亭人貢生有塔射園詩

玉壘爲文敏公從弟家門鼎盛絕無進取之志掩

關高枕種竹澆花讀書樂道之餘工于筮法爾來

易道荒蕪吳中士大夫無通于大衍者今詰嗣晦

堂傳之亦好古者所當問業也

湖海詩傳

摘句 明月滿空山迷濛香霧遠思古咏梅人亭

閒坐忘返

孫魯

字嘯甫浙江嘉善人貢生

嘯甫依人萬里氣宇溫醇老而彌粹湖海詩傳

摘句 過從三徑多賢友點勘千秋有異書

故園月色歸蓬底永夜江聲撼枕邊

回首獨憐同輩少斷腸翻為結交多

汪大經

字書年號秋白浙江嘉興人貢生有借秋山居詩

秋白能書善散體文又從沈沃田學詩清新峻拔

羣謂裘杼樓之後勁也

湖海詩傳

秋白有談箋三十韻句云有明談仲和製箋共稱善乃祖侍郎公入直邀主眷仲和其從孫斯技妙獨擅其妙在本色無取朱粉碾觀此詩則今之青捶箋益其遺製余用箋亦喜本質凡箋搨印山水花卉人物余以爲皆不及本質素地之妙

聽松廬詩話

摘句

人從樹杪上百折乃至頂

暝色歸深樹秋陰染一峰

風聲雨聲戰葉聲萬聲力與萬竅爭

慰藉聊憑三勺酒平安先報一緘書

姜宸熙

字檢芝號笠堂浙江烏程人諸生有陵陽山人集

笠堂克荷門業雅擅聲律又虛懷善受更恐泥古

者愚時復取證今賢其結交多半老蒼歸愚文鈔

只有青天月隨子到海邊寒輝終夜照孤館不成

眠把盞渾忘醉臨風獨愴然故園書未至時問渡

江船此姜笠堂詩也雖無奇特却極清真聽松廬詩話

歸安楊拙園知新重刻笠堂詩集與笠堂素未謀

面也余在楚北拙園郵詩見贈神交數載至今亦

未識面拙園蓋以友朋文字為性命者松軒隨筆

忽看芳草路又是踏青時

偶隨瓜步雨獨上秣陵船

途窮惟仗友客久似忘家

春水方三月楊花又一生

詠萍

壁蟲秋靜作人語露葉夜明如水流

客久暗驚頭漸白天寒惟覺酒多情

客淚不禁雙袖濕十年七夕九離家

長淮一碧桃花水似解鄉心背北流



國朝詩人徵略卷四十二

摘句 忽看芳草路又是踏青時

途窮惟仗友客久似忘家

壁蟲秋靜作人語露葉夜明如水流

客淚不禁雙袖濕十年七夕九離家

長淮一碧桃花水似解鄉心背北流

芮熊占

字飛庵直隸寶坻人貢生有蕉亭閒詠

余讀寶坻三子詩飛庵之作尤能自出己意年五

十餘始以副榜貢於鄉

簡河文鈔

李樸園太守 光庭 芮飛庵先生婿也嘗述先生之

言曰凡讀書者不理會孟子尚志二字不足以爲  
士作人者打不破財色二關不足以爲丈夫卽此  
可想見先生之爲人先生翁壻俱有詩癖其爲詩  
皆抒寫性靈自得天趣冰清玉潤古人豈專美於

前哉聽松廬  
文鈔

摘句 月因邊地冷花是故鄉肥喜仲兄自  
北口歸


夢因貧更幻愁與夜俱長

論境自輸人有樂寬心誰禁我忘憂

灌花塔下雲移影鋤草池邊鳥換聲

論文老豈無談笑宴客貧猶有酒漿

寒舍今年添一事拈香除夜拜花仙水仙花



022-468

國朝詩人徵略卷四十三

番禺張維屏子樹輯

錢 澧

字東注號南園雲南昆明人乾隆三十六年進士  
官通政司副使

南園居臺諫慷慨敢言無所梗避嘗劾山東巡撫  
貪暴不法

勅審得實正其誅眉稜聳峭同事畏之其實中懷樂善見  
如不及清談終日必以世事爲心君督湖南學政  
予從雲南入都道出辰州時方扁門試士子僅貽

一刺候之而君遣人固請少留比日暮試畢即至

子寓中蟬聯絮語燭見跋乃去其飲人以和如此

君歿後索其詩不得雲南門人袁子文揆以所選

滇南詩略見示故抄錄數首於此詞海詩傳

常乾隆之末和珅自張威福朝士有恥趨其門下

者已可貴矣若夫立論侃然能訟言其失於奏章

者錢侍御一人而已惜抱軒文集

摘句 時命有利鈍此意久所體

雄都峙楚規南幸重鎮窺吳號上游荆州

此夕公安城裏月藥鎗孤枕對黃昏

程世淳

字端立號澂江江南歙縣人乾隆三十六年進士  
官御史

先生爲御史有伉直聲督山東學政奉

旨主試武闈異數也後引疾歸主講中江晴川兩書院凡  
二十年晚年喜談道與朱文正公尤相契壬午力  
辭講席旋里次年卒年八十六卒前數月寫遺囑

猶作小楷其神明澹定如此

聽松廬  
文鈔

余於詩古文及駢體雜文以至詞曲無所不好而  
時文中見有發揮名理包羅史事杼寫物情者亦



復愛翫不置惟於近時所謂律賦觀之味同嚼蠟

且有疊牀架屋滿紙時文調者尤令人欲臥矣程

澄江先生詩有云最忌習時腔用韻之八股此二

語蓋為凡作賦者下鍼砭也聽松廬詩話

摘句用法去其甚存心求所安

歸來三徑菊坐對九江潮

送窮真屢空乞巧亦蹉跎韓柳皆賢者當年奈困何

年奈困何

古來明月三分少天下瓊花一樹多揚州

不逢春日偏能醉開到秋江尚未遲木芙蓉

邵晉涵

字與桐號二雲浙江餘姚人乾隆三十六年會試  
第一官侍講學士有南江文鈔詩鈔

君少多病左目微眚清羸如不勝衣而獨善讀書  
數行俱下寒暑舟車未嘗頃刻輟業於四部七錄  
無不研究嘗謂爾雅者六藝之津梁而邢叔明疏  
淺陋不稱乃別爲正義以郭景純爲宗而兼采舍  
人樊劉李孫諸家郭有未詳者摭他書補之凡三  
四易稿而始定今承學之士多舍邢而從邵矣自  
歐陽公五代史出而薛氏舊史廢獨永樂大典采

此書君在館會稗編次其闕者采冊府元龜諸書  
補之由是薛史復傳人間予嘗論宋史紀傳南渡  
不如東都之有法寧宗以後又不如前三朝之粗  
備微特事迹不完卽褒貶亦失實君聞而善之乃  
撰南都事略以續王偁之書詞簡事增過正史遠  
甚畢尙書沅續宋元通鑑常就君商榷輒歎曰今  
之道原貢甫也君生長浙東習聞戢山南雷諸先  
生緒論於明季朋黨奄寺亂政及唐魯三王起兵  
本末口講手畫往往出于正史之外自君謝世而  
南江文獻無可徵矣君所著又有孟子述義穀梁

正義韓詩內傳攷

皇朝大臣諡迹錄翰軒日記皆實事求是有益於學者君  
至性過人事親喪葬盡禮篤于故舊久要不忘性  
狷介不踏權要之門以教授生徒自給詩文操筆  
立就淵博奧衍有南江詩文稿潛研堂文集

二雲在史館最久數十年來名卿列傳多出其手

據實直書未嘗有所依阿瞻徇也湖海詩傳

先生博聞強記於宋明以來史事最深在

四庫館與戴東原諸先生編輯載籍史學諸書多由

先生訂其略其提要亦多出先生之手筆經室集

南江札記四卷前三卷攷經第四卷攷史

松軒隨筆

摘句 西風振客衣西山落襟袖

遠遊不如歸新知不如故

斷梗隨風人易別薄寒吹袂酒初醒

魯仕驥

字九臯號絜非江西新城人乾隆三十六年進士

官夏縣知縣有山木居士集

君嘗謁朱梅崖而受其爲古文之法君古文雖本梅崖而自傳以己之所得持論尤中正里居授其學于子弟及鄉之雋才又授于其甥陳用光蓋新

城數年中古文之學日盛矣其源自君也

惜抱軒文集

君謁選得山西夏縣縣當驛道縣舊分二十餘里以次出錢供役謂之里差君自持既廉又減其役之得已者而重禁侵蠹民大便之

同上

摘句 舟行願無波車行願無泥

人生骨肉情觀此足嘆嗟亡者既已矣存者客天涯

程晉芳

字魚門號戢園江南歙縣人乾隆三十六年進士官吏部主事以校勘

四庫全書改編修有載園全集

魚門祖居新安治鹽于淮乾隆初兩淮殷富程氏  
 尤豪侈君獨情情好儒罄其貲購書五萬卷君耽  
 于學百事不理又好周戚友求者應不求者或強  
 施之付會計于家奴任盜侵了不勘詰以故雖有  
 俸有飲助如沃雪填海負券山積勢不能支乞假  
 赴陝將謀之中丞畢公為歸老計時酷暑索通者  
 呼噪隨之君已衰老乘舸棧車行烈日中遂病至  
 中丞署中一月死年六十七所著周易知旨尚書  
 今文釋義左傳翼疏禮記集釋各若干卷

小倉山房文集

京師語云竹君先生死士無談處魚門先生死士

無走處

同上

標題

王莽貨布歌七

太白罇七

苗刀歌七

摘句

人生各有好彼此不互易

春水方生夜孤帆獨去時

殘篋誰憐白團扇新聲終愛鬱輪袍

藏名漫擬隨龍尾學道何曾悟馬蹄

孔繼涵

字體生山東曲阜人乾隆三十六年進士官戶部

主事有紅欄書屋詩集



孔體生農部著有春秋世族譜春秋地名人名同  
名錄春秋閏例日食例左國蒙求周官聯事國語

解訂論

松軒  
隨筆

摘句 淡者非枯槁濃者非粉黛

又是一年春過眼棟花開盡賣櫻桃

陳昌齊

字賓臣號觀樓廣東海康人乾隆二十六年進士

官溫處道有賜書堂集

先生自編修至中允十餘年歷充三通館纂修官

四庫館纂修兼分校官

國史館纂修官一爲甲午湖北鄉試主考官乙未會

試同考官

登雲山  
房文稿

其掌刑科給事也疏言粵東洋匪會匪相爲狼狽  
屢苦瀕海民若不及時懲創誠恐釀患日深且會  
匪藉洋匪爲去路洋匪靖則會匪自消同上

先生奏緝捕洋賊事宜其略云查屢次土岫之洋  
匪不過一二百人至行劫輒有陸居會匪持械助  
兇每行劫後給丁壯等銀每人數十兩誘令下海  
沿海居民類皆採捕爲生習拳勇熟水勢向爲匪  
等所畏自匪等出銀招誘從匪者往往而有因思

重賞之下必有勇夫可以爲盜卽可用以捕盜似  
宜令地方官明張告示有能出洋勦捕或乘匪等  
上舫併力殲擒送官驗實者其財物船隻一概給  
予充賞卽已經聽誘下海之丁壯若能設法殲擒  
連船投首亦准免罪

雁山文鈔

巴圖魯一等侯德楞泰奉

命按閱閩浙營伍議于各海岬設兵巡邏不許一人下海  
侯風采嚴厲屬吏莫敢置對先生進曰環海居民  
多捕魚爲業若禁其下海則數萬漁戶無以爲生  
激變之咎誰當任之侯默然久之曰公言是也

同上

先生論學謂不當分漢宋爲二漢儒有傳經之功  
宋儒有體道之實漢儒所長在訓詁宋儒所長在  
義理且程朱未嘗不從訓詁入也謂明人言說文  
過于分近人言說文過于合謂今世宗漢學者失

之拘墟

登雲山  
房文稿

所著有經典釋文附錄歷代音韻流變考測天約  
術楚辭韻辨天學脞說臨池瑣語呂氏春秋正誤  
淮南子正誤營兆約旨囊玉秘旨別傳同上

摘句

天開無盡藏人坐最高峰

微言都著已淡趣足忘貧

賸勞  
我野

自來臣朔能禁餓豈有韓康尚好名  
餘年尙有皆天賜長物原無許我閒

### 胡亦常

字同謙廣東順德人乾隆三十六年舉人

亦常事母孝抗志希古不欲爲一鄉一國之士詩

妙悟天成能於南園諸子外自成一家

廣東通志

富貴人飲食居處服御無不適意一旦失其富貴

而處貧賤必將有愀然不可終日者惟能處富貴

又能處貧賤乃不爲境困耳胡同謙詩云常恐驟

富貴不復能貧賤語最可思

聽松廬詩話

同謙有踏車曲云海遠於岬中間轉灌水上天半

一半人汗語極古質而人力之勞已見同上

標題 詠古五古 四君詠五古 觀鶉鬪七古

摘句 鳩鷹有遷性荃茅無恆根朝為人愛惜暮

為人所憐

元氣迴羣物神功動百靈浴日亭

積嫌詞賦美多誤性情真陳思王墓

彭淑

字秋潭湖北長陽人乾隆三十六年舉人官吉水

知縣有蟾芝集

秋潭沈毅喜學問能文章好切言高論所歷崇仁  
弋陽瑞金吉水振綱舉凡釐條搜日期於大適而

後已

太雲山  
房文稿

摘句 桐陰山路淨稻氣水風涼

相思舊雨非今雨惆悵逢君是送君

鐵保

字冶亭號梅庵滿洲人乾隆三十七年進士官至  
兵部尙書兩江總督有梅庵集

冶亭少入詞垣以詩名尤工書法北人論書者以  
劉相國石庵翁鴻臚覃溪及君爲鼎足嘗選集

國初以來滿洲人詩爲

熙朝雅頌共一百二十卷蓋百餘年來名人傑作搜

採無遺尤足爲

盛朝掌故也

湖海詩傳

尙書與百菊谿制府法時帆學士天下稱三才子

生平敬賢禮士人倫冰鑒真鄂文端後一人

羣雅集

標題 黃金臺古七 日出謠古七

摘句 士窮詩任過才大地分靈

灘聲畱雨住雲影帶山飛

頓驚佳日去如見故人來

廢稿



對面馬隨飛鳥沒上山人帶斷雲來

古北

天外雲如倦遊客雨中花似獨醒人

愁裏逢春驚老至中年生女作兒看

許兆椿

字秋巖湖北雲夢人乾隆三十七年進士官江寧  
布政使有秋水閣詩鈔

秋巖與弟石泉兆棠先後入詞館石泉早卒秋巖  
轉御史降刑部郎由知府而至監司嘗與子案事  
高郵及長沙應山衛輝諸處同羈旅者年餘于思  
飄然議論明達工詩善書尤精於吏牘下筆千言

無不迎刃而解與其鄉余元亭同知彭秋潭明府

文名鼎峙

湖海詩傳

先生官江南釐奸剔弊蠹胥豪猾尤加懲創

羣雅集

摘句 塞天風有色江浦月流聲

世味漸諳知老大鄉園欲近問桑麻

風雷直破蠻人膽日月原臨化外天

記得前年長白下雪花如掌作中秋

鄒炳泰

字仲文號曉屏江南無錫人乾隆三十七年進士

官至戶部尚書有午風堂集

曉屏清真廉介素以名節自持山東江西兩任學  
政非特苞苴屏絕卽偶有承筐亦必卻也詩風格  
在青邱漁洋間又撰午風堂叢談名公佳話詞林  
典實多摭其中足爲史學之助

湖海詩傳

摘句

林藏兩厓合樓出一峰高

潮聲到關盡帆影上城來

山鐘過澗初知寺江月升舟欲上潮

石磴茶香清暑後書牕梧韻晚涼餘

百齡

字菊溪滿洲人乾隆三十七年進士官至兵部尙

書協辦大學士有守意龕詩鈔

百菊溪制府撫粵時多惠政而嚴禁班館重懲蠹  
役一節尤得民心班館者蠹役私設以羈畱犯事  
及訟案牽連之人也公在任數月調兩湖總督去  
之日士民遮道畱肩輿不得行至夜乘馬出城乃  
登舟後復奉

命督粵先聲奪人海盜望風有降意於是巨盜張保首先  
乞降公許之保懼誅未敢遽進請公出海招撫願  
望見顏色乃降旁人謂公不宜以貴重之身蹈不  
測公曰粵人苦海盜久矣今既乞降若不開其自

新之路海氛何時息乎既招撫之卽宜坦白待之  
使不生疑懼遂單舸出虎門時盜船數十艘隨張  
保來環公船公神色不動命張保過船進見好言  
撫慰之獎勵之並以所用之物賞之保於是率衆  
降公卽奏請

旨賞給頂戴因命張保招降巨夥烏石二烏石二猶豫未  
決公以計誘至雷州斬之並斬爲從者百餘人餘  
黨釋之粵海巨盜悉平二十年來沿海居民及商  
船來往得以安然無患者公之力也

聽松廬  
文鈔

嘉慶乙丑六月廿六日菊溪百公調任兩湖總督

有感

恩紀事詩四首錄第三首云不敎藏過宰官身夾路香燈  
照水濱豈有去思畱異日從來直道在斯民同其  
好惡情能洽釀以詩書氣自醇付與諸公勤撫字  
未妨單騎出城闌公去任之日士民遮道畱至夜

公乘馬出城故有結語

聽松廬詩話

百菊溪尙書有俠女行一篇序云有嫠母與女獨  
處有紈袴子目而豔之強委禽焉選日往迎女女  
夜與母訣欲自裁悲愴間有虬髯者自屋飛下謂  
母曰若所苦吾已聞之矣勿悲請以身代母方詫

卽擲刀去巾髯宛然好女子也母女大驚喜急爲  
塗粧結束俄綵輿至乃假婆女往豪家方張宴列  
炬以待女人門密薰異香一室皆眯乃攫其寶器  
還母家夜猶未闌謂母曰惡姻緣已斷請爲若女  
更結好姻緣此寶器以資奩具也遂挾母女去不  
知所終此事頗快人意因錄之尙書詩有云借面  
誰知善女人低眉我亦奇男子語亦警切同上

摘句 又逢生我日難得養親時生日示諸弟

出門無百里憶汝已千回寄女

後日功名誰料得前生福地要修來

從知民事原難緩此是天功詎敢貪

粵海平

開眼東風過二月畫眉春色到三分

春柳

嶺南一事君堪羨殺賊歸來啖荔枝

凌浩

字滄洲號花農河南中牟人乾隆三十七年進士

官貴州知府有花農集

公之先常熟人祖宦粵東家焉始業鹽筴旣而饑  
務日落遂遠游就中牟幕乾隆辛巳秋河決楊橋  
大溜將繞牟城而下牟令唐君倉皇商諸公公令  
城中丁壯以筐運土筐百錢復發錢市質庫之絮



被袴襦為塞城罅漏又以民間裹糧布囊實土以掩之又令戶各輸秫席並輸麻以麻聯兩席如囊中實以土抵於城根若列齒狀有隙則以土彌縫之層土層囊復於漚勢冲激處捲埽禦之於是中牟城獲安後公即著籍中牟以太學生應鄉試中式舉人壬辰成進士以知縣即用游擢大定府知

府護理貴西道卒年七十二

聽松廬文鈔

公捐廉刊張君

甄陶

所著四書翼註論文

松軒隨筆

摘句 悠然濠上心吾以隱為吏

不是芳心能耐久翻愁和雪一齊消

梅花

吳俊

字曇繡號蠡濤江南吳縣人乾隆三十七年進士官山東布政使有榮性堂集

蠡濤與弟少甫同以畫省望郎稱詩京雒蠡濤取徑幽深精心獨造從軍以後崎嶇烽火所見益奇筆足以發難顯之情卽少甫亦多不逮

湖海詩傳

榮性堂文集載十家牌法云每十家爲一牌公舉牌長一名如十家之內有一家爲匪及通盜窩匪者九家卽行緝縛送官倘有徇隱經別牌察出牌長治罪九家一併究處累十牌爲一甲公舉甲

長一人累若干甲爲一約公舉身家殷實人品端  
方無論有職無職一人充當約正再舉一人充當  
約副一約之事均歸約正約副管理由官給與鈐  
戳執照每家門首各懸一牌牌上詳寫丁口姓名  
年歲行業牌長門首懸一大牌將十家姓名年歲  
丁口行業彙書於上每日晚間牌長赴各家的審  
人口有無增減及有窩藏匪類等情累十牌烟戶  
丁口共爲一冊交甲長掌管又累若干甲烟戶丁  
口共爲一冊交約正副掌管每約多不得過十甲  
仍另造清冊繳送地方官以備抽查愚按此保甲

之法本於周禮自兩漢後魏以迄於明皆嘗倣而

行之而于北漢成龍陸稼書隴其彭九峰鵬張孝

先伯行李義卿九型沈冠雲形諸前哲論之益詳

近時左杏莊中丞輔增編零戶另戶兩種尤善其

孤苦無依者名之曰零戶其行為不端者名之曰

另戶零戶可以動秀人矜恤之心另戶可以動本

人愧恥之念且另戶不編入十家牌內彼雖強悍

亦將孤立而無所容誠良法美意也雖然有治法

亦貴乎有治人耳不得其人吾恐保民之利未見

而擾民之弊先見矣松心  
日錄

欲行保甲之利必先除保甲之弊如彭中丞鵬保  
甲示所云不點卯不委員不取結保甲長不聽情  
更換凡牌自買紙刷印不費民一錢是誠去擾累  
之弊矣然愚更有進者鄉民多各懷其私約正事  
事秉公持正不難先結怨於鄉人然則約正誠不  
易爲而廉謹有品者多不肯爲其肯爲之者大都  
好事之徒甚則漁利之輩如是而欲其有實效也  
難矣嗟乎治法易言治人難得豈獨保甲哉同上  
摘句 梧竹倚娟妙水雲相淺深

書生敢謂平蠻易幕府深虞轉餉難

秦 瀛

字凌滄號小峴江南無錫人乾隆三十九年舉人  
官刑部侍郎有小峴山人集

錫山秦氏素以事功經術見稱至對岩學士始擅  
詞章有蒼峴山人集故凌滄以小峴名集在武陵  
數年益以文章山水自任招邀賢俊屢爲詩酒之  
會刻前哲遺書又修望湖樓上以供東坡修龍井  
寺旁隙地建祠以祀少游而詩文日益進

湖海詩傳

司寇敷歷中外鋤奸除弊風骨嚴峻人不敢干以  
私任浙時士夫肖像刻石祀之詩謹守唐賢古文

匡章言ノ程田卷四二三

希踪歸方兩家以叫呶狂縱為才大者當奉為清

涼散也君率雅集

小峴先生襟懷瀟灑雖位躋通顯而儀度同於山

澤之臞生平愛才禮士藹若春溫及施之政事善

於用猛為廣東臬使時訪拏積匪從嚴懲治匪徒

聞風歛跡除莠安良百姓至今德之惜其在任未

久耳聽松廬文鈔

小峴先生論文云文以明道沾沾於尋章摘句餽

飭訓詁之學而形而上者反遺焉文以致用做精

勞神於注疏箋釋紛紜軼轡而所為適於用者不

存焉治古文而欲廢攷據非也以攷據爲古文亦

非也觀此數言而先生爲文之宗旨已見

松軒  
隨筆

小峴先生廉訪吾粵時風清政肅公餘不廢篇詠  
後擢浙藩馮魚山劉樸石兩先生偕吾輩數詞人  
繪圖賦詩餞送於花埭先生臨別曰明日此時相  
思都在迷離煙雨中矣賦詩誌別其次章云花田  
古勝區飛蠶在晡靄從來送行者於此集冠蓋羣  
公澹蕩人襟懷出塵壒謂我非俗吏世態盡淘汰  
論詩半簋笠讀畫緩巾帶花藥滿階前延翫豁矇  
眛勿聞津吏喧執手動深嘅相期崇令名詎久隱



蓬艾

朝廷正需賢彈冠赴良會時同祖席者張南山同年

維屏

吳雁山孝廉

應達

梁蓼圃明經

吳

劉月鋤明

經廣禮

葑房先生令子無山秀才

思齊

魚山先生

令子子坦秀才

士履也

香石詩話

丁卯余在都中先生招同法時帆宮庶吳蘭雪國

博陶季壽大令潘伯臨比部拜淮海先生像談醮

極歡後公餘輒招過寓齋評詩讀畫先生論及古

人詩文或自出所作每琅琅吟誦或談古今事意

所不可輒振袂離席甚且七箸落於地其真性坦

率令人想見老輩天懷猶是書生本色也

聽松廬詩話

小峴先生五七律多警健之作偶錄數首於此荆  
軻墓云一死報燕丹如卿亦大難酒徒從此盡易  
水至今寒擊筑歌聲古招魂仗骨殘惜哉疎劔術  
孤負白衣冠鑿巫閭云萬古大荒東開天一鎮雄  
空青塞遼薊蒼翠割鴻濛石壓危崖樹潮鳴大壑  
風夫犁莽蕭颯碑碣問遺宮文信國祠云天畱正  
氣作星辰滄海橫流繫此身風雨厓山思帝子衣  
冠柴市泣纍臣北枝夢冷梅花月南國啼殘杜宇  
春異代孤忠鄉後進從公碧血化青燐

明李忠肅  
邦華自經

於信謝文節祠云書成却聘已長饑賣卜餘生涕

淚揮滄海只餘孤鶴在錢塘不見六龍歸衣冠南

渡空禾黍日月西山長蕨薇天水到公殘局盡蒼

涼蕭寺送斜暉祠在憫忠寺故結句云爾同上

標題 鸚鵡洲古七 晉磚古七 過采石磯放歌古七

題宋高宗手書賜岳忠武敕後古七 人

峽古五

摘句 人生天地間無如讀書美

嗜欲鑿情竅憂患伐性柯聞道苦不早萬

事成蹉跎

荷外鳥雙下柳陰蟬一鳴

村水不容路山雲常近人

天橫古塞出山壓大荒來

前朝流水在舊事夕陽知

三百人銷金虎氣六千士散水犀軍

一水鴟夷連越絕三年烏喙沼吳宮

三生慧遠山中社一枕羲皇柳下門

靖節故里

目窮南海初升日脚踏中原未了山

危言豈畏含沙怒 聖代能容伏闕呼

喜聞故御史曹劍亭蒙  
蔭有作

恩贈銜子

吳蘭庭

字胥石浙江歸安人乾隆三十九年舉人有南雪草堂詩集

胥石壯遊燕趙多蒼深清健之作年六十餘寓京師與仁和吳長元齊名時號二吳胥石有五代史纂誤補四卷長元有宸垣志略十六卷

湖海詩傳

摘句 麥場風引雉荷浦雨隨鷗

晴烟融碧樹小雨漲紅潮

豈有虎賁憐北海空餘馬策慟西州  
愁鬢欲星還作客長途無日不登高

宋大樽

字左彝號茗香浙江仁和人乾隆三十九年舉人  
官國子監助教有學古集牧牛村舍詩鈔

宋茗香詩以太白爲法能不襲面目而別具神解  
寄山塘酒家云美人安在哉猶在姑蘇臺一片五  
湖月香魂獨自回春風忽吹散化作桃花開笑勸  
當壚女如何不舉杯

靈芬館  
詩話

茗香五言極有真氣送陳白雲賦北上云阻君非  
人情送君殊黯然我有田間廬畱君已數年君今  
別我去何時來田間辭榮亦云矯易退乃稱賢只

四十字而惜其遠別盼其復來望其進取勸其恬

退諸意俱到

聽松廬詩話

摘句 種花莫種桃住家莫住城桃花易零落城

市多煩縈

猶持故人酒莫作異鄉看

師 範

字荔扉雲南趙州人乾隆三十九年舉人官知縣

有金華山樵集

荔扉資性敏捷偶然揮翰動輒萬言法時帆稱其

負聲若折鐵抽筆如縑絲真定論也

羣雅集

荔扉令望江公明慈惠克著賢績士民謳歌之同上

摘句

河與山相倚中橫斗大城

高山城  
題壁

立馬太行巔關河曉月前五更橫積氣一

徑上青天

曉度  
太行

風雨控弦三十萬佩環欵塞二千春

大同

高文照

字潤中號東井江南武康人乾隆三十九年舉人

有闔清山房詩錄

高孝廉縱情山水倜儻不羈朱笥河學士典學皖

江辟置幕府登臨嘯詠幾無虛日鄉薦後遽主蓉



城遺稿散佚秋媵大令以賢達素交搜羅片羽相  
其生氣如接美襟惜乎韻海一編芸煙久化物之

傳信有數夫

吳會英才集

摘句 也知才子原關數未有庸人解好名

行盡柳陰三十里和煙和月睡征鞍

李壇

字道登號杏墅廣東嘉應人乾隆三十九年舉人

官教諭有退學軒詩文集

杏墅有夙慧過目成誦自天文樂律醫經至丹青

篆刻無所不通為詩文操筆立就

玉壺山房詩話

古言鮑魚統謂乾魚也今海菜中有所謂鮑魚其名不知起於何時或云卽石決明或云卽鰻魚其味甚美王莽所嗜蓋卽此物李杏墅有鰻魚行云殼含九孔或名螺曰石決明有同科小或如錢大如掌半蚌應月形偏頗觀此詩則鮑魚蓋卽鰻魚與螺雖同類而實不同螺肉性寒鮑魚性微溫且能滋肝海物中上品也

聽松廬詩話

摘句 一家常苦癯 一身常苦肥 癯肥杏不接 何

如早旋歸

國朝詩人徵略卷四十三

國朝詩人徵略卷四十四

番禺張維屏子樹輯

吳錫麒

字聖徵號穀人浙江錢塘人乾隆四十年進士官祭酒有有正味齋集

浙中詩派自竹垞初白兩先生後二十餘年大宗太鴻起而振之及兩公殂謝嗣音者少司成以雲蒸霞蔚之文合雪淨冰清之作馳聲藝苑獨出冠時既工駢體尤善倚聲而詩才超越直繼朱查杭厲之後宜中外望之指爲景慶也情殷護背乞假

南還性好溪山流連詩酒青簾畫舫綠箬紅衫游

筇所造無不承蓋扶輪埽門納履湖海詩傳

吾師穀人先生有正味齋集既出修辭者以為北

斗南車後進英髦咸資準的先生各體文皆工而

于駢體致力尤深近代能者或誇才力之大或極

摭拾之富險語僻典欲以蹕躒百代睥睨一世不

知其虛驕易盡之氣為有學之士所大噓也先生

不矜奇不恃博詞必澤于經史體必準乎古初合

漢魏六朝唐人為一鑪冶之胎息既深神采自王

眾妙畢具層見疊出所謂為之不已直到古人愈

唱愈高去天三尺者也

八家四  
六文抄

司成負沉博瑰麗之才由編修入都不一二年被  
知遇游歷今職旋陳情歸養昔賢所謂一日之養

不以三公易者司成之謂也

羣雅  
集

先生名重中外詩文集鐫板賈人漁利致富高麗  
使至出金餅購有正味齋集厥肆爲一空

松軒  
隨筆

穀人先生駢體文論古厚不及胡穉威洪稚存至  
清華明秀以視諸家有過之無不及也詩鎔漢魏  
六朝唐宋爲一鑪而得力於宋人者爲多嘗合詩  
文全集論之命意必清吐辭必秀取材必富運筆

必靈凡操觚而有晦澀拙滯癡肥粗俗之病者當

奉此爲換骨金丹

聽松廬詩話

穀人先生七律多清新靈雋之作亦有沉著者如感懷四首其首章云洗兵何日倒天瓢夜望欃槍氣未消江漢軍聲堅四壁風烟路勢走中條祇今殘局猶煩算在昔微熒本易澆玉靶雕弓金勒馬誰憐上客已頭焦此詩蓋作於川楚教匪將平定時使早爲撲滅自不至蔓延第六句善用逆筆結二句亦極沉頓

同上

我知之矣暢飛暢舞之場千金萬金之壽名爐畫

蕊華燈夕張雕俎勝乎蘭羞金尊湛其蜜醴卷髮  
之女有過乎三千下箸之錢更加乎十萬傲北海  
之常滿忘東方之漸高若是者謂之富交扶風豪  
士五陵少年馬埒鋪銅鶴裘裹雪結客之金瀉水  
照人之膽生秋答玉札以百兩酬寶劍於一諾氣  
求聲應川泳雲飛生慕相如之名死傷要離之冢  
若是者謂之俠交至於輪輿似水冠蓋如雲三枝  
檠戟之門二等金釭之第韋柔貢其顏色較炙逞  
其諧談借片羽將以升九霄附一毛可以翔千里  
遂有馮讜市義毛遂爭盟侯鯖合而王氏歡關雞



鳴而田文脫所謂炙火不知熱倚冰不知寒者若是者謂之勢交夫恃富者忘家任俠者忘身竊勢者并至忘國夫子之門何雜比人之匪終凶凡此三端實同一轍風其吹女賦能污人此翟公所以榜羅雀之門劉生所以廣絕交之論也若夫總角從師十年講學檢冬書而拾蠹披暑草而搜螢硯席必與偕出入必與共似乎晨夕相思不迷乎風雨華實異用均贄於韋弦何以口舌偶愆膠漆立泮談性天者詆謨乎高密習訓詁者訾議乎新安門上之莠未除室中之戈已起憤言騰于酒座詈

吻肆於賓筵學問之交亦如是乎且夫長虬遇困  
而泥蟠喬木經冬而霜肅則或易衣而出含菽相  
過打頭之屋難申枵腹之談不輟方謂升沉有命  
顯晦何常他時富貴之遭無忘車笠之約豈知雲  
泥路絕茵溷花分嗟采葵之傷根將墜井而下石  
雲雨倏忽翻覆之手可成日月變遷炎涼之態難  
隱惟見揚眉高視袖手無言似半面之乍逢無一  
毛之可落貧賤之交又可恃乎由前而論則如彼  
由後而觀則如此然則出門而求有功伐木而思  
鳴鳥將欲遴玉質之無玷守金心之在中者不其

難哉不知臨世濯足履綦乎仁義之途希古振纓  
繩踐於道德之路清暉接于竹柏冥契合於苔岑  
則觀其面可以見其心喻於水而不汨於醴吾見  
邪交歇正交興嗜欲無所紛始末無所異其進也  
道自應乎雲龍其退也德亦符乎霧豹求開徑之  
三益計樹人之百年莫不芬若椒蘭歡如親戚衡  
宇相對則褰裳就之樵蘇不爨則清談而已其或  
巖壑肆志江湖窮年視宇宙爲匡居總古今於密  
席浩浩乎落落乎泉石證其性情蟲鳥通其言語  
高山如面知己晤于一琴良醞可懷新詩酬之十

斗情往如贈興來若答無悔無悶與之終身此吳  
穀人先生友論也於朱氏絕交劉氏廣絕交之外  
更進一解爰錄之與世之喜交游者共翫之松軒  
隨筆  
穀人嘗自哀所著爲有正味齋集行於世世多推  
其駢體之文而予所尤服膺者乃其八韻詩也穀  
人他詩靡不工然生峭之音新蒨之色超逸之解  
以南宋金元與漢魏六朝共鑪而冶雖脫化幾變  
猶足以知其爲西泠前輩流風獨於八韻詩則天  
崑自解一洗萬古真力彌滿先射命中洞入題腴  
橫生側附衆妙孕包時而見若異軍蒼頭時而見

若時花好女時而見若佩玉長裾時而見若仙巾

鶴警儵忽異狀不名一能

楊甫未定稿

虎氣消沉鶴市荒東風容易客迴腸真娘墓上年  
年柳畫了春愁畫夕陽羣峰如畫照船頭歸去閒  
雲白似鷗波面萬荷喧已定夕陽無語一蟬秋園  
亭何止一莊荒風脚蕭蕭草有光黃蝶不知懷古  
恨故將金粉糝斜陽宛然大酒肥魚社各具壺觴  
各主賓占得一方苔最厚綠濛濛地坐詩人殺人  
先生絕句佳者甚多此四首余尤愛誦之

聽松廬詩話

先生排律生面獨開於流轉之中含沈鬱之致集

中如文丞相遺像于忠肅公祠諸篇皆傑作也同上  
余嘗欲選徐虹亭顧梁汾朱竹垞陳其年鄭板橋  
厲樊榭蔣心餘黃仲則吳穀人詞合刻之名曰

國朝九家詞鈔

松軒  
隨筆

標題

泛舟至臯亭看梅古五

太白酒樓歌古七

顏魯公名印歌古七

題鄺湛若硯銘并洗

硯池字拓本古七

文丞相琴歌古七

悲臺

城古七

雨霖鈴曲古七

清涼居士古七

述

懷五首古五

湖上大雪作歌古七

濕瘡甚

發偃臥經旬古七

慈雲寺尋宮人斜故址

言七 登南天門古五 度步五橋上二天門

古五 朝陽洞古五 日觀峰觀日出歌古七

梅花嶺拜史閣部墓古七 禮烈親王克勤

馬圖歌古七 登千佛閣望塞上諸山古五

題周端孝先生血疏貼黃遺跡古五

摘句 雲深不見雲合沓羣峰秋秋又數峰外日

落天悠悠

長松入雲裏見雲不見松直出松頂上雪

又迷數峰

空色亦成綠冥寒欲生漪更轉更幽曠灑

然松風吹

風水時相聲沙石互成篆

不從軒冕游詎識農夫樂

離觴傾向夕情密無疎斟

十日故人酒萬端游子心

蟲聲千葉雨月氣一湖烟

春雲寒貼地海氣濕黏天

雲出爭爲天下雨日晴低見海中山

泰山

但覺無船無月載不知是水是風行

可惜此來紅葉落所思不見大江橫



有梅有竹開詩境不富不貧成草堂

樹自老蒼花自韻竹能疎瘦筍能肥

蘆三尺裏通蛙語桑萬葉中聞剪聲

名畫要如詩句讀古琴兼作水聲聽

葉纔脫樹月流地秋欲浸人河在天

雪深正好擒元濟風利何須泊石頭

衆口稱賢寧獨我此人早死欲疑天

亭榭儘容名士會江湖難得老臣歸

擊賊未忘垂釣日臨終如唱渡河聲

讀放翁集

兒童一口稱君實福命千秋替令公

阿文成公

李憲喬

字子喬號少鶴山東高密人乾隆四十一年

召試賜舉人官歸順州知州有少鶴詩鈔

單銘序少鶴受詩於其兄石桐先生規模較濶出入唐宋諸大家能運以己意雖巉削不傷真氣文亦簡勁有法度官粵西時袁子才見其詩文歎曰今之蘇子瞻也性狷介不能隨俗俯仰與江西李松圃秉禮友松圃從受詩法以風節相砥礪歿後妻子不能歸葬松圃以千金送其喪

國朝山左詩續鈔

李秉禮序子喬爲人氣象峴嶽應對多若率爾而

胸次磊落余詩必以相質凡心有所得或意有所未安者輒能指之其壯歲之作已臻於古末年造詣尤深幽憂惕厲有騷雅之遺同上

標題 書王令詩後古七 示州父老古五 宜州黃

摘句

家食父母尤旅食父母愁小年不努力及壯方百變

山谷祠堂古五 寄郭氏妹古五

人睽方兀兀既見翻卒卒已共千萬言倘如未曾說所說非世情所說非世悅無味中至味乃是古歡結

壯方百變

人睽方兀兀既見翻卒卒已共千萬言倘如未曾說所說非世情所說非世悅無味中至味乃是古歡結

人睽方兀兀既見翻卒卒已共千萬言倘如未曾說所說非世情所說非世悅無味中至味乃是古歡結

如未曾說所說非世情所說非世悅無味中至味乃是古歡結

中至味乃是古歡結

中至味乃是古歡結

浩翁於爲詩抵死不肯熟

孤月無人處扁舟先雁來

能除衆有句獨得古無貧

旅寒生靜晝鄉思入閒春

更理別時語多成醉後悲

將何酬父老諒我本書生

留別縣民

未能諧衆好難得是真知

轉憐好時日多向衆中消

燈盞不盡燄案有未成詩

卽教就平立總有欲高心

品鶴

王焯

字少闔號碧山浙江嘉興人乾隆四十二年舉人  
官教諭有白華堂集

我鄉近學竹垞詩者不辨其根本節目所在往往  
溺志於風懷閒情等作爭妍取多其能自建旗鼓  
如許晦堂王少闔兩先生真豪傑之士南野堂筆記

黃仲則句云茫茫來日愁如海寄語義和快著鞭  
王碧山句云愁多輕性命皆苦語也一以揮斥出  
之一以道鍊出之聽松廬詩話

摘句 千秋詞賦陳隋上一代興亡佛老間梁朝

遊子年華易蒲柳故人酒肆已山河

謝聖輶

字德沛號虹亭廣東番禺人乾隆四十二年舉人  
官知縣有春暉堂稿

虹亭早有詩名然隨手散佚聞春暉堂稿乃其令

嗣漁璜孝廉掇拾成編

嶺南羣雅

摘句 波濤爭一石烟雨失諸峰

銅駝街冷牛羊下夾馬營荒蘆荻秋

潺湲一夜龍門雨五百灘聲到枕函

國朝詩人徵略卷四十四

國朝詩人徵略卷四十五

番禺張維屏子樹韞

馮敏昌

字伯求號魚山廣東欽州人乾隆四十三年進士  
官戶部主事有小羅浮草堂詩鈔

乾隆庚寅由拔貢舉鄉試戊戌成進士改庶吉士  
授編修充甲辰會試同考官大考改官刑部主事  
乙卯辛酉丁外內艱廬墓六年每朔望肅衣冠向  
闕稽首轉而拜於祖及其師終身如一日惇篤至行  
其論學有云聖門之學大抵就事上見心又順理



成章至公無我可以處處推廣又知權達變無歉於已而有濟於人此之謂仁耳其論詩云詩者心聲也高下抗墜單緩焦殺各有一偏惟天地之中聲流於人心而發於詩有中聲必有元氣詩者元氣所爲非區區格調之謂能知元氣之鼓萬物此謂大家故其詩由昌黎山谷上追李杜又穿穴諸家而自闢面目開闔動盪不名一體巋然爲嶺南一大宗也書法精研蘭亭平生遍遊五嶽皆造巔題其厓壁他如匡廬龍門砥柱壺口雷首中條首陽無不遍涉晚講學於鄉學者稱魚山先生著有

孟縣志華山小志河陽金石錄小羅浮草堂詩鈔  
師友淵源集覺羅文敏公桂芳受業於敏昌卒爲  
名臣嘉慶己巳奉

旨人祀鄉賢

廣東通志

魚山讀書砥行工書能詩名山大川必往登涉丁

憂歸遂不復出

湖海詩傳

魚山先生徧游五嶽凡名山大川雲煙變滅波濤  
起伏之狀盤礴胸次而注於筆端渾渾浩浩包孕  
萬象粵詩自曲江後一振於南園再振於海雪藥  
亭獨漉湟溱諸公以迄於今其力追正始以弁冕

百餘年來風雅羣英者非先生其誰與歸嶺南羣雅

在都聞釋石先生訃痛哭啜粥數十日後復哭於

墓房考韋葑軒先生病劇公往護視葑軒曰甚哉

子視予猶父也臨訣以所寶大滌子畫畀焉張葑

房太史卒懸其所畫松爲位哭至喀血都中廉州

會館創始公手鄉人得所芘有卒於都者爲之謀

歸其柩于里前後凡十餘櫬每急人之急慨然以

不得廣廈萬間爲憾常惺惺齋文集

公足跡半天下嘗謁

闕里觀車服禮器登泰山至聖人小天下處遊廬阜

觀瀑布三千丈洎之大梁上中嶽神祠又抵華嶽  
攀鐵絳躋嶂峽大鐫蒼龍嶺三字其上復書一聯  
于嶽帝廟門在河陽時舉秋帆中丞屬脩孟縣志  
親歷芒碭王屋大行諸山條其疆域訪韓子祠墓  
確得其處公以北嶽去孟縣不千里騎駿馬直造  
曲陽飛石之巔窮雁門長城而後返最後雨宿南  
嶽廟待霽而升祝融諸峰觀雲海賦七古一首勒  
石壁其餘神臯與區靡不遐矚曠覽收攬變態吐  
納奇狀一注於詩同上

魚山先生初以詩謁錢擇石先生大加獎許評其

詩卷云嶺南自曲江後諸子或存偏方之音惟馮生力追正始余謂曲江極其醇至先生極其大皆當以一代論者也

香石詩話

魚山先生天資超邁生平師友既多博雅通儒而中年徧遊五嶽攬勝探竒名山大川復有以開拓胸懷增長魄力故其發而爲詩自有一種伉爽雄

豪竒嶽磊落之槩

聽松廬詩話

魚山先生詩集令嗣所編殆欲無一字不存遂致重複脫誤後梁蓼浦孝廉攜至都中翁覃谿秦小峴兩先生爲選定之其本甚精善蓋先生豪情勝

槩有時下筆幾不能自休如洪爐之火金鐵齊鎔

大河之流沙礫並下者往往有之然宗派甚正體

格甚宏洵屬壇坫雄師鐘鏞巨響

同上

魚山先生弱冠時卽爲學使北平翁公方綱所賞

拔且命隨至省垣節署讀書後先生官都中亦追

隨最久受知最深故朋輩中每語及翁公先生輒

肅然動容且爲敘述師訓娓娓不倦先生旣歿之

明年余入都見翁公語及先生公輒歛歔嗚咽蓋

師弟之誼篤摯如此至先生每朔望向

闕稽首轉而拜於祖及其師終身如一日此天性惇

篤尤足令人起敬者矣

松軒  
隨筆

魚山先生謁杜少陵祠詩有云大哉北征作元氣  
高淋漓初陳戀闕心乾坤悲瘡痍繼述行旅傷回  
首覘旌旗又云浣花開草堂成都得栖遲雖然縱  
嘯詠亦自關蒸黎况迺君不忘中餐時墮卮嗟嗟  
老賓客所需特饘糜奚偏捋虎鬚幾同掩麟髀才  
人自古窮夫子尤堪噫霜嚴先主宮風披武侯帷  
魚水憶君臣咨嗟涕漣洏陣圖走風雲檜柏森蛟  
螭高秋白帝城暮雨昆明池併作一生愁茫然千  
古悲又云重惟古文章質厚關秉彝忠孝苟不根

文采空蕨蕤惟茲真粹氣鬱作雄奇姿高爲歲寒  
松下亦傾陽葵長鯨旣海掣雷雨方天垂衆體皆  
集成萬古誠獨推謁韓文公祠詩有云周昔衰仍  
戰言訐墨與楊聖徒工放距異說爲懲創二氏來  
何自羣迷勢益猖求仙前古妄迎佛國人狂不有  
名賢憤何由至教張五原俱躡輿一表遂排闥髮  
引千鈞重瀾迴巨手障偉功同禹孟高識邁荀揚  
事與聞知並仁還大勇將先時從上相已佐尅淮  
疆鎮將兇尤熾王朝使但恇長驅踐牙距銳辨攝  
疆梁信視儒臣效真爲白刃當躬危因正直筆振



自雄剛述作先秦擅流風盛漢芳起衰從八代作  
鎮向三唐并約六經旨還窺數仞牆詩篇祗餘事  
李杜亦同行霞佩高飛燄天瓢倒挹漿雨間盈浩  
氣萬丈發光芒此二詩篇幅甚長節錄之先生生  
平宗法杜韓故於謁二公祠不覺罄所欲言滔滔  
不竭濡染大筆何淋漓此足當之

聽松廬詩話

先生遊龍門謁大禹廟五律二首其一云萬年欽  
禹力千仞睹龍門山東峰巒壯河驚氣勢奔晴雷  
冬亦奮白日晝仍昏感激爲魚歎真看瀕洞源先  
生喜書此詩蓋得意之作也次首山河待始終句

亦警健

同上

離居又近十霜期萬感惟應病骨支何事年來心  
漸怯被稜如鐵夜眠時此魚山先生寄內詩也久  
客多病長夜苦寒試誦此詩能無淒冷

同上

先生以憂歸前後主講端溪越華粵秀三書院時  
余方弱冠先生一見卽索觀近詩因錄數十首就  
正先生評云詩才清逸自是空羣之彥及此盛年  
精進不已方當扶輪大雅豈但橫絕一時又書楹  
帖見贈云聲華日下荀鳴鶴志節琅瑯邴曼容今  
懸齋壁間猶令人想見老成典刑也

同上

國朝詩人系田名目二三

標題

唐元宗脊合頌墨蹟卷古七

三弟凶問至

不得哭越月筆述五首古五

登落鴈峰仰

天池古七

中秋夜析城山頂對月歌古七

孟縣謁韓文公墓古七

嵩山漢柏圖古七

顏氏家藏魯公名印歌古七

至偃師謁杜

少陵先生祠古五

祝融峰頂觀雲海歌古七

祖考忌日感述古五

唐子畏摹趙文敏

馬九十三匹古七

紀八月初二日雨古七

夏縣謁大禹廟古五

謁韓文公祠古五

摘句

日月照其頂齊魯衛其足十八盤冥冥何

人夜中宿

岱宗

還時弟獨病病裏兄獨去長路有郵亭是  
弟曾畱處

雲白山自青水流花更開是中有何法法  
亦非如來

林塘靜曉色隔水花濛濛

故友如明月風吹向晚來

白帝西來行萬里黃河東去避三峰

華頂作

仙掌試看初日上芙蓉高倚半天秋

洶洶黃流千里下冥冥風雨二嶂來

羣山已似朝宗下千里真成望氣來願得  
凌風舒六翮青蓮瓣上看紅埃

清洛一川映餘雪平原千里受和風

千尋絳闕應鼇牀九點齊州尙霧昏

日觀峰

大漠無塵通去馬長天如陣置平雲

塞上

紫塞秋風隨馬度白登寒色壓城開

大同

干將牛斗千年氣王子江河萬古流

滕王閣

官居人海身如寄家遠天涯夢亦難

百千轉路方停棹三十餘年再叩門

生平不下窮途淚每哭良朋涕不禁

李鼎元

字味堂號墨莊四川縣州人乾隆四十三年進士官宗人府主事有師竹齋集

梁為西南屏水厲山刻削而數十年來未有鍾其靈異者近日縣州稱三李以墨莊為最意沉摯辭警拔所過名山大川發其抑鬱無聊之氣拔地倚天三吳士大夫未能或之先也

湖海詩傳

標題

一七盤關

五古

滴水岨

五古

柴關嶺

五古

摘句 峨峨葭萌關棧中第一隘上壓石千尺下

截江一派

雞頭高人雲人與雲爭路夜行山不知險  
隘未全露輿夫昧高低亂踏滑石步悄悄  
盡七盤艇歸或驚去天雞鳴一聲回望轉

生怖

雞頭關

功名退似臨風鶴家計清於吸露蟬

恭 泰

字伯震號蘭巖滿洲人  
乾隆四十三年進士官兵部侍郎有蘭巖詩稿

恭蘭巖先生督學吾粵余受知補弟子員嘗在馬  
嶽山師處見公詩一卷甚清越今不復記憶惟誌

其遊峽山寺一首以示不忘坐對翠屏幽開軒俯

碧流我來方苦熱到此始知秋雲氣縹幡嶺鐘聲

伏虎樓徘徊不盡興留夢到扁舟香石詩話

先生舟中看山詩云一重復一掩曲乃盡其妙譬

讀未見書意想所不到數語得山水之趣聽松廬詩話

摘句 萬山遶一水回折急流湍一里幾回折舟

依山脚盤

鄉心黏短夢客路挂叢山

陳詩

字觀民號愚谷湖北蘄州人乾隆四十二年進士



官工部主事

愚谷殫見洽聞勤於著述暝讀晨鈔罔間寒暑生  
平纂輯繁富如湖北舊聞湖北文載湖北詩載湖  
北叢載等書均係湖北山川事跡又有歷代地理  
志彙纂專記沿革又有質疑錄自天神地祇人鬼  
以至道釋鬼神一一攷其原委以詩文附之又有  
姓氏書以姓爲經氏爲緯每種皆數十卷其小小  
記錄如紀元韻譜名物類編又有宋韻合鈔取廣  
韻集韻合爲一編而以三十六字母次第之  
考田詩話  
摘句 山林竟許詩人老歲月還教我輩長

錢世錫

字慈伯號百泉浙江秀水人乾隆四十三年進士  
官翰林院檢討有鹿山老屋詩集

百泉兄爲先從父禕石先生長子生平孝友樸實  
詩如其人先從父清宦歸田饗殮常不足兄大考  
罷歸嘗授徒于外以佐甘旨乾隆乙卯卒於家年  
六十三子寶甫己未翰林官至山西布政使王西  
莊先生嘗謂百泉詩真率不做作最好是詩中有  
一段仁厚意思蔣心餘先生評己卯庚辰年作謂

得山水之助

衍石  
筆記

穉石先生清德雅才卓然爲一代傳人慈伯太史  
敦行績學克嗣家聲道光庚寅余入都衍石侍御  
以麋山老屋詩集見示其自警有云吉人能寡辭  
凶德莫如傲持身與交友吾其戒輕躁又云父事  
兄事人練達推先覺莫妄短處議且就長處學此  
數語足爲後生輕浮者對病之藥

聽松廬  
詩話

慈伯初入詞館時穉石先生方奉

命教習庶吉士英文肅公謂慈伯曰子入翰林

上命其父爲之師可謂至恩試考之古籍能多得否慈伯  
有述德詩云瓌頌雄文苑談遷繼史家斯人能自

樹古道豈終賒樗櫟材應棄駑駘策亦加槐庭頻

請業猶憶夕陽斜此蓬瀛佳話亦喬梓美談也同上

標題 游晉祠七首古五 霍太山古五 過長平古七

自岢嵐往保德雜詩三首古五 古詩示

學徒蔣知讓古五 古詩三首贈洪稚存古五

偶成古五 題高東井陳蓉圃聯句圖古七

摘句 後世士大夫多被釋氏惑放魚以好生埋

鹿以示惻區區婦人仁於事初何益笮融

王縉輩遺笑在史冊佞佛禍蒼生其咎兩

儀塞

宋學與漢學豈意鴻溝劃兩造辭俱存獄  
情當徐獲何乃溝膺儒胸次太逼窄漢宋  
說異同會未細紬繹便爾袒左右不得通  
阡陌強者誇記誦縹緗廣搜索支離逞博  
辯經義愈晦蝕幹濟亦何能身心亦何益  
宋儒說近醇莫便輕指摘梳之且櫛之勿  
隨勿詭激

生計合離蹤未定中年哀樂話難忘  
無由再見仍歡飲卻悔當初有未言  
已懶新知投意氣倍於舊雨見情親

莫元伯

字台可號臞山廣東高要人乾隆四十四年舉人  
官訓導有栢香齋詩鈔

臞山胸無畦畛和易近人負笈其門者歲嘗百餘  
人廉俸所入營甘旨以奉九旬老母餘悉以周貧

交人品既高詩亦質而不癯淡而彌永

嶺南羣雅

鄉先生以學行聞於時而余獲親炙之以友而兼  
師者有二人焉一爲欽州馮公敏昌一爲陽山鄭  
公士超馮公雄豪伉爽近於狂鄭公清介剛方近  
於狷馮公主講端溪與高要莫善齋先生唱酬甚

歡歲戊辰先生秉鐸吾邑余歸自都中始相見於  
省垣先生出舊稿屬點勘余就鄙見爲刪存先生  
不以爲謬余以詩質先生先生亦直言無隱其後  
過從益密乃知先生誠樸無僞凡事皆然而談藝  
其一端也先生事母有老萊子風處家和而嚴在  
官八載多士樂從之遊旦晚講授環而聽者日益  
衆尤喜讀史嘗摘其要手錄之每春秋佳日招友  
人登臨覽觀銜盃賦詩怡然藹然人或以非義干  
輒毅然拒之蓋先生之清介有類鄭公而詩酒尙  
洋豪情逸致抑何其與馮公相似也

聽松廬  
文鈔

善齋爲人狷而和詩品清真五言近陶時臻獨到新築小園云身世苦形役一勤百不荒藐茲灌溉地卒歲同皇皇春來種瓜蔬秋至築禾場時復率婦子拮据不敢康老母扶杖來指揮高樹芴人生無長少艱苦須備嘗老母二語已入神境五言佳句如涼雲斷曙河七言如秋夢如雲半在山皆秀

絕人區

香石詩話

魚山先生書楹帖贈善齋廣文句云奉母孝經看

在手教兒文選讀從頭

松軒隨筆

辛未余北上善齋學博賦五言古詩三章贈行其



詩樸老適健循覽詩中之言惟增感愧錄之以誌  
不忘其首章曰萬里歸閉關一朝行復出悠悠越  
鄉縣未敢耽暇逸通經果有用濟世豈無術當代  
諸鉅公拂拭曾一一乘時騁神駿得路卽騰軼會  
見趨承明何能守蓬蓽雖無溫飽志願秉鉛黃筆  
春風看花晨得意馬蹄疾其次章曰十載登賢書  
長年侍慈親南山尊人舉辛酉科  
以母老不赴禮闈鍾鼎非所營菽  
水安吾真阿翁此大節高行超等倫翁方守田園  
兒乃膏車輪南北各異途借問此何因行止隨所  
遇志非爲一身努力當少年卽以慰老人載途風

雪多行矣自寵珍其三章曰垂暮無一成京塵數  
奔逐未曾三上書幾等三別足歸來客羊城得晤  
人如玉忘年相切劘投分杼心腹遠行何所贈家  
世遺芳躅子厚正蒙書子壽金鑑錄退爲吾道重  
進作蒼生福君喜老生談應不厭往復他日賦遂

初相見酒一斛

聽松廬詩話

標題

曉起

古五

水輪歌

古七

謁八忠節祠

古七

中秋與諸生宴集

古五

新築小園

五古第  
二首

摘句

適意多可欣豈必在遙托

江天浩無極吳楚但一氣

登燕磯

山明塢影瘦灘急水光碎

平生慕文獻到處訪遺逸

石奇爭作筍松小亦成濤

樹老易秋色江空多夕陽

寒塘聚白水平野散烏犍

孤村四面水疎雨一船秋

老知讀書趣貧切教兒心

似供花鴨坐不礙畫船行

詠萍

相逢無雜語竟夕只論詩

積水遠浮獅子白亂山橫立虎頭青

浴日亭

斧鑿何年開混沌乾坤到此失陰晴

石室巖

問鬼膝前曾半夜望仙河上有高臺

漢文帝

那堪天子都言數誰信將軍果是飛

李廣

國事關心重有感此生多恨半無題

李義山集

太息身緣知己死珍珠十斛未爲恩

綠珠

兼程敢惜驚眠早一飯方知作客難

卅載故人同酒盞片帆明日又天涯

詩成得意忘爲客天與閒身豈必官

美人病去無靈藥秋士吟成有苦聲

一代霸圖何處是梧桐明日又秋風

虎邱

趙希璜

字渭川廣東長寧人乾隆四十四年舉人官知縣  
有四百三十二峰草堂詩鈔

渭川讀書于羅浮山噓吸雲烟故詩無塵土氣好

交海內名士嘗刻黃仲則全集

嶺南羣雅

趙渭川官安陽令有仙吏之目魚山先生嘗稱其

羅浮詩羽化不可期行行已天際二語甚高

香石詩話

摘句 關河百二稱形勝道德三千括治安太史

不教藏柱下神龍從此入雲端

函谷關

元勳誠意猜嫌甚靖難周公殺運乘燕子

春鐙歌舞歇有明終始在金陵

金陵雜詩

人歸一枕烏衣夢我到長吟白傅篇

燕子樓

國朝詩人徵略卷四十五

國朝詩人徵略卷四十六

番禺張維屏子樹韞

黎簡

字簡民號二樵廣東順德人貢生有五百四峰堂詩鈔

簡生粵西十歲能詩歸里益肆力於古其詩峻拔清峭刻意新穎足跡不踰嶺海內詞人想望風采名流來粵者咸折節下交簡才思敏妙兼工書畫書得晉人意畫直造元四家堂奧著有五百四峰

堂詩鈔藥烟閣詞鈔芙蓉亭樂府注莊韻學

廣東通志



嶺南自三家後風雅寥寥比來余所知者張庶常  
錦芳馮戶部敏昌溫編修汝适潘舍人有爲趙大  
令希璜而簡民爲之冠性好山水屢入朱明洞天  
窮其幽勝朋儕罕有當意惟與德清許宗彥無錫  
孫爾準爲詩文交其詩峻拔清峭刻意新穎言人  
所不能言

湖海  
詩傳

時張葯房以詩名里中得二樵爲勅敵李南澗令  
潮陽見其詩曰必傳之作也造廬訪之於是二樵  
之名傾動一時己酉以選拔貢太學旋丁外艱繼  
得疾未赴

廷試足跡不踰嶺海內名士想望風采恨不獲一見  
鉅公來粵者咸折節下之其詩意境幽峭吐屬深  
警戛戛獨造劇目怵心似非經營慘淡不能成一  
語者顧才思絕敏無論長篇短什援筆立就蓋其  
天姿旣高而又深造自得故雖絕幽鑿險如出天  
成方之葯房一奇一正旗鼓相當未可以意爲軒

輕也

嶺南四  
家詩鈔

二樵山人所居曰百花村有亭曰衆香有閣曰藥  
煙以婦善病而名之也山人襟情脫灑意趣蕭閒  
視花鳥若友朋以筆墨爲耒耜時往來仙城佛山

之間既登拔萃科當貢入成均將北行以事不果  
生平擅詩書畫三絕其詩由山谷入杜而取鍊於  
大謝取勁於昌黎取幽於長吉取豔於玉溪取瘦  
於東野取僻於閻仙鍾焉鑿焉雕焉琢焉於是成  
其爲二樵之詩其書意態欲追晉人中年兼學李  
北海晚年寫蘇黃兩家之體居多其畫一種蕭疎  
澹遠做倪高士一種淋漓蒼潤蓋欲由梅花道人  
而問津於北苑也山人所寓求詩書畫者日填于  
門硯田所入頗豐足以自給既歿人得其手蹟珍  
逾球璧焉山人自稱樵夫又號石鼎道士

聽松廬  
文鈞

二樵先生詩甘苦得失自知之自言之其答同學  
云簡也於爲詩刻意輒新響當其跨步時語亦頗  
倜儻又與人論詩云士生古人後詎有不踐迹始  
則傍門終自監檠戟裨校轉渠帥揮叱赴巨敵  
一身數生死百戰資學識絕境無坦步高唱有裂  
笛彎弓石爲肉磨刀水先赤要於其發端真氣貫  
虹霓誦此數言可以知先生之詩矣聽松廬詩話  
二樵喜讀莊子詩亦多用莊子有句云老生所讀  
書南華性之適同上

世人望我我亦閉門薜蘿幽深外有白雲此二樵

山人詩也余每於塵勞中誦此如一服清涼散又有句云清宵悠悠撫我鳴琴孰聽其曲自惜其心自惜其心四字道盡千古文人心事同上

二樵詩好奇以七古論之有清奇者如湖上秋光濶無著約束結成明月團有雄奇者如刀色抱人不見人人乃聲出刀中央有瑰奇者如黃昏碧火行木客陰洞雄狐拜金馬有幽奇者如長狐嘯血成碧苔一絲冷夢尋不回語皆匪夷所思同上

二樵詩多單句可味者五言如情真使人醉又積愛成至愚又孤心入萬象又天氣夜中分七言如

秋氣誰先與雲又吟詠氣平心有悔又一官纔  
罷百骸尊又漸減聰明願息機又賣文隨力飯饑  
人若此者皆耐尋繹同上

粵東黃梅天氣牆壁多出水二樵句云南風古牆  
汗又云南霧萬物濕語樸而鍊同上

粵東最怕旱二樵詩云廣州受旱無旱色旱甚水  
田猶一碧富兒不信山縣田乃有炎炎千里赤同上

二樵惟恐身後不傳其詩有云身前之名尙按劍  
身後之名同立錐二樵自知身後必傳其詩有云  
文章死則貴又云絕技原非死前寶絕技蓋兼書

畫言之同

二樵七律多幽新僻雋之作然亦有沉著者如牂  
牁一首云天上牂牁屬要津穀絲唇齒互相因猶  
聞重譯輸華夏何至堅關閉晉秦白虎壇臺勞大  
吏青燐風雨待耆民雲頭幾夜巉巖黑可洗西南  
赤地塵此憂旱詩也起二句言永本通津粵東資  
粵西之穀粵西資粵東之貨三四言海外尙來洋  
米何至鄰省不放穀船第五句言督撫求雨第六  
句言老羸多斃結二句言密雲不雨望愈切矣提  
筆寫來筆頭甚重樵夫固無所不能上

二樵力避平熟斧鑿太過遂有初稿極佳之詩經  
屢改而致壞者同上

張黃黎呂之稱由於李南澗司馬南澗將死郵書  
至粵東云願乞張黃黎呂各製輓詩一篇於此可

見司馬與諸君交誼之篤松軒隨筆

標題 華首臺至洗衲石古五 水簾洞古五 秋風

引寄二三故人古七 人日歎古七 與升父

論詩古五 林哲侯彈琴詩古七 望農古五

射虎圖歌古七 周生書來言王蘭泉近刻

湖海詩傳欲選拙詩古五 九日許周生置



酒觀音山古七

韓東老置酒三元宮古七

古七

自題覓句圖小影持贈平叔古五

古五

長歌行

贈虛舟古七

古七

趙渭川以漢瓦當及瓦當文

見寄

古七

摘句

西日東流水無語各自急

萬響不成喧一靜吾自有

萬戶閉秋月家家有魂夢虛無生笑啼衆

幻作一闌我如寒巖僧身倚枯木凍潛處

諸妄界抱靜不敢動學道轉迷悶求悟亦

冥洞孤心自迴薄千古入收縱

萬物供獨坐寸心遊太初  
此身有大藥無病取微勞  
雨兼潮有信春及客爭程  
風長雲亦厭江濶月無依  
露靜叢葦白雨多空地青  
眼看逝者水吾亦古之人

海潮入村水三折水深花深地深極故人  
村口隨香風小艇衣裳濕春碧

生如草木真爲死士有詩書亦可貧  
短長道路供離別少壯交遊半死生

國朝詩人傳卷四十一  
治產我還師我法無田吾亦讀吾書  
生平今世斯爲盛學至中年喚奈何  
宋玉愁多秋送遠賈生年少古傷心  
土龍實是鸞鳳子帝虎虛糜犬馬年  
蛾子綢繆槐國雨鷄居蹭蹬魯門風  
不辨海含何處雨漸窺雲歛半池星  
到地雨融雲上隔花山擁霧中鬢  
天許春工縱花鳥世容吾輩飯文章  
詩句隨時成掌故饑寒行處卽殊方  
殘年賤子無家別昨夢嬌雛哭母聲

直以病軀縈老友，勉安慈母譽嬌兒。

今爾生來已憂患，古賢傳者半風塵。

倘問樵夫故，豪侈萬花園屋百城書。

右語鏡臺如問病，熟知人面作通家。

燕子

千段深紅一團綠，轉增楊柳盡情妍。

桃花

### 臧法高

字憲庭，號盧谿，山東諸城人。諸生有盧溪詩草。

憲庭好吟詠，專好爲七言律。其自序有云：聲不必

鸞鳳，家雞野鶩亦能成聲響。不必黃鐘擊筑，叩缶

皆堪作響。各適其適，卽以各詩其詩而已。其夢故

友句云人雖已故詩長在道卽終窮志不移此二

語如自寫其生平矣

聽松廬詩話

摘句

細草半遮沽酒路斷霞橫映養花天

鶴帶松陰畱月砌蝶隨花氣入柴門

野浦煙涵漁舸小驛樓雲壓戍旗低

因憐白鶴時開籠爲愛青山不閉門

辟穀未能延歲月積書難必到兒孫

非因事佛畱禪榻却爲傷生掛釣竿

蝴蝶夢魂明月下鷓鴣詩思落花中

往來識面無新貴終始關情有故交

吳文溥

字博如號澹川浙江嘉興人貢生有南野堂集

丙辰秋按試至嘉興試畢將行有諸生獻其父詩  
南野堂集二帙舟中閱之知爲嘉興吳澹川文溥  
所作披吟終日定爲浙江詩士之冠關中草閣游

編尤爲直逼古人

定香亭  
筆談

陳鴻壽曰余年十二卽識吳丈澹川飄然如神仙  
中人能作蘇門之嘯時方自關中歸酒酣耳熱輒  
道遇赤腳仙事刺刺不休後涉臺海歸言

大兵征林逆時狀甚悉戊午同客濟南次年中丞師

撫浙同依幕下輪軒錄稿丈所校訂所著南野堂

筆記師貞備覽所見錄已刊行兩浙輪軒錄

澹川學有本源尤精韜略西諸侯爭延為上客其

詩推陳出新一空凡響羣雅集

標題 田家雜興五古 盧生歌七古

摘句 同居不覺好臨別始相悲

風月似前世漁樵皆古民

鳥飛風未定人語月初生

一劍少年身許國千金破產客為家

明年縱使花如舊未必看花君又來

王佩鍾

字穎川陝西三原人乾隆

年舉人官安塞

教諭有霍汀詩草

三原王穎川先生邃經義精篆法尤長詩古文詞  
以名孝廉司鐸隴西秦州各邑出其所學教授士

子多所成就

霍汀詩草後序  
華州史寶徵撰

穎川先生宿儒耆德味道耽書苜蓿冷飈怡然自  
得訓士之暇吟詠陶情其詩不事規摹自抒胸臆  
又精繪事嘗畫羅漢寫蝴蝶白拙美人題詩其上  
得者珍之性愛菊賦白菊句云淵明有意畱高格



剩得秋容斗室中詠瓶菊句云一枝那許隨秋老

獨傲嚴霜莫與同借物寓懷可想其翛然高致矣

先生令子平軒比部治與余為會榜同年乙未平

軒典試江西余充內監試官闈中樂數晨夕話及

秦中詩人平軒使還以三原劉九晚紹效所輯二

南遺音見寄竝獲讀先生崔汀詩草因識數語於

詩草後復摘其警句錄入此聽松廬詩話

先生長子振菴孝廉鴻亦喜為詩嘗詠玉蘭句云

莫向沅湘誇九畹瓊姿原不染塵埃道骨仙心知

非久戀人間世者同上

摘句 未能辭散秩只爲慰高堂

峯頭響徹空潭水松外飛來眾壑雲

崆峒山

馳驅甫就三千路投止頻尋四五家

捧日立身超世界撥雲屈指數山川

六盤山

寐後神遊天地外覺來意在有無中

身閒整日誰相問書滿匡牀獨與親



張開東

字白蕤湖北蒲圻人

白蕤坐隻輪車遍游五嶽北踰朔漠東眺滄溟畢

秋帆中丞題海嶽游人四字贈之

考田詩話

白蕤天才敏贍詩逾萬首其興會所至但覺滿紙

性靈一片天籟有不可以繩尺拘者

同上

白蕤詩如迴車巷云相如不畏秦乃畏廉將軍出

殺虎口云殺虎口前風烈烈忽然爲雨忽爲雪謁

閔子祠云不仕季孫易承歡後母難喻石農極稱

賞之

聽松廬詩話

摘句 日色三關遠風聲萬里來

九河重渡日五嶽一歸人

華蓋垂天張北斗黃河劃地鎖中原

但聞衆鳥春相語不辨何花風自香

海閣天涯同一望故人杯酒自千秋

蓬萊閣

呂 堅

字介卿號石颿廣東番禺人貢生有遲刪集

石颿工詩古文辭爲諸生時李南潤見其詩奇之

由是得名性兀岬自異少所許可豪於飲高談雄

辯四座皆驚家貧甚然胸次落落無所介雖簞瓢

屢空笑傲自若也犬興朱石君相國蒞粵粵之名  
士咸被延接而石駟與二樵尤見稱許顧躋躋名  
場老而不遇磊落抑塞之氣時發之于文與詩幽  
豔陸離奇情鬱勃不肯作一常語所著遲剛集六

卷文附焉

嶺南四  
家詩鈔

嶺南四家石駟最後歿張黃黎兼工書畫呂遜之

呂爲古文張黃黎亦不能及也

玉壺山  
房詩話

阿堅番禺諸生也少矜風調好辭賦狎山槃澗落  
落於世情性寡歡而多恨家貧倦遊連蹶于有司  
生平死友履迹於黃泉非文何適

遲剛  
集

呂石颿有絕句云一年一見一愁予多病心情懶  
著書千里月輪分半片卿持青桂我蟾蜍可謂豔

情奇想聽松廬詩話

標題 越臺四首七古 五百四峰草堂詩刻成余

遲刪集亦鈐板醉占長句兼調二樵七古

摘句 素娥東死三更月黑水西流萬里河

賣書鑄劍酬知己碎錦裁詩贈美人

風兼水氣送殘雨樹減夕陽停片雲

國朝詩人徵略卷四十六

國朝詩人徵略卷四十七

番禺張維屏子樹輯

法式善

本名運昌奉

自改今名字開文號時帆蒙古人乾隆四十五年進士官  
侍讀有存素堂稿

時帆自登仕版卽以研求文獻宏獎風流爲事在  
詞垣著清秘述聞槐廳筆記在成均著備遺錄其  
餘有資典故著而未刻者甚多所居在厚載門北  
背城面市一畝之宮有詩龕及梧門書屋室中收



匡尊言ノ有田多下二一

藏萬卷間以法書名畫外則移竹數百本寒聲疎影  
儵然如在岩谷間經師文士一藝優長莫不被其  
容接為詩質而不癯清而能綺故問字求詩者往往  
滿堂滿室湖海詩傳

學士以詩文為性命意氣為雲霞宏獎風流主持  
名教者幾三十年接跡西涯允無愧色詩清醇雅

正力洗淫哇羣雅集

王鐵夫最賞法時帆祭酒淡花開不濃之句余則  
喜誦黃葉打門響青山生暮寒二語因論詩清如  
先生可謂清到骨矣香石詩話

時帆用漁洋三昧之說言詩主王孟韋柳又工爲

五字一篇之中必有勝句一句之勝敵價萬言嘗

刻其詠物詩一種予偶弗之善遂止不行

揚甫未定藁

丁卯余寓都門秦小峴侍郎招同時帆學士暨諸

詞人拜淮海先生像越日學士過余寓齋茶話良

久且曰朋好多在城南吾常出城子勿拘往還之

禮吾所居甚遠也其待人溫厚如此旬餘余乃報

謁主人出城余入其室庭戶翛然新綠侵簾古書

插架爲裘裒久之歸途過李公橋望積水漣漪令

人想見西涯之流風焉

聽松廬文鈔

時帆先生索余詩欲選入詩龕及見錄余方欲改  
定數十篇覓人寫正與之會偕友南旋念促未果  
後因便寄去一帙未幾聞先生歸道山令嗣亦下  
世所寄詩不知入目否及見錄一書聞未刊行今  
不知歸於何所也

聽松廬詩話

但有梅花看何妨長閉門地偏車馬少春近雪霜  
溫老剩書藏簾貧餘酒在樽說詩三兩客往往坐  
燈昏此梧門學士詩也蕭寥澄澹如見其人

同上

標題

遊西山宿秘魔崖

五古第一首第二首

摘句

自古情至語中必無色澤

萬樹已秋色一蟬猶苦吟

掃地畱殘月推窗放懶雲

鐘聲止羣籟酒力入新詩

亦是人間語塵埃一點無

讀王鐵夫詩

貧賤交心易文章造命難

馬老漸忘瘦鶴饑時得閒

兩三竿竹自秋色千萬疊山皆雨容

謝振定

字薌泉湖南湘鄉人乾隆四十五年進士官監察

御史有雲將山草

薊泉在御史臺巡城適道遇勢家奴車服侈麗且  
相抗乃縛而鞭之焚其車事聞吏議弗善也既罷  
官性好山水爲東南汗漫游所至士大夫虛左迎  
之酒痕墨瀋中獲其寸紙珍爲拱璧

湖海詩傳

摘句

宵寒燭屢跋瑣碎誦新句

雨足分秧水風清曬麥天

吳蔚光

字愬甫號竹橋江南昭文人乾隆四十五年進士  
官禮部主事有素修堂集

竹橋初登詞館繼改儀曹志尙幽閒卽辭華廡旣

而喆昂總制湖湘門盈蘭綺而向禽之志彌專箕  
穎之情愈切覃研文史嘯傲湖山跌宕琴樽搜羅  
書畫且與門人鮑叔冶等及女士席佩蘭屈宛仙  
弦詩讀畫粉墨淋漓故發爲著撰莫不刻羽引商

揚風屹雅

湖海詩傳

摘句 千古功名春夜夢半生交友曉天星

蕢來綠酒堪爲國畫出青山可當家

半湖流水青通市十里垂楊綠到城

逢花客有畱連意對月人多太息聲

璫屑久憑妻與子荒唐終斥佛兼仙

紅雨半簾飛蛺蝶綠雲千葉蓋鴛鴦

錢塘

字禹美號學淵江南嘉定人乾隆四十五年進士  
官教授有鶴原詩草

塘成進士需次當得知縣自以不習吏事就教職  
選授江寧府學教授專志撰述著律呂考文六卷  
又著史記三書釋疑於律厯天官家言皆究其原  
本而以他書疏通證明之律書上九商八羽七角  
六宮五徵九數語注家皆不能曉小司馬疑其數  
錯塘據淮南子太原經證之又以淮南天文訓一

篇多周官馮相保章遺法高氏注罕所證明作補  
注三卷晚年讀春秋左氏經傳作古義若干卷以  
補杜氏之闕且糾其謬所作古文曰述古編四卷  
皆行於世卒年五十有六

國朝漢  
學師承記

摘句 百年幾令節名士半離家

晚潮隨月上獨鳥傍船飛

程際盛

字煥若號東冶江南長洲人乾隆四十五年進士  
官監察御史有稻香樓集

東冶由舍人游歷蘭臺奉職三十餘年退食而歸



惟以汲古窮經為務所著有說文古語考禮記古訓考周禮故書攷儀禮古文今文攷駢字分牋續

方言補清河偶鈔皆有功于學者

湖海詩傳

摘句 紅樹隱遙汀蒼烟辨岬屋絕壁聳千尋窈

窕結寒綠驚濤夜有聲觸石浪仍伏徘徊

沙月生泠泠葦花曲

子夜泊燕磯

趙懷玉

字億孫號味辛江南武進人乾隆四十五年

召試賜舉人官青州府同知有亦有生齋詩文集

吾年十九省吾父於都門遂就京兆試二十娶金

宜人時吾父刑部君官京師汝叔父尙幼家頗餘  
錢太宜人每別儲錢一二萬令買書帖此爲最樂  
庚寅丁酉秋試皆爲病阻庚子應

純皇帝五巡召試既入選閱卷者意別有屬欲易之南昌  
彭文勤公力爭得免又押元暉仰合

上意由第七移置第三遂以內閣中書通籍甲辰薦不售  
癸丑仍躋南宮甲寅補中書庚申冬俸滿富陽師  
憊其積困長安注外用入都九載逋累如山旨甘  
難具不得已就外選山東青州同知在閣日久及  
爲郡丞同官每日爲迂僚屬則嫌其弱賴上官多

知己壬戌一歲中先攝登州繼權兗郡癸亥春葺  
青州廨破屋三椽雜蒔花木陳書其中甫得稍閒  
而滕縣徐盛氏之獄起鑄一級讞未上刑部君凶  
問至馳還青州九月杪竭蹶就道十一月初舟泊  
清河二壩猝遇湖廣估船觸擊破板水入纜斷漂  
至中流舟截爲二時予偕親友輩俱先往惠濟閘  
眷屬則賴居民孫氏預救登岸身以外物盡付波  
臣乙丑上海觀察李君廷敬延葺宋遼史詳節歸  
營葬事丙寅阮撫部元伊太守秉綬延葺揚州圖  
經丁卯索佳鹽使額勒布延主通州石港講席在

石港六年頗爲諸生愛戴辛未秋陝西書來延主  
關中講席子遊跡未嘗至秦思一攬山川之勝孰  
知到甫月餘驟嬰末疾右手尙能作書甲戌決計  
辭歸明年正月抵家細數此生愆尤叢集聞見閭  
淺然不敢好名爲欺人之事亦不肯好奇爲欺人  
之學厭作生計別存遐心少卽喜爲詩文顧筆力  
平弱又牽率酬應多不足存間有存者易餅覆瓿

聽之而已

亦有生  
齋集

本朝自汪堯峰姜湛園邵青門諸君子引有明以來  
數人爲正宗修飭邊幅選言擇貌桐城方靈臯雖

高識冠流厚力企古而波瀾鋒鏑未鑿聰明於是  
矜奇務博者起而摧之如褒衣博帶之儒舉動繩  
尺不能制遊俠之亂禁敵貨殖之多畜而能言之  
士範於軌物者蓋亦鮮矣先生獨不惑於貴勢不  
牽於友朋硜硜自立不厭不倦故集中所存無有  
雜言詖義離真反正者可不謂難歟

大雲山房集

京師士人各攜一壺一碟醪飲諧其聲曰蝴蝶會

亦有生齋集

耿湘門先生五十治棺趙味辛先生七十自題木

主皆達人也

松軒隨筆

趙味辛七夕詩云蜘蛛結網鵲成橋河漢無聲夜

寂寥不是病餘貪久坐秋來第一可憐宵末句品

題七夕甚雋妙聽松廬詩話

方蘭士薰病危以詩稿託趙懷玉鮑廷博金德輿

趙有句云一編真託命九死見交情同上

趙味辛舍人贈高麗記室李喜明進士李承薰句

云萬里人來箕子國一家詩有建安風同上

標題 君勿疑行古七 流民行古七 壯烈伯李忠

毅公長庚挽詩古七 哭洪大古五 讀綏寇

紀略古五 題司馬文正公神道碑拓本古七

潼關行古

題文信國書古

漢壽亭

侯玉印歌古

摘句

堯舜皆至聖朱均亦大賢浮雲視富貴敝

屣輕河山未聞動顏色毋論興戈鋌邈焉

唐虞子庶比巢許肩

除官時有日登科歲有記雲烟倏過眼誰

復識姓字

三千蓄鍾乳八百儲胡椒豈知禍所伏早

為識者料

立身稍自愛人已目為迂

春光先在水暝色欲歸樓

百年誰白首七夕易黃昏

逸次叔齊原有位讓開季札更無稱

仲雍墓

相逢竊位甘爲逸兄縱無良豈累和

柳下惠墓

史公位置還齊孟弟子門牆竟出斯

荀卿墓

張翰可因鄉味去陶潛竟以妹喪歸

孤真是藐貧誰託醫本無靈病亦奇攬涕

自爲朝野惜不徒風義友兼師

挽錢侍御禮

多病不堪兼作客思家況值久無書

百年爲客輕千里萬事關心逼五更



國朝詩人卷四十一  
舉世人誰醒春夢此官我未補秋豪  
急流肯退斯爲勇清福能消卽是仙  
莫把江湖當平地收帆要在未風前  
紅顏自古難頭白黃絹今應付汗青  
眼中餘子容如許身後相知竟屬誰  
多少舊游登鬼錄青雲莫但羨飛騰  
最好光陰容易失兒童竹馬是神仙  
神仙也要填橋渡無怪人間風浪多  
柳外斜陽波底月都城東是小江南  
但有詩名尙千古可知人不在官尊

楊揆

字荔裳江南金匱人乾隆四十五年

召試賜舉人官四川布政使有桐華吟館詩鈔

楊舍人俊逸清新才兼庾鮑與其兄蓉裳齊名嗣以詞賦通籍珥筆機廷吟紅藥之翻階對紫薇於畫省摘華校藻侷儻不羣頃暫假遊秦道出大梁見投長句時蓉裳偕至而子雲穉存淵如秋塍輩俱在座中燈火樊樓畱連觴詠才士之盛真不減

當日鄒枚也

吳會英才集

荔裳偕其伯兄才雄藻密世號二難蓉裳旣已黃

巾青犢著績岩疆而荔裳復出塞數千里耳目所  
見得未曾有蓋造化奧區久而必發而窮荒戰地  
自嘉州昌黎之後紀載無多天或借翰墨以發其  
奇兩君遭際洵非偶然宜閱之者如游絕域如讀

異書也 湖海詩傳

標題 題史閣部遺像 古七 同伯兄夜話感舊書

懷成一千字 古五 函谷關 古七 青海道中

古五 崑崙山 古七 星宿海歌 古七 番地雜

詩八首 古七 皮船 古五 路引篇 長短句

摘句 伴侶神形影聲名夢幻泡

論才我愧居易積愛士公過韓歐陽

呈畢中丞

非時客至堪沽酒有用身閒合著書

談宜深屋忘宵永夢裏重衾戀曉溫

淒涼似送辭巢燕潦倒疑逢中酒人

以落卷寄

還亦齋

最憶羣真朝散後晚風閒煞好樓臺

### 陸樹英

字恆芳號春圃廣東高要人乾隆四十五年舉人

官鹽城知縣有醉霞山房詩鈔及塞嚶集

春圃未弱冠卽有詩名見知於李雨村學使宰鹽

城以水災聖吏議行戍伊犁所過天山瀚海白草  
黃沙有所感觸悉以韻語寫之未幾賜環年僅強  
仕酒酣浩歌意氣猶不可遏其詩以塞嶶集為尤

傑嶺南  
羣雅

春圍天山一律前四句云奇山豈受中原縛走出  
窮邊始大觀羣峭摩天連不斷層崕積雪暑猶寒  
語頗雄健又有日月雪邊生五字亦奇警聽松廬  
詩話  
摘句 亂峰為雪有一徑入雲無

馬與冰流爭路走人從風勢帶山飛

全家忽作重逢慶故里真同隔世看喜抵  
家作

楊倫

字西禾江南陽湖人乾隆四十六年進士官荔浦知縣有九栢山房稿

西禾德氣溫醇望而知爲儒者生平論學以不欺爲本主江漢書院七年門下多尊信之撰杜詩鏡詮實能照見古人心髓足與朱鶴齡上下

湖海詩傳

楊進士博極羣書早傳聲譽與孫淵如洪稚存徐尙之輩倡酬最富邇年主講江漢公餘談讌出觀

所著杜詩鏡詮知其得力於少陵者深矣

吳會英才集

西禾論詩有云高卑辨詩派升降繫世風唐宋界

不分此論殊未公得毋所習偏護短慮見攻護短

慮見攻一語古今才人學人多不免此病聽松廬詩話

標題 小除日送孫淵如之句曲古七 關吏坐古七

摘句 夏蟲難語冰蜀犬多吠日

陳思好譏彈少陵勤改定無矜萬篇富每

爭一字勝

東粵兩奇人臣佗與洗氏

名山著述閒中富逆旅知交分外深

鳴嚇尙疑貪腐鼠鵬游真欲效冥鴻

江漢雙流天際湧樓臺三楚鏡中看登大別山

汪學金

字敬箴號杏江江南鎮洋人乾隆四十六年

賜進士第三人官左庶子有靜厓詩初稿

杏江爲持齋少司空哲嗣襟情旣勝才調彌嘉標  
格則玉樹瓊枝詞賦乃金荃蘭畹旣由詞館游陟  
宮僚請假南還營靜厓小築水竹彎環樓臺窈窕  
梵磬龕燈儼然世外朋舊中如武林潘侍御庭筠  
同之餘人莫逮也

湖海詩傳

摘句 西風吹易水落日下滹沱

亂鴉先客宿歸雁入春聞



新綠簾櫳春去後淡黃庭院月來初

山鷓數聲松葉雨溪蟬十里藕苗風

少年濁世佳公子垂死清流舊黨人

侯朝宗廟

國朝詩人徵略卷四十七

國朝詩人徵略卷四十八

番禺張維屏子樹輯

惲敬

字子居號簡堂江南武進人乾隆四十八年舉人  
官知縣有大雲山房文稿

先生幼學於父少長從舅氏鄭環夢楊遊然持論  
好獨出己見長老皆驚異焉中式乾隆四十八年  
癸卯科本省舉人五十二年充咸安宮官學教習  
時同州莊述祖珍藝莊獻可大久張惠言臯文海  
鹽陳石麟子穆桐城王灼悔生先後集京師先生

與之爲友商榷經義古文而尤所愛重者臯文也  
五十五年教習期滿以知縣用五十九年選授浙  
江富陽縣知縣臯文爲序以送其行其略曰夫爲  
令之道六經孔孟之所述皆子居向時之所道也  
以子居爲之其不可以至耶曰吾不爲彼之所爲  
而已豈子居向時之所道耶君子出其言則思實  
其行思其行則務固其志固志莫如持情實行莫  
如取善子居勉之矣先生曰善敬敢不求從良友  
之規旣至富陽銳欲以能自効矯然不肯隨羣輩  
俯仰大吏憚其風節欲裁抑之令督解黔餉先生

曰王事也怡然就道返自黔中調知江山縣父喪  
去官時嘉慶元年十一月也四年服闋入都謁選  
明年四月選授山東平陰縣知縣引

見改授江西新喻新喻吏士素橫藐視官長先生至懲創  
之人疑先生之爲治過猛也已乃進其士之秀異  
者與之講論文藝斷事不收聲必旣其實士民懷  
德畏威翕然大變於其舊七年張臯文歿於京師  
先生聞之慨然曰古文自元明以來漸失其傳吾  
向所以不多作古文者有臯文在也今臯文死吾  
當并力爲之先是臯文與今禮部侍郎仁和湯公

金釗講宋儒之學是時先生方究心於黃宗義明  
儒學案有所見輒筆記之未及與臯文辯論往復  
也及臯文卒先生爲書與侍郎其略曰濂洛關閩  
之說至明而變至

本朝康熙間而復其變也多歧其復也多仍多歧之  
說足以眩惑天下之耳目姚江諸儒是也多仍之  
說足以束縛天下之耳目平湖諸儒是也二者如  
揭竿于市以奔走天下之人故自乾隆以來多愁  
置之愁置之者非也揭竿于市者亦非也彼此之  
相詈前後之相搏益非也夫所謂濂洛關閩者其

是耶其揆之聖人猶有非是者耶其變之仍之者  
是非其孰多耶知其是非矣何以行其是去其非  
耶蓋先生嘗自言其學非漢非宋不主故常故其  
說經之文能發前人所未發十年調知瑞金縣瑞  
金在萬山中俗好訟鬪素稱難治先生張弛合宜  
吏民咸就約束有所論決問法何如不可干以非  
義瑞金諸生楊儀招倚富姦逼佃戶女事發到官  
願進千金求脫罪先生峻拒之後屢邀人關說至  
以萬金相啗先生曰吾自作令以來苞苴未嘗至  
門今乃有此豈吾有遺行耶卒論如律先生廉名

素著至是人益信之十五年大吏以先生治行第一保舉卓異十一月至京師明年回任是歲刻大雲山房文稿成又明年守南昌府吳城同知十九年以姦民誣告家人得贓失察被劾黜官先生爲人負氣矜尚名節所至輒與上官忤上官以其才高每優容之而忌者或銜之次骨先生既擯不見用士大夫之賢者咸爲先生惜而先生不以介意益務爲文自壯初先生之再謁選也石橋灣故居已奉其先府君遺命讓兩從父居之自挈兩弟奉鄭孺人之官至是假館所親無寧居屬有門下士

官安慶知府試往謀之道遇疾歸歸寢十日而卒  
先生生於乾隆二十二年丁丑二月初一日卒於  
嘉慶二十二年丁丑八月二十三日春秋六十有  
一先生既卒之三月余始從其嗣子穀求遺書得  
大雲山房文稿都若干卷外集及詩詞各若干卷  
歷代冠服圖說未成其治獄別有子居決事四卷  
先生之治古文得力於韓非李斯與蘇明允相上  
下近法家言敘事似班孟堅陳承祚而先生自稱  
其文自司馬子長而下無北面先生所欲有爲於  
天下者具見文集中以在下位不獲有所施設然



後之人讀其書足以知其志之所存也

初月樓文鈔

### 大雲山房文彙通例

一 襍著文古多自書子或書氏書字集中皆書字  
序記文古多自書名或書余或書愚集中皆書  
名碑志文古多自書名傳後論或書字或書名  
集中皆書論曰不書名與字

一 大傳本史書體故韓退之傳陸贄陽城不入本  
集後人有入本集者或自存史彙或爲史官擬  
彙而已集中無大傳其小傳外傳傳中必書名  
祖父及傳中所及之人雖貴且賢必書名祖父

賢始見子孫亦然妻妾有故始見傳非碑志體也官與地必書

本朝之名紀實也

一大傳書名書字不書號史法也儒者於傳中事別書稱某號先生亦史法也外傳小傳或書號或書別號道號著性情也古者幼名冠字故於名下書字世人加字於名上者非也集中名字并書者字皆在下號或取地或取所居世人稱號而加於名之下亦非也集中名號并書者名皆在下別號如漫郎醉吟先生道號如華陽真

逸無垢居士集中有故則書

一傳目自漢書以下皆書名史記或書名或書字  
或書官或書爵集中家傳皆書號書先生外傳  
小傳皆書字或書人所稱如曹孝子是也

一碑志文較史傳例稍寬集中凡文中所及之人  
書某官某姓公或某姓君再書名其滿洲蒙古  
不紀其氏者書某官某名公或某名君用元色  
目人例也紀其氏者書如漢人

一碑志文目書階官書職官書爵書諡此通例也  
古人集多不畫一集中止書職官其階爵諡於

文中見之書石則目具階職爵諡用當時法也  
一集中碑志文目監司以上書公以下書君成一  
家學者書先生所尊書府君友書字婦人書所  
生之姓姓所以別女子也其夫之姓文中見之  
一集中碑志文日止書某公某君某府君其妻之  
合葬者文中見之以合葬志非古法也祔葬志  
書祔葬從夫之義也

一集中遺事述書法如碑志行狀行略書法亦如  
碑志書事之書法如傳

一墓表有列銘及詩者變例也集中皆不列銘及

詩碑記列銘及詩者正例也集中皆列銘及詩  
壁記則無之其壁銘有序者書并序以別於壁  
記也

一碑志文有序有志有銘記作文緣起序也記事  
及葬年月志也詠歎之銘也集中志文有作文  
緣起者目書并序餘不書其有志無銘者目止  
書志志略者目止書銘碑文皆書碑銘不書并  
序碑以無序爲正例也

一碑志文書甲子則不書日數書日數則不書甲  
子正例也集中有書日數并書甲子者必有大

美大惡焉以之別疑表信變例也

一集中碑志文書始遷祖及曾祖以下其高祖有功德則書書母書前母繼母生母不書曾祖母祖母其書者變例也書妻書子書女不書孫以孫應書其父之碑志也有故則書集中有應書之人而不書者必有當絕之道焉此春秋之義也傳文中亦用之

一集中碑志文必書葬日月及地不書者乞文時未卜日月及地也必書曾祖以下及官名其書某官某名止從某某者狀失體不官不名或失

體不及其上世也

一集中碑志文尊祖以下有官者書職官卒後贈職官亦書至子孫貴封贈官止書階官以不治事也

一集中傳文止書某年進士舉人不書某科史法也碑志文書鄉試中式會試中式

殿試

賜進士及第出身同出身詳之也

一集中序文地名據今時書之官名亦然其或書古官者以世多以古官稱存當時語也碑志文

中述人言書古官亦存當時語也書尺牘皆與序文同詩詞目亦同記文不書古官紀實也

一集中書上書目皆書姓書官座主舉主及所受業稱先生其目書官文中書先生者非所受業也友書字其書諱者或其字不著或其字不應古法如號之取地取所居也漢人友稱字唐人稱行宋人稱官於所學稱號自明以來及門俱稱號矣時爲之也

一集中書上書首必書某人閣下足下執事未必書某月日某謹上以別於尺牘也



一史記漢書載四言時歌行晉唐書以後載五七  
言古近體詩此史法也文家載詩則格下集中

載詩者皆入外集詞曲不載

大雲山房文稿

古文體例有有定者有無定者然必先明於有定  
而後可以言無定明以來金石之文往往不攷古  
法漫無矩度是體例不可不講也如潘氏昂霄之  
金石例王氏行之墓銘舉例黃氏宗義之金石要  
例皆援據賅洽辨論精詳治古文者所當攷究至  
憚子居自為文集通例不過一家之言然亦足見  
其矜慎不苟且條列簡明亦足為初學治古文者

之一助也

聽松廬  
文鈔

聖人治天下必有以合乎人情之所宜是故中制者聖人之法也其不滿乎中制與越乎中制之外者于人情苟不至甚不便聖人必不違之此三代之道也聖人之治天下有二倫物之紀名實之效等威之辨授之以一成之式齊之以一定之法若其質文之尚奢約之數或以時變或以地更故養生不至于拂戾趨事不至于迂回彼諸儒博士者過于尊聖賢而疎于察凡庶敢于從古昔而怯于赴時勢篤于信專門而薄于攷通方故其爲說也

推之一家而通推之眾家而不必通推之一經而

通推之眾經而不必通至不必通而附會穿鑿以

求其通則天下之亂言也大雲山房文稿 惲子居有二代因革論八篇

於三代之制能提其要能會其通洵屬通人之論茲撮其立論之大指如此

蘇子由曰古之君子不用於世必寄於物以自遣

敬之庸劣不敢附於古之君子露竊微祿近二牛

年不敢謂不用於世然今之天下人才眾矣任鈞

軸者有人任疆場者有人任河渠者有人任漕輓

者有人任百執事者有人皆循循然奉功令赴期

會較其貴賤則有相懸者矣論其賢不肖之相去

其間豈能以寸哉是何也世亂則才勝法世治則  
法勝才太平既久無異政無殊俗豪傑與凡庸同  
功正直與詭隨並譽如洪鑪熾則金鐵雜投而皆  
鎔大海泛則淨穢疾下而同化也若是則敬雖服  
卑官二十年豈敢謂用於世卽等而上之再等而  
上之又豈敢謂用於世哉若是則寄於物以自遣  
之說敬何敢辭焉同上

史記漢書有排比數千言者其後必大震蕩之東  
坡司馬公神道碑虛在前實在後所以如此者因  
一切相業不足以盡文正故竭力推闡在前後列

數大事止閒閒指示如大虛中浮雲此文正人之  
大東坡手筆之大也同上

國朝古文論者多推望溪方氏苞前乎方氏者有侯

方城魏汪玠姜辰英朱彝尊邵長蘅諸家後乎

方氏者有劉大櫟袁枚朱仕琇魯九臯彭紹升姚

鼎諸家而數十年以來則袁姚兩家爲尤著子才  
之文爽健近於肆矣然未足以言古人之肆也且  
好爲可喜可愕以動人目其流弊將入於小說家  
姬傳之文謹嚴近於醇矣然未足以言古人之醇  
也且拘守繩尺不敢馳驟其流弊將如病弱之夫

慙慙不振故就諸家而論愚以爲文氣之奇推魏  
叔子文體之正推方望溪而介乎奇正之間則惲  
子居也諸家爲古文多從唐宋八家入惟魏叔子  
惲子居從周秦諸子入而皆得力於史記夫善學  
古人者非徒學其形貌貴得其神氣也非徒學其  
文中之辭貴得其文外之意也叔子子居之文於  
史記未嘗貌似而吾謂其善學史記者謂其得史  
記言外之神法外之意也然世人貴遠而賤近推  
魏叔子或以爲偏嗜矣至推惲子居或且以爲阿  
好矣雖然文章公器願與知言者共審之

聽松廬  
文鈔

嘉慶乙亥六月常州惲子居敬初至廣州一日葛

衣葵扇訪余于城西一見如舊相識次年春子居

卽度嶺北旋其寓羊城僅數月時余館西關外相

隔重城亦未能數數把晤也一日謂余曰吾將爲

文贈君以誌永好余曰微先生言屏亦願有請也

先大母苦節數十年旣蒙

朝廷旌屏欲得賢而工文者爲文表諸墓以示後嗣

敢以爲請子居曰敬諾不敢辭越日屏具衣冠奉

行狀詣寓齋再拜子居於是爲撰黃太孺人墓表

今載集中又一日過余談至日暮畱宿齋中固索

余古文稿觀之辱承獎許且勸併力爲之將行執  
余手曰子嶺外桺仲塗也他日文集編成作序者  
其惓子居乎孰意別後曾不二年遽聞微疾辭世  
古文一道失此良友每一念及輒令人意沮心孤  
不禁太息歔歔而不能自己也至桺仲塗集雖曾  
瀏覽實非所好且生平性情亦與之不類不知子  
居易爲舉以相况惜當時匆匆握別不暇詳矣同上  
一日與子居飲酒酣余曰子之文必傳於後世無  
疑惟集中有牽引釋氏之言此種最爲可厭余他  
日爲子別刊一本當盡刪之子居曰佛遺教經云



若有人來節節支解當自攝心無令嗔恨支解且  
不恨況刪文字耶余曰子欲以酒解酒耶相與大

笑  
松軒  
隨筆

余應童子試邑侯吳象川先生得余卷異之試竣  
因書扇及楹帖見贈時余年十三未有字先生署  
款曰南山友臺後余人都見翁覃谿先生先生贈  
詩有云南山舊墨緣韶石響鳴絃蓋韶州有南山  
其峰曰鳴絃而余先世系本曲江故即以南山為  
號也自是凡交於余者皆號余曰南山獨憚子居  
不然其集中黃太孺人墓表及香石詩序聽雲樓

詩序皆稱余字而同遊海幢寺記則稱余曰柎山  
凡書來皆稱柎山不稱南山卽一稱謂之間亦必  
詳審如此

同上

摘句 春風懶于人花枝日嬌情誰澆花間酒拆

花眉上鎖

每於七椀風生後萬斛泉源筆下來

李符清

字仲節號載園廣東合浦人乾隆四十八年舉人  
官開州知州有海門詩鈔

載園性豪邁喜交游愛書畫所藏有杜少陵贈衛

八處士詩墨蹟因署所居為寶杜齋杜文貞書罕

傳於世觀者無從證其真贗也

松軒隨筆

摘句 地遠迴孤鴈天低入百蠻

五年作令知官况四海論交得友難

李驥元

字鳧塘四川綿州人乾隆四十九年進士官編修

有雲棧詩稿

鳧塘詩有奇氣與兄墨莊工力悉敵

湖海詩傳

標題 七盤山

古五

白馬灘

古五

雪山關

古五

摘句 門棲唐代烟園種宋時樹

溫汝适

字步容號箕坡廣東順德人乾隆四十九年進士  
官兵部侍郎有攜雪齋詩鈔

汝适成進士改庶常授編修丁巳入直

尙書房擢贊善再擢洗馬侍講侍讀轉左右庶子遷  
國子祭酒太僕少卿通政使歷典廣西四川山東  
鄉試督學陝甘尋陞副都御史己巳監臨京兆試  
臨場條陳降補太僕正卿旋復副都御史癸酉擢  
兵部右侍郎甲戌以母老

子告南歸未幾居母憂哀毀成疾及痛聞

仁宗睿皇帝升遐急奔赴扶病就道兼程進發卒於江西  
吉安舟次年六十有七

上聞憫卹

賜其子舉人承悌進士汝适視學陝甘時以甘肅寫遠  
藏書絕少乃厚捐俸貲多購善本置書院中戊辰  
己巳間粵洋不靖汝适卽見聞所及剴切陳奏生  
平無他嗜好惟多蓄書公餘以書史自娛著有曲  
江集攷證曲江年譜攜雪齋詩鈔文鈔其未梓者  
有咫聞錄韻學紀聞日下紀游略藏于家

廣東通志

少司馬詩詞和氣平肖其人品

嶺海詩鈔

標題

鄜海雪天風吹夜泉硯歌古

荔枝有名

貴味者殼厚而粗味乃獨絕偶用東坡韻

賦之七古

摘句

星分鶉首秦關壯險關蠶叢蜀棧遙

歸路正尋金雁驛新詩遙寄碧雞坊

徐鑠慶

原名嵩字朗齋江南金匱人乾隆五十一年舉人

官湖北知縣加知州銜有玉山閣集

徐孝廉爲健菴尙書後人文筆高華稱其家世少

歲卽游秦隴兼涉伊涼其詩清激時露奇響梁谿

近日顧立方楊蓉裳荔裳皆足名家孝廉更拔戟

自成一隊其逸藻古豔擅青蓮昌谷之長吳會英才集

朗齋刺史有絕句云家住梁谿楊柳邨山房細雨

約開尊鴛鴦听口桃花水一夜春潮綠上門最近

晚唐風調聽松廬詩話

標題 陳畱行五古 役夫歎七古 述征篇五古

摘句 主將不驕貴士卒同苦艱隨身十餘騎深

夜踰高山月黑蹊徑迷露宿叢塚間主將

且如此僕夫何時閒從軍

西風驅萬馬落木滿三關

酌酒勸行客異鄉無少年

新涼半牀月殘醉一簾花

有酒休辭連夜飲好花須及少年看

虛名麗六流傳遍下第江南第一人

癸卯省試

得解首後場卷損補一字被貼主司謝戴  
二公刊其文曰麗六蓋闕中紅號也

### 余鵬年

原名鵬飛字伯扶江南懷寧人乾隆五十一年舉

人有枳六齋詩稿

伯扶嶽嵒歷落意氣自豪西踰秦隴南絕江漢壯

遊所至發為詩歌莽莽蒼蒼筆力雄偉

懷舊集



摘句 一水與人爭大地兩山作鎮鎖斜陽

海內浮雲看倦眼山中叢桂識初心

爲客歲時貧病裏寄人兒女死生餘

臘雪幾曾成水去唐花從未見春來

劉統基

字未山廣東歸善人乾隆五十一年舉人官訓導  
有南石山房詩鈔

惠州詩人余所知者黃初陵煇趙渭川希璜及未

山如鼎三足嶺南羣雅

舟維天柱險水比衆山高一夜潺湲裏行人夢亦

勞行人勞矣乃夢亦勞此加倍寫法

聽松廬詩話

摘句 秋來人易怨況乃久離家

十年宦況書千卷五夜齋心月一輪

李如筠

字介夫號虛谷江西大庾人乾隆五十二年進士官翰林院編修有蛾術齋詩集

同課諸君或篤於古或趨於時惟介夫參會其中  
夙以古人之雄直運今人之婉約擢肝招腎轉成

渾融

揚甫未定稿

先生甲寅典試湖南慎畛出先生之門先生一登

玉堂再典文柄沒年僅三十有二

蛾術齋詩集序

標題

張睢陽南將軍合像

古七

臨清行

古七

摘句

蜂蜜不自飽蠶繭不自衣竭力娛他人辛

苦將何爲

人隨孤雁遠天到百蠻低

度大廣嶺

鷺鷥人共夢風水樹同聲

我註六經經註我人磨寸墨墨磨人

心長髮短中年恨親老家貧一第難

論文求是非爭勝識字無多怕問奇

贏得平安惟健飯生離骨肉坐微官

孫星衍

字淵如號季逖江南陽湖人乾隆五十二年

賜進士第二人官山東糧道有雨粟樓集

君幼有異稟讀書過目成誦及長補學生員與同

里楊君芳燦洪君亮吉黃君景仁文學相齊袁君

枚品其詩曰天下清才多奇才少讀足下之詩天

下之奇才也遂相與爲忘年交

學經室集

乾隆丙午科大興朱文正公典試江南文正在都

與彭文勤公約曰吾此行必得汪中孫星衍公搜

落卷得其經文策曰此必汪中也及拆卷得君名

而汪實未就試

同上

己酉散館君試厲志賦用史記駒駒如畏和相國  
珮疑爲別字置二等引

見奉

旨以部員用故事一甲進士改部或奏請畱館時相國知  
君名欲君屈節一見君卒不往曰吾寧得

上所改官不受人惠也遂就職又編修改官可得員外前  
此吳文煥有成案或謂君一見相卽得之君曰主  
事終權員外何汲汲求人爲自是編修改主事遂  
爲成例補刑部直隸司主事總辦秋審君所居埽

室焚香爲諸名士燕集之所高麗使臣朴齊家入  
貢在書肆見君所校古書特謁君爲君書問字堂  
扁賦詩以贈同上

相國阿文成公大司寇胡莊敏公皆器重君每有  
疑獄輒令君依古義平議行君執法求平所平反

全活甚多同上

五十九年京察一等次年五月奉

旨授山東兗沂曹濟道嘉慶元年七月曹南水漫灘潰決  
單縣地君偕按察使康公基田築塞之君鳩工集  
夫五日夜從上游築堤遏禦之漕歸中浚不果橫

決康公語君曰吾治河數十年未見以決口能卽  
堵閉者惟曹南之役吾與君成之省

國家數百萬帑金矣

同上

權臬七越月平反數十百條活死罪誣服者十餘  
獄亦不以之罪縣官云縣官實不盡明刑律皆幕

僚誤之也

同上

山東衛河經臨清開口夏秋水漲高於閘內之汶  
水卽閉閘謂之悶口糧艘阻滯君知德州哨馬營  
及恩縣四女寺舊有兩支河合流入老黃河卽鈎  
盤鬲津故道經樂陵至海豐入海請開濬以洩衛

水異漲

同上

十二年六月署布政司印值部使廣少司寇興在省按章供張煩擾君慎守帑項不肯妄支事竣北行君獨無所餽後廣以賄敗豫東兩省以支庫獲罪者衆君不與焉

同上

君嘗病古文尙書爲東晉梅賾所亂官刑曹時卽撰集古文尙書馬鄭王注十卷及逸文三篇歸田後又爲尙書古今文義疏若干卷積二十餘年而後成其餘撰集有周易集解十卷夏小正傳校正三卷魏三體石經殘字攷一卷倉頡篇三卷孔子



集語若干卷史記天官書攷証十卷寰宇訪碑錄  
十二卷平津館金石萃編二十卷孫氏家藏書目  
內編四卷外編三卷續古文苑二十卷問字堂文  
稿五卷岱南閣文稿五卷五松園文稿一卷平津  
館文稿二卷古今體詩若干卷其所校刊者有周  
易口訣義六卷尙書攷異五卷春秋釋例十五卷  
孫子十家注十三卷元和郡縣志四十卷景定建  
康志五十卷唐律疏議三十卷其餘篇簡小者不  
可勝數君以嘉慶二十三年正月十二日卒於江  
寧距生於乾隆十八年九月初二得年六十有六

君妻王夫人名采薇工詩善書早卒君訂其詩爲

長離閣集

同上

秋帆撫軍刻惠徵君易漢學九經古義禘說明堂  
大道錄古文尙書攷諸書皆淵如爲之校定秋帆

撰山海經校正亦藉其蒐討之力其學以漢魏詁

訓爲宋鉤深索奧孫穀董悅所弗能逮

湖海詩傳

觀察清真灑脫好游揚後進僑寓白門座客恆滿

有陳太邱之風嘗與余論一前輩曰彼之不愛才

畢竟自家才識有限耳

羣雅集

淵如觀察詩云千杯酬我上北邙不及容我生前

狂千言相思寄行路不及逢君得君怒又云獸鑪  
紅深三寸灰那信急雪凌春來停歌出戶一驚顧  
醉影忽落瓊瑤臺此觀察中年以前詩頗有太白

神氣聽松廬詩話

標題 人蓬壺洞古五 冠山堂夜飲歌古七 送邵

二雲閣校入都古五

摘句 靜懷鴻荒始遠覺身世細

仙花積疑雪風鶴落如雲

紅燭照顏年少去碧山回首昔游非

相逢馬上成今雨歸去鷗邊有故鄉

一度落如人小別暫時圓比夢難成

月影

八百孤寒連夜接千秋四部一言開

朱竹君

一代識君非冥莫千秋得我是相如

得古文

日孫喜與予小名同口占一律

### 顧敏恆

字立方號笠舫江南無錫人乾隆五十二年進士

官蘇州府教授有笠舫詩集

立方與蓉裳州牧競秀梁溪以顏謝擬之揚則鏤

金錯翠顧乃初日蓉蓉也性喜簡默不欲以議勝

人然一義偶杼孺形雋永

吳會英才集

笠舫少游貴池代人撰昭明太子廟碑袁子才見

嘆爲六朝高手後知笠舫文驚喜漢絕珠湖草堂筆記

往與君鄉人楊永叔劉簡之論及梁溪詩人咸推

君爲第一懷舊集

標題 牧牛詞 采茶詞 伐木詞 賣花詞 古

摘句 貧疑天地窄嬾覺聖賢難

身閒轉覺心難靜家近翻憐夢未成

曉寒可耐春衾薄殘醉方知昨酒濃

那知似笑原非笑未到言愁已欲愁

桃花紅雨梨花雪斷送春風又杜鵑

何道生

字立之號蘭士山西靈石人乾隆五十二年進士  
官九江知府有方雪齋集

蘭士詩風骨清蒼如千金戰馬騰溪注澗無所不  
宜山西自澤州相國以來若蓮洋居士清妙則有  
餘排冝則不及也湖海詩傳

蘭士取科第早入工部為郎勤於其職其為詩疎  
爽雄健出入昌黎劔南之間楊甫未定稿

君尤善余有所譏彈應時改定同上

君與兄硯農相愛同時為曹郎相代為御史同上

蘭士詩云客子中夜興臥榻以車代瞑行就坦夷

鼻息出晦曖忽驚急雷響迸此夢魂碎石力拒輪

起如豆爆釜內車行石路數語善於形容聽松廬詩話

蘭士又有句云乾坤清氣在在有不解領取真可

痛人生寂寞即奇福斯世繁華皆大夢飲酒何須

舞歌侑講學莫為鄒魯闕此真實語亦解悟語同上

標題 青石梁古五 岱廟飛來松歌古七

摘句 此心苟無營是物皆不誘

士生天地間所寶惟我躬前後各萬古曷

以當厥衝

新寒深夜覺初月衆星親

日蒸千嶂雪風鑄一河冰

一畫鴻溝秦晉豫幾番龍戰漢隋唐

潼關

親闈久隔心頻動宦海初游志已灰

花光膩似人初浴我意懶于雲不流



國朝詩人徵略卷四十八

國朝詩人徵略卷四十九

番禺張維屏子樹榘

王芑孫

字念豐號惕甫一號鐵夫江南長洲人乾隆五十三年

召試舉人官教諭有淵雅堂集

鐵夫以詩聞於時性簡傲不肯從諛遇公卿若平  
交人以是病鐵夫狂吾謂鐵夫狷耳輦下人士以  
萬數其遊於公卿者大都借援聲勢務爲關說而  
鐵夫介然無所苟館穀之外不名一錢雖金盡裘

敝不自恤鐵夫常欲買田築室於其鄉之楞伽山

又號楞伽山人云

小峴文集

楊甫詩癯然以瘦戛然以清亦縝密以粟在京師  
與法時帆何蘭士張船山楊蓉裳諸君琴歌酒賦  
爲南北時望所推又工書仿劉石菴相國具體而

微配曹貞秀亦以翰墨聞

湖海詩傳

芑孫至京師客於今大學士富陽董公者六年客  
於睿邸者又六年中間往來故梁文定公及今韓  
城諸城南昌內直諸公之家歲出關居熱河尋常  
皆在淀園私爲諸公代手其後充教習別居南城

則又出而與館閣之士遊故雖官不挂朝籍而自  
乾隆五十年以後

朝廷有典禮文章之事未嘗不操筆竊與其間

淵雅堂集

墨琴年二十三歸山人爲繼妻墨琴無金粉之好  
所好作詩寫字山人有詩名復以書稱於世人或  
持縑素求山人書者必兼求墨琴書所作書輒自

署寫韻軒

同上

將治古文必且融會於羣經旁貫以小學導源於  
身心性命之間究觀於上下天人之際本其所不  
容己者發爲言而又裁之以

國家之掌故

朝廷之令典如是然後行之以馬班之法運之乎韓  
歐之體無難易平險高下而一歸乎心之所安與  
夫義之所止非是者不爲能而芑孫材地至薄旣  
根柢之弗植又撓雜之多端志之三十年學之二  
十年而意中所欲作之文猶未之能出而應事牽  
率之作則己不勝其多芑孫區區所繇媿憤而日  
夜無以自喻者今但目之曰未定藁以志其願學  
之心未已焉爾

楊甫未定藁

嘗論古文之術必<sub>五</sub>其才而後可以裁於法必無

所不有而後可以爲大家自非馳騫於東京六朝  
沈博絕麗之塗則無以極其才而所謂法者徒法  
而已以徒法而語於文犬羊之鞞而已自宋以後  
歐會虞范數公之文非不古也以視韓柳則其氣  
質之厚薄材境之廣狹區以別矣蓋韓柳皆嘗從  
事於東京六朝韓有六朝之學一掃而空之融其  
液而遺其滓遂以負絕千餘年柳有其學而不能  
空然亦與韓爲輔望溪方氏宗法昌黎心獨不愜  
於柳亦由方氏所涉於東京六朝者淺故不足以  
知之今雖謂歐會數公之文勝於柳可也使誠坐

歐會數公於此而俾之執筆爲柳氏之文吾知諸  
公謝不能也同上

古碑版文雖甚簡核必有所獨詳之處凡所謂略  
者從其所詳而略之也無統攝數言而一槩略之  
之理韓之誌子厚紹述皇甫之誌韓頗略矣而獨  
詳於其爲文所謂言各有當也同上

講試帖者皆謂與他詩異子以爲與他詩同且必  
他詩悉工而後試帖可工必有韓杜百韻之風力  
而後有沈宋八韻之精能同上

馮魚山王鐵夫之詩皆學韓魚山學韓而得其骨

之重鐵夫學韓而得其氣之盛

聽松廬詩話

法時帆祭酒題王鐵夫詩集云渣滓除已盡字字  
出瘦硬匪緣讀書精安得行氣盛瘦硬氣盛二語

道出鐵夫詩佳處

同上

王鐵夫秋懷十二首學杜而能得其神骨摘錄數  
首于此第四首云袞袞諸公捧劍韜草間羣盜尙  
如毛洗兵待挽銀河下轉饜仍過玉壘高風外馬  
嘶頻踠足霜前鷹意欲離絳何當援筆供磨盾雪  
滿平蕪血滿刀第六首云苗蠻戡定又萑苻三楚  
連年震鼓鼗惡少數羣丸赤白好官平日轂丹朱



荆襄自古經龍戰樊鄧中宵到虎符漸喜封章都  
實奏科名端不負吾儒第七首云天彭井絡勢紛  
紜獸集蜂屯合復分無數元戎親握槊何來孃子  
却成軍雨昏巫峽函箱陣日射夔關虎豹羣花果  
園中哭都護翩然大鳥下新墳謂花果園之戰第八首云  
陝右傳烽過竹山蒼黃消息近商顏劫營驍將纓  
先結據隘書生甲自擐組練三千新鄩部風雲百  
二舊函關定知虎旅從天下快埽妖氛唱凱還第  
九首云種區狝裸幾豪酋警報滇黔驟數州文武  
江湘方論帥西南眴町妄稱侯三更墨騎圍堅寨

一路紅旗達

御樓聞道苗民也辛苦至今輓運抵車牛第十首云久將  
市舶作郊廛關吏今憂闕算錢哨卒空教懸什伍  
將軍其奈少樓船盧循就歛終爲賊徐福逋誅肯  
作仙黃浦濤聲秋萬鼓左編夜誦想荆川上同

黃仲則程孝子行王鐵夫書常公殉節錄後此二  
詩一寫孝子一寫忠臣筆力遒勁生氣湧出真字  
宙間大文字也上同

王鐵夫有西陲牧唱詞六十首并自註敘述西域  
山川及準回諸部土風夷俗頗詳可與尤西堂外

國竹枝詞紀文達烏魯木齊雜詩並傳上同

鐵夫詩云打門一輩但求書又云書好何曾換得

鴛又云苦教磨墨累家童鐵夫負重名故書雖不

甚工而求者甚衆余名不及鐵夫乃索書者亦日

踵于門甚至如索逋之急余嘗倩區方山陳丹厓

沈竹坪袁壽山諸君代筆自余觀之諸君書皆工

於余而索書者必欲得余手書凡善書者多樂此

不疲余不善書但覺疲而不樂可笑也上同

標題 觀石菴先生所藏陽明山人銅印作歌古七

擬李長吉天上謠古七 草彭尙書墓碑

竟爲書以報允初書所不盡申之以詩古五

中秋宿喀拉河屯古五 次日雨至常山

峪古五 晉太康瓦荊詩古五 書故崇慶州

知州常公紀 殉節錄後古五 題王南陔紹

蘭困學說文圖古五 知忻州事汪君本直

重修元遺山墓求詩古七 出京四首古五

韓文公畫像古七

摘句 學圃豈門場漢宋罔不宜要之必已出始

以毋自欺

堯典一帝紀不過五百言下武章四句功

兼祖曾孫古人尚體要見道語不繁晚周  
莊屈徒謀篇始瀾翻

自從頡籀來書體幾同異今人爭點畫天  
地入蟲臂可憐無字處徬徨聖心寄

孟堅志地理在往多引詩宋衛陳鄭間推  
本風人辭

自非讀書多何以實其腹妙處不關書無  
書苦磽确

言中苟無物憍氣非堅蒼絃外苟無音虛  
響難久長

秦漢未言佛佛義具列子

巍巍陸宣公誤傳墳有二朽骨起衆爭聚  
訟各修治飄飄唐伯虎風期感文字封冢  
樹碑亭後先煩長吏古今且暮耳賢達一  
揮淚清明澆酒人不必皆後嗣

生平厚自待因以期諸人

知縣七品官束縛敢搖膝號令未出門動  
已躓於閩苟存康濟心亦救萬分一

見心不見字字字獻神采

翻新乍驚愚久而遂陳陳

有名召瑕疵無譽遭嗟薄

英雄惟有骨仙佛總無聲

蟾蜍戀東鳥戀西昨日之日成古時

才子回頭多是佛美人彈指各成仙

宦塗況味溫涼玉人海聲名上下帆

絲雨勒成寒食景好風吹聚故鄉人

天連絕漠常時紫山出長城一半紅

液從幾鍊香成蜜丹到重燒玉化烟

吾輩寸長安問尺下官方鑿那投圓

一語贈行三反復立朝須怕受恩多

溫汝能

字希禹號謙山廣東順德人乾隆五十三年舉人  
官中書有謙山詩文鈔

謙山性豪邁有玉山草堂風嘗搜輯粵東詩文爲  
詩文海自漢迄今千有餘家書近二百卷又嘗搜  
陳巖野遺文及其子元孝與孫曾輩爲陳氏五代  
集人尤義之所爲詩亦原本性情

嶺南  
羣雅

洪稚存太史稱其高出流品凡貴遊之習聲氣之  
場槩不能染歸田後刻書甚夥黎棗之資費以巨  
萬而粵東文海詩海之選尤稱大備

嶺海  
詩鈔



摘句 夢魂尙有酬君日歲月難留報母春世上

倚間多白髮好傳仕路各書紳讀李令伯陳情表

### 閻秉升

字峴亭山西夏縣人乾隆五十三年舉人官知縣

詩品云返虛入渾積健為雄峴亭造誼如是詠史

諸作尤具特識羣雅集

摘句 欲得死節士當於諍臣求

天下不妨知己少古來惟有受恩難

國朝詩人徵略卷五十

番禺張維屏子樹輯

伊秉綬

字組似號墨卿福建寧化人乾隆五十四年進士官揚州知府有畱春草堂詩草

君由縣學生中乾隆己亥本省舉人甲辰舉中正榜己酉成進士授刑部額外主事補浙江司遷直隸司員外郎嘉慶元年嘗侍光祿與千叟宴三年典湖南試明年出守廣東惠州甫下車問民疾苦裁汰陋規有豪辱寡婦子予校荷杖寡婦呼冤君

立拘豪詢責民皆稱快倡修學宮建豐湖書院課  
諸生有程法嘗修朝雲墓於蘇文忠祠沼中得德  
有鄰堂研人謂文忠以貺賢守云君故練習刑名  
有重讞總督吉慶公輒以委君洋匪中有被擄服  
役者二十二人君照律問遣總督以律載三年今  
逾期欲從重君曰律意重行劫三年概詞耳所以  
五年者由不能自脫設非被擒又豈五年止耶卒  
免死陸豐甲子司奸民聚黨肆劫限期勒贖遲則  
支解之君請總督發兵速剿幕中客多阻之不聽  
總督因問策君曰總兵錢夢虎素著威望同知袁

樹悉彼處民情如割錢駐甲子而令袁曉喻父老使獻巨魁事當有濟從之果送七人出歸善博羅永安之變陸豐不乘隙起者誅此七人之力也歸善陳亞本滋事未發提督孫全謀駐同城君屢請兵不允乃部差役七十餘人夜搗其巢縛其親黨亞本遁設計擒之未幾博羅陳爛屐四將爲亂君又請兵總督提督設詞阻之兵仍不發亂遂作而君適以博羅絞犯越獄呈議去官士民共籲奏畱乃畱軍營辦事當是時大府蒼黃失措提督擁兵不前兵丁卓亞五卓亞佳爲僞先鋒朱得貴爲僞

國朝言行錄卷三十一  
三大王均通賊搶掠民既死賊又死兵君憤懣請  
兵愈力遂逢上官怒復以失察教匪劾論戍軍臺  
會新總督倭什布公平反入告

上以情事與劉清之於魁倫相同免罪回籍同人伙助捐  
復兩江總督鐵保公請發南河時淮南水災君查  
高寶賑銀米皆親給奏攝揚州

特旨真授每邑置四粥廠經營賑務至廢寢食北湖湯家  
泮盜藪也糾掠人貨肆其淫虐兵役莫敢誰何君  
獲其魁數人餘盜解散揚州奸猾擾民者俗號魍  
魎勾串以害富室者則名搭臺君皆嚴治之風以

漸息一攝河庫道再權鹽運使胥稱職旋遭光祿  
公喪及還閩邑中城圯君出千金倡修上書大府  
以不經官不邀議敘不委估核爲請城卒完營秋  
水園供母夫人游憩未成母夫人卒改爲家塾榜  
其柱曰未能將母園何用且望成才塾有靈其他  
有利於桑梓者率力爲之家居八年朋交敦勸出  
山遂勉就道中塗游歷山水多紀以詩抵揚州寓  
黃氏園一時名流酬唱頗洽偶感霜露患肺痿症  
卒時嘉慶二十年九月十一日春秋六十有二歿  
未一月揚州士民羣祀君於三賢祠三賢者宋歐

陽文忠蘇文忠及我

朝王文簡皆揚州名宦也君工詩尤善隸法好蓄古

書畫而以前賢手迹爲重頗究性命之學不僂門

戶屏謝聲色食每具蔬日藉以清吾心耳亦有生齋集

墨卿太守幼稟尊人光祿公庭訓又獲聞鄉先正

李文貞公蔡文勤公及雷翠庭先生之緒論故於

立心行己之學有志講求而文章詞翰亦皆精能

早歲在都中卽爲諸鉅公所愛重旣出朱文正公

之門而紀文達公嘗延爲西席課公之孫迨成進

士官部曹扈從灤陽典試湖湘益譽滿雲司聲騰

日下迺一麾出守適遘无妄之災幸際

聖明事獲昭雪春回寒谷免戍軍臺

上諭復以劉清爲比君感激涕零益思勉圖報稱朋舊伙  
助遂復出山旣而一守揚州未竟厥志憂歸服闋

又復北行中道謝世士林咸歎惜之

聽松廬  
文鈔

嘉慶壬戌墨卿先生以事罷官大吏委官看守在  
按察司司獄廳旁人爲之憂危先生灑然若無事  
者臘月十九日坡公生日先生招同宋芷灣庶常  
陰青原上舍家賢仲陳仲卿兩秀才設祀堂中懸  
笠屐小像共拜之賦詩飲酒極歡高士徐薌圃曰



嗟乎如伊墨卿者豈復有世間升沉得失之念在

其意中哉

松軒  
隨筆

墨卿先生訃至雲谷農部招同人集長壽寺爲位  
以哭余爲祭文有云父爲九卿宴預千叟侍親趨  
朝榮慶希有鸞旂皇皇天門蒼蒼身隨豹尾灤河之  
陽白華在堂皇華在路手提玉尺瀟湘秋渡一麾  
出守管領羅浮何來蚩氓乃操戈矛有謀不用非  
公之咎臣心水明

君德天覆維揚七屬黃流滔滔災黎水宿哀鴻嗷嗷公乘

小舟戴星聿往民謂父母不謂官長云云

聽松廬  
詩話

標題

小學篇贈黃小松古七

讀史六首古五

湘

江曲古五

對酒行懷故學士竹君先生古七

上宗伯師紀先生古七

俞貞女詩古七

長城謠古七

廣仁嶺古五

李墨莊舍人冊

使琉球歸槎圖古七

贈陳仲卿古五

賑災

四首長短

三師二友詩古七

題張南山

孝廉松石圖古七

摘句

月華洞庭水蘭氣瀟湘煙

思通天地人以靜爲胚胎糟粕姑置之磊

落來吾儕對月

功不下神禹象真同泰山

鄒縣謁孟子祠

君臣三大節詞賦十先生

尋南園故址

雪花落水盡竹淚過秋深

寒色憶湘江

才大豈難用歲寒方有聲

畫松

湘夫人枉思公子屈左徒空弔賈生

沅水

王人忝列諸侯上別墅仍勞小隊移

酬姜度香

玉露嬋娟照良夜銀河清淺作新秋

七夕

又分鴻雪東西印虛負雲龍上下情

贈韓桂船

此行已似他生晤既別猶追半日談

寄葉雲谷

張錦芳

字粲夫號葯房廣東順德人乾隆五十四年進士  
官翰林院編修有逃虛閣詩鈔南雪軒文鈔

錦芳初以經術補優貢入京師嘉定錢大昕河間  
紀昀見之目爲奇士錦芳淹貫羣籍通說文之學  
分隸得漢人法兼嫻繪事出其餘技足以輝映一  
時而於詩所造尤邃與欽州馮敏昌同邑胡亦常  
稱嶺南三子旣又與黃丹書黎簡呂堅號嶺南四  
家天性孝友事親能測意指以仲兄暨弟錦麟早  
世居恆淚常盈睫迨登第聞伯兄訃遂乞假歸養

未幾卒年四十有七廣東通志

馮魚山謂吾粵自曲江而後風雅中微前明作者

稍起而振之至葯房出而汪洋馳騫牢籠百態直

可接武曲江嶺南四家詩鈔

葯房天性友于與弟瑞夫以詩齊名學問淹通兼

工書畫詩宗大蘇上溯韓杜論者謂可接武曲江

談何容易要其才力富健氣韻深醇雖以魚山絕

大之筆二樵絕奇之才聯鑣並驅莫相先後以之

追軌抗風夫奚媿焉嶺南羣雅

魚山先生於同人中尤推張葯房葯房有送李文

穎遊大梁詩云曾聞合浦葉飛入洛陽城君去沿  
江漢何時達汴京天涯師友訟壯歲別離情到日  
吹臺望浮雲但北征先生從李君扇頭見之以爲

妙絕一時

香石  
詩話

魚山謂葯房可接武曲江宋芷灣謂讀葯房詩令  
人心醉余謂魚山詩濶大而或失之粗豪二樵詩  
奇崛而或失之剗鑿葯房詩不及魚山之大亦不  
及二樵之奇然言必稱乎心才必範以法文根於

情味餘於聲是真得溫柔敦厚之旨者

聽松廬  
詩話

葯房哭胡同謙云意長數有盡質化憂難薶又云

可憐窮愁際交勉意未歇語極沉摯同上

葑房七古多學大蘇五律追步唐賢余最愛湘水

一首云不盡三湘水來從八桂林遠循衡嶽麓直

下洞庭深天地餘秋色帆檣入暮陰竹枝與蘭葉

終古動哀吟可與湛若翁山相伯仲同上

葑房與南澗交篤輓南澗六十韻極沉鬱頓挫同上

葑房三閭大夫祠五首騷情杜意自是傑作同上

葑房黑米酒詩乍熟沉雲黑新嘗壓蔗甜極工同上

葑房在江西覆舟兩手急持王元章墨梅及舊端

硯餘不暇顧也其雅癖如此松軒隨筆

標題

度庾嶺

古五

南旺分水廟

古七

北固山甘

露寺

古七

月夜泊燕子磯登絕頂

古五

戒

壇古松歌

古七

光孝寺貫休四羅漢

古七

鄉賑詩

古五

補書

古五

禾虫

古七

朱仙鎮

岳忠武廟

古七

大水歎濟寧道中作

古七

常州道中寄黃仲則

古七

摘句

入門環眾綠水樹同一色

寄暢園

意中有空山行尋出雲上萬景隨步潤望

眼始一放

登西樵大科峰

片雲迷望嶽孤月冷浮湘



春水當門長孤舟與岸平

學難空舊習名畏逐時人

文人每自憎少作烈士未全灰壯心

明月白雲憑弔遠中州北渚下來遲黃陵廟

放還未必緣明主隱去猶能比德公孟襄陽宅

大江欲靜潛虬動初月無光積水明

涉印須友喧斜日東馬懸車迫小舟渡汶水

於物多藏仍是累與人同患得無情落水書畫

我已無兄欣得弟夜原多雨更兼風對牀

日暮鷗聲離岸盡白鷗隨意占江天

別離容易懽娛少願作凡人不作仙七夕

王寧焯

字熙甫號直菴山東高密人乾隆五十四年進士

官御史有在山集及學靜草廬文稿

直菴明習律例遷侍御章奏得大體人來京師常

咨訪民間利弊為奏稿將上遽以疾卒山左詩續鈔

標題 題椒山先生與王遴小簡搨本後七古

摘句 方今無遺賢此士猶待價有或登之朝能

令側媚怕贈王鐵夫

君子畏清議不畏眾人言

墮檐雙鵲鬪出草一蟲跳

國朝詩人徵略卷五十一

番禺張維屏子樹輯

洪亮吉

字君直一字稚存江南陽湖人乾隆五十五年

賜進士第二人官翰林院編修有卷菴閣集

君生六歲而孤家貧就外家塾讀書聰穎出諸同學上乾隆己丑年二十四補縣學生朱學士筠視安徽學往從之遊所交多知名士始君好詞章至是迺兼治經庚子中順天鄉試舉人庚戌成進士殿試一甲第二名授翰林院編修明年充石經館收

掌及詳覆官以舊書十三經多譌俗白總裁欲東  
正之未能從也壬子充順天鄉試同考官闈中拜  
視學貴州之

命故事未散館翰林無爲學政者蓋異數也在貴州奏請  
以禮記鄭康成注易陳灝爲部議所格敎士敦厲  
實學購經史足本及通典文選等書俾諸生誦習  
由是黔中之人爭知好古丙辰充

咸安宮總裁丁巳三月入直

上書房戊午弟靄吉卒於家君以古人有期功去官  
之義乃引疾歸己未正月

高宗純皇帝升遐赴都哭臨四月充

寶錄館纂修官教習庶吉士八月乞假擬俟送

梓宮後南還時川陝之賊未靖

上宵旰焦勞君目擊情狀欲有獻替顧編檢例不奏事於

是上書 成親王及座主朱尙書珪劉尙書權之

冀其轉奏 成親王以原書進呈大指謂

聖躬宜勤政遠佞臣工多奔競營私語過激有

旨交軍機大臣與刑部會鞫讞上當君大不敬擬斬立決

特恩免死發往伊犁交將軍保寧管束庚申四月京師旱

上親書諭旨釋令回籍旋得甘雨

御製得雨敬述詩紀事有納言克己乃爲民請命之大端  
及將原書裝璜成卷常置座右以作良規之注計  
居伊犁甫及百日自新疆關後漢員

賜環之速未有如君者自此枕蓆墳籍放浪山水者十年  
卒得告終家術

上之成就而安全之者可謂至矣君旣歸自號更生居士  
好遊居里中觴飲無虛日丁卯吾鄉歲祲首請當  
事設局賑濟而自捐金爲倡城鄉之民賴以就蘇  
君厚於天稟精力過人然明恩怨別是非少容人  
量君嘗語予人孰無病要自有其真耳君若後吾

死銘誄當必出君手幸無失吾之真也豈知斯言  
遂爲今日識哉詩文涉筆有奇氣生平所著書凡  
二百六十餘卷經傳訓詁地理沿革尤所顧門云  
嘉慶十四年五月卒春秋六十有四

亦有生齋集

君常橐筆游公卿間節所入以養母母卒君時客  
處州弟霽吉不敢訃爲書言母疾甚促君歸君亟  
行距家二十里舍舟而徒方度橋遇賃僕之父仇  
三問得家狀君號踊失足落水中流數里汲者見  
髮颺水上攬之得人識君者共舁至家久之方甦  
君以不及視含歛後遇忌日輒不食

大雲山房文稿



洪常博奇思獨造遠出常情五古歌行傑立一世  
早年與仲則齊名江左時號洪黃後沈研經術著  
書盈篋與季述同客最久論學相長人又稱洪孫  
云夙嗜山水所遊嵩華黃山皆升絕壁題字乃反  
綜其奇蹟各爲一集又以至性過人篤于友誼暨  
黃客死素車千里奔赴其喪世有巨卿之目故其

贈友諸什情溢于文

吳會英才集

稚存少孤失怙爲母夫人守節教養而成是以刻  
意厲行確苦自持而於取與尤嚴蓋古之狷者也  
性好山水如天都華嶽皆登其巔必縋幽歷險而

後已作文具體魏晉作詩五言古仿康樂次仿杜  
陵七言古仿太白然嘔心鏤腎總不欲襲前人牙  
慧至於經史註疏說文地里靡不參稽鉤貫蓋非  
僅以詞章名世者

湖海詩傳

洪稚存太史志行氣節儒林引重余讀卷施閣乙

集朴質若中郎適宕若參軍肅穆若燕公

八家四六文鈔

聖賢能不好名乎孝經曰揚名于後世論語曰君  
子疾沒世而名不稱焉是聖賢不能忘名也然則  
名不可好乎曰好名之弊尙足以扶世何則人而  
能好乎名類皆聰穎拔萃之人也聰穎拔萃之人

賞之不能勸罰之不能懲而名之一字卽足以拘  
之然則名亦可假乎曰不能也有聖賢之名有忠  
孝之名聖之名而可假則莊周列御寇之徒假之  
矣賢之名而可假則郭解樓緩之徒假之矣忠孝  
之名而可假則王莽趙宣之徒假之矣等而下之  
至才士詩文之名亦無不然文有文之精神詩有  
詩之精神精神能永百年者則傳至百年焉精神  
能永之十世五世者則傳之十世五世焉精神能  
歷劫不磨者則傳之歷劫而不磨焉然則吾欲救  
天下好名之弊亦惟使之各務實而已

卷施  
閣集

喪葬之制古今人惑雖不同然其爲惑則一也古人之惑一棺之費累及千金一壙之幽藏及百物以爲不如是不足以明人子之心也是其惑尙近于愛親今人之惑營一塚之地或遲及十年謀一穴之吉必訪及百輩于是有至曾元之時尙未及葬其高會者大率貧賤者尙易而富貴者益難富貴而骨肉支派少者尙易富貴而骨肉支派多者則愈難至有兄延一客弟聘一師兄購于南弟營于北始則各不相謀繼則各以爲是喪庭出而復返卜日成而屢移其故云何則祈福之念十倍于

愛親之心爲子孫之謀百倍于爲祖父之計也是則古人之厚葬尙近于愛親而今人之營塚則實欲爲己謀爲子孫謀耳同上

官之累民者少吏胥之累民者多三代時府史胥徒之賢者即可遞升爲上士中士下士漢以來三老嗇夫掾史之賢者即可遞升爲丞尉守令今則不然由吏胥而爲官者百不得一焉登進之途旣絕則營利之念益專姓名一入卯簿則呼之爲公人咸不敢忤其意其始鄰里畏之四民畏之甚至士大夫亦畏之若有奸狡桀出把持官府之人則

官亦畏之何則官卽欲侵漁其民未有不假手于吏胥者究之入于官者十之三其入于吏者已十之五矣不幸一家有事則選其徒之壯勇有力機械百出者蠶擁而至不至破其家不止是其權上足以把持官府中足以凌辱士大夫下足以魚肉里閭子以傳子孫以傳孫其營私舞弊之術益工則守令閭里之受其累者益不淺況守令所以得罪者大半由吏胥及至守令陷于法而爲吏胥者不過笞杖而已革役而已至于新舊交代之時則又夤緣而入故吳越之俗以爲有可避之官無可

避之吏職是故也然則有牧民之責者可不先于

胥吏加之意乎

同上

穉存先生刻意厲行希蹤古人其所爲詩文脫去  
恆蹊直摠胸臆觀其論好名謂名可好而不能假  
則先生生平直情徑行銳於自見之意亦大略可

觀矣

聽松廬  
文鈔

國朝駢體文體格高華才藻豐贍者不止數家若論

氣韻之古無過卷苑一集

松軒  
隨筆

洪北江詩有真氣亦有奇氣時或如飄風驟雨未

免失之太快

聽松廬  
詩話

先生未達以前名山勝遊詩多奇警及登上第持使節所為詩轉遜前至萬里荷戈身歷奇險又復奇氣噴溢信乎山川能助人也同上

作客二十年衣食知其難卑身與周旋不敢忤世顏此洪穉存先生詩也以先生一代奇才而猶歎謀食之難周旋之苦則世間有才之人而不免奔走衣食以致消磨壯心屈抑真氣者蓋未易更僕數也然殘杯冷炙杜老心酸乞食叩門陶公語拙古賢有同慨矣悲夫松心日錄

先生詩如一峰缺處補一雲人欲出山雲不許又



雲光裹地亦裹天風力飛人復飛馬又天山大雪  
句云雲頭直下馬亦驚白玉闌干八千丈皆善狀

奇境

聽松廬  
詩話

先生絕句有奇情快論者偶錄數首大九州藏小  
九州大瀛海外水仍流九州各有開天聖迭柱乾  
坤到盡頭 一粟先看世界浮女媧搏土不曾休  
自從未有人行日玉兔金烏已出頭 轉覺雙鬢  
有定評旗亭聲價一時傾怪他九級慈恩墻徧檢  
都無李杜名 都似空中飛鳥過強分名目費編  
摩試將列傳平心看一代傳人本不多 門前三

萬六千頃架上二千四百年胸次近來無一事釣

竿纔放枕書眠同上

標題 榮陽城古七 金谷園古七 潼關門古七 關

中送黃二入都待選古七 朱孝子詩古七

題黃石齋先生手書詩卷古五 從天井上

千尺幢古五 經天梯升日月巖古五 日晷

經蒼龍嶺古五 夜從落雁峰足至蓮花峰

古五 晉太康五年買地蒞歌古七 閘官詩

古七 黃山人文殊洞古五 林屋洞古五

摘句 萬燈雖明不敵一星九流雖精不敵一經

一家飢寒擾及里黨四民飢寒憂及君  
相以財濟世財有匱時以言濟世利無  
窮期欲身不病無與物競欲身無災與  
物共財

人生天地間百物無不借日受天地恩不  
向天地謝

人生天地間各各私所有未知室中物屬  
客百年否

嘗嫌生世遲千載隔鄰魯不知更千載我  
又成太古

客有一寸心抱此亦云久妻孥不能知庶  
可喻良友一世乏賞音吾將寄身後

昔者慕著書鉛槧二十年傳世難預期庶  
足慰目前

家儲萬黃金或者憂色行乞得數錢陶  
然樂昕夕賤者未必非貴者未必得

閒身置天地非可自菲薄

盪此衣袂雲還成吳會雨

母病逋師俸兒長著父衣

野雲隨地落春樹接天生

新月如眉過寒食東風吹雨作清明  
乍識面人偏入夢不關心事忽沈思  
作者衆憐傳者少前無古更後無今  
愁中花月催人老夢後樓臺易主多  
遙憶風前小兒女紫籐花下讀家書  
輸他百鳥啼春徧一箇吟蟲欲占秋  
能容一個眞名士足抵孤寒八百人  
好名亦是文人事不近情人不近名  
贏得夜深談往事一雙人立雨絲中

要與春人門標格有花枝處有鞦韆

杏花

張問陶

字仲冶號船山四川遂寧人乾隆五十五年進士  
官萊州知府有船山詩草

先生爲相國文端公元孫生于山東館陶縣乾隆  
戊戌先生年十五集中詩於是年始自戊戌至壬  
寅皆寓漢陽甲辰春由漢陽入都乙巳八月出都  
丙午返遂寧周孺人歿於涪州丁未九月繼娶林  
恭人卽贅于成都鹽茶道署戊申三月由棧道入  
都是秋順天鄉試中式第十三名舉人已酉下第  
出都由棧返蜀十二月由棧入都庚戌成進士選

國朝言行錄卷之三十一  
庶吉士辛亥二月乞假出都由棧返蜀壬子十一月舟發成都眷屬偕行由蜀而楚癸丑二月抵都散館授職檢討是年先生三十歲自甲寅至嘉慶丙辰皆居京師丁巳九月中棧返蜀戊午正月由棧入都庚申閏四月奉

敕選翰詹三十人各書扇五柄五月選十二人分書

養心殿屏幅先生皆與焉八月奉

命充順天鄉試同考官十月入史館辛酉正月先生兄亥日奉太夫人至京五月奉派教習庶吉士乙丑九月改官御史丁卯四月奉

命巡視南城己巳三月奉

命充會試同考官七月選吏部驗封司郎中庚午七月部  
選萊州府知府九月出都赴任辛未正月赴濟南  
夏返萊州壬申二月辭郡是年先生四十九歲罷  
官後僑寓吳門自顏所居曰樂天天隨鄰屋癸酉  
仍寓虎邱往來大江南北未幾卒于客舍卒之年  
月不得其詳先生出守與上官齟齬鬱鬱不得志  
辭二千石而爲寓公身歿無子太夫人猶在堂亦  
可悲矣然先生官未昌而詩則大昌年未永而名  
將愈永則造物之於先生厚矣

聽松廬  
文鈔



船山詩生氣湧出生趣飛來古體中時有叫囂剽  
滑之病當時隨園名盛以遊戲爲詩船山亦未免  
染其習氣至近體則極空靈亦極沉鬱能刻入亦  
能清超大含名理細闡物情或論古激昂或言情  
婉曲或聲大如鐘鏞或味爽如菘韭幾欲於從前  
諸名家外又闢一境

聽松廬詩話

船山五律有極警健者如嶠陵云沙白秦人骨山  
蒼夏后墳古今雙去鳥霸王一浮雲奇險昇平忽  
中原大道分長鞭入霄漢我馬亦空羣巫峽云一  
年第一日攜酒看巫山晴雪照三峽春風吹百蠻

倚天雙壁破迎歲萬峰閒冷絕高唐觀朝雲自往

還上

先生寶雞題壁十八首傳誦一時茲錄其五首石  
磴縈紆戰馬麓入山符疊碎兵符殺人敢恕民非  
盜報國真愁將不儒豺虎縱橫隨地有貂蟬恩寵  
愧心無荒寒驛路匆匆過焦土連雲萬骨枯窮山  
避亂做軍門威望遙遙萬馬屯不戰豈能收殺運  
無功先已負君恩祇聞怨讟歸諸將可有心肝奉  
至尊一樣沙場征戍死模糊敢信是忠魂故事虛張諭蜀  
文懸軍安養募新軍山中城破官仍在闔外兵譁

匡卓言 卷之三十一  
將不聞大賈隨營緣我富連村無寇是誰焚烽煙  
未埽偏流毒萬鬼含冤指隩雲憂憤書來處處同  
故人幾輩尙從戎能文未易參軍事有口都能說  
戰功爲我經心籌去住看君彈指變窮通東溟西  
域曾帷幕猛將還應憶海公議撫招降計已施凋  
殘民力久支持不明賞罰終何益眞舉才能尙未  
遲將相有權甘自棄英雄無種要人爲孫吳兵法  
非天授誰竭誠謀報

主知語寫悲涼義關諷諭所謂言者無罪聞者足戒也第  
十八首結云風詩已廢哀重寫不是傷心古戰場

先生蓋自言之矣同上

船山絕句云秭歸城下秭歸嘯江出夔巫水漸低  
莫上柁樓高處望鄉山都在夕陽西 稻香吹過  
水聲來野樹無行遠近栽不費一錢風景足萬金  
何苦築樓臺 草樹經秋雨又風老青荒翠間疎  
紅閒攜小鉢收花種要替明年補化工 門無芳  
草徑無苔灑掃黃塵日幾回如此零星花數朶虧  
他蜂蝶會尋來 罵佛顛狂佞佛癡妙心難望俗  
人知看他塵海翻身苦正是如來默坐時 數詩  
皆有情味又論詩絕句云躍躍詩情在眼前聚如

風雨散如煙敢為常語談何易百鍊功純始自然

名心退盡道心生如夢如仙句偶成天籟自鳴

天趣足好詩不過近人情 土飯塵羹忽斬新猶

人字字不猶人要從元始傳丹訣萬化無非一味

真 也能嚴重也輕清九轉丹金鑄始成一片神

光動魂魄空靈不是小聰明 數詩實獲我心空

靈不是小聰明吾即以此語評先生之詩上同

船山詩單詞隻句有警動者隨意錄之五言如瀑

飛明月動 萬嶺塞空來 沙飛風有形 龍歸

氣滿山 萬事有明日 好詩堪下酒 吟苦暫

忘家 七言如古今大局多重複 古今有我須

與耳 小坐移時又古今 萬古無如眼前好

一朝能得幾傳人 得句常疑複古人 好古不

泥真通人 天下才人窮有例 身當貧病見交

情 身謝塵勞轉不情 不善謀生友代謀 交

爲通財漸不親 兒好強于負郭田 世緣空處

性情真 緣盡還須讓後人 信天人不避孤虛

怕讀人間趁韻詩

好爲夢韻者  
請誦此七字

嘉慶丁卯余入都在小峴少司寇坐中晤船山太

史其狀似猴故自號蜀山老猿又自稱老船老船

畫頗近徐天池余於墨卿太守伯臨比部處見之

雖隨意數筆皆有天趣

松軒隨筆

香山有蠟油船山向溫篋坡索之篋坡曰君以詩

來蠟油可得也船山賦七古一篇後伊墨卿守惠

州船山又致書索之其癖嗜如此

同上

船山夫人有絕句云愛君筆底有煙霞自拔金釵

付酒家修到人間才子婦不辭清瘦似梅花船山

和之有夜窗同夢筆生花句亦閨房佳話也

同上

船山云紅樓夢八十回以後皆高蘭墅所補蘭墅

名鶚與船山同年交好

同上

船山歿後石琢堂殿撰刻其詩且賦詩云料理一

編親告奠百年心事此時完友誼可風也聽松廬詩話

標題 七盤嶺古五 巴陽峽古七 蒯通墓古七 朱

孝女詩古七 秦節婦江氏詩古七 玉河洗

象歌古七 風木圖為張八愚題古七 題觀

空觀色圖古五 醉歌行古七 雪中詩古七

摘句 古人重骨肉後人重朝市但願名利生不

畏別離死

秀才至性足 朝廷以為寶考訂實小技

何足立師道寄貴州學使洪稚存



世人畏速化悲戀攢心胸昧然去實境苦  
向虛無攻術盡身亦滅一散隨東風

黃金堆几案不如花數枝

美人實無罪溺者自忘身

眼前真實語入手見奇創

本無祖述心忽已承其派

奇雲穿華嶽古雪照河流

有生皆過客無事卽深山

道心一明月人境幾浮雲

身如前日死心對衆人孤

才退安微命心平悔大言

何事能千古無端又一年

漸減兒時趣新年亦淡然

無事何須投筆起此生原爲讀書來

難測天心姑任運既來人世可無情

疎于骨肉無天趣嘗盡艱難好酒悲

白酒澆愁還此日青山埋骨定何鄉

福命在天憑婦孺形骸如土況田園

一生儘有關心事萬物姑存過眼緣

過眼榮枯皆嚼蠟切身經濟是加餐

生來寒瘦天難補看到流亡我未貧  
半生傲骨禁秋氣萬事輕心悔少年  
逢場未礙鬚眉冷經世終防意氣麤

長爲有情人說法莫從無佛處稱尊

河海無聲通戒外金焦分影立風前  
頑雲吸雨蛟宮黑芳草承花蝶路紅  
亦知蜀道真難上可奈長安不易居

秋樹有花皆慘澹夜天無月更深沉

老死空山人不見也應強似洛陽花

梅花

牡丹富貴梅清逸總是人間極品花

李鑾宣

字伯宣號石農山西靜樂人乾隆五十五年進士  
官雲南巡撫有堅白石齋詩集

石農先生爲詩四十年少卽遠遊不遑息曰行行  
草官西曹曹有白雲亭曰白雲初橐分巡溫處二  
州曰甌東集提刑雲南曰詔南集謫迪化州曰荷  
戈集分巡天津曰七十二沽草堂吟草提刑廣東  
曰訶子林集合爲堅白石齋詩集若干卷先生自  
髫年及於中歲室家之近羈旅之遠科名之所際  
仕宦之所值多處憂患之中

大雲山  
房文集

石農少失恃育於祖母長遭家變窶且貧備極艱  
難困苦而後博一第由刑曹出爲溫處兵備道遷  
雲南按察使旋緣事謫戍輪臺父歿於家尋荷

聖主格外恩放歸終制仍由部郎洊陟方面

繩樞齋  
文鈔

石農中丞正直而和易虛己而愛才其詩模山範  
水自具清雄弔古言懷每多沈鬱至荷戈集中述  
哀諸篇能使讀者愀然以悲余嘗謂中丞與夢文  
子相似兩人皆宦達而詩皆多愁苦之音家庭骨  
肉中多傷心之故耶抑古之傷心人別有懷抱也

聽松廬  
詩話

厲樊榭哭姪人句云此生只有蘭衾夢其奈春寒

夢不通李石農悼亡句云蕭齋一枕寒於水夢裏

呼卿覆短衾皆情至語讀之令人酸楚同上

石農題任邱邊徵君連寶詩集云一時南北兩隨

園各有瀾從舌本翻瀛海詩人工樂府倉山仙吏

富詞源邊隨園固不為袁隨園所掩也同上

石農秋闈分校詩云得意狂呼還擊節從頭再看

倍分明衡文必從頭再看庶不負作文者苦心同上

標題 于忠肅公墓七古 枯蒼山出雲歌七古 大

龍湫七古 靈巖五古 小龍湫七古 龍鼻水

古七 沙山來古七 水輪古五 銅鼓歌古七

花田曲古七 商柏抱周槐歌古七

摘句 山有太古心 水有太古音 樵風送青靄 如

撫成連琴 嶺陽

功寧在禹下 醇漫與荀論 孟廟

梧桐荒禹甸 風雨碎秦碑 嶧山

六國尚存先易呂 五經未燼已亡秦 關中

此日當關無虎豹 昔年開國有魚鳧 成都

鼓瑟有靈堯 二女問天無語楚 三閭 浮湘

蓮花白到辛家灤 楊柳青連丁字沽 天津

蛇蟠大澤龍能斷鹿死中原狗又烹淮陰

烏喙未忘嘗膽苦蛾眉猶恨捧心遲姑蘇

好古官增新博士傳經詩授小毛公河間獻王

一弟一兄兼弱妹三人三樣各奇才班氏故里

畏君如虎走司馬似水得魚來臥龍武侯祠

主持騷雅詩能聖歌哭文章筆有神少陵草堂

萬馬窺邊天似蓋一言退敵膽包身寇萊公

米老顛呼石作文逋仙權以鶴為兒

士仰先生同北斗人傳前世是西涯輓法時帆

朱文正公謂時帆是李西涯後身



李賡芸

字生甫號許齋江南嘉定人乾隆五十五年進士  
官福建布政使

君少從錢辛楣先生學孝於繼母敦品節礪廉隅  
爲時所稱通六經蒼雅三禮善屬文慕許叔重之  
學故又字許齋性廉正自爲縣令至藩臬所在皆  
有惠政得民心其治平湖也以陸清獻曾官嘉定  
而已以嘉定人官平湖爲治勉法清獻其守嘉興  
也正己率屬元理浙漕持官民軍三者之平多用  
君之言五年金華處州水災元已馳奏

恩賑矣金華民苦無錢錢價大貴處州苦無米米亦貴元  
加銀二萬兩付君曰惟惠于民任便空爲之君以  
銀之半易錢載至金華加賑民百錢民益安而錢  
價頓平又以銀之半買米於溫州運處州減價糶  
之復以糶錢轉輸運米而米亦賤十年嘉興水災  
君奉檄減糶復分廠賑粥粥厚而吏不侵全活者  
眾任漳州時漳俗獷悍兩族聚眾相攻甚則施鎗  
礮名曰械鬪官拘犯則匿而抗故縣令必會營兵  
以往糶糧之費獨責之縣以故縣皆困君初至有  
歸德堡某姓械鬪龍溪令黃懋修束手無所施君

亦未有策朱履中者內狡肆而外樸誠攝平和縣  
事受代來謁君詢曰平和亦械鬪乎曰有之擒渠  
必以兵乎對曰爲民上者平日不以謠訟擾民遇  
有應捕主名飭里長縛以獻無不如指兵則多費  
矣君視爲真能感民者乃請於督撫以朱代黃久  
之知其終不辦也親率兵往治無所得費帑七百  
兩與朱分任之數月遷汀漳龍道未幾遷按察使  
署布政使會甄別朱爲教職朱虧鹽課五千餘兩  
抵以他款代者張均不聽抵漳守畢所謫昔納朱  
賄而今苛督之朱窮且憤具揭督撫謂虧帑由道

府婪索督撫合詞密奏君解任君之在漳也監造  
戰船不如式被駁重修君已去任家人稱貸於朱  
以竣事而君不知也質訊時朱撫前二事指爲贓  
私家人自承稱貸實有之而君慳不知總督桐城  
汪志伊益疑之飭兩司及福州府必欲窮其獄正  
月四日促君對簿君終不肯誣服十八日總督謂  
獄不成將并罪案事者福州知府索詞聲色益厲  
君恐爲獄吏所辱夜縊於牀以歿士民數千人走  
數百里號哭于門累月不絕事聞

上使吏部侍郎熙昌副都御史王引之理其獄乃抵朱履

中等罪督撫皆罷斥士民林光天等公呈於使者  
闔省士民願捐貲建李公遺愛專祠得

旨允行

學經室集

官受累于家人不一而足彼家人者非不曉事卽  
好生事非營私爲己卽倚勢凌人小官之家人固  
然大官之家人尤甚以許齋方伯之爲人而不得  
其死實由于家人之稱貸吁可畏哉

松軒  
隨筆

摘句 非市非城當僻地有書有酒伴吟身

訂交不乏邨夫子扣戶應來農丈人

桂馥

字冬卉號未谷山東曲阜人乾隆五十五年進士  
官永平知縣有東萊草南征草

未谷工八分書脫手輒為人持去長於說文之

學著有說文義證及札樸

國山左詩續鈔

百餘年來論天下八分書推桂未谷第一

松軒隨筆

標題 漢敦煌太守碑歌

摘句 孤懷違世好靜力定羣疑

異鄉知己少本性對人難

牟昌裕

字啓昆號松巖山東棲霞人乾隆五十五年進士  
官御史

松巖居官廉正為工部囚君子之一奏章疏稿不

以示人故人無知者國朝山左詩續鈔

戊辰春寓都門鄭貫亭侍御過子夜話談及生平

直諒之友推牟松巖為最松軒隨筆

摘句 秋色不知如此早寒花豈解為人開

高士釗

字西山廣東順德人乾隆五十七年舉人有北游

草

西山好治古文而筆力精悍足以副之

嶺海詩鈔

乙丑余館城西西山以古文稿屬爲點定謂予曰子視吾文若何余曰君進而不已將追步歸震川汪堯峯其庶乎西山笑曰如是足矣余曰古文難言也聰明人取唐宋人家文熟復之學其聲貌不難裒然成集但恐皆古人所已言無勞疊牀架屋耳且古人負盛名者其文集尙未易流傳况後人耶西山曰如是則心力不虛耗乎余曰不然文人之思如春蠶之絲必吐而後快斯吐之耳他何計

焉西山笑而去

松軒隨筆



摘句 飛瀑瀉清寒山骨露剔透

傷午輕陰移小樹新秋涼思入疎簾

鍾啓韶

字鳳石廣東新會人乾隆五十七年舉人有讀書樓詩鈔笛航游草

鳳石家羊城西畔與張墨池顏穀田高酉山蔡季材裙屐相邀每多倡和詩饒風韻蘊藉空人

嶺南羣雅

鳳石灑脫不羈詩有雋語喜吹笛自號笛航生嘗言放船珠海吹笛作水龍吟少焉月出如驪龍吐珠鮫宮晃漾洵可樂也捐館後其徒伍紫垣茂才

輯其遺詩刻之

松軒  
隨筆

鳳石有澳門詩十二首句如兵鬼黔於墨燥漿凍  
欲冰蠻姬裙屢摺番衲髮鬚髻又不風潮刮岸當  
午瘴沉山大舶微如點頽沙曲似環語皆警健又  
羈縻原勿絕他族爾母滋十字尤有深意

聽松廬  
詩話

澳門古名壕鏡在香山縣南虎跳門外先是暹羅  
占城爪哇琉球浣泥諸國互市俱在廣州明正德  
時移於高州之電白縣嘉靖十四年指揮黃慶納  
賄請於上官移之壕鏡歲輸課二萬金佛郎機遂  
得混入又潛匿倭賊萬厪四十二年總督張鳴岡

檄番人驅倭出海因上言壕鏡在香山內地官軍環海而守彼日食所需咸仰於我一懷異志我卽制其死命若移之外洋貿易則巨海茫茫奸宄安詰制禦安施似不如申明約束無啓釁無弛防相安無患之爲愈也部議從之其時大西洋人來中國亦居此澳此前明番人來居澳門之大略也我朝德威遠播懷柔諸夷重譯梯航嚮風慕義今居澳者多西洋人日久亦甚馴順惟嘆咭喇貪頑而狡獪彼見西洋人安居澳門頗有歆羨妒忌之意包藏禍心殆不可測且則慎固海防嚴察奸宄有守

土之責者其可忽哉

聽松廬文鈔

標題

書飲

五古

西濠曲

七古

摘句

幹濟實資才糟粕直須棄乃知紙上談不

了天下事

所虧惟子職無計代親勞

得友行藏適逢晴肺腑開

煙橫一鳥平拖去於轉羣山逆走來

隔水雲如詩思懶過船風學酒人顛

如夢幻中忘去住最虛無處有神仙

野老賓明白真率舟人兒女最團圓

境因挫頓成孤往思入蒼茫悟正聲  
事到大難惟有達家能粗可不如耕

張騰蛟

字孟詞福建寧化人乾隆五十八年進士

孟詞少負異才家近蛟湖朱文正公嘗以老蛟精  
呼之文正詩云三千文士校雄雌第一應推張孟  
詞其愛重如此喜博覽嘗撰山海精良一書未就  
而卒師友咸痛惜之孟詞與伊墨卿交篤歿于京  
邸墨卿爲經紀其喪哭以詩有執手彌留際心宣  
更目成亮爲雛鳳計竟失老蛟精之句

聽松廬詩話

摘句 買春休惜金如斗竊藥難攀桂一枝

茅屋牽蘿人故在雲鬟倚幌淚孤垂

葉鈞

字貽孫號石亭廣東嘉應人乾隆五十九年鄉試

第一官祁州知州有石亭詩文集

石亭留心經學詩筆雅健其卒於官也長物蕭然

含殮之外僅餘著述數種

嶺南羣雅

標題 漢柏古七 讀吳梅村集古七

天津述事古七

摘句 寒日兼天瘦驚沙挾霰飛

周索斗邊標北戶秦城天際立東門

山海關

國朝詩人徵略卷五十一

國朝詩人徵略卷五十二

番禺張維屏子樹輯

鄭士超

字卓仁號貫亭廣東陽山人乾隆六十年進士官  
監察御史

士超少力學家貧攜書而牧誦弗輟不知牛之逸  
去也舉乾隆癸卯鄉試又十二年成進士授工部  
主事補都水司兩充嘉慶辛酉壬戌會試同考官  
歷營繕員外郎郎中浙江道監察御史轉廣西道  
又轉河南道見有屈膝迎謁上官者因劾稱



國家之制六部司官見堂官揖不屈膝典章不可不守廉隅不可不勵權勢不可不防得

旨可其言而責不指實且奏遲翼日具疏所以再上

上釋弗罪于是人服其誠時粵東盜賊未靖士超疏陳弭盜之本凡五款三千餘言條舉剴切

上嘉納之士超貌甚豐腴自居喪哀毀遂終身骨立好講

社倉法門下士官縣令者必以告後遂舉行於鄉

年五十有四卒

廣東通志

貫亭刻苦自勵同於雞廉居恆樸訥粥粥若無能者及其立朝則侃侃無所顧嘗條陳粵東吏治數

事於海防利弊尤詳且切

上多所採納焉工楷法書必端謹詩文彙藏於家茲所錄

乃傳鈔之本耳

嶺南羣雅

君條陳五款原疏甚長今節錄之其一曰粵東海

盜向來多在外洋近年沿海口岸及內河之盜較

外洋爲尤甚從前地方官規避處分遇有報劫重

案逼令事主改盜爲竊改多爲少改白晝爲黑夜

猶不過化大爲小今則諱有作無遇事主稟報輒

擲還原詞或向事主多方留難使被劫之家忍痛

不敢復言以是盜風愈熾既掠財物併劫人口因

而勒銀取贖甚至沿邊港口公然設立稅廠凡鹽船商船均須到彼處掛號始敢開船盜匪得銀給予口票中途遇盜船卽可驗票放行名曰納洋稅上年八月間有關書王洪奉差香山縣澳門口猝被盜船劫去勒索火藥鴉片及銀兩取贖報至省城地方官束手無策於九月初四日捐銀二千兩贖回通省傳爲異事又上年十一月二十八日有賊船十六七隻炮械旗鼓具備在離城之荔枝園獅子竇汎一帶沿河大劫礮傷客民兵丁又過思賢濬拆毀營汎鳴鑼揚帆而去掠腹心之地如入

無人之區堂堂省會尙然如此是現在情形治內  
河之盜較外洋尤難刻緩矣其二曰粵東奸徒結  
盟拜會所在而然多者數千人少亦數十人其語  
言舉動皆有暗號其尤悍者身帶雙刀名曰大貨  
手公行無忌恃強凌弱倚衆暴寡劫掠奸淫無所  
不至地方紳士保甲明知伊等踪跡不軌無如地  
方官專事諱飾卽欲指名拏究徒結讐怨奸鋒未  
挫反噬隨之因而公私容縱日益蔓延嘉慶十年  
三月內英德縣之蕉岡鄉闕姓二十餘家被土豪  
統帶會匪藉捕盜爲名搶劫一空至今案懸三載

并未拘到一人兇徒得計縱賊殃民莫此爲甚此等會匪較之洋匪尤爲可慮乃地方官明知故縱動以恐激變爲詞不思會匪雖衆必有一二爲首之人果能嚴密訪拏剪厥渠魁餘黨自當解散何得因循玩縱總不關心萬一勢成燎原噬臍何及其三曰粵東棍徒開設賭局名曰番灘館招集無賴日夕聚賭南海一屬有七八十處南海縣屬之佛山鎮亦有四五十處緣此項主持開局之人皆係衙門長隨吏役及巡查街道之兵役人等勾聯盤結莫敢誰何每局出花銀數十員或至數百員

送與衙門各色人等按股派分名曰納衙此項贓銀歲計數萬其四曰粵東鴉片烟皆由西洋夷人私帶入境向來喫此烟者多係各衙門長隨及遊手好閒之徒在私居暗室猶畏人知近卽省城內外公然開設烟館工賈士庶靡然成風宴會卽爲敬客嫁娶卽爲妝奩或至文武官員亦有私自瞞食且由閩粵延及各省流毒日深尤堪痛恨粵海關監督稽查洋稅貨物是其專責此項鴉片烟全由香山縣澳門口娘媽角用小船移載入境聞該處隘口書役人等遞年坐抽私稅盈千夥萬因而

擅放入關該監督豈從無覺察亦難保無私收陋規情弊從前私運入關者恐一時未能淨盡應請以一年爲限倘一年之外仍有私販私銷者必嚴究該關監督及書役等賄縱情由無貸其五曰粵東浮收錢糧積弊多端臣請以陽山一邑言之陽山每稅一畝無閏每年按徵銀一分六釐五毫舊規納銀二分有閏年額徵銀一分七釐舊規納銀二分二釐每稅一畝徵米四合八勺一撮舊規按觔數核算納赤色條米四兩零銀則自封投櫃庫房取割票銀一分米卽赴倉交納倉房亦收割票

銀一分惟零星小戶統計銀米及割票准銀匠包  
納收銀二分六釐自乾隆三十四年以後歷任遞  
有浮收至三分四分不等其徵收米石自乾隆四  
十八年改爲折色每米一石折銀一兩五錢現在  
折至五兩三錢其零星小戶准銀匠收二分六釐  
者現在收至一錢二錢不等錢糧總彙交官官旣  
收足浮收之數又復短價發給採買倉穀該匠勢  
難賠墊因而浮外加浮官則剝匠匠則剝民無力  
完納積欠愈多而地方官催欠一丁不納輒勒令  
同戶殷實之丁代爲完納名曰埽戶又復從中擇



噬給錢釋故不給錢者票拘公堂桎梏多係錢糧  
已完之人往往因一家欠糧數家蕩產其實欠糧  
之丁轉得脫身事外陽邑地處窮僻即云該縣養  
廉無幾不敷支持不得不稍有增加亦何得有加  
無已至數倍之多以上五款事關地方積弊伏乞  
皇上嚴飭該督撫悉心查辦併將如何實力整頓緣由先  
行分晰具奏庶封疆大吏認真一分則地方受一

分之益 松心日錄

君下第留京朱漳浦太史 絨 延課其子弟君日課  
徒夜則自課讀書恆至三鼓冬寒夜長預買硬麪

餽餽飢時食之歲所得脩必寄家其刻苦自勵如此君平居貌恂恂言訥訥不立崖岸及立

朝則侃侃而言無所顧忌不妄交游未第時嘗以文

就正魚山太史同官則與牟松厓侍御昌裕陳嵇

亭鶴方鐵船元鵬兩水部最稱莫逆屏與先生僅

數面辱引爲道義交戊辰屏下第出都先生方奉

命巡城晝詣粥廠夜過屏寓舍送行期勉諄切乃別未及

一載而先生歸道山矣詩云彼其之子邦之司直

直臣如先生而不克大展其抱負爲可惜也悲夫

聽松廬  
文鈔

貫亭侍御未第時深爲魚山先生器重旣通籍爲  
諫官正色立朝能不負先生知人之鑑後乞假還  
粵先生已捐館彌留猶呼侍御思一見侍御至羊  
城經紀其喪哭先生詩四首如難堪元伯彌留際  
猶自呻吟待巨卿又真性瀾漫忠與孝奇懷空濶

海兼天語皆切至

香石詩話

摘句 斯文天地間豈真判南北

服古精神通八荒在吾域

厲志敦古修懷忠慨時務

詩思今宵傾竹葉鄉心同日到梅花

黃丹書

字廷授號虛舟廣東順德人乾隆六十年舉人官  
教諭有鴻雪齋詩鈔文鈔

丹書天姿秀穎讀書過目不忘學使李調元見其  
詩嘆曰抗風軒之不墜其在丹書輩乎貢優行

廷試歸築聽雨樓隱居養親乾隆乙卯舉於鄉下第  
朝貴延致辭不就語人曰貧與富交則損名賤與  
貴交則損節大興朱珪撫粵尤加器重工書善畫

與其詩竝稱三絕

廣東通志

詩出入唐宋諸家於蘇尤近

嶺南四家詩鈔

虛舟題馮魚山比部畫蘭二首其次章云筆妙曾

窺瘞石翁畫書詩悟一源同與君相對忘言處綠

意滿庭生澹風香石詩話 凌譽劉嶺海詩鈔選 此詩歎為色香味俱絕

虛舟擬古詩有云兩地莫相疑兩心同不死此十

字中包多少義士情人聽松廬詩話

標題 光孝寺鐵塔歌古 堂前梨花古

摘句 馬鳴媚其曹鴈飛各求羣明星燦東方照

見勞勞人問君何所營愴焉難具陳

苦雨春無色禁寒酒有情

屐當幾繡阮遙集酒且一杯張季鷹

周有聲

字希甫號雲樵湖南長沙人乾隆六十年進士官  
大定府知府有東岡詩贖

公以貴州請棟發借挑知州赴黔借補清江通判  
黃平州吏聽訟失民心洵洵將亂上官檄公往攝  
命以兵從公曰吏民交惡當以理論不可以兵激  
之兼程至州置爲首者於法笞其附和者人情帖  
然思南俗往往以親屬病死移人戶外指爲謀斃  
得賂乃請和至有戕其子弟以爲利者公廉得其  
情置重枷於門有誣人者枷之朱書其誣狀驅赴

場肆貿易處以辱之且傲其餘半年後惡俗胥革  
後以失察小錢落職入後復官節相百公奏請奉  
旨發南河委用李家樓工竣歷署松江蘇州府事公勤力

敏事如在黔時甲戌總理下河工務以勞得疾卒

年六十有六子鳴鸞乙卯舉人鳴鸞副榜

靈芬館文集

余交楚南詩人曰周半帆孫石翁唐陶山而最久

者莫如周希甫希甫為人伉爽有智略累典大郡

能於其職

小岷文集

老子賢而隱於吏者也後人惑於神仙奉為道教  
之祖周希甫函谷關詩云老聃古隱君意不在著

書脫不遇尹喜應知一字無紫氣果何祥得無近

誕迂後來夢金人相率祖其誣咄哉關尹子實為

此禍樞此詩一掃荒誕之言可云卓識聽松廬詩話

標題 望華岳古五 題倪文貞公小像古七 固原

新樂府五章古七 函谷關古五

摘句 山川舊京兆風俗古幽詩長安懷古

持函不能啓憂喜定何如問得平安字方

披尺素書得家書

每從怵裏思閒日常對新知憶舊遊

逋臣遷客原同感野鵬江魚共此心屈賈



丹當滿處應能指花若飛來定解拈佛手

蟠桃易種偏難熟學得神仙又忍饑

### 陳 燮

字理堂江南泰州人嘉慶三年舉人官教諭

陳學博少負雋才綜覽典籍謝東墅少宰視學江

淮有郭景純木元虛之目以里選入都聲華藉甚

述菴笥河兩君尤為激賞然而一官奉檄十載櫻

憂仲宣登樓景行種韭繹其詩每悲其志吳會英才集

標題 悲歌九首七古

摘句 畢鸞舊善東方對鼯鼠新從爾雅聞

星芒四射河無影  
露脚斜飛月有煙  
選樹老鴉知地利  
上牆幽草得天憐

董 芸

字香草號書農山東平原人嘉慶三年舉人有半

隱園詩集

香草所著詩話可與漁洋後先相輝映

國朝山左詩續鈔

摘句 道德五千言其要在知足

凡物各有用所貴適其宜

家貧逢歲歉客久見人情

詞客今爲五湖長高人閒似六朝僧

少田身三二

國朝詩人徵略卷五十三

番禺張維屏子樹韓

喻文鏊

字治存號石農湖北黃梅人貢生有紅蕉山館詩

鈔

石農老年好學不倦著有考田詩話頗能自抒所

見聽松廬詩話

劉金門侍郎云前年在黑龍江邱芷房方伯見行

篋中所攜紅蕉山館詩調不釋手又為人講解

於是黑龍江無不知有紅蕉山館

集中明月一林霜西風薜荔牆  
滿玉筍流韻

滿銀牀一律頗為人傳誦其實空調耳余愛其登

太行山一律云太行天下春一髮走中原忽向遼

東折因為冀北藩岡巒互聯絡面背割寒暄下有

流如帶黃河萬里源五律如此可稱傑作上

石農詠坡公云青蓮久不見退之今則無兩作赤

壁賦三上神宗書較之飽喫惠州飯細和淵明詩

尤為警拔上

石農至荊州尋息壤瘞處詩云息壤傳自山海經

又復見之溟洪錄羅泌路史語具詳自岷至荆禹

功篤頗憂汎濫在萬世埋之洪荒鎮以屋倨劬剡  
上迫視難非金非石非土木後來發掘致雷雨謂  
此可已旱魃酷據詩言則息壤在荊州而余前年  
在楚北聞人言漢川修堤於漢水中見一物大如  
屋其質非金石亦非土木識者云是息壤然則息  
壤不止一處耶抑今漢川縣本古荊州地耶存此  
說以俟諸考古者

松心  
日錄

朱子無書不讀其解釋諸經於古說有所取有所  
棄雖所取所棄未必盡當乎人心要之後人所見  
之古書皆朱子所已見者也乃亦以家往往喜新

好奇得一古說如獲異寶遂據以改說朱子似朱

子未嘗見者不知皆朱子所已見而棄不取者也

喻石農詩云近來考掘家動與紫陽畔竟似所看

書紫陽未曾看此數語先得我心聽松廬詩話

標題 武昌行古 牧童詞古 復社姓名錄古

高忠憲寒篁冰檠圖古 答雲素問黃

安被賊狀古 張氏有母行長短 漢敦

煌太守裴岑破呼衍王碑古

摘句 鈞必用直鉤母乃太矯情事事要異人此

心先不平

所職活萬民不惟一己潔

苟有利物心不論官崇卑

高談遺世務必無經世功

阿翁真得婿愛女甚於男

送女示葉  
婿志說

屋角爨烟青兒童喧晚食

人身如月魄顯晦任其常

塢雲藏鳥語春色到田家

大江流霽月一雁點新霜

但期在官日不忘住家時

性癖稀留客年荒賤典衣



論古仍須識時務讀書原不為科名

潼雲曉挂蒼龍雨漢時秋明白帝霜

望華嶽

秀才天下為憂樂老子胸中有甲兵

范丈正祠

重臣外鎮熊羆壯丞相中朝水火爭

渝林懷古

秋士銷魂如落木楚人託興在幽蘭

流水亂鴉翻夕照淡烟疎柳是黃州

楚水未沉征士恨秋山還伴酒人行

泉當咽處墮殘雪山忽斷時沈碧鐘

一夜西風驚客夢滿林黃葉別詩人

客喜座來今舊雨詩如梅瘦雨三花

黃凱鈞

字南薰號退菴浙江嘉善人太學生有友漁齋詩  
集

君及冠而孤不能習帖括乃課治農晦以其閒讀  
書性伉爽喜論事人以難事相質必爲規畫處置  
其倍理不可行者亦必正告之以是人翕然稱爲  
長者其治家絲粟無妄耗而於大事特犖犖行意  
不作囁嚅顧瞻態甲子歲浙西州縣被水禾稼淹  
沒米騰貴上官檄邑平糶君爲衆倡率大暑烈日  
持蓋戶行按戶之上下罔有漏失鈎稽明劃無敢

侵欺蝨蝕者嘗以屋傍隙地假人後又不還笑置  
不問又買鄰人之屋而其屋先已賃人爲店慮其  
他徒失利垂立券而毀之讓其爲店者好行其德  
如此君有四丈夫子長子安濤以進士二甲第一  
入翰林里人以爲榮君處之恬然東阡西陌杖策  
往來野老故人雞黍談笑不異往日少好爲詩寢  
食于是以一以攄抒性情狀難顯之情故於宋人楊  
萬里陸務觀爲近嘗爲楊陸談詩圖以見意有友  
漁齋詩若干卷夙工於醫以濟物爲急合善藥以

施輯其所得爲醫話

靈芬山  
館文鈔

鐵塔

頭廣一尺或四齒或六齒發土之具也

鋪

即古之鍬也鋪地以起土也

翻車

其制如槽長可二丈槽中架厚木板一道隨槽潤狹以鶴膝木聯之循環不斷岸上橫設

大軸人憑架上軸轉動則水引而上矣

罽

用以罽泥編竹為箕兩箕對合用長竹竿作柄

附以細竹相為啓閉

犁

犁利也治金而為之者曰犁底

耙

柄長四尺首潤一尺五寸列鑿方竅以齒為節蓋犁以起土惟深為功耙以破塊惟細為度

蕩

用木板長二尺潤入寸以釘排列長竹為柄田方蒔秧尚未勻熟須用此器蕩之使水土相和

凹凸

臂籠

篾竹編之農夫耘苗穿臂於內以代衣袖

鎌

似刀而彎長尺許刈

禾麥斫柴篠農家便之

喬扞

挂禾具也

擔

負禾具也

稻牀

方約四尺

柳栗條十數莖橫其中持稻把攢其上穀粒漏於下

礮

礮穀器所以去穀皮也

杵

臼

春也古掘地為白我鄉白多置平地列牀其後人立踏之

農器詩十四首

見友漁齋詩續集中今錄其題并節其註不耕而

食者觀之可以知稼穡艱難農功辛苦焉

松軒  
隨筆

雲臺先生問近日魏唐詩人予以退庵父子對并

以其稿鈔呈先生深爲擊賞采入瀛舟筆談中目

爲嘉善三黃

靈芬館  
詩話

退庵老而好學出入石湖劔南之間霽青入翰林

萬人如海之中獨能稽經誦史從事著述子未主

家事酬應之暇不廢吟詠皆未知其所至也

同上

長君霽青太史成進士入詞垣先生紀事詩有云

幸叨先人貽見爾青紫拾此祇俗人羨原非志士

急性分有榮華蘿袞徒外襲先生胸有道味澹於

浮榮故其集中詩雖寫景言情時寓名理聽松廬詩話

標題 鷹窠頂觀日出歌古 元夕東莊看月古

上元後大雪登千佛閣古 頻伽靈芬

館圖古 老僕詩古 農器詩古

摘句 鄰家有二子大兒能守家貌朴心亦朴失

歡於阿爺小兒貌姣好言辭尙浮華慣行

小孝敬阿爺心暗誇親朋窺所向歎譽相

交加惡少伺其隙縱博游狹斜人情蔽所

近誠偽何紛挐父子尙若此何况堂廉賒

國朝詩人卷之三  
精思原在我妙處却由天

論詩

八口無饑真樂事一家少病卽神仙  
閒情每向忙中得樂事能於澹處尋  
花發先呼嬌女看詩成念與老妻聽  
故人詩好久能記自種花開倍可憐  
欲了事如急性子懶于謀似信天翁  
藥非自製終難信書却貪看奈健忘  
試看紅紙都成白安得烏鬚不變蒼  
老境漸來先齒髮此心自問尙兒童  
老漁深擁綠蓑臥穉子倒騎黃犢行

漆修綸

字漢青號雲窩江西南昌人諸生有雲窩贍橐

先生少時肄業豫章書院山長萬侍御

年茂

極稱

賞之爲文與朱漳浦太史

絳

齊名時號朱漆屢試

不售省親粵東遂僑寓羊城四十後無意仕進課

徒自給大庾戴文端公未達時嘗與往還談藝後

文端爲宰相聲望甚隆人謂先生盍往求書數函

必得館且豐先生笑曰吾生平最怕求人卒不往

終其身未嘗有所干請其高簡類如此晚年喪子

後納妾連舉數女竟無子病中夢人邀之偕行賦



詩云寄語山靈須少待卽拋書劍逐雲來未幾卒

年七十有一聽松廬文鈔

李介夫太史如筠漆雲窩先生表甥也先生授徒

潘氏南墅介夫遊粵時過從觴詠一日拈題得宦

海同賦七律介夫結句云長風萬里思宗慙寄語

書生莫膽寒先生結句云中流成敗知多少都在

漁翁冷眼看不數年介夫成進士入詞垣典試湖

南中歲卒而先生尙康彊無恙聽松廬詩話

雲翁有絕句云空拳赤手初生世富貴何人是帶

來既不帶來難帶去銅山鐵券總塵埃此詩可爲

世間沉迷貪戀者作醒夢鐘聲

同上

雲翁與屏爲忘年交翁素奉佛每日誦金剛經一日過談盛稱西方聖人屏曰中國聖人所言具在我輩不能奉行乃轉求之西方無乃惑與翁曰子關佛耶屏曰如昌黎乃能關佛我輩安能但不佞佛耳翁曰子之意將謂佛可廢耶屏曰不可廢也有佛家言於是文字中得一種超妙語熱鬧中得一種清涼語愁苦中得一種解脫語庸衆中得一種果報語果報尤有補於世蓋世間惡人惟佛法輪迴地獄冥報之說稍足以戢其肆行無懼之心

此佛所以不可廢也若夫搢紳先生誦聖人之言  
服儒者之服負人倫之望膺民物之寄而乃舍吾  
正學趨彼異端甚且奉緇流爲師資尊釋典如律  
令執慈悲之見則姑息適以養奸溺虛無之言則  
清靜必至廢事若此者不惟獲罪於聖人吾恐佛  
亦不樂其有是也翁喟然曰子言良是吾亦藉以  
遣憂耳今翁墓草宿矣感念疇昔知己縱談聊復

識之

松軒  
隨筆

摘句

波光浮日曉雁影度江秋

癯僧雙眼碧古佛一燈青

馮 燠

字穎中廣東南海人太學生有銳亭詩草

穎中爲羅章山人室弟子陳南賓註粵臺徵雅錄

多與商榷

嶺海詩鈔

君爲石門司馬第四子與哲兄竹洲孝廉及羣季  
一門友愛翰墨怡怡家於濠畔鐙船花榭命酒徵  
歌綺歲芳辰頗多豪興迨中年以後杜門息影書  
卷爲緣余妹婿子臬吉士君之從孫也君長余三  
十年每有晤言屢承下問憶甲子春偕呂丈石帆  
見訪並贈佳篇今循覽遺詩益深耆舊彫零之感

國朝詩人卷之三十三  
聽松廬  
文鈔

摘句 征鴻排夕照落葉舞秋聲

未老已添兒女債無成空負弟兄心

親亡窮達情俱淡食少寒暄病易侵

半生歷數三更後兩歲平分一醉中

除夕

世上已無同甲友夢中時作少年人

人間浪說團圓好那識圓時恨漸多

新月

陳禎芳

字若蘭號湘舟廣東南海人太學生

湘舟跌宕不羈黎二樵謂其腹稿萬首謝少白總

戎曾代其存稿名夜錦堂集今皆無存又聞其有

遊鬼詞數十章語多奇絕亦未見因思古今才人

心血化為灰燼者何限

聽松廬詩話

摘句 繞郭蘇青陌週園嫩綠塘華燈遲日落水

荇帶星光迤邐栽松徑嶙峋疊石岡樓臺

朝倒影亭館遠相望

顏氏園

顏園詩百韻茲節錄數句以存其概園以石勝故名磊園今在西關十八堡民居稠密非復從前郭外野景矣園屢易主仍以顏著從其舊也

### 潘 藝

字富宗號游亭廣東南海人有後樂堂稿

潘游亭有讀明史十首其警句云土木變來軍挫  
銳鐵碑移後寺專權台銓臺閣歸三黨礦稅山川  
瘁四民繼林尙議尊曹節鉤黨驚聞捕范滂國事  
已成牛角鼠臣心皆類虎皮羊吳穀人亦有讀明  
史十首其警句云立君幸賴飴孫議返國翻讐叔  
武迎忠臣肯死輕蛇膽方士難生諱馬肝史縱能  
言聲亦淚天何此醉問難知羊頭儘許侯封博蝸  
角猶難黨禍消可與潘作合觀之

聽松廬詩話

摘句 半閣綠煙鳩喚婦一簾紅雨燕窺人

一笛冷風殘夜月鐵橋流水立癯仙

梅花

田上珍

字嘉穗一字西疇廣東番禺人諸生有自鳴詩鈔  
西疇人品高雅長貧多病歿後遺稿流傳則其及  
門黃蒼厓之力也其詩瓣香白陸脫手如彈丸寓

懷雁字諸篇久已爲時傳誦

嶺南羣雅

先生生平抱負經濟通知時務竟以貧病賫志而

沒嘗作寓懷八首以寄慨

香石詩話

詩以物比興其情愈深田貢庭先生夏日曉起云  
忽觀新荷綠滿池却憐春去已多時杜鵑啼盡枝  
頭血燕宿雕梁總未知偶感云屏跡雲山戶懶開



匡廬詩言卷之三十一  
芒鞋久不踏蒼苔無端却被松間鶴引向塵寰半

日來皆寄託遙深

粵嶽草堂詩話

摘句 青燈慈母夢黃葉故人心

風警鴉移樹燈昏雁過樓

落日明殘水重烟失遠山

屋角綠飛鄰樹雨牆頭紅散落花風

如能聞道何妨老若果工詩敢怨窮

蓮花結子心偏苦燭淚成珠色尙紅

方天根

字應復廣東香山人諸生有風佩軒遺草

天根持躬狷介沉潛敏悟所爲詩古文詞繪事篆

刻皆卓然可傳年三十八卒

香山縣志

黎二樵哭天根詩云使我同斯世得君誠占人小

時聞孝友一往不淄磷可以想見其爲人

嶺南羣雅

子谷有白蓮花七律三十首又有南漢宮詞白雲

山探梅賦馬嶸山先生刻之

香山詩話

子谷漫賦一律云彭澤休官日平原乞米時蕭條

海外集慷慨劍南詩等是心如水都無境足羈數

公如可作斟酌欲從誰此詩與杜牧之九原可作

吾誰與師友琅琊邴曼容同一沈鬱

聽松廬詩話

摘句

秋意忽已動露華清滿天

陽崖陰嶺各奇絕東雨西雲相對飛

已証聰明成慧業可能身世便微塵

徐本義

字申之號薌圃浙江仁和人諸生有申椒詩草

君尊人游粵僑寓羊城生三子君其仲也兄本仁

弟本禮時有三徐之目本禮年十二爲文驚耆宿

未冠卒君哭之慟君事親孝痛弟早歿事兄益恭

三人皆補商籍弟子員本仁舉於鄉君薦弗售旣

聞督學使者爲平寬夫學士君曰故人爲學使而

吾尙逐考棚隊乎遂不起試  
齏商吳延君課子一日綵觴  
宴客君首坐會有達官至主人  
請讓坐君曰貴可加於師乎吾  
可避席師道不可貶也遂起  
辭去君素不治生家益貧戊午  
除夕前數日偕君之戚過君聞  
吟誦聲徹戶外入門老屋蕭然  
綠苔上砌几硯間梅花一瓶史  
記一卷君方讀伯夷傳其戚與  
其家人言乃知無以卒歲而君  
弗問也君古文學歐曾詩宗唐人  
晚年間學宋人書瘦硬得魯公  
爭坐帖意弟子從遊者多掇科第  
去君竟以諸生終年五十餘無子  
歿後詩文散佚胡蔚岩孝

廉曾手錄其詩胡卒所錄亦佚而陶綏之茂才近

復搜輯君遺詩百數十篇將授梓焉聽松廬文鈔

薊圃性狷介家故貧非其義一介不取遇富貴人

辭色益峭岸知交譚藝則又欣然忘倦也嶺南羣雅

薊圃以沈姓補廣州商籍諸生嶺海詩鈔

薊圃乞巧曲李雨村學使謂似元和中筆墨同上

金藝圃兵部性倔強少所許可惟服徐薊圃鄭貫

亭兩先生人間何以然藝圃曰此兩人胸中絕無

勢利之見者也松軒隨筆

薊圃先生見贈詩云我愛詩人南山子文章膠漆

一知己我詩因子忽吐出隱然方寸五嶽起時先  
生五十餘而屏甫弱冠辱引爲忘年交又嘗於廣  
座中指屏而朗誦老眼能知天下士之句嗟乎少  
壯可惜忽逾中年學業蹉跎仕途蹭蹬無可報良  
友于地下者因披遺稟慨想生平期逝絃摧能無

於邑

聽松廬  
文鈔

薊圃詩諸體皆工五言如秋思云洞庭葉初下江  
臯秋已涼美人隔湘浦離緒乘清商鶉鳩中夜鳴  
百草爲不芳遲暮一以屈感物情彌長七言如題  
沈石田飛泉圖云蛟龍倒挂一千尺浩然風雨來

堂前老松怒攫不相讓似與泉勢相盤旋吐屬俱  
非凡近又梅花云拗此清寒一义玉銅瓶汲水歸

柴門尤想見高人清趣

聽松廬詩話

少時見薊圃絕句愛之今錄之偶來獨坐無人伴

紗帽文茵白石邊閒向春山彈一曲桃花如雨點

琴絃

題畫

絳色中單冰玉胎紅塵香裏擘初開左

車一損堪愁絕猶自西川驛騎來

荔枝

我家西子

湖邊住無數花開玉井蓮鷗夢未醒涼月曉香風

吹到水門前

白蓮

葉葉相當映紫苔花花並倚暈

紅腮西風一夜牆陰雨愛忍秋寒獨自開

秋海棠

又有擬幽州馬客吟云驅車黯黃沙揮鞭淡白日

古戍何蒼蒼大半幽州客 朝行居庸關暮過盧

龍下枯桑挂吾鞭清泉飲吾馬 雕鞍盛年客身

騎五花驄腰間金僕姑手底綠沈弓 鳴鏑荒山

隅解鞍古城口槃泛紫駝羹栲酌紅梁酒 大醉

酒爐旁虬鬚猛如虎十三胡姬歌十五渾脫舞卽

此短章令人如見幽燕老將

同上

標題 秋思寄博齋先生

五古

上清謠

七古

乞巧

曲 瓶梅用東坡先生松風亭下梅花

七古

韻 題乘槎圖歌

七古

七古



摘句

楊柳洞房春攀條映玉人

阿兄如衛玠夫婿得王昌

鞞脫疑將起風生試一呼

畫鷹

天末斜陽微度鳥雲邊疎雨忽浮嵐

空聞上將戈船渡不見降王桂殿畱

杉皮矮屋多藏柳秧水平田巧畫棋

鯉魚風定晚潮落蘆荻雨來沙岸秋

解

刁斗一聲寒夜靜臙脂山下月如霜

塞下曲

顧張思

字懷祖江南太倉州人諸生有越游小草

顧行人陳埤博學能文懷祖纂成家業著有七經

訓詁異同土風錄識字略陳檢討四六補註

湖海詩傳

摘句 殘年如小劫小住卽深山

梁殿珍

字符章號璜溪廣東番禺人貢生有璜溪詩文集

璜溪性穎悟少時背誦文選如流水壯好談兵棘

闔屢薦不售五十後雄心消耗有類枯禪然才思

敏捷詩文仍下筆千言滔滔不竭康茂園方伯聞

其名聘主禺山書院講席甚賓禮之聽松廬文鈔

摘句 邇來說風雅強半填青紅競賞章臺柳莫

觀吳江楓

春風寬帶眼夜月靜琴心

百年身世遲龍戰終古關河有鴈飛

王世錦

字再陸江南吳縣人太學生官巡檢有藝芸館詩

先生為嘉峪關巡檢建義塾修節孝祠淵雅堂文集

再陸為文恪公八世族孫官甘肅十七年罷歸乃

卒蒲褐山房詩話謂其卒于任誤也松軒隨筆

再陸從事戎行詩有金戈鐵馬之聲

詩話

摘句 地經烽燹後夜盡馬蹄中

邊地未生青草候故園正好杏花天

雪聖峻嶺千年白天入窮邊五月寒

當思官作民之母莫信人誇吏是仙

囊剩一錢名是俸味忘三月不關韶

王宗烈

字承甫號竹埜廣東高要人貢生有寶唾山房稿

竹埜劬書嗜古著有紀齡彙典事物權輿叶音類

編述同述異儷言擇雅及文集詩話惜未見

松軒隨筆

摘句 林初散暑蟲鳴股池漸生寒鳥墮翎  
青山不管紅塵事也逐秋光上畫屏

沈大成

字瘦客浙江嘉善人諸生

魏塘自水村東齋而後風雅稍替二十年來瘦客

首先倡率退庵父子起而扶輪

靈芬館詩話

瘦客深於情一往三復詩如其人記其看燈詞云  
華燈萬戶影交枝月上黃昏也不知郎愛看燈儂  
愛月到無燈處立多時

同上

摘句 未見書當從客借無名花亦動人憐

一伎不工惟善病三生有福得長閒  
牆裏小桃花一樹只分一半與人看  
楊花莫便多于雪都恐鴛鴦易白頭  
妾家花與郎家柳不隔春風只隔城

黃沃楷

字式方號松谷廣東香山人諸生有松谷詩鈔

松谷余同年香石明經之兄以古學受知覃谿先生遊羅浮歸病卒年弱冠耳松谷選先輩七律如孫西菴朝雲集古梁陳懷古黎美周黃牡丹鄭湛若赤鸚鵡王蒲衣無題百首張河圖十二樓等作

名香草集余嘗欲彙集近代無題及香奩諸詩取

陸士衡語名緣情集亦香草之意

聽松廬詩話

摘句 遠映滄江外徐收古道中

夕陽

墟散村烟暝林深人影迷

望到遠時多憶友興逢佳處便留題

避地雁多鳴落月倚樓人正望歸帆

黃沃棠

字蔭方號蔭亭廣東香山人諸生有楚遊草

蔭亭胸中浩落以酒得天醅楊孺人如梅能詩工

奕幼時父以花陰堪避暑命對卽應聲曰繡閣不

知寒于歸後持家勤儉克盡婦道焉

聽松廬詩話

摘句 故鄉久別忘爲客遠地尋芳欲寄題

半生對影多慚忤垂暮依人負弟兄

### 黃愷鏞

字南英號楠蔭浙江嘉善人諸生有書耕堂集

先生弱冠補博士弟子員鄉闈九次薦卷者四於

書無所不窺晨暮兀坐朱墨並施委一僕司出入

乾沒錢米不問也家日落而嗜書不厭

慰託集

楠蔭先生退菴先生之兄霽青太守伯父也余旣

輯退菴先生詩霽青見示慰託集乃知先生嗜學



耽吟中年謝世因亟登之聽松廬詩話

摘句 濛濛夕照中人烟古原樹

人兼黃犢返帆翦滄波去

百年不可知須爲目前惜

莫待盛開時盛極衰之始牡丹

石佳持笏拜花好致書求

惟有詩人能弔古秋風下馬讀殘碑

大海之中漚一點執迷誤認世人癡自輓詩

李遐齡

字芳健號菊水廣東香山人貢生有勺園詩草

鐵城詩人前有松崖巖堂後有菊水竹孫香石諸

子菊水詩蒼健真樸深於樂府

嶺南羣雅

馮魚山稱其詩筆甚蒼譚康侯謂其上自騷選以

迄杜韓白蘇旁及諸家咸所取則

嶺海詩鈔

菊水答人問詩二律有云與會偶然到性情如此

深又云造境逾人境多師是汝師前二句以天分

言後二句以學力言二者不可偏廢若徒恃性靈

而不講學力未必能深造也

聽松廬詩話

標題 哀永新

詠劉淑英

雌游擊

詠沈雲英

刺醉羅

詠宮

人費氏

俱七古

安南使

七古

白雲山放歌

七古

摘句 月涼萬花醒天宇碧森森

訶子久無林林猶訶子稱可悟世法中萬

事浪得名

細路沿雲入閒門映竹斜

慧業文人會成佛血性男子須生天

朱元秀

字協萬號可石浙江嘉善人太學生

可石少業買持籌之暇伊唔自如郭頻伽贈以詩

云平生不識竹垞翁世間乃有周青士

慰託集

可石除夕詩云飲罷屠蘇帳不眠獨吟還傍小窻  
前不辭秉燭更深坐未聽雞聲尙舊年

靈芬館詩話

摘句 梅逕隨香曲春流抱屋深

家貧驚歲暮裘敝愛春來

書纔經眼過多忘詩到言情刪復留

交從極澹處相訂罇到無聊時一開

李鱗

字潛淵號秋浦廣東番禺人有倚嘯閣詩草

君少讀書屢試不售退隱小金山下自稱鬱洲老

漁好為山水遊嘗遊潯梧間都人士留而師事之

行年五十猶好學不倦

聽松廬文鈔

標題

示兒姪三詩

五古

崑崙關懷古

七古

摘句

東鄰紈袴子謂富可長據珠玉飾轡鞍綺

羅賜僕御鳴鞭入章臺千金買一顧烹庖

滿珍錯猶謂無下箸物力不愛惜天地亦

震怒一朝勢運衰親戚等行路見人自赧

顏乞食播間去當其祖父時辛苦厯霜露  
可憐陰雨夜啾啾哭墳墓

屠沽未盡非儒者未盡是揚雄作美新何  
貴文如綺

人非忠孝無文字天與艱難有性情讀正  
氣歌  
葦葉潮乾浮海月棟花風起上鱗魚

孫 姓

字西雍號白峰浙江嘉善人諸生有半山詩集

白峰先生教授鄉里不爲俗學所溺里中前輩如  
南陔柯徵君慈山曹居士嘗親炙有淵源焉慰託  
集

摘句

相如下廉頗國難扞十城太真媚錢鳳武  
昌摧逆旌生各矢忠孝用晦佐休明人世  
有網罟盛氣爲之櫻孰能褰裳去行權以  
濟經

藝蘭蓬蒿中三年望其盛蘭穗纔寸莖蓬  
蒿已滿徑揮鋤顧園丁區別爾爲政若云  
聽諸天百卉毋乃病

青山詩客影香霧美人舟

乍暖日如人薄醉新晴天似客初歸

蔡邦煊

字月樵江南合肥人太學生有聞喜堂詩集

月樵於書無所不覽家有園林吟詩作畫而外足

不出戶而視二三好友若性命

聞喜堂詩集序徐世鑿撰

月樵性好讀書手鈔錄者不下數千卷然不求聞

達嘗一試於有司輒弃去家有別墅傍曹公鬥鴨

池故名依綠園於其中構亭榭蒔花竹與二三莫

逆交日尋文酒之樂暇復潑墨隨興寫菊花蘭竹

一切戶外事悉屏置不關涉閒嘗一遊白下訂交

陳古漁先生而歸

聞喜堂詩集序朱備撰

月樵癖於詩其子陶門尤癖於詩余至吉安陶門



攜其詩并先人詩質於余月樵自得家園嘯歌之  
樂而陶門不免異鄉羈旅之悲然陶門窮老卒能  
以詩自怡且勤勤焉惟恐其父湮沒而不彰可謂  
孝子之用心也已余為之錄其詩存其人不惟慰

樵翁且以慰陶門也

聽松廬  
文鈔

歲荒散賑人眾擁擠有死者月樵詩云傾仆萬足

踐苟延乃速死十字驚心怵目

聽松廬  
詩話

摘句 晉人尚元虛唯公矢拳拳卷懷歸畎畝飲

酒全其天胷臆抱大志見之荆軻篇試問

添毫客此意誰能傳

題淵明  
畫像

故人生死別涼月古今圓

無才難涉世多病悔辭家

田園自給何嫌薄誦讀雖勤不爲名

一度滿時剛置閏八回圓夜未中秋

閏七月十

月五夜

一語囑君歸及早歲寒家有倚閭親

黃葉雨殘秋欲老白衣人去酒初寒

餞菊

医言(待田)卷三三

十四

022-818

國朝詩人徵略卷五十四

番禺張維屏子樹輯

宋 湘

字煥襄號芷灣廣東嘉應州人嘉慶四年進士官  
湖北糧道著有不易居齋集豐湖漫草燕臺滇蹄  
諸集

君九歲見諸伯父課文卽取片紙學爲文二十三  
歲入庠壬子鄉試第一己未成進士乙丑散館授  
編修丁卯典四川試戊辰典貴州試癸酉補雲南  
曲靖府知府所屬馬龍州地瘠民貧君捐俸設棉

花行教婦女紡績署廣南府城內地高飲水艱君  
度地開挖東西二塘護理迤西道所屬大飢君捐  
俸賑恤署永昌府團練除暴郡有書院已廢君度  
前鎮署舊基創建書樓講堂材擇良不以官市工  
酬值不以民役董事擇庠生不以胥役計捐廉一  
千七百餘兩灣甸者所屬土州也土知州某死未  
有嗣親支景祥護印有景在東者遠族也乘景祥  
懦奪印兇橫盤踞土境賊殺自恣不附己者死如  
是五六年當事怯不敢發賊謀襲土職復招長髮  
野匪數百人又脅從數百人號二千人謀攻保山

縣君慮其爲前明二莽續誓除之商之營不濟請  
諸帥又不濟賊以知益猖獗民夷皆赴愬君曰爾  
等能爲我殺賊乎衆曰能君曰果爾芻糧我任之  
患難我同之團爾丁練爾勇殺賊者重賞君慷慨  
激昂民夷亦踴躍以赴於是江有防隘有備又以  
計散其黨羽賊懼宵遁君懸重賞募敢死士大索  
山箐七日殲其渠計自捐軍需八千餘兩邊隅以  
靖士民以安郡人德之塑生像祠焉君宦滇十三  
年推陞湖北督糧道道光五年十一月抵任六年  
正月押運北上十月回任十一月二十五日卒於

官年七十有一

聽松廬  
文鈔

君性地高明氣概伉爽見人詩文佳者輒贊歎不置余里居識君僅兩面別二十餘年道光乙酉相見于武昌君一見卽曰吾甚恨足下余愕然旣而曰恨足下不入詞館耳於是索觀已刻詩明年重晤於漢陽舟次謂余曰足下十一卷詩俱讀過某篇吾所愛某篇可不存茶話良久忽掀髯笑曰一唱三歎入人心脾我不如子哀樂無端飛行絕迹子不如我是時坐有他客君亦不暇與談也其真率類如此

同上

芷灣襟抱豪邁故揮毫灑翰皆具個儻權奇之概  
詩磊磊落落從真性情空涌而出自成爲芷灣之

詩嶺南  
羣雅

覃谿先生寄題雲泉山館七古已勒石先生邀芷  
灣同作芷灣用律體寄余與南山云遠聞山館築  
雲泉此地會遊二十年北抱番禺大都會南來清  
淑越山川仙人只許飛前住名士猶能深處眠莫

笑出山泉已濁歸心長逐暮雲還

粵嶽草堂詩話

詩善用逆筆倍覺生動如芷灣白鶴峯謁東坡先  
生故居第三首云長江在北戶青山滿牆頭青山



自萬古長江亦千秋先生不到此荒荒空一邱當  
時事已過何必重怨尤請看題詩處江天如許悠

先生不到此一接筆力矯變

聽松廬詩話

芷灣七律以生動之筆寫沉鬱之氣如鸚鵡洲云  
兩日停橈鸚鵡洲接天波浪打江樓靈風尙帶三  
槳怒芳草難消一賦愁從古異才無達命惜君多  
難不低頭秋墳莫厭邨醪薄何處曹黃土一抔江  
夜聞楚歌云莫是宮中舊舞腰聲聲餘恨咽前朝  
英雄兒女虞兮曲落日哀猿下里謠詞客有魂留  
夜渚孤舟無伴讀離騷如何一副千秋淚不唱吾

家大小招大江云東諸侯長朝天子百谷王門走  
大江天起風雲扶氣力地開吳楚出旂幢無愁兒  
女沙淘盡有恨英雄浪打降誰奏銅絃鐵綽板萬  
山明月入船窗龍泉觀題壁四首之一云我豈無  
情入世來

君恩父德子孫材未能誓墓頭先白到得還山日亦頽可  
更磨牛同道路原知野馬一塵埃獨慚飽飲滇南  
水涓滴曾無補草萊同上

湖上感懷四首俱沉着錄其第三首云讀書堂角  
一梅花昨夜今朝也自斜無處寄人春點點何能

伴我路義父鄉愁歲暮真多感白骨黃塵況萬家  
誰信羅浮枝上月曾經連月照悲笳時惠州有陳  
爛屐之亂故詩云爾上同

芷灣有六妹詠虞姬一首尤警詩云奈何聲斷酒  
三巡夜半君前楚舞身事去難思范亞父功成不  
過戚夫人悲風江上無情水豔草山前有恨春百  
戰天七千古淚名騅愛妾本埃塵上同

李忠毅公

長庚

勦海賊蔡牽功垂成而歿於王事

芷灣太史賦李將軍詩寫忠肝毅魄颯爽如生其  
詩云入海斬蛟登山射虎壯士出門寸心報

主生也臣不敢知死也臣不敢辭臣知殺賊而已焉知生  
歸死歸汝賊蔡牽汝何么麼海水四晏無風鼓波  
汝賊蔡牽汝何多狗信信血人千里牙口汝賊蔡  
牽我來將軍將軍飛來汝聞不聞汝賊蔡牽汝何  
不柁上天入地將軍殺我汝賊蔡牽汝何不弓出  
日入月將軍如風汝賊蔡牽汝何不死罪大海小  
將軍守此迷迷離離將軍之旗歌歌舞舞將軍之  
鼓將軍曰刀蒼天書高將軍曰矢怒潮夜死吁嗟  
乎臣不滅賊臣甘死賊臣且滅賊臣竟死賊海水  
無情天風盡墨臣北面稽首謝

天子聖德

天子無悼臣臣死臣之職大海蕩蕩天所圍雲車風馬神  
靈來上帝許我梟厥魁明年蔡牽死戰士休徘徊

龍宮開靈風回

同上

謝文節橋亭卜卦硯名作如林七律一體余最愛  
芷灣作詩云摩挲贖墨玉庚庚想見夷齊萬古情  
國既無人焉問卜臣猶有母此埋名從容豈愧文  
丞相流落曾聞玉帶生同是山頭一方石人歌人  
哭至今并

同上

芷灣絕句有沈雄者有宕逸者隨意錄數首疊隘

重關古湖鳴長城一抹亂山青漢唐戰鬪今陳跡

立馬秋風看井陘過井手提殘蜀漢山川六出

祁山去不還猿鳥風雲俱慘澹至今人識定軍山

定軍山蕭同叔子事堪哀動地干戈為笑來寄語

美人歡喜口春秋戰國莫輕開書平原君傳後讀書萬

卷真須破念佛千聲好是空多少英雄應下淚一

生纏死筆頭中說詩東江水長西江落南堤北

堤有水關生小西湖撐艇子不愁風浪只愁閒湖

權歌浮沈宦海以官為家者得毋類是鏡裏嫦娥也自傷青天碧

海可憐涼神仙無限長生藥只少人間黑髮方月答

聽松廬  
詩話

標題

德有鄰堂硯歌古

阮芸臺師命題靈隱

書藏圖古

陳石士用王半山贈蔡天啓

詩韻見贈次韻和答古

十二月十九日

同陰青原張賢仲張南山陳仲卿至歸去

來堂拜東坡生日古

湖居後十首古

疫鬼哭古

四安得詩古

摘句

不如墳頭草猶得與親依

人情附所歡物理趨所見

陰陽與剛柔偏勝俱爲患

老子五千言守雌而已矣

昏之以世情失我獨也正一日積一塵一塵生一病

我詩我自作自讀還賞之賞其寫我心非我毛與皮

漁翁汝何來何來復何去一網出白魚歌聲入紅樹樵父汝何去何去復何來擔頭有白雲草香花尚開而我同住湖慙愧呼曰儒斷斷幾箇字以白白其鬚公等我不如請就盡一壺



苟無古性情安得真風雅

種樹五千本讀書花鳥間

貌同民共瘦心與月齊孤

四面青山三面水兩湖明月一湖秋

舊歲梅花新歲看今時明月古時憐

世上葛藤須快劍心中風雨有深卮

俗士畫皮兼畫肉神雕行氣直行空

論文

岳陽城郭中流見黃帝笙鐘上界聞

君山

祝融以德火其木雷電成章天始春

木棉

笑口人情花剪響酒杯天氣雁聲涼

買菊

吳 稟

字山尊號抑菴江南全椒人嘉慶四年進士官翰  
林院侍講學士有夕葵書屋詩

山尊胸藏二酉力富五丁所作駢體沉博絕麗少  
爲石君司農激賞詩以韓孟皮陸爲宗門險盤空  
句奇語重五言長古尤足以推倒一世

湖海詩傳

山尊太史慷慨任氣磊落使才詩文敏捷思若湧  
泉朱文正公愛其文謂合任昉邱遲爲一手公奏  
御文字嘗命其屬稿故才名達於

九重晚以母老告歸屢主揚州書院講席酣嬉文酒跌宕

林泉歿後全集未見僅於選本中得其一鱗片爪

耳

聽松廬  
文鈔

嘉慶己卯先生入都祝

嘏將出都偶於友人處見屏代閣部師撰

萬壽頌百章謂友人曰此手筆大近孟堅典引中郎釋誨

既而知爲屏作因訪屏于米市衢衙廟中適見案

頭近作一卷卽攜去越日余往報謁先生未暇他

語卽朗吟南海月華今夜白西山雲氣古時青一

生不幸稱詞客萬古能豪是酒人之句遂同過雲

谷農部寓齋劇譚豪飲夜分乃別

松軒  
隨筆

余贈先生二律次首云花鳥湖山互主賓風懷如  
故鬢霜新禁中久識凌雲客江左今多立雪人軼  
事徵來聞見博古歡結處性情真高軒累日尋蕭  
寺香火前生或夙因先生次韻見答云弱冠曾充  
上國賓文章未老鬢毛新千秋自我無窮事四海  
如君有數人古義濯磨如矢直歧塗面目與山眞  
嶺南諸老何曾死高下川陵大可因詩中獎藉弗  
克當末二句以吾鄉前哲相期意尤可感聽松廬  
詩話

標題

東坡生日禮像賦詩

古五

題桓伊吹笛圖

古七

摘句 君子處富貴炙手中不熟堅白惟自完百

試不磨涅木灰

入手七星寒剖心一寸赤趙忠毅公  
鐵如意

俯視楊契丹尚友陶貞白題畫

解籜迎夏長落花感春晚

竹陰先客到山色與詩來

雪天寒色畱羈鳥海國晴波起伏鯨

去鴈遠從潮際定歸鴉爭向雪前喧

鮑桂星

字覺生江南歙縣人嘉慶四年進士官工部侍郎  
有覺生初稿

覺生先生天分過人爲詩文不拘一格不專一家  
隨意所之學之輒肖余嘗於友人齋中見其零篇  
碎句陳伯芝庶常云先生奉

旨閉門思過之日曾自訂其生平所爲詩付之剞劂余尙  
未見故所錄止此

聽松廬詩話

標題 吳門訪黃雪香得見林子遠峯因畱度歲

長歌贈之

七古

摘句

江湖淚滿窮途後  
雨雪魂銷欲別時

梧桐南內唐天寶  
枯樹西風庾子山

落葉

千點月涵汾水白  
一行天斷楚峯青

秋雁

國朝詩人徵略卷五十五

番禺張維屏子樹輯

張惠言

字皋文江南武進人嘉慶四年進士官翰林院編修有茗柯文編

張皋文編修以經術為古文於是求天地陰陽消息于易虞氏求古先聖王禮樂制度於禮鄭氏

室文集

編修所著書元為刊其周易虞氏義虞氏消息儀禮圖其友李生甫張雲藻又為刊其文集而屬序



於元因闡編修素所持論俾後之學爲文者決擇焉若其文之不遁於虛無不溺於華藻不傷於支離則又知言者所共喻也

同上

皋文前後七試禮部而後遇散館奉

旨以部屬用朱文正公珪特奏改授翰林院編修文正屢進達之而皋文斷斷以善相諍文正言

天子當以寬大得民皋文言

國家承平百餘年至仁涵育遠出漢唐宋之上吏民習于寬大故奸孽萌芽其間宐大伸罰以肅內外之政文正言

天子當優有過大臣皋文言庸猥之輩倖致通顯復壞

朝廷法度惜全之何用文正喜進淹雅之士皋文言

當進內治官府外治疆場者皋文少爲辭賦嘗擬

司馬相如揚雄之言及壯爲古文效韓氏愈歐陽

氏修言易主虞氏翻言禮主鄭氏元嘗曰文章末

也爲人非表裏純白豈足爲第一流哉

大雲山房文稿

皋文先生自言居京師盡棄置曩時所習詩賦不

爲而爲古文三年乃稍稍得之今觀茗柯遺文雖

不多而言皆有物且氣骨極似昌黎惜乎其年不

永其志未竟耳

聽松廬文鈔

茗柯論文云法有盡而意無窮此語足為執死法

以言文者進一解同上

摘句 馬馳千里足人看一城花

許宗彥

字積卿號周生浙江德清人嘉慶四年進士官兵

部主事有鑑止水齋集

周生穎悟非常讀書目數行下稍長博通墳典自

經史詩詞而外如小學算術醫方梵筴靡不涉獵

尤深於古文本於宋之南豐明之遵巖理實而氣

空學充而辭達嘗從其尊人方伯君徧歷滇黔東

粵山水之勝故瀏覽之作亦多超越

湖海詩傳

宗彥以爲經義之大者十數事前人聚訟數千年未了今日豈復能了之就令自謂能了亦萬不能

見信當時取必後世

鑑止水齋文集

西士彌納和爲余言近三十年測得五星外尙有一星形小而行遲在赤道規上約八十餘年可一

周天若能測定此星可因以紀赤道攷歲差然此非一人一世所能候故自來星官家皆未言及卽西人亦今始知之余偶讀大集經云大星宿其數有八所謂歲星熒惑星鎮星太白星辰星日星月

星荷邏侯星則西士所測其荷邏侯星與上

兩漢功曹掾史皆擇邑之高望者補之六朝時令  
史猶重至明而吏始與士分途天下有以操守稱  
官者矣未聞以操守稱吏也無高名之可慕無厚  
祿之可望則彼所夙夜用心以治事者安得不唯  
利是圖乎官或朝暮更易而吏累世相傳官深居  
于府寺吏散處于民間其可以欺詐之勢十倍于  
官官之強幹者百事或察其二三昏庸之徒乃如  
木偶寄坐而欲治之善不亦難乎今欲吏不爲奸  
則莫若高其品使士人爲之士人爲吏習知政務

無迂懦不曉事之患其于治道必有裨益上同

周生駕部題船山詩草有云一代詩才指可屈黎

黃孫洪皆傑出筆底尋常迴萬牛眼中往往無前

哲如君真足與之敵尊黎於黃孫洪之前其傾倒

於二樵可謂至矣而周生又云二樵論詩最膺服

錢少宗伯蘅石先生聽松廬詩話

周生送女于歸陳氏有句云便同遠別悲歡有如

此新人德貌兼譚康侯曰此可謂有譽女癖同

標題 題五代史吳越世家後古五 贈別平叔古五

題黎二樵五百四峯草堂詩古七

摘句

道古苟無識多識亦奚爲頗怪博雅士攬  
撫期無遺成書每充棟母乃鈔胥疑何爲  
任耳目轉欲廢心思

有懷誰能已發言乃爲詩聲音本自然悟  
者自得之

人間春短花偏怨心上秋多月亦憐  
風擁亂雲歸遠嶂虹收斷雨放斜陽  
天上人間大歡喜兩心如一定情時  
水流花謝歸何有愛海空添一滴波  
人間名滿不稱意得失晚年心自知

姚文田

字秋農浙江歸安人嘉慶四年

賜進士第一人官禮部尙書諡文僖有邃雅堂集

公年十八入湖州府學乾隆五十四年己酉鄉試  
中式舉人五十九年淀津獻賦

召試一等一名授內閣中書嘉慶四年己未入軍機處行  
走是科成進士

殿試一甲一名及第五年充廣東鄉試正考官六年  
充福建鄉試正考官提督廣東學政十二年充山  
東鄉試正考官十五年提督河南學政十八年奉



命入直

南書房二十二年充丁丑科會試副總裁二十四年  
提督江蘇學政道光五年充乙酉科順天鄉試副  
考官七年七月補授禮部尚書十月以疾卒年七  
十公屢司文柄洵陟崇班生平持己端方居官清  
慎百數十年來學人盛談攷據多尊漢儒詆宋儒  
公獨持議謂三代以上其道皆本堯舜得孔孟氏  
而明三代以下其道皆本孔孟得宋諸儒而傳五  
代以後人道不至陵夷者宋諸儒之力至其著述  
之書豈得遂無一誤然文字小差漢唐先儒亦多

有之未足以爲詬病

詳見集中宋諸儒論

公宗法宋儒然於

漢學亦未嘗不究心也公所著有易原春秋月日

表說文聲系說文考異諸書公夙留意天文占驗

之學嘉慶十八年林清事未起萼橫入紫微垣近

歲萼見南斗下主外夷兵事公皆先言之

聽松廬文鈔

姚文僖公奏議有極剴切者節錄之其言曰督撫

藩臬迎新送舊如衙署之整理館舍之儲待無論

其本管上司卽例以賓主情誼亦不能盡廢既履

任後通省官員紛紛晉謁事又必不可已在大吏

自以爲秋毫不擾而不知耗費已多矣且大吏抵

任之初諸務尙未周知迨莅事稍久然後人才之賢否以明風俗之澆淳以辨方將稍有設施而瓜代者已至亦有更事未深之人纔一莅事動議更張以此博振作之名不知地方情形均未諳悉見爲極利而他弊已隨其後故不如久於其任次第圖之之爲得也又曰自古圖治之要惟以任人爲本近日科條過於煩密如某縣得一循吏忽有四叅被議之案不能不罷斥又如地稱難理非得人不能勝任然才優者或有處分合例者人僅中下亦不能不俾之受事是爲例議所格而吏治皆不

得人似亦空稍爲變計者也。又曰：自數年來開上控之端，於是刁民得逞其奸，彼見獄詞可以聳聽，則多牽引其所不快者以陷害之；胥吏惟利是圖，則又多方株連以困抗之。衣食粗足之家，一經官訟連染，雖立見昭雪，而資產已蕩然矣。彼所訐控，不過一人而牽涉常至十數，受吏胥之折辱，甚至瘐死而道斃。後雖處原告之人以極刑於被誣者，何補推。

國家慎刑之意，亦曰恐有冤抑耳。然一案未結而事外之被累者相繼，是一冤未雪而含冤者且數十。

人也又奏漕務情形曰乾隆三十年以前無所謂浮收之事是時無物不賤官民皆裕其後生齒愈繁用度日絀於是諸弊漸生然在州縣亦有不能不如此者所得廉俸公項斷不敷用自開倉至兌運其修整倉廩蘆席板片及幕友家人書役修飯工食費已不貲加以運丁需索津貼日甚一日至其署中大小公事一到卽須出錢料理又如辦一徒罪之犯自初詳至結案約須費至百數十金案愈大則費愈多復有遞解人犯運送餉鞘事事皆須費用伊等熟思他弊一破勢必獲咎愈重不如

浮收尚爲上下皆知其藉此以肥身家者不能謂  
其必無要之不得已而爲此蓋亦不少臣見近日  
言事者動稱不肖州縣竊思州縣亦人耳何至一  
行作吏便至行同苟賤此又州縣不能上達之實

情也

松心  
日錄

標題

歸度庾嶺在梅花中行竟日

古七

摘句

舊時燕子誰家屋前度桃花載酒人

簾淨小童晨薙草枕香侍女夜藏花

金菁蘭

字春汀廣東番禺人嘉慶五年舉人官知縣

君身長目秀微髭性伉爽有膽略其戚倪行鹽廣  
西之富川延君理埠務富川僻處山中多深林荒  
菁君暇好出遊一夕被酒踏月行數里同行者欲  
返君興未已復行隔林遙見一巨人霧中面目不  
甚可辨下體毛鬚鬚然同行者大驚反走君屹立  
不動大呼曰有山魃木客能來與金春汀一談乎  
君發聲洪亮山響相答怪條不見大笑而返又嘗  
行荒徑見蝦蟆與蜈蚣鬪蝦蟆大如盤蜈蚣長及  
尺兩物昂首若吐氣相角者久之蝦蟆跳而去視  
蜈蚣則已斃矣君謂蜈蚣蓋氣盡而斃也君解鹽

餉返羊城時三水縣界有盜藪客船不敢獨行君  
語舟人但風順卽揚帆賊來吾以鳥鎗擊之於是  
君立船頭單舸竟過嘉慶庚申舉於鄉戊辰大挑  
一等分發直隸是秋于役山海關值中秋君登樓  
舒眺飲酒賦詩自言平生勝遊以此爲最署廬龍  
縣事以道遠不能迎養遂乞假歸數年病卒年  
三十有八論者咸謂君以有用之才不幸短折爲  
可惜也

聽松廬  
文鈔

君之先浙人尊甫奉直公商籍諸生以食指繁業  
鹽筴每歲延師課子必致敬盡禮君兄弟以文字



相切劘以故秋榜春官聯翩輝映君之兄茂園明

經菁藜藝圃兵部菁莪從兄鍾山茂才菁英樸齋

明經菁華弟醴香中翰菁茅裳繡司馬菁藻一門

之內友愛怡怡二十年來君及諸昆先後下世今

存者醴香裳繡兩君年華方盛堂構克承教子姪

以讀書為先務謝樹阮林方興未艾人謂奉直公

積善尊師之報云余既為君作傳復詳綴君昆季

以見天倫之樂如君者蓋亦未易多觀焉同上

摘句 山海關前月盧龍寨上人

白鷺新秧裏烏犍淺水中

樂鈞

字元淑號蓮裳江西臨川人嘉慶五年舉人有

集

余有病起懷人詩琴鳴太史爲補圖樂元淑題絕

句云離羣病鶴強昂頭半憶鵝鸞半鷺鷥報逍沈

郎腰帶緩藥烟千縷是新愁

靈芬館詩話

蓮裳初名宮譜少日喜爲奇麗之文曾撰耳食錄

一書壯歲韻語益工兼工駢體既登賢書屢試不

第憶辛未春闈後訪余于萬明寺既而彼此報罷

出都遂不復相見聞其橐筆江湖爲諸侯客鬱鬱

不得志竟佗僚以終才士偃蹇自古歎之然其詩  
文足以傳世珠光劍氣詎受塵埋以之位置於蓉

裳芙初之間允堪伯仲

聽松廬  
文鈔

余過南昌冒雨登岸購蓮裳詩文集弗得

松軒  
隨筆

標題 謁潮州韓文公祠

古

摘句 任筆兼沈詩在古常寥寥

守關用一夫萬騎空偃蹇時平虛地利斥

堠上苔蘚

羊蹊  
嶺

劉彬華

字藻林號樸石廣東番禺人嘉慶六年進士官翰  
林院編修有玉壺山房詩文集

君幼穎悟好學乾隆丙午補博士弟子員是科舉  
于鄉同榜謝君啓祚年九十四君年十六一老一  
少時人以爲美談嘉慶辛酉成進士改庶吉士散  
館授編修請假歸省以贈公不及見爲恨時母太  
孀人多病以故二十餘年未嘗再入都先後主端  
溪越華講席越華向設生童正外課五十餘名君  
請於大吏增額至一百五十餘名書院掌教六年

有成效者例得奏請議敘諸生欲聯呈以請君亟止之曰授徒儒者分內事得免素餐幸矣何議敘爲平居樂行善事如通六脈渠倡卹嫠會修通志修貢院大吏皆商於君君皆贊成之任事不辭勞亦不與人爭交久能敬雖橫逆之來不校也君事親能養志友愛兩弟弟歿撫從子如所生而君晚年乃連喪三子悲傷抑鬱未幾遂卒年五十有九遺囑不鼓樂不買水不作佛事家祭母殺生出殯人夫母得過百人母刻行狀母撰墓誌母刻詩文集卒之日知交無不歎惜之詩曰言念君子溫其

如玉斷章贈君君無愧焉

聽松廬  
文鈔

樸石所選嶺南羣雅幾於家有其書

嶺海  
詩鈔

標題

過飛來峽

七古

題李氏三忠傳後

五古

初

春集翠園

七古

廬陵王氏兩世孝子歌

七古

摘句

書聲符讀夜詩意鼎來時

架滿詩書畫客兼儒佛仙

潮聲朝暮雨帆影去來雲

一代奇謀山聚米千秋遺烈柱標銅

馬伏  
波廟

吏部文潮先徒鱷右軍筆陣偶籠鷺

絕域先零原屬國將軍大樹是征西

西藏  
平

苦吟人似寒山瘦久客裝如落葉輕

待完婚嫁應垂老猶賸詩書未赤貧

海天高唱赤城曉風月獨韻松廬秋

贈張南山

### 方元鵬

字海槎號鐵船浙江金華人嘉慶六年進士官戶

部主事有鐵船詩鈔

方子爲諸生數十年及成進士官工部鬚髮蒼然

偃仰一室悲憂愉樂之境一寓之於詩

稽亭文鈔

嘉慶丁卯余寓都門因鄭貫亭侍御識鐵船其貌

冷其心冷其室冷其官非冷而自冷以其冷眼觀

書每能抉剔古義以其冷眼觀世復善宣達今情

戊辰余出都後聞其告歸不復出

聽松廬  
文鈔

方海楂有燕臺雜詠仿樂府體平津鄉一首真得

我所欲言者平津鄉六百戶相宏之封已裂土飾

經術希主知相宏之學專阿時開東閣仰餘祿親

御布被甘脫粟吁哉相宏心寘腹主父偃江都生

睚眦之隙乃力傾吁哉相宏心有兵

靈芬館  
詩話

標題 錢王祠表忠觀碑古七 和靖先生墓古七

雜言古五 鐵船道人歌古七 閱通鑑綱目

古五 韜光庵古五 崇效寺看花古七 論詩



放歌

五古

白鳴鐘歌

七古

摘句

十步勢一折綠盡始見屋

白水包區夏青山剩富春

睡與吟相適談雖病不妨

飯香遲食覺睡味早行知

談鋒因懶退禮節為貧疎

草風低蝶影槐日閃蟲絲

艱難立業差能久憂患為文始覺深

不希榮遇原無辱少與歡緣亦省悲

是福何妨常失馬無災且莫更求魚

蘭能伍草方生谷龍不殊魚始在淵  
但得天真常爛漫何妨小事略糊塗  
紛紛市僧談新法往往庸醫執古方  
未必考終非短折由來世議卽三刑  
科名尙賤文誰買仕宦猶貧隱更難  
吏抱牘來教押尾官同案坐怕橫肱  
詩無真意羞存藁友不交深懶致書  
句爲偶拈無次第夢常半記不分明  
君看興亡十七史只因氣數自乘除

六經磨得英雄老錯計焚書是祖龍

讀史絕句

還鄉天子仍遊子建業關中戀沛中沛中

雄風誇大諛驕主夢雨荒唐託婦人楚中

英雄不及癡兒福安坐成都四十年蜀中

誰將玉斧分河界坐使金甌限瓦橋

死欲傳詩生足穀難兼從古說熊魚書懷

### 倪世華

初名孟華字素之廣東番禺人嘉慶六年進士官

刑部員外郎

君先世上虞人遷粵東君早失怙兩叔皆業鹽筴

家素封君補博士弟子員方少壯銳志科名叔父

勸之襄理齟務意不屑也旣而屢試不售遂赴北  
闈復屢試不售叔遺書勸之歸歸則衣食居處皆  
惟意所適而君意必得科名乃歸叔屢寄以金君  
見人有急輒助之久之資斧匱乏君性倔彊恥干  
謁落落寡合初猶授徒繼則寄食僧舍僧見其孤  
窮語侵之不得已遷破廟中戊午以薦卷得謄錄  
庚申中式舉人辛酉成進士授內閣中書以謄錄  
議敘補刑部主事十餘年以資陞員外郎君官部  
曹落落如故旣而丁內艱歸服闋再入都將補御  
史未幾卒年八十有三君性剛嫉惡不畏彊禦其

率也知君者咸惜君不為言官云

聽松廬  
文鈔

摘句 冷眼看熱場大半皆巧宦

新秋昨夜瓜棚月舊友今朝葵扇風

張炳文

同邑林伯桐填諱

字虎臣號繡山廣東番禺人嘉慶六年舉人官四會縣訓導有玉燕堂詩鈔

君生十日而孤母黃太孺人苦節得

旌陽湖惲敬表其墓君頎皙有儀音響清越初補商籍弟子員改歸番禺學嘉慶辛酉舉于鄉愛日心殷未赴禮部試太孺人歿君哀毀葬事畢丁丑會試大挑二等補四會訓導君教家有法度子維屏登第爲令湖北君作書累數千言勗之維屏楚蘭分校得士稱盛黃梅賑災全活尤多君聞之色喜

然未嘗就養曰吾欲近守墳墓也與人交不設町畦待親舊有恩五旬後弟子多以甲乙科顯仕維屏以文學重於四方而君抑然屏世俗之嗜戀庭闈之歡終身如一日君生於乾隆十八年十一月十三日終於道光六年十月十六日壽七十有四

配耿宜人能佐君承歡教家先君卒

脩本堂  
文稿

君八歲時孤苦無依母黃太孺人攜之歸外家仰女紅以資衣食君生而端慤性至孝髫齡卽劬學勵志如成人太孺人年七十餘病篤君禱於神辭旨痛惻已而母疾頓瘳壽至八十五人咸謂孝感

所致

息耕草  
堂文集

先生事節母以孝領鄉薦十餘年不上公車以母在不遠遊也喜吟咏其詩抒寫性情不事雕琢而

和平可味

嶺南  
羣雅

廳宜話雨添疎竹屋為看雲築短牆繡山先生句

也先生純孝宿學吟詠其餘事

粵嶽草  
堂詩話

鄴侯護天家骨月視畱侯殆將過之嵩華衡山即

圮上穀城意耳繡山孝廉讀李鄴侯傳詩云生平

黃老言意或有所寓足窺見長源之心

嶺海  
詩鈔

繡山丈生平出處大節已為表諸墓矣餘事作詩



人真性逸情亦復隨時流露七律如十載青衫承  
母訓一孫黃口拜兒邊終身之慕讀之愾然七古  
如客行每厭水程遲山好轉嫌風力順江行常值  
之境胸中所欲言却未易道着也

詩娛室  
詩話

標題

讀李鄴侯傳

古五

菩提樹歌

古七

藥洲懷

古七

羊跳峽

古七

北山寺

古五

摘句

放生但隨緣雞豚戒特殺

退步便為進步法濃時須作淡時思

短夢有時逢舊侶衰年無伴向誰談

五夜梨雲招有蝶一簾梅雨喚無人

睡燕

從來離別事多在夕陽天

月光分曙色人語雜潮聲

村深連樹暗帆濕過江遲

窗破雲爲補牀空月自填

十載青衿承母訓一孫黃口拜兒邊

家祭

柏子香濃煙結篆梅花影瘦月尋詩

冬夜

楚岫雲低三峽雨瑤臺月冷一池星

落花

波浪不驚鷗夢熟琴書無礙燕泥香

素舫齋

千里雲山環獨客九秋風雨逼重陽

連州九日

燕喜堂前看插柳始知明日是清明

偶於三弟書篋中檢得先君手書詩稿數紙字  
多塗改蓋自書舊句而自改訂之時方官四會學  
官三弟隨侍在署故得而藏之也先君生平以  
孝著不以詩名而維屏所輯詩人徵略一書於紀  
事之後必繫以詩必摘句錄之伏思沈歸愚宗伯

纂

國朝詩別裁曾賓谷中丞輯江西詩徵皆錄其先人  
之作今幸獲觀先君手自改定之句因敬錄之  
補入詩人徵略中蓋書之體例如是非敢云選詩  
也道光辛卯臘月維屏謹識

金菁莪

字藝圃號蘿香廣東番禺人嘉慶七年進士官兵部主事有軒于詩鈔文鈔

君幼穎悟年十七補諸生乾隆乙卯舉于鄉嘉慶壬戌成進士以知縣卽用尊甫奉直公以縣令不易爲因爲援例捐主事籤掣兵部旋丁外艱歸服闋入都不數年復丁生母憂歸服闋再入都乙亥以疾卒于京師年四十有四君嗜學不倦自爲諸生至爲部曹蓋無一日不觀書有疑義必思索常夜分乃寢爲文喜獨造羞雷同君家雖業鹽筴然

食指數百不足於用君素儉冬衣敝裘車帷敝卽  
以布易之嘗言惟儉乃可養廉今人飲食居處服  
御玩好事事求豐美不量入爲出如是而致困乏  
是自貽伊戚也君嗜酒惟酒不儉飲必佳醞酒後  
頗有灌嬰罵坐之風於世少所許可嘗言學問吾  
服吾師曉嵐先生人品吾服徐薌圃先生次則鄭  
貫亭耳然君性實坦率見人有善樂稱道之見人  
有過能面折之論者謂君爲言官必能有所建白  
惜乎不永年耳君五女一子長女適固始吳紅生

葆晉

紅生兄嵩少

俊民

君皆與爲莫逆交每把酒

論文相得甚歡後嵩少舉京兆試紅生成進士而君歿已十餘年矣余每人都過綠雲館三人剪燈

話舊輒相與悵望停雲愴懷落日也

聽松廬文鈔

君以文就正於紀文達公公稱其文筆健舉

嶺南文鈔

嘉慶丁巳戊午讀書潘氏南墅一橋見山萬綠飲

水時與金七

菁莪

潘大

正亨

襄羊其間讀畫絃詩

吞花臥酒紅日暫別呼白月而卽來朱夏旣迎雷

青春而不去尤可娛者四序惟秋最清百花惟菊

最壽五柳不作一籬可東依花傳觴選石安硯金

七賦秋菊篇篇中菊花之名凡四十有六

聽松廬文鈔

藝圃樓霞嶺謁岳鄂王墓敬步于忠肅公原韻詩  
云天使將軍竟渡河黃龍痛飲勢嗟峨兩宮不日  
都迎復一檣何人敢議和凱入朱仙臣事盡生封  
鄂國主恩多無端十二金牌下遺恨南枝空浩歌  
天使二字直貫六句故爲快語以快人心第七句

無端一轉遺恨作收章法旣奇筆力亦健

聽松廬詩話

旅人雖或不安寄家書必寫平安兩字以慰家人  
藝圃有離亭燕一闋云天際片帆搖曳客裏風光  
須記過幾處水村山郭又指酒帘歌肆春色到揚  
州人在紅橋廿四 不見嶺頭驛使書倩飛鴻遙

寄無限別離愁與恨併作平安兩字家隔萬重山

只有夢歸容易藝圃詞不多作此闕使蘇辛秦柳

見之亦當歎為黃絹幼婦也

松軒  
隨筆

標題

溪峽慈林寺

古五

王昭君

古七

除夕醉後

作歌

古七

藏花

古七

食魚生

古五

摘句

芳草如綠波風吹縠痕亂隨風點落花水

面餘霞散

作客書為伴離家僕亦親

逆流行到順殘月看成圓

潞河  
舟中

萬樹松杉圍一寺半天樓閣俯諸山

峽山  
寺



天從庾嶺分南北人與梅花共雪霜

梅關

野店隻雞作端午敝車羸馬度生辰

端午生日

兩地神仙猶有別一天風露更無聊

八夕

除過此夕還除夕客盡今年又客年

客邸小除

啜茗挑燈思往事淡雲涼月坐秋宵

客夜

兩地夢魂在青草一年風景到黃橙

寄兄弟

為客遠行成熟路故人幾別失華年

寄潘伯臨

千里寄來詩兩卷一燈看到漏三更

答張南山

天生烽火無秦鹿地貢珊瑚有越人

木棉

草木降王同一朽滄桑餘地尚三生

素馨田

尚沾泥作同心結更化萍生有信潮

柳絮

匪草言ノ稽史ノ五三三

國朝詩人徵略卷五十六

番禺張維屏子樹輯

李秉禮

字敬之號松甫江西臨川人官刑部郎中有章廬詩內集外集

松甫為詩愛左司其所居曰章廬松甫嘗為部郎

子學士君方翩翩侍從而松甫蕭慘超迴若遺棄

世俗而不顧其詩似韋固有其所以似者歟小覘文集

吾兄石桐先生攷詩素嚴即於子才亦多所不足

乃獨許章廬詩以為是真能學章者少鶴文鈔

松圃父丹臣先生少貧以筆一枝傘一柄至廣西  
不二十年致富百萬松圃詩才清絕不慕顯榮父  
子皆奇士也曉行云朦朧曙色噪歸鴉風撼疎林  
一徑斜滿地白雲吹不起野田蕎麥亂開花蘆荻  
飛花白滿汀停車小憩水邊亭前林一綫炊烟起  
畫斷遙山半角青秋思云涼笛聲兼風葉下歸鴉

影帶夕陽來

隨園  
詩話

或誦詩鳥聲穿樹月當午燈影隔簾人讀書問何  
人句余曰似宋名家曰非也近人李松圃句

同上

余與先生弟芸甫水部爲婚姻丙戌鑑兒往桂林

就婚君年七十九猶矍鑠屢以書來約相見談詩

余慕桂林山水亦欲一遊以事不果庚寅冬先生

歸道山神交數載竟未一面

松軒隨筆

標題

閒居

古五

喜茂甫夜過

古五

漁家樂圖

古七

清明作

古五

摘句

人皆嗟我拙我自覺人忙盍各適其適喧

靜兩相忘

翛然發興孤所得非衆有

吟詩山月白說鬼鐙花綠

冥冥千載人開卷還與俱

乃知文字交猶勝骨肉戀

明月忽在水荷香生我衣

遠雲分野色去水帶離聲

蛩知秋氣味月與夜精神

事去都疑夢詩成似得仙

年衰常畏客病久漸知醫

生不並時嗟杜甫死憐同調有靈均

宋玉

對月莫辭深夜酒還家猶是暫時人

春從細雨聲中盡蝶向餘花落處飛

睡到日高猶未起那知枕上改新詩

史善長

字誦芬號赤厓江南吳江人諸生有秋樹讀書樓集

誦芬從秋帆制軍於湖廣來往荆襄目覩焚哭之慘故形之篇什雖一哭六太息不是過也湖海詩傳

標題 神礮行七古 募鄉兵七古

摘句 詐伴衷楚甲狼比毒秦涇當陽紀事 諸官營詐降 賊

懷利刃又謀以毒藥置井水中被獲始悉其狡

此輩故應除害馬諸公慎勿易弄蜂

有才不愧推良史此老惟憎見要人懷蔣心餘



方秉仁

字靜園廣東番禺人太學生官候選布政司理問  
有活潑圓機亭橐

君號靜園人稱曰靜翁先世由浙遷粵翁少孤貧  
傭書養母中年業鹽筴家小康卜宅於五仙門內  
所居曰蘊石山房外有小池池上累石爲小山山  
外有亭曰活潑圓機亭環以竹竹下有屋曰有竹  
居山房之左爲堂三楹堂下雜蒔花木堂之左迴  
廊達於內室室外紫藤一架室內圖書彝鼎茶竈  
筆牀翁日偃仰其間翁二子八女每佳晨令節與

家人飲酒賞花園棋絲竹以相娛樂性愛山水暇  
輒遊白雲山嘗於山麓建彌勒寺又愛菊自號菊  
圃花農有憶菊詩云秋到無言空悵悵花如愛我  
莫遲遲其癖於菊如此率年六十有六

聽松廬  
文鈔

余年十四翁以幼女字余越五年女以哭母病沒  
余遣恨詩是以有西母驂鸞入絳煙曉風環珮散  
羣仙之句而紫藤曲諸詩及玉香亭詞皆緣是而

作也

松軒  
隨筆

摘句 鈔書恆繼燭購帖欲傾囊

生難超弱水死欲葬名山

引魚躍浪時垂餌放燕尋春故卷簾

臨風展簟玲瓏牖待月尋詩曲折欄

松竹夾泉喧樹杪藤蘿牽月度崖陰

山影倒垂疑化墨天心高潔欲成霜

海門尺地皆元土柴市孤忠有宋臣

文丞相祠

藏拙靜求無事福收心補讀少年書

### 金 棨

字誦清浙江錢塘人太學生官候補員外郎

誦清生長綺羅性耽書畫嘗集明人法書刻之名

清嘯閣帖尤愛暉南田筆墨搜藏獨富

湖海詩傳

摘句 蒼苔猶有色黃葉欲無聲

藏經樓抱千重樹法雨泉飛四面山理安寺

李士楨

字廣成號東田廣東番禺人貢生有青梅巢詩鈔

予持破硯覓食精神耗於縫裳代嫁者多矣朱文

正公撫粵偶見拙唱目為異才始獲揚詡遊庠旋

充選人北計三十年來開笑口之日無幾得間則

含毫伸牘踖壁而高哦青梅巢詩鈔自序

東田少時黎二樵即稱為畏友嶺南羣雅

標題 婦墓古五 憶弟妹古七 大風行古七 閉墓

國朝詩林卷之三十一

日家祭五古

艤繁昌舊縣下登岸尋村七古

摘句

蛟蝶影在水野竹如人長莎亭間蘚榭地

綠苔髮香

恨不閨時刻申亥忽然入鰈魚難得曙短

檠紅一粒

與弟雖二身與弟同一親勗哉日斯邁共

慰泉下人

史為益智粽經為饋貧糧

才短少機事世長多梅心

日色沈高柳風聲壯大河

獨往與誰語此生空自評

孤立才名減多愁病痛增

屠人倚樹分蛇肉獵戶沿墟賣虎皮

露冕關心當大暑覆盆垂手卽陽春

憂國自零公子涕問天誰亮美人心

三閩大夫

我自貪涼人逐熱半生無故得狂名

桃花雨小東風大魚婢成羣白滿簷

潘有度

字憲臣號容谷廣東番禺人官候選員外郎議敘

加鹽運使司銜

容谷丈理洋務數十年暇日喜觀史尤喜哦詩有  
 園在河南曰南墅方塘數畝一橋跨之水松數十  
 株有兩松交幹而生因名其堂曰義松所居曰漱  
 石山房旁有小室曰芥舟余髫齡讀書園中與諸  
 郎君為總角交今每過南墅與伯臨季彤話舊猶  
 想見當日花前微笑酒後高哦也

聽松廬  
文鈔

翁有西洋雜詠寫海外風土蔡生甫太史謂可與  
 和泰庵尙書西藏賦頡頏

聽松廬  
詩話

摘句 鏡中照見炊烟起可是人家住廣寒

用大  
千里

鏡照見月中有  
烟起如炊烟云

忽吐光芒生兩孔圭形三尺此星奇

用觀星鏡

照見一星圭形長三尺頭尾各穿一孔

昏姻自擇無媒灼繾綣閨闈只一妻

夷人男女

自擇配既娶妻不符納妾違者以犯法論

素衣減食悲三月

夷人喪服父母妻皆期年朋友三月

易簣

遺囊友亦分

夷人重友誼臨終分財友亦與焉

### 葉廷勳

字光常號花谿廣東南海人官候選員外郎議敘

加鹽運使司銜有梅花書屋詩鈔

花谿跡託塵器性耽泉石馮魚山黎二樵皆折節



與交晚年自號荔灣漁者閉閣拈毫評書讀畫高  
致脩然卒葬白雲山令子雲谷民部夢龍築倚山  
樓為丙舍佳節攜酒榼集名流賦詠其上雅有父

風焉

嶺南  
羣雅

花谿翁少年棄儒而賈晚歲棄賈而儒嘗手校王  
文簡公古詩選重為鐫板偶賦新柳詩一時名流  
多次韻和之紀文達公贈以詩有云傳來新柳句

如見老松身

聽松廬  
文鈔

令子文園比部雲谷農部延余課子館於其家愈  
悉翁之為人蓋有得於老氏知足知止之義者同

摘句 白沙漁父棹紅樹酒家旗

江帆依岸轉島月照人寒

昨宵杯酒離亭畔和雨和烟綴馬蹄

新柳

潮水未生人夢醒一簾新月看梳頭

葉廷樞

字冠芳號竹庭廣東南海人貢生有芙蓉書屋詩  
君年十二父旅卒伯父遣人迎樞君請行比長以  
既失怙恃無意仕進遂以詩酒自娛嘗遊羅浮鼎  
湖窮其幽勝卜居羊城之西楊柳溪邊芙蓉環之  
君鮮兄弟視從兄弟如胞鄰里貧者隨時資助之

病篤召諸負者而焚其券有感泣者聽松廬文鈔

竹庭子夢草少孤能以畫書詩世其家又勤懃焉

思貽親以令名余是以重其為人松軒隨筆

摘句 子落不到地香飄常在天詠桂

菖蒲澗響泉千尺蒼荀花開月一龕

名花自種還同賞家釀新開不待沽

門外最宜微雪夜水邊應有苦吟人梅花

### 陶章瀉

字季壽湖南長沙人太學生官知縣有嘉樹堂稿

季壽幼慧眉目秀整隨其尊人官粵好氣任俠早

負才名卒之屈於貲郎遭迴屯踣年未中壽忽焉

以歿

節錄李松甫撰  
嘉樹堂詩鈔序

季壽官為盩鐵需次浙中寓西湖可莊門繫一舟

往來南北兩山間與野人山衲尋煙問水

靈芬館  
詩話

余喜看雲季壽晴雲生萬態五字甚妙

聽松廬  
詩話

摘句 故侶行將見他鄉喜似歸

月色兼涼到秋心與夜長

岸低平野見江靜遠灘聞

向人無語我偏敬如柏不花誰敢嫌

懷查  
梅史

冷面向人客每罵深山讀書妻不知

歐陽  
礪東

溫承恭

字靖聞號莊亭廣東德慶州人貢生有莊亭集

君七歲而孤九歲偶見崔鴻十六國春秋讀之喜  
遂徧覽諸史年十五李學使調元奇其文補弟子  
員覆試見君穉而文多用史疑有僞因面令默寫  
本史前後文凡數十條皆不誤驚歎贈以佳硯嘉  
慶二年聞蜀地用兵因入蜀依姊壻華陽令徐君  
念高久之還粵應鄉試再入蜀船至雲陽寇以礮  
阻隘口沿江數十艘不敢進會日暮望坡上煙縷  
縷枕後風徐來君語舟人曰賊終日守隘今往炊

適風利不可失汝等懼賊吾立船外當之舟人從  
之亟挂帆遂出險其膽識類如此嘗遇風覆舟物  
浮江僕欲取之君曰昨壞舟數十此豈必吾物耶  
禁勿取其顛沛不苟又如此君倜儻好講經世之  
略數往返蜀中無所遇晚乃教授生徒嘗云人日  
間總有善事可爲以故親舊告貸君雖貧必力應  
之嘉慶二十五年以疾卒年五十八著有莊亭詩  
文集補迂集隨得錄凡十餘卷子賜少稟庭訓勵  
行績學戊寅舉于鄉

聽松廬  
文鈔

莊亭言吾粵理學經濟文章皆大有人惟英雄一

匡卓言ノ後田光三ノ

輩頗少如東莞伯何真袁督師崇煥暨雄飛將軍

或庶幾耳莊亭素以王景略陳同甫自命惜未用

於世 粵嶽草堂詩話

莊亭談兵則效杜牧請纓則思終軍激昂慷慨之

氣時露於詩亦奇人也 嶺南羣雅

莊亭蜀中往返備悉險要作松潘防守議 嶺海詩鈔

王仲瞿溫莊亭皆喜談兵然用兵今與古異今制

勝之具首重鎗礮至一鼓作氣信賞必罰與士卒

同甘苦則古今一也 松心日錄

摘句 細雨連疎樹孤帆入亂山 歸峽

水似從梯上天真在井觀

巫峽

路多通嶺背人半住林間

川東道中

地成秦四塞天入嶽三峯

華山

湖海有人牛馬走笙鏞何處鳳凰來

九成臺

去國懷鄉餘此地先憂後樂更何人

岳陽樓

湘注北流通上國地迴南戒畫中原

祝融峯

死木可驅流馬役生天不許臥龍飛

武侯祠

信國入元心有宋包胥復楚哭無秦

襄平侯

官知骨傲難容我死得名高便是仙



厚与言ノ箱田老五二六

十一

國朝詩人徵略卷五十七

番禺張維屏子樹輯

劉嗣綰

字醇甫號芙初江南陽湖人嘉慶十三年會試第

一官翰林院編脩有尚綱堂集

爨餘集

癸巳至丁酉

年十二三學爲詩丁酉稍稍存錄

半粟山房集

戊戌己亥

老桂一株已枯其半而著花較

早金粟因緣半人身世敢云妙悟或證聞思

寄柳集

己亥

侍大父華亭學舍

刻楮集

庚子迄壬寅

三年中方事舉子業

二十四航集 癸卯 是歲秋試小住白門

獻賦集 癸卯 甲辰 同人相約獻賦往返吳門

葭花閣集 甲辰 乙巳 家園有紅蓼數株映帶煙水

禪榻集 丙午 維摩示疾禪榻為緣

竹中集 丁未 家園種竹盈畝偶然得句嘯詠其間

戊己集 戊申 己酉 燕知戊己守土也安時也

碧山後社集 庚戌 吾鄉碧山吟社里中擬續此舉

楚游集 辛亥 就食武昌館於藩署

雪苑集 壬子 由武昌赴豫仍館商邱陳氏

燕囊集 壬子 觸暑北行襍被千里

圍爐集 壬子 圍爐選話銷寒之興不淺

寓園集 癸丑 春夏間寓居澄懷園

籬下集 癸丑 黃花爛漫一尊陶然

問津集 甲寅 應試津門小住問津書院

槐天集 甲寅 槐陰如蓋一綠到門

澹香秋圃集 甲寅 移寓阿相邸第蕭然有老圃風

策蹇集 乙卯 驢背行吟尋有歸志

中江集 戊午 乙卯冬奉諱里門尋以故人之招就

食江右丁巳夏留中江季冬歸里戊午仍赴舊約

勞歌集 己未 公車歷碌勞者之歌

獨浪集

己未

下第南歸關河獨浪

吳船集

庚申

扁舟江渚叩舷之歌

蓬心集

辛酉

四十無聞一邱將老因人碌碌重赴

公車莊叟所謂猶有蓬之心也夫

蕭寺集

辛酉

秋移寓保安寺

南轅集

壬戌

一旦南轅浩然而返

蘆中集

壬戌

淪落江湖蘆中人豈非窮士乎

竹西集

癸亥

曾都轉招寓題襟館

五甲集

甲子

仍畱揚州計余已歷五甲矣

十上集

乙丑

余應秋試者六至是又四上春官

竹西後集 乙丑 夏歸自都門重寓題襟館

婺州集 丙寅 下榻婺州之郡齋

鼇背集 戊辰 舉南宮以庶吉士派入文穎館與纂

校諸役日僕僕於金鼇玉螭閒編詩為鼇背集

不易居齋集 庚午 余官京師襍被蕭然一歲中數

移研几居大不易昔賢所歎因名所居曰不易居

循陔集 辛未 乞假南還仍有負米之役

雲心集 癸酉 雲無心以出岫入山出山同一無心

懷南集 甲戌 時以省親言歸江國

雪泥集 乙亥 一天風雪重到京華

丁丑集 丁丑 忝列編脩已歷五科新庶常於五月

行大拜禮前後輩由此分也即編詩為丁丑集

且住齋集 戊寅 己卯 浮沉人海且住為佳

補蘿集 己卯 庚辰 同社移居寥寥獨處秋風四起補屋

牽蘿因名詩為補蘿集 尙綱堂詩集

芙初詩分為四十三集集各有小序節錄之可作

年譜觀也 松軒隨筆

醇甫少作明豔居多肄業太學以後則沉博矣放

浪江湖以後則排畧矣茲則清適駿邁以快厲之

筆達幽隱之思如水銀瀉地天馬行空 梧門文鈔

言心聲也余拙於言而又好自道其心所欲言然

則余之詩余之言而已

尚綱堂  
集自序

芙初以相門子稽古績學綺歲能文乃青衫落魄  
破硯依人可謂窮矣然卒以禮闈榜首簪筆木天  
不可謂非達也顧中年以後心力就衰又以不工  
小楷未獲奉使衡文身居京國心繫家園歸詠循  
咳出仍負米迹其生平蓋窮而達達而窮者也然  
境嗇而才豐位卑而名顯以視榮華露電轉瞬皆  
空者吾知芙初必不肯以彼易此

聽松廬  
文鈔

已卯余下第寓米市衙衙芙初太史寓橫街時過



從唱和余詩云各有衰親已白頭莫道無田歸不

得美初詩云月中烏鵲飛繞樹只有倦翮思歸林

庚辰余歸嶺南美初歸江南遂不復相見聽松廬詩話

標題 詠古小樂府長短句 詠懷五古 禹碑七古

舟中望廬山七古 赴宋中留別在楚諸子

七古 寒夜蹋月下窰子七古 演雅一篇擬

山谷七古 文信國遺像硯七古 李北海岳

麓寺碑七古 哀呂堰七古 張南山春夜過

訪以詩見贈即用原韻奉答七古

摘句 聰明貴深造茲事非任天

昔年母別兒別淚傾不已今年母別兒母  
淚且枯矣含悲但嗚咽苦語亦無幾兒身  
猶在門親心已萬里

名馬一千里奇書二五車

月行疑讀畫花坐當薰衣

風竹有聲畫草蟲無字詩

荒村牛聽笛古驛馬吟鞭

減酒分佳客添香伴病妻

贈張  
船山

有書兒廢讀無米母持家

過秦論在應傳世論蜀文成竟入關

雞羣獨立非凡骨龍性難馴有父風嵇侍中祠

海嶽衣冠邀石丈東坡笠屐伴琴師

維摩自掃天花室彌勒同居水月龕

垂簾算奕畱仙客隱几看花當美人

黑甜一枕蝶離世綠靜半塘魚在天

魚隱綠苔疑傍樹鳥穿紅葉當看花

鶴鳧祗自爭長短環燕從誰定瘦肥

三周路轉華不注四面帆來無定河

擺脫塵心離宦海安排慧業到名山

野藪登盤思學圃鄉音入座當還家

茶聲細欲成泉夢酒氣多能暈月華

爛到封侯公合笑瘦如博士我應憐

食全  
羊

人如風柳時三起酒似春潮日兩回

一別也知如小死再來難定是今生

別來盡眼惟秋水終古傷心是夕陽

天上朝霞空有色人間殘月最銷魂

自人世來無世想不應春去有春愁

西風畫出勞人樣吹得衣裳似葉聲

東塢夕陽西塢雨那容人世不炎涼

露珠走上風荷葉不到傾時不肯休

正言ノ卷之三十一

022-916

國朝詩人徵略卷五十八

番禺張維屏子樹鞞

吳慈鶴

字韻臯號巢松江南吳縣人嘉慶十四年進士官翰林院侍講有蘭鯨錄鳳巢山樵求是錄

巢松太史之初爲蘭鯨錄也其時翔輝鼎門振奇觴歲涌思雷出通莊軼馳固已鏗錡炳耀凜耳曩目旣而邁躋隻事戎旃登蓬山愴風樹迨乎秉篋乘傳騰岑降深咨諏周原延訪民隱則又瑩澈靈府發揮高致減雕飾屏華靡運神明幹風骨經萬

辟千灌而成純鉤由聲聞緣覺而入悲智

小謨觴館文集

其初刻蘭鯨錄也蘭氣襲袂則百草失芳鯨音鏗

鐘則眾樂奪響煌煌乎絕絕乎固已追躡孟韓並

駕徐庾既乃涉歷多故馳驅壯遊蒿筆一枝蕩節

萬里揚雄少作悔其雕華謝傅中年深以陶寫則

又原本忠孝發抒性情飲真茹強簡精練銳譬諸

老禪入定百怪失其姦窮宿將行軍萬眾暗其叱

叱筭然一變以臻厥成

賞雨茅屋文集

巢松太史弱冠時尊甫彙繡先生官廣東糧道蘇

臺庾嶺南北往來既而隨宦濟南中更憂患蘭鯨

一錄已見老成迫成進士入詞垣摘毫木天載筆  
史局使車所至山水爲緣著雞金馬助其奇思豈  
嶽河流增其壯采中年篇什所詣益精不以才力  
掩其性靈故足貴焉惜乎體弱多病不克永年方  
持秦岱之旌遽返蓉城之駕海內騷壇失此健者  
篋中尺素如覩故人猶憶君返東吳曾寄嘉藻僕  
居北渚復枉瑤華重覽蜀州之篇恍聽山陽之笛  
嗚呼唏矣

聽松廬  
文鈔

道光甲申巢松視學河南時余在荊州巢松寄詩  
有云我已擔頭兩嵩嶽君亦胸中九雲夢今重覽



遺篇猶想見興酣落筆也

聽松廬詩話

巢松讀後漢書圖首之一云萬里烏桓部西來就  
月支易滋非族類懷惠必羈縻茶藥闕生命牛羊  
閱歲時此曹皆困獸全仗撫綏宜此詩作於壬午  
論古通今卓有所見不獨詩筆沉鬱也同上  
巢松絕句云縷衫檀板記當年嗚咽秦淮比杜鵑  
自古興亡家國恨箇中偏要著嬋娟二語包幾許

史事

同上

標題

金塗鐵塔歌

古七

天潢小裔墓

古七

通遠

驛紀行

古五

七贈

古五

開元登封磨崖碑

古七 顏魯公書東方先生畫贊碑 古七 韓

山謁文公祠 古七 題沈閨生詩卷 古七 晏

城驛 古五 桐鄉程節婦詩 古七 救荒新

樂府五首 古五 鄂文端公鐵柱歌 古七 樂

戶兩烈女行 古七 黃河驟漲幸卽平落誌

喜 古七 蕭典史歌 古七 謁中岳廟 古七 三十排韻

摘句 古人鈔書讀皓首烟露濡今世富梨棗百

錢換一書奈何婉孌子學不古人如

根源在周孔旁涉乃騷選

爭此隙駟光黽勉萬古計

身甘百年否詩必隻字泰豪情日月動旅

泊冰雪耐

贈陳虹  
橋布衣

水糧鷗旣富雲臥猿獨壽

涼秋易爲陰輕風不能雨山含靜女色江

似幽人語

夜經七里灘

百歲見千月月月一盈虧人事有阻隔風

雨且半之良夜足可惜珍重吟一詩

軟紅著閒人似宦亦似隱

手把一卷書沈酣日如癡妻孥顧我笑爲

官豈如斯僮僕亦私訕精力空自疲吾自

樂吾樂遑恤汝輩飢不聞金石聲鏗然出  
原思

干戈奇士出涕淚直言來

求名忌太急厚責惟吾身還須耐官職舒

卷隨天真

不揚胡將相忍事卽英雄

裴晉公墓

鍊心略似無波井養氣應如出岫雲

智慧盡從無我出勳猷非是要人看

妄思憂樂羣生共未必酸鹹衆口和

得路喜看鷓侶捷嬾鳴深願身冠遲

省事偶閒思學佛熟眠無夢亦游仙

詩到開天真有力仙能行地合通靈

能納江河知海力不資塗澤是天工

似醒還醉傷春地易雨難晴養夢天

如何鼇極扶輪手都化龍驤大道塋

結交磊落天下士料理崢嶸身後名

縱與汾陽遭際各儘畱諸葛大名懸

岳忠武祠

花縣久無仇覽鳳莠民猶畏邳都鷹

讀史有感

一時牛耳閑閑趙三影鶯花燕燕張

贈吳王松

祝君長作王文度待我同為馬少游

藹人歸養

從游多似邴根矩清德過於王彥方

寄劉松嵐

花碗定磁天下白水樓斬簞夕陽黃

吾曹須識天公福生長江南桑苧村

李光里

字號東亭順天寶坻人嘉慶十四年進士官

贛州府知府

先生官工部與鄭貫亭牟松崖諸君以直道相勗

貫亭歿爲經理後事且延師課其子出守贛州增

書院膏火疏鑿惶恐灘龍安衙蠹把持官府爲民

害先生選幹員擒之獄具監斃一方獲安

聽松廬文鈔

先生門第高華性情伉直令弟樸園太守略述一  
二事如擒治衙蠹一端爲民除害大快人心吾粵  
衙蠹尤甚安得如先生者爲之懲一而儆百乎  
摘句 陽明洞裏春無限清獻琴中韻自幽

張聰成

字阮林號傳巖江南桐城人嘉慶十五年舉人有  
傳巖詩集

阮林太傅文端公五世孫也張氏爲吾邑巨族世  
有達官才人亦不乏而文辭能直追古人則自阮  
林始爲詩宗法少陵姚惜抱先生覓所作嘆爲異

才著有左傳杜注辨正及經史質疑錄積勞以死

年僅三十有二

劉孟塗文集

張阮林據鄭氏尙書注小顏漢書注謂大別山在安豐西南今河南固始縣自杜征南謬讀禹貢遂疑此山在江夏界其說詳杜註辨證未免好爲新

奇然考大別者亦不可不知此說也

松心日錄

胡小東太守跋阮林詩集云阮林少時結交里黨間皆一時之傑若劉孟塗姚石甫光栗園李海帆左匡叔徐六襄諸君子性情才力雖不必同要皆器識深遠爲詩亦各有深造而論才則首推劉張



觀此則阮林之才與孟涂相伯仲而皆不克永年

豈才與命實相妨耶然兩君固自有可傳而小東

與諸君子勲勲焉護惜遺橐篤於故人古誼尤可

風也聽松廬  
交鈔

國初以來稱騷人無過番禺屈大均阮林之傾倒

於翁山如此聽松廬  
詩話

標題 登采石太白樓放歌古 貧交行酬光栗

園古 苦別行懷石甫古 懷劉明東古

摘句 逝者已異物 追亡為慮存

不眠求照合欲起覺身難

海內公卿誰命世，儒生經術有專家。  
中原吏治萊蕪少，南國人情雀鼠多。  
京口烟波收楚越，海門潮汐撼金焦。  
畫角五更吹月落，寒潮萬里動城來。  
峰陰擁堦凌帆外，日氣穿雲射水中。  
新歲春初仍舊歲，風聲雨裏雜潮聲。

國事考  
卷之二

國朝詩人徵略卷五十九

番禺張維屏子樹輅

彭兆蓀

字湘涵號甘亭江南鎮洋人諸生有小謨觴館詩

集文集

樓煩集

辛丑迄丁未

山右寧武古樓煩地雁門三邊之

一也兆蓀象勺之年家君作宰十稔於茲銜其山

川學爲賦詠刪十存一戢戢已多

南鴻集

丁未迄庚戌

家君以病解職侍籃輿南下馬背

船脣不無所觸凡得詩若干首鴻以北爲家及秋

南征爲賓子少長塞垣其視歸也轉若賓焉

星社集

庚戌迄乙卯

彭子隨親潁州潁固淮北雄郡晏

呂歐蘇遺澤未泯山川人事托諸詠歌不幸不祐

洵丁艱棘躬奉廣柳歸祔故邱捐棄筆硯者閱月

二十乙卯秋乃援祥琴例補作別友遷居諸詩計

庚戌至乙卯六年詩薈爲二卷

傭書集

乙卯迄戊午

昔樊南文云占數東甸傭書販春

予自丁閔凶衣食驅遣始客京口繼客楚州賓館

淒清波路壯濶苦蟲寒鶴時復一呻爰取傭書以

名是集

葦杭集

己未迄  
癸亥

淮海還歸津梁厭倦弭楫茂苑授

經三年繼復流轉泖湖佐人述譔地不越三吳程

不逾百里一水如帶扁舟可杭

觀濤集

甲子迄  
丙寅

闕逢青陽子抱幽憂之疾鍵戶半

年秋間辱邗上當事之招抱舟渡江繼乃代舍移

牀東閣嘯侶文酒之會沈痾為蘇跡非等於掃門

事有同於發疾觀濤之語義取於斯

小謨觴  
館詩集

甘亭詩分為六集集各有小序節錄之亦可作年

譜觀也其續集二卷丁卯迄丙子所作此十年詩

不分集亦無小序

松軒  
隨筆

國朝詩人傳卷之三十一  
昔人有沉博絕麗之語求諸近代罕覩其人蓋多  
讀書者博不待言惟沉麗難兼沉未必麗麗未必  
沉麗在肉采沉在神骨骨重神寒是之謂沉然非  
博不能麗更不能沉徒恃博不能沉并不能麗此  
中有天事焉有人事焉吳梅村詩麗多於沉陳獨  
漉詩沉多於麗胡稚威詩文沉多於麗彭甘亭詩  
文麗多於沉偶舉數家未遑更僕要皆合天分學  
力乃克成爲一代鴻駿之才也

聽松廬  
文鈔

郭頻伽序甘亭之詩謂以才爲主以古爲程王鐵  
夫序甘亭之文謂少長邊塞多接通流精求緣起

熟析利病有山川以助其奇有風雲花鳥以壯其  
思又不幸久困有騫愁騷屑碰撞拂鬱以激宕其  
中之所存繇是長篇短章隨變雜施持原以往扶  
氣以立陽開陰闔神出鬼沒而一皆自載其心吳

巢松贈甘亭詩云揚馬借爪鱗李杜與衣鉢笑攀

蒼龍胡屢嘖白鳳咽三君皆知甘亭者

聽松廬詩話

嘉慶己卯下第送盛子履

大士

出都有古詩一篇

兼寄彭甘亭乃詩未達而甘亭已歸道山聞聲相

思竟未一面至今余懷猶悵悵也

松軒隨筆

甘亭詩多沈鬱之作偶舉一二首如史閣部祠云



鐵礮摧城弔國殤衣冠畱墓拜堂堂夷吾自灑新  
亭淚江總仍飛曲院觴半壁山河撐赤手九霄箕  
尾落寒芒燐光都在梅花嶺披髮依稀下大荒

又歲暮雜感云潯州烽火接梁州蟻子郟屯楚上  
游僞讖荒唐三屈律將星搖動五諸侯檻車劇報  
收盧植巴國休輕縱李流正好奇功乘雪夜鴨鵝

聲裏落旄頭

十四首之一

有贈人以言委婉入情者

如送子白謁選北上云唱慣驪駒接慣歡此番離  
緒渺無端八义手壓朋儕易七品官宦上下難判  
牘不妨遲展卷活人先要自加餐在奴大有蒼茫

感未肯輕彈貢禹冠

聽松廬詩話

甘亭論詩實獲我心有絕句云厭談風格分唐宋

亦薄空疎語性靈我似流鶯隨意囀花前不管有

人聽 甘亭才奇境困牢騷感慨寓於詩而蘊藉

出之絕句云玉真夫婿等閒畱只爲胡麻飯一甌

知否有人雲外立桃花如火不回頭

同上

標題

詠古九首

五古

周忠武公墓紀異詩

五古

莜麥飯

五古

土審歌

七古

李晉王墓下作

七古

井陘關

七古

賣馬行

七古

擬新樂府

六首

長短句

塗山禹廟

七古

賣書行

七古

讀書十首

古五

海鯨行

古七

有會而作十

三首

古五

自題懺摩錄

古五

楊忠愍公遺

墨四幅

古七

摘句

榮枯境何常名在抵壽考

得為且自勉不獨在文章

升沉不足言曷哉作佳士

今晨惜昨晨明又惜今日萬事類如斯能

禁幾悠忽

源積流斯長所吐視所食

立言必根情選字必擷芳

人讀等身書如將兵十萬兵多行慮諱書  
多語愁蔓何以節宣之一心制眾亂不見  
陸士衡才富轉爲患亦有淮陰侯多乃  
益辦要以我用書勿爲書所絆

所圖送春秋遑暇計妍醜并此而無之吾  
生更多負

詩文雖無益於世然人之精神面目境  
遇性情皆在焉并此而無之生平之歲  
月不愈虛擲乎讀甘亭詩有味乎其言  
之

老堅求道志病鍊著書才

文章前後水將相卷舒雲

少年耽飲飲必羣下至屠沽上簪紳中年  
 與漸闌選酒兼選人素心可望不可親不  
 若相對形影神一甕自撥牀頭雲中有至  
 味醇乎醇胸次盎盎皆陽春此情莫與世  
 俗論但遣屋角榑花間

寒夜  
獨飲

四七星辰見光氣八九雲夢吞心胸

玉帳照斜三輔月金笳吹老一城霜

宣府

鳴聲風叫平原箭鏖血鏗行毳幕觴

百戰終輸姚弋仲一心難得呂婆樓

晉陽  
懷古

油幕談兵韓吏部天山磨盾傅脩期

贈王  
述庵

誰以先鳴憎蓋旦儘聞大饗到爰居

如夢歡場原變幻舊巢飛羽各差池

忍寒花學曉妝女積雨春如病少年

撥悶詩書勝藥石避人衾枕卽山林

破甑我原拚撒手碎琴君勿替攢眉

本無榮願妻孥諒漸有離心僕隸驕

賤謁諸侯叨上客號稱遊子實窮民

隨例盤餐回味少代人文字愜心無

皖城節署

誰於月滿花芳候想到鐘殘漏盡時

傾城自要天然色打槩真逢月樣人

白桃花

奉倩取涼原越禮真卿乞脯亦人情婦病

未散魂來殘夢裏最傷心是上鐙初悼亡

只要寒巖倚枯木略添花草便添愁友勸置筵

誰知跋扈詞場客也到觀河皺面時

### 觀榮

姓索綽絡氏字春農號梅林滿洲正白旗人官候

選道有挂月山莊詩鈔

君先世自遼左從

龍入關累代貴顯君幼力學屢試不售補內務府堂筆帖

式兼樂部供用官嘉慶辛未奉

命司權宿遷爲淮關上游先是豫省載貨入淮每夜關吏  
畱難船運減少淮宿稅往往不及額君別釐積弊  
商困頓蘇士民書遺澤遠播扁額懸之津亭時母  
太夫人迎養署中築春暉草堂雜蒔花木以爲親  
娛癸酉滑縣教匪滋事故相國百文敏公總督兩  
江親赴徐州防禦文敏素稔君之能數以兵事相  
商悉中機宜旣而以太夫人年高思家遂解組歸  
先是君弟竹樓觀察首領鄉薦君喜曰弟獲科名  
吾心慰矣觀察初選文昌縣後擢任南雄州道光  
癸未君赴粵東至官署尋對牀之約蓋君與觀察



國朝詩人卷之二十一

文愛尤篤也君考近亭公少有神力八齡能舉四  
釣石仕至福寧鎮遊擊既歸於盤山祖廬旁築挂  
月山莊君補種松檜數千株將終老焉乃願不獲  
遂竟以疾卒於南雄州署聞者咸歎惜之  
摘句 不知夜來雨但覺泉聲急

聽松廬  
文鈔

山勢隨潮湧天光到海明

雲泉  
山館

將軍令不驚雞犬僕射恩原若父兄

和百  
菊溪

為貧將母歸應早因病解官名亦佳

夢裏關山難得路天涯風雨莫登臺

寄竹  
樓

香迷忽有風相引寒極已知春欲回

探梅

國朝詩人徵略卷六十

番禺張維屏子樹韓

劉開

字明東號孟塗江南桐城人諸生有孟塗前集後集

孟塗生數月而孤年十四以書謁惜抱先生先生大奇之因從先生學其爲人落脫不羈喜交游與人談論輒罄肺腑家貧不能養奔走公卿間無干謁之態嘗謂元之曰吾鄉多佳山水使吾有菽水資迎吾母居龍眠杯渡間手一編且不去吾母左

右其樂何如而顧爲是僕僕哉然亦習舉子業試  
輒不利卒以上舍終年四十一初孟塗游浙過某  
邑有人候於門卒然問曰君得非桐城劉先生耶  
要至家具盛饌酒半告以有母孀且老前夕夢其  
父語之曰三日有桐城劉先生過吾門非先生文  
不能傳爾母當固請之旣復與遊山至一古墓碑  
題曰宋處士劉開之墓孟塗懽然自失道光元年  
亳州修邑乘聘孟塗正月行別其妻曰此去尙相  
見耶妻愕詰之則亂以他辭及之亳寓佛寺閨月  
十一日陡得腹疾勢不起指佛殿金葫蘆頂示客

曰視月色中乃吾去時也果以其時而逝喪歸妻  
倪欲以身殉其姑止之一日姑聞閤戶聲縊死矣  
孟塗生享盛名沒又得其婦之烈夫乃嘆天之生  
是人非偶然也孟塗詩有前集十卷歲久板損沒  
後前臺灣令家弟瑩急造其家訪遺藁得後集二  
十二卷文十卷駢體文二卷臨漳令家弟柬之爲  
捐貲付剞劂併重刻其前集屬元之任其事鄱陽  
陳方海伯游偕伯棠助讐校焉節錄姚太史元  
之撰劉孟塗傳  
孟塗上書姚公蘄公常曰此子他日當以古文明  
家望溪海峯之墜緒賴以復振節錄陳君方海  
撰劉孟塗傳

劉孟塗曰三代而上聖人之言理也寬三代而下  
儒者之言理也密夫情勝理則無節理勝情則難  
行聖人知人心不能卽安於義也故文武之道有  
張有弛大學之法有藏有修有息有游凡以使之  
安於教也言不爲過高行不求至難心不欲已甚  
凡以便於人情也後儒不顧人情所安而以義理  
之言束縛天下嚴之以儀節多之以防閑於是乎  
有操勵之學有專敬之功論非不是而人莫能久  
從則言理太密之過也治天下者法令簡易庶民  
安之網愈密則奸僞愈生君子之教息者亦若是

而已矣夫孝弟忠信節之大者也起居動作行之  
細者也爲學之初卽繩以禮法言笑不敢稍苟動  
履不敢卽安天下於是不勝其煩苦而決去之記  
不云乎以義度人則難爲人以人望人則賢者可  
知聖人以人望人故其言理也寬後儒以仁望人  
故其言理也密夫言理者由寬而入於密亦勢所  
必至而其失也遠乎人情

孟塗  
文集

孟塗論學又云淹通宏博之士詳於名物度數而  
或略於義理之是非其後嗜古益以博爲能以多  
爲貴厭故而喜新以功令所載爲泛常以先儒所

言爲迂濶於是獵奇好異之習興而躬修心得屏  
而不論夫君子之學知法孔氏而已何漢宋之有  
哉學之判爲漢宋也自近世之人名之也門戶之  
見執而不能化也

同上

孟塗論文有云退之起八代之衰非掃八代而去  
之也但取其精而汰其粗化其腐而出其奇其實  
八代之美退之未嘗不備有也宋諸家出乃舉而  
空之於是文體薄弱無復沉浸醲郁之玫瑰奇壯  
偉之觀然而志於爲文者必自八家始何以言之  
文莫盛於西漢而漢人所謂文但有奏對封事皆

告君之體耳書序雖有不多見至昌黎始工爲贈  
送碑誌之文柳州始創爲山水雜記之體廬陵始  
專精於序事眉山始窮力於策論序經以臨川爲  
優記學以南豐稱首故文之義法至史漢而已備  
文之體制至八家而乃全學者必先從事於此而  
後有成法之可循

同上

孟涂游粵東余於賓谷方伯座上遇之越日見訪  
又數日訪之於西關劉氏園姚石甫亦在坐談讌  
極歡孟涂集中有喜遇張南山孝廉詩後四句云  
城西少年昨相識痛飲狂歌傾倒極歌罷暮寒生



紫瀾海雲爲我變顏色卽詠是日事也又十餘日  
復來話別余賦詩送之孟涂見贈詩云展我碧瑤  
箋書君白雪篇孤花豔春色空翠點晴煙此筆自  
今古有人來海天相逢無限意畱記暮雲邊次章  
結云遲迴江上路卻是爲君畱似有惓惓難別之  
意然當時年華甚富方謂後會有期豈意遂成永  
訣今君沒已十載而余鬢亦蕭蕭二毛嗟乎異才  
難得逝川不回三復遺篇惘然終日

聽松廬  
文鈔

余與孟涂僅三面時孟涂年甫二十餘不知其古  
文所造至是其文氣甚長而年乃不永惜哉然其

身雖死其名則不死矣

松軒  
隨筆

孟涂七律有一種磊落伉爽之氣如涿州詠先主  
云能教王佐出隆中百戰纔收取蜀功半世依人  
同旅客一生知己是奸雄兵戎婚媾丹陽宴骨肉  
君臣白帝宮今日故居遺跡盡不須恩怨說江東  
謁王陽明先生祠云軍前儒服坐麾兵手挽銀河  
轉太清曠古人誰繼諸葛一杯我獨奠先生身閒  
未盡匡時略才大難辭講學名莫道奇功成太易

當年遭遇有王瓊

聽松廬  
詩話

標題

喜雨歌

古七

力役謠

古七

過婁妃墓

古七

與石甫夜話有贈古五

憶浮山寄光栗園

比部古七

讀史古五

寄懷鮑覺生侍郎古七

素雲曲古七

渡海登小落伽山觀大洋

作歌古七

游黃山登蓮花峯古七

樓中醉

題雷別西湖古七

摘句

退念我身後追想古人前遙恨自天來飄

風與迴旋

朽脯投地上蟻見卽來趨同類爭相賀負

之歸堂隅忽然覆杯水平地成江湖棄脯

各逃生或至沒其軀富貴亦如此康衢多

畏途

昔者衛庾公古稱爲端人，不爲言孺子抽  
矢而扣輪，此事脫在今，必曰非忠臣忠孝  
本至性矯俗，豈其真蘇章按友罪立名以  
榮身俗儒或歎息識者謂非仁秉衷先旣  
薄安能厚君親嚴刻以爲直世風滋不淳  
不情卽姦慝人語非無因

雲扶孤日定波靜百靈閒

觀海

池光如出水石勢欲離山

只緣人去懶不是馬行遲

詩緣爲客富酒到異鄉多

日高猶海氣風斷自江聲

敢因謀祿干知己直爲驅愁作壯游

名士晚成關氣數英雄退步卽神仙

俠士未逢求寶劍傾城難遇種名花

半生卷裏名山句一夜燈前四海心

異鄉花柳都無色故國蘼蕪亦有情

臨行已覺無他語別去偏多不盡心

寄家書

每逢歸客難言別纔近中年送春

愁多似髮來天外事遠如雲到枕邊

乾坤有我愁難遣仙佛無家願易成

眼前奇士誰爭命事後庸流論人

道大不嫌為帝祖情多猶記送先師

諫老子祠

地有文詞開戰國天生芳草為離騷

楚南懷古

萬種悲懷成此序千秋驚歎只書名

蘭亭

千秋姊妹傾城福一代君臣快壻才

咏二喬

男兒三十休言困謝傅當年未出山

謝太傅墓

別去六年應念我南來千里為尋君

喜晤石甫

四海論才偏我獨一生知己更誰先

哭姬傳師

霄漢神交各十年君臨京洛我游燕豈知

一夕論文地仍是三春故國天

酬作昂付  
講見贈

相逢且盡今宵話別後書來總不如